

საქართველოს საპატრიარქოს წმინდა ანდრია პირველწოდებულის სახელობის
ქართული უნივერსიტეტი

ვასილ მოსიაშვილი

თურქ-სელჩუკთა სულთნის ალფ-არსლანის ლაშქრობები
საქართველოში

*სამეცნიერო ხელმძღვანელი: როინ მეტრეველი, ისტორიის
მეცნიერებათა დოქტორი, სრული პროფესორი, აკადემიკოსი*

თბილისი

2012

სარჩევი

1.	ანოტაცია-----	3
2.	შესავალი-----	8
3.	I თავი წყაროები-----	11
4.	II თავი ისტორიოგრაფია-----	33
5.	III თავი თურქ-სელჩუკთა სახელმწიფოს ჩამოყალიბება-----	59
6.	IV თავი თურქ-სელჩუკები და საქართველო ალფ-არსლანამდე-----	70
7.	V თავი პოლიტიკური მდგომარეობა საქართველოში ალფ-არსლანის ლაშქრობების წინ (1057-1064 წწ)-----	92
8.	VI თავი ალფ-არსლანის პირველი ლაშქრობა საქართველოში-----	100
9.	VII თავი ალფ-არსლანის მეორე ლაშქრობა საქართველოში-----	141
10.	VIII თავი ალფ-არსლანის საქართველოში ლაშქრობების შედეგები-----	171
11.	დასკვნები-----	180
12.	გამოყენებული ლიტერატურა-----	188

ანოტაცია

სადისერტაციო ნაშრომი „თურქ-სელჩუკთა სულთნის ალფ-არსლანის ლაშქრობები საქართველოში“ შედგება შესავლის, რვა თავისა და დასკვნებისაგან.

შესავალში მოკლედ არის გადმოცემული ნაშრომის მიზანი და აქტუალობა, სელჩუკთა საქართველოსთან ურთიერთობის ხასიათი ალფ-არსლანამდე, საქართველოს სახელმწიფოს მდგომარეობა ალფ-არსლანის ლაშქრობების წინ, ალფ-არსლანის საქართველოში ლაშქრობების მიზეზები და შედეგები.

პირველ თავში, წყაროები“, მიმოხილულია ის ქართული და უცხოური (სომხური, არაბული, სირიული, ოსმალური...) წყაროები, რომლებსაც ვიყენებდით სადისერტაციო თემის კვლევისას. ქართულ საისტორიო წყაროებს („მატიანე ქართლისა“, „ცხოვრება მეფეთ-მეფისა დავითისი“, „გიორგი მთაწმინდელის ცხოვრება“ „თრეხვის წარწერა“, „მირაშხანის წარწერა“) ხშირ შემთხვევაში უპირატესობას ვანიჭებდით, ვინაიდან ქართველი ავტორები საკვლევი პერიოდის თანამედროვეები არიან. ისინი აღმოსავლელ ავტორებთან შედარებით, ისტორიულ ამბებს უფრო ნათლად და გასაგებად გადმოგვცემენ. ხშირად მოვლენას ეპოქის შესაფერის კვალიფიკაციასაც აძლევენ.

მეორე თავში, „ისტორიოგრაფია“, განვიხილეთ იმ ქართველ (ვ. ბატონიშვილი, დ. ბაქრაძე, თ. ჟორდანიას, რ. კიკნაძე ნ. შენგელია, რ. მეტრეველი, ზ. პაპასქირი...) და საზღვარგარეთელ (რ. ჰუსეინოვი, ა. სევიმი ა. ქოიმენი...) ავტორთა შრომები, რომელთაც ვიყენებდით ძირითადად კვლევისას. ნაშრომში სხვა ავტორების შრომებიც არის გამოყენებული, მაგრამ ყველას შეტანა ამ თავში ვერ მოხერხდა. უნდა აღინიშნოს, რომ სელჩუკთა ისტორია და მათთან დაკავშირებული მოვლენები ქართულ და საზღვარგარეთულ ისტორიოგრაფიაში კარგადაა შესწავლილი, თუმცა ჯერ კიდევ ბევრი საკითხია გამოსაკვლევ-გასანალიზებელი.

მესამე თავში, „თურქ-სელჩუკთა სახელმწიფოს ჩამოყალიბება“, განხილულია თუ ვინ იყვნენ თურქ-სელჩუკები, სად ბინადრობდნენ და რა საქმიანობას ეწეოდნენ ისინი. საიდან იწყება მათი სახელმწიფოს ისტორია. ვინ იყვნენ დუკაკი და მისი შვილი სელჩუკი, რატომ გაწყვიტა თურქთა წინამძღოლთან კავშირი სელჩუკმა, რომელმაც მიიღო ისლამი, თავის გარშემო გააერთიანა ოღუზი ტომები და საფუძველი ჩაუყარა სელჩუკთა სახელმწიფოს. შემდეგ დინასტიის სახელწოდება-სელჩუკები-გავრცელდა

მთლიანად მის მიერ გაერთიანებულ ტომებზე. შემდეგ ამ თავში გადმოცემულია, თუ როგორ დაიდრნენ თურქ-სელჩუკები სელჩუკის შვილიშვილების თოდრულ-ბეგისა და ჩადრი-ბეგის მეთაურობით XI საუკუნიდან ირანისა და ახლო აღმოსავლეთის მიმართულებით, როგორ ჩაეყარა საფუძველი დიდ სელჩუკთა სახელმწიფოს და სხვ.

მეოთხე თავში, „თურქ-სელჩუკები და საქართველო ალფ-არსლანამდე“, განხილულია თუ როდიდან იწყება სელჩუკთა პირველი შემოსევები ამიერკავკასიაში, რა გავლენას ახდენდნენ სელჩუკთა პირველი ლაშქრობები სომხეთსა და აზერბაიჯანში საქართველოს პოლიტიკურ მდგომარეობაზე. რა ღონისძიებებს ატარებდა საქართველოს სამეფო კარი მათი საქართველოში ლაშქრობებისაგან თავიდან აცილების მიზნით, რა დროიდან იწყება მათი საქართველოში ლაშქრობები და როგორ ხასიათს ატარებს ეს ლაშქრობები XI საუკუნის 60-იან წლებამდე. ამ თავში ქრონოლოგიური თანამიმდევრობითაა განხილული სელჩუკებისა და საქართველოს ურთიერთობები ალფ-არსლანის ლაშქრობებამდე.

მეხუთე თავში, „პოლიტიკური მდგომარეობა საქართველოში ალფ-არსლანის ლაშქრობების წინ“, გაანალიზებულია თუ რატომ შეცვალა ბიზანტიის იმპერიამ პოლიტიკა საქართველოს სამეფოსთან, რა გარემოებამ შეუწყო ხელი ბაგრატ IV-ის „საპატიო ტყვეობიდან“ გათავისუფლებას; როგორ დაძლია საქართველოს მეფემ აბაზასძეთა და ბაღვაშთა წინააღმდეგობა; როგორ იბრძოდა იგი თბილისის შემოსაერთებლად; გიორგი მთაწმინდელის საქართველოში ჩამოსვლა და მისი საეკლესიო რეფორმა. ამ თავში ნაჩვენებია თუ რამდენად ძლიერი იყო პოლიტიკურად საქართველო ალფ-არსლანის ლაშქრობების წინ.

მექვესე თავში, „ალფ-არსლანის პირველი ლაშქრობა საქართველოში“, განხილულია თუ როდის და როგორ მოვიდა ალფ-არსლანი (1063-1072) სელჩუკთა სახელმწიფოს სათავეში, როგორ ხასიათდება პიროვნულად ალფ-არსლანი საისტორიო წყაროების მიხედვით, რა იყო მისი საქართველოში პირველი ლაშქრობის ძირითადი მიზეზი და როგორ ხასიათს ატარებდა ეს ლაშქრობა, ამ ლაშქრობებთან დაკავშირებული მარშრუტები და თარიღები, ახალქალაქის გმირული დაცვა და მისი აოხრება. ბაგრატ IV-ის აქტიურობა ეროვნული დამოუკიდებლობის შენარჩუნების მიზნით. სხვა (ახალი) კუთხითაა განხილული „მატიანე ქართლისაჲს“ ცნობები ამ ლაშქრობასთან დაკავშირებულ თარიღებთან მიმართებაში. სხვადასხვა წყაროების მონაცემთა საფუძველზე განხილულია ალფ-არსლანისა და საქართველოს მეფის ურთიერთობა

ახალქალაქის აოხრების შემდეგ, ბაგრატ IV-ის დისწულისა და ალფ-არსლანის ქორწინების საკითხი, ბაგრატ მეფის აქტიურობა და აქტიურობის მიზეზი ამ საკითხთან დაკავშირებით. ალფ-არსლანის საქართველოდან ანისის მიმართულებით გალაშქრების მიზეზები, ანისის აღება, ალფ-არსლანის საქართველოში პირველი ლაშქრობების შედეგები. საქართველოს მეფის ბაგრატ IV-ის მოქმედება ალფ-არსლანის საქართველოდან წასვლის შემდეგ.

მეშვიდე თავში, „ალფ-არსლანის მეორე ლაშქრობა საქართველოში“, გადმოცემულია ალფ-არსლანის ანატოლიასა და ამიერკავკასიაში პირველი ლაშქრობიდან ისპაანში დაბრუნების მიზეზები, მისი მოქმედება ტახტის განმტკიცების მიზნით, ბაგრატ IV-ის პოლიტიკა ალფ-არსლანის მეორე ლაშქრობის წინ. ალფ-არსლანის საქართველოში მეორე ლაშქრობის მიზეზები, მარშრუტები და მსვლელობა. ამ ლაშქრობასთან დაკავშირებული თარიღები, ქართველი ხალხის ბრძოლა დამპყრობლების წინააღმდეგ. ალფ-არსლანის საქართველოდან წასვლა და ამ წასვლის მიზეზები, მისი მეორე ლაშქრობით გამოწვეული შედეგები, ბაგრატ IV-ის აქტიური მოქმედება ალფ-არსლანის საქართველოდან წასვლის შემდეგ (ფადლონის დატყვევება, თბილისის საკითხის მოგვარება, ქართველებისა და ოსების ერთობლივი ლაშქრობა განძაში და სხვ.). ალფ-არსლანისა და საქართველოს მეფის დიპლომატიური ურთიერთობა. საქართველოს პოლიტიკური მდგომარეობა ალფ-არსლანის ლაშქრობების შემდეგ.

მერვე თავში „შედეგები“ გადმოცემულია ალფ-არსლანის ლაშქრობებით გამოწვეული მძიმე პოლიტიკურ-ეკონომიკური შედეგები, აგრეთვე ის, თუ როგორ მოახერხა საქართველომ, დიდი ზარალის მიუხედავად, ეროვნული დამოუკიდებლობის შენარჩუნება.

Annotation

The dissertation “Alf-Arslan’s , Sultan of Turk-Selchuks, Campaigns in Georgia “ consists of the introduction, eight chapters and conclusions.

The aim and actuality of the work, the character of Selchuks’ relation with Georgia till Alf-Arslan, the condition of Georgian State before Alf-Arslan’s campaign, the reasons and results of Alf-Arslan’s campaign in Georgia is given briefly in the introduction.

Georgian and foreign (Armenian, Arabic, Syrian, Ottoman ...) sources which we used in the research of the dissertation are discussed in the first chapter –“*Sources*”. In many cases we gave superiority to the Georgian sources (“Chronicles of Kartli”, “A Life of Mefed-Mefisa”, “A Life of” Giorgi Mtatsmindeli”, “Trekhvi Inscription”, “Mirashkhani Inscription”) because Georgian authors are contemporary of the research period. They describe historical events more clearly and understandably than Oriental authors. Very often they give corresponding qualification to the epoch of the event.

In the second chapter: “Historiography” we discussed the works of those Georgian (V. Batonishvili, D. Bakradze, T. Zhordania, R. Kiknadze, N. Shengelia, R. Metreveli, Z. Papaskiri...) and foreign (R. Huseinov, A. Sevimi, A. Coiman) authors that we mainly used during the research. We used the works of other authors too but couldn’t manage to bring all of them in this chapter. It should be mentioned that the history of Selchuks and the events connected with them are studied well in the Georgian and foreign historiography., though a lot of issues are to be researched and analyzed.

Who Turk-Selchuks were, where they lived and what they did, where its history begins, who Dukak and his son-Selchuk were, why Selchuk broke the connection with the leader of Turks, who became Muslim, who united the Oghuzi tribes around him and laid the foundation to the State of Selchuks (later the Selchuks , name of dynasty was spread on all the tribes united by him).are the questions that are discussed in the third chapter –“*The Establishment of Turk-Selchuks State* “. The chapter also discusses how Turk-Selchuks headed by Selchuks grandchildren –Toghrul-begi and Chaghri-begi started towards Near East and Iran from XIc, how great Selchuk State was founded and so on.

In the fourth chapter “*Turk-Selchuks and Georgia till Alf-Arslan* “ is discussed the time when the Selchuks’ first campaigns began in Transcaucasia, how the campaigns in Armenia and Azerbaijan influenced on the political condition of Georgia, what the royal court of Georgia did to avoid their campaigns in Georgia, when the campaigns in Georgia began and what kind of

campaigns were they till 60s of XIc. The chapter also discusses the relations between the Selchuks and Georgia till the campaign of Alf-Arslan in the chronological succession.

The fifth chapter “*Political Condition in Georgia before Alf-Arslan Campaigns*” analyzes why the Byzantine Empire has changed its politics towards the Georgian kingdom, what helped to free Bagrat IV from “honoured captivity”, how Georgian king managed to overcome the Abazasdzeta and the Baghvashta resistance, how he fought to join Tbilisi; Giorgi Mtatsmindeli’s arrival in Georgia and his church reform. This chapter shows how strong Georgia was politically before Alf-Arslan’s campaigns.

The sixth chapter, “*Alf-Arslan’s First Campaign in Georgia*” is about how and when Alf-Arslan(1063-1072) came in the head of Selchuks’ State, how Alf-Arslan’s personality was established according to the historic sources, what was the main reason of his first campaign, what were the dates and routines connected with this campaign. It describes Akhalkalaki heroic defense and its destruction, Bagrat IV’s action to keep independence. It’s worth mentioning that the data of chronicles of Kartlisai is discussed from the new point in accordance to the dates of the campaign. On the base of different sources it discusses the relation of Alf-Arslan and Georgian king after Akhalkalaki destruction, it also discusses the marriage of Bagrat IV’s niece and Alf-Arslan, Bagrat IV’s action and its reason, the reasons of Alf-Arslan’s campaign to Anisi from Georgia, Anisi’s capture, the results of Alf-Arslan’s first campaign in Georgia, Bagrat IV’s actions after Alf-Arslan’s departure from Georgia.

The seventh chapter “*Alf-Arslan’s Second Campaign in Georgia*” discusses the reasons of Alf-Arslan’s return to Isfahan from his first campaign in Anatolia and Transcaucasia, his action to strengthen his throne, Bagrat IV’s politics before Alf-Arslan’s second campaign, the reasons, routines and action of Alf-Arslan’s second campaign in Georgia, dates connected to that campaign, the fight of Georgian people against invaders, Alf-Arslan’s departure from Georgia and its reason, the results of his second campaign, Bagrat IV’s action after Alf-Arslan’s departure from Georgia, (Padlon’s arrest, to settle the issue of Tbilisi, the Georgians and Osetians joint campaign to Gandza and so on) Alf-Arslan’s and Georgian king’s diplomatic relation, Georgia’s political condition after Alf-Arslan’s campaigns.

In the eight chapter “*Results*” is discussed the heavy political-economical results caused by Alf-Arslan’s campaigns, it also shows how Georgia could preserve national independence, in spite of big loss.

The dissertation ends with recommendations.

შესავალი

თურქ-სელჩუკთა სახელმწიფოს წარმოქმნამ მნიშვნელოვანი როლი ითამაშა როგორც მახლობელი და შუა აღმოსავლეთის, ასევე კავკასიის ხალხთა ისტორიაში. სელჩუკების კულტურული და ეკონომიკური ჩამორჩენილობის გამო, მათი დაპყრობითი ომები გამორჩეულად მძიმე ხასიათს ატარებდა.

XI-საუკუნის 60-იანი წლებისათვის ბაგრატ IV-მ მოახერხა ქვეყნის შიგნით მშვიდობის დამყარება, ყველაზე ძლიერი ფეოდალების აბაზასძეთა და ბაღვაშთა დამარცხება, აგრეთვე ძირითადი ქართული მიწების გაერთიანება. ამ დროს სამეფო ხელისუფლების ძლიერებაზე მიუთითებს ქართველი მემატიანე: „და მოირჭმუნა ბაგრატ და განძლიერდა უფროჲს ყოველთა მეფეთა მის ქუეყანისითა. და ამან წარიხუნა ყოველი ციხენი ჰერეთისა და კახეთისანი, თჳნიერ კუეტარისა და ნახჭევანისა“ („მატიანე ქართლისაჲ“ 2008: 289). ქვეყნის შემდგომი პოლიტიკური გაძლიერება შეაფერხა მძიმე საგარეო პოლიტიკურმა ვითარებამ, რაც განპირობებული იყო საქართველოში თურქ-სელჩუკთა სულთნის ალფ-არსლანის ლაშქრობებით.

XI საუკუნის 60-იან წლებამდე თურქ-სელჩუკებს საქართველოს მიმართ პოლიტიკური მიზნები არ გააჩნდათ, ამიერკავკასიაში მათი დაპყრობის ძირითადი ობიექტები სომხეთი და აზერბაიჯანი იყო. წყაროების მიხედვით, ამ დროს საქართველოში მათი მხოლოდ ცალკეული, მარბიელი ხასიათის ლაშქრობები შეინიშნება (ჩვენს ნაშრომში გარკვეული ადგილი აქვს დათმობილი ამ პერიოდის კვლევასაც). რადიკალურად შეიცვალა ვითარება ალფ-არსლანის სელჩუკთა სახელმწიფოს სათავეში მოსვლიდან (1063წ). მან თავის მთავარ ამოცანად დაისახა ამიერკავკასიის ერთადერთი დამოუკიდებელი სახელმწიფოს, საქართველოს, დახარკვა-დამორჩილება და ამ მიზნით უშუალოდ თვითონ აწარმოა საქართველოში ორჯერ ლაშქრობა (1064 წ; 1068 წ.). დიდი მცდელობის მიუხედავად, ალფ-არსლანმა ვერ შეასრულა ეს ამოცანა, მან საბოლოოდ ისე დატოვა საქართველო, რომ ბაგრატისაგან ხარკის გადახდასა და ქვეყნის დამორჩილებას ვერ ეღირსა. სხვა მხრივ, საქართველომ დიდი ზარალი განიცადა. ამ ლაშქრობების დროს სელჩუკებმა ააოხრეს სამხრეთ საქართველო, კახეთ-ჰერეთი, აღმოსავლეთ საქართველო და დასავლეთ საქართველოს ნაწილი (ვიდრე სვერის ციხემდე), ხელთ იგდეს უამრავი ტყვე და ნადავლი, შეაფერხეს

ქვეყნის პოლიტიკურ-ეკონომიკური განვითარება. რამდენიმე ხნით გადაიდო წარმატებით დაწყებული საქართველოს გაერთიანების საკითხი.

წინამდებარე ნაშრომის მიზანია, სხვადასხვაენოვანი წყაროებისა და ისტორიოგრაფიაში არსებული თვალსაზრისების გათვალისწინებით ალფ-არსლანის საქართველოში ლაშქრობების კვლევა და მის ფონზე ამ პერიოდის საქართველოს საგარეო პოლიტიკური ურთიერთობების დახასიათება, ამ ლაშქრობებთან დაკავშირებული მარშრუტებისა და ქრონოლოგიური საკითხების შესწავლა. საქართველოს მეფის ბაგრატ IV-ისა და ქართველი ხალხის დამოკიდებულების წარმოჩენა სელჩუკთა ლაშქრობებისა და მისი შედეგების მიმართ.

ეს ლაშქრობები საქართველოს ისტორიის ერთ-ერთი მნიშვნელოვანი ნაწილია, რომელიც ქართულ ისტორიოგრაფიაში საკმაოდ კარგად არის შესწავლილი, თუმცა მონოგრაფიულად დღემდე არ დამუშავებულა. ჩვენ შევეცდებით ამ ხარვეზის შევსებას, რისთვისაც გამოყენებული იქნება წყაროთა მთელი კომპლექსი როგორც ქართული, ასევე უცხოური (სომხური, არაბული, სირიული, ბიზანტიური...) და მდიდარი ისტორიოგრაფიული მასალა.

უცხო თავდამსხმელთა მოგერიება და მათ წინააღმდეგ ბრძოლა თითქმის მუდმივი თანმდევია საქართველოს ისტორიისა. ერთ-ერთი ასეთი საკითხია ალფ-არსლანის წინააღმდეგ ბრძოლაც, რომლის მაგალითზე შესაძლებელია განზოგადებული სურათის წარმოდგენა უცხოელთა აგრესიისა. ნაშრომი თავისი შინაარსითა და კვლევის შედეგებით ეხმიანება თანამედროვე საქართველოს პოლიტიკურ მდგომარეობასაც. მასში წინაა წამოწეული ის, თუ რაოდენ მნიშვნელოვანი იყო საქართველოს მეფისთვის სახელმწიფოებრიობის შენარჩუნება. სწორედ აქეთკენ იყო მიმართული მისი ენერგია და დიპლომატიური უნარი. ჩვენს ხელთ არსებული ისტორიული წყაროებით, ალფ-არსლანის დაპყრობითი ომების ისტორიაში ბაგრატ IV იყო ერთ-ერთი იშვიათი გამონაკლისთაგანი, რომელიც სელჩუკთა მრისხანე სულთანმა ვერც ნებით და ვერც ძალით ვერ დაიმორჩილა და მასთან დიპლომატიური ურთიერთობის გზას დაადგა. ბაგრატ IV-ისა და ქართველი ხალხის თავდადებული ბრძოლის მაგალითით სელჩუკების წინააღმდეგ, შეიძლება, კარგად გავიაზროთ, თუ რაოდენ მნიშვნელოვანი იყო და არის ტერიტორიული მთლიანობისა და ეროვნული დამოუკიდებლობის დაცვა. ამდენად, ეს ის შემთხვევაა, როდესაც ისტორიული კვლევა და გამოცდილება გამოყენებული იქნება თანამედროვეობის სამსახურში.

ალფ-არსლანის ლაშქრობების მონოგრაფიული შესწავლა მნიშვნელოვანია არა მარტო საქართველოს ისტორიის, არამედ მისი მეზობელი ხალხის: სომხების, აზერბაიჯანელებისა და თურქების ისტორიის შესაბამისი მონაკვეთების შესწავლისთვისაც.

I თავი

წყაროები

თურქ-სელჩუკთა სახელმწიფოსთან დაკავშირებით საგულისხმო ცნობებია დაცული ქართულ, სომხურ, არაბულ, სირიულ და სხვა საისტორიო წყაროებში. იგივე წყაროები მოგვითხრობენ სელჩუკების საქართველოსთან ურთიერთობის, მათ შორის, ალფ-არსლანის საქართველოში ლაშქრობების შესახებ. ამ საკითხების შესასწავლად დიდი მნიშვნელობა აქვს ქართულ დოკუმენტურ და ნარიტულ წყაროებს. განსაკუთრებით უხვადაა ცნობები საისტორიო კრებულ „ქართლის ცხოვრებაში“ (ანონიმი ავტორის „მატიანე ქართლისაჲ“, დავით აღმაშენებლის ისტორიკოსის თხზულება- „ცხოვრება მეფეთ-მეფისა დავითისი“, უცნობი ავტორის „ისტორიანი და აზმანი შარავანდედთანი“, ბასილი ეზოსმოდვრის „ცხოვრება მეფეთ-მეფე თამარისი“ და სხვ.). ქართველი მემკვიდრეები მოკლედ, გასაგები ენით აღწერენ ეპოქის ვითარებას. შესანიშნავად გადმოგვცემენ, თუ როგორი მიუღებელი იყო ქართული საზოგადოებისათვის თურქ-სელჩუკთა გამეზობლება და მათი ჩამოსახლება. ისინი კარგად ამჩნევდნენ მათი მიზეზით, ინტენსიური სოფლის მეურნეობის, საქალაქო ცხოვრებისა და ვაჭრობა-ხელოსნობის შეფერხებას. ქართველი ისტორიკოსები ფაქტების განზოგადებისა და გაანალიზების უნარით გამოირჩევიან. ხშირად ამა თუ იმ მოვლენას ეპოქის შესაფერის კვალიფიკაციასაც აძლევენ.

შესასწავლი საკითხიდან გამომდინარე, ამჯერად ჩვენთვის მნიშვნელოვანია XI საუკუნის უცნობი ისტორიკოსის თხზულება „მატიანე ქართლისაჲ“ („მატიანე ქართლისაჲ“ 2008), რომელიც VIII საუკუნის ამბებით იწყება და თანამიმდევრობით გადმოგვცემს მოვლენების განვითარებას XI საუკუნის 70-იანი წლების დასაწყისამდე. „მატიანე ქართლისაჲს“ ავტორი ერთ-ერთი ერუდირებული და საქმისმცოდნე ქართველი ისტორიკოსია, რომლის მიერ გადმოცემული ამბები ამდიდრებს ჩვენს ცოდნას იმ დროის საქართველოს შესახებ (სილოგავა 1992: 6). აღნიშნული წყაროს ცნობების მნიშვნელობა, მათი სანდოობა კარგად არის შეფასებული და დასაბუთებული ქართულ ისტორიოგრაფიაში. ი. ჯავახიშვილი წერს: „ჩვენს ისტორიკოსს მრავალსიტყვაობა სძულს: მისი მოთხრობის ენა მარტივი

და ბუნებრივია და სიტყვის მოკლედ მოჭრა უყვარს. ამ მხრივ იგი მეტად თავდაჭერილი და მოკლედ მოუბარი მწერალია, ამის გამო მისი თხზულება ისეა ნაწერი, რომ თვითოეულს სიტყვას თავისი მნიშვნელობა აქვს და არც ერთის გამოტოვება არ შეიძლება. ამ მხრივ მას ქართულს საისტორიო მწერლობაში ტოლი არ ჰყავს... ჩვენი ისტორიკოსის თხზულება შინაარსიანია, აუარებელი ისტორიული ცნობებით აღსავსე, ამასთანავე ხშირად ისეთი ცნობებით, რომელიც არსად სხვაგან არ მოიპოვება. მაგრამ მისი თხზულების ღირსება უფრო იმის გამო ძლიერდება, რომ როცა მის მოთხრობილს ამბავს სხვა ქართველსა თუ უცხოქვეყნელ ისტორიკოსთა ცნობებს შევადარებთ ხოლმე, უმეტეს შემთხვევაში ჩვენი ავტორის სიმართლე მტკიცდება“ (ჯავახიშვილი 1977: 206-209).

„მატიანე ქართლისაჲს“ ავტორს აღწერილი აქვს ლიპარიტ ერისთავის ლაშქრობა დვინზე ბერძენთა დასახმარებლად, 1048 წლისთვის სელჩუკთა მხედართმთავრის იბრაჰიმ იინალის ლაშქრობა ბასიანის მხარეში, მათ წინააღმდეგ ბიზანტიელებისა და ქართველების ერთობლივი ბრძოლა, ლიპარიტის დატყვევება და გათავისუფლება, სელჩუკების მიერ განძაში შექმნილი ვითარება, ბაგრატ IV-ის მონაწილეობა სელჩუკების განძიდან განდევნაში და სხვ. იგი გადმოგვცემს ალფ-არსლანის სამხრეთ საქართველოში ლაშქრობას და ჩამოთვლის მის მიერ დარბეულ ადგილებს. აღწერს ქართველთა ბრძოლას ახალქალაქთან და მათ დამარცხებას, ახალქალაქის აოხრებას, ალფ-არსლანისა და ბაგრატ IV-ის ურთიერთობას. ქართველი მემატიანე გადმოგვცემს აგრეთვე საქართველოში ალფ-არსლანის მეორე შემოსევას რამდენიმე წლის შემდეგ, აღსართან კახეთის მეფის გამუსლიმებას, მის ურთიერთობას ალფ-არსლანთან. „მატიანე ქართლისაჲს“ მოგვითხრობს კახთა მეფის აღსართანის, სომეხთა მეფის კვირიკეს და თბილისის ამირას დახმარებით სელჩუკთა ლაშქრის მიერ მთელი ქართლის დაკავების ამბავს. მოთხრობილი აქვს იმის შესახებ, თუ როგორი მდიდარი იყო ქართლი ალფ-არსლანის შემოსევამდე და როგორ გაანადგურეს და ააოხრეს ქვეყანა სელჩუკებმა, სელჩუკთა მარბიელი ლაშქარი სვერის ციხემდე გადასულა. ქართველი მემატიანე მოკლედ მოგვითხრობს სელჩუკთა საქმიანობაზე. იგი კარგად ხედავს ალფ-არსლანის საქართველოში მეორე ლაშქრობის შემდეგ შექმნილ ვითარებას. მისი სიტყვით, სულთანი ძღვენის მირთმევითა და ტკბილი სიტყვით მეფეს ხარაჯას სთხოვდა, მაგრამ ბაგრატ IV ძღვენს უგზავნიდა მას, ხარაჯაზე კი უარს ამბობდა. თხზულებაში დეტალურადაა

აღწერილი ალფ-არსლანის გარდაცვალების ამბავი. ბაგრათი და ალფ-არსლანი დაახლოებით ერთდროულად გარდაიცვალნენ. მემატიანის ცნობით, მათ ერთმანთის სიკვდილი ვერ შეიტყვეს. საყურადღებოა, რომ ქართველი ავტორი კარგად ერკვევა სელჩუკ სულთანთა მიერ სხვა ქვეყნებში ჩატარებულ ღონისძიებებში: „ის შესანიშნავად ერკვევა თავისი დროის მახლობელი აღმოსავლეთის საერთაშორისო ვითარებაში და მოკლედ, მაგრამ საქმის ცოდნით გადმოგვცემს XI საუკუნის 40-70-იანი წლების დიდ-სელჩუკთა სახელმწიფოს ისტორიისათვის არაერთ საყურადღებო მოვლენას. მას, როგორც წყაროს, უდიდესი მნიშვნელობა ენიჭება საკუთრივ დიდ სელჩუკთა სახელმწიფოს პოლიტიკური ისტორიის რიგი საკითხების დასაზუსტებლად, ასევე საქართველოსა და ამიერკავკასიის ქვეყნებთან სელჩუკების ურთიერთობის ისტორიის გასარკვევად. მის მიერ მოცემული ცნობები უთუოდ დიდ ნდობასა და ყურადღებას იმსახურებს. მათი შეჯერება აღმოსავლურ წყაროებთან ბევრ საყურადღებო საკითხს ობიექტურად წარმოადგენს“ (შენგელია 2003: 55).

„მატიანე ქართლისაჲს“ ავტორის თხრობის სტილი მშვიდი და მიუდგომელია, თავის ემოციებს არსად არ გამოხატავს, მხოლოდ თურქ-სელჩუკთა ამბების გადმოცემის დროს იგრძნობა მისი აღელვება: სულთანმა „სიფცხლისაგან ზამთრისა ვერღარა მოილოდინა და წარვიდა ქართლით. და ჩამავალმან წარუღო ტფილისი და რუსთავი და მისცა ფადლონს, განძისა პატრონსა. არათუ მეფეთა ჩუენთა მტერობისათჳს ოდენ გამოსწყვდა ტფილისი და რუსთავი ამას სამეფოსა, არცა ამისთჳს ქმნა, თუმცა იგი ამირანი ორგულად დადგომილ იყვნეს კარსა მისსა ზედა, არამედ კეთილისა და მსახურებისა ნაცვლად ბოროტსა უყოფდიან ყოველსა კაცსა, რამეთუ მინდობილ იყვნეს იგინი ყოვლით კერძო მცბიერ“ („მატიანე ქართლისაჲს“ 2008: 292).

XI საუკუნეში საქართველოში თურქ-სელჩუკთა შემოსევებზე მოგვითხრობს ვახუშტი ბატონიშვილი (ვახუშტი ბატონიშვილი 1973), რომელიც ძირითადად პოლიტიკური ისტორიით შემოიფარგლება. იგი „მატიანე ქართლისაჲს“ და დავითის ისტორიკოსის თხზულებებს ეყრდნობა, რაც კიდევ უფრო სანდოს ხდის ქართველი მემატიანეების ცნობებს.

თურქ-სელჩუკებისა და მათი საქართველოსთან ურთიერთობის შესახებ მნიშვნელოვანი ცნობებია დაცული XI საუკუნის ქართულ ჰაგიოგრაფიულ

თხზულებაში „გიორგი მთაწმინდელის ცხოვრება“ (გიორგი მცირე 1967), მისი სრული სათაურია „ცხოვრება და მოქალაქეობა წმიდისა და ნეტარისა მამისა ჩუენისა გიორგი მთაწმინდელისა“. საერთოდ აგიოგრაფიულ ძეგლებს დიდი ისტორიული მნიშვნელობა აქვთ, ვინაიდან მათ ახასიათებთ ისტორიული მოვლენების ობიექტურად გადმოცემა. მასში მოქმედი პერსონაჟები კი ისტორიული პირები არიან. ი. ჯავახიშვილი „გიორგი მთაწმინდელის ცხოვრებას“ ძვირფას, შინაარსიან და სრულიად სანდო საისტორიო წყაროდ მიიჩნევდა (ჯავახიშვილი 1977: 157). გიორგი მთაწმინდელის ცხოვრებას აღწერს მისი უახლოესი თანამოაზრე და საყვარელი მოწაფე გიორგი მცირე (ხუცესმონაზონი). იგი 1060 წელს მოძღვარს საქართველოში გამოჰყვოლია, მასთან ერთად გადაუტანია გამძაფრებული პოლიტიკური ვითარების შედეგად შექმნილი სახიფათო მგზავრობა, მოუღწევია საქართველომდე და 1065 წელს გიორგი ათონელს გაჰყვოლია უკან (აფციაური 1980: 15).

გიორგი მცირის ცნობით, გაძნელებული მგზავრობის მიზეზი სელჩუკების მიერ თითქმის მთელი მცირე აზიის დაპყრობა და საქართველოსკენ მომავალი სახმელეთო გზების დაკეტვა ყოფილა. იმ მძიმე პოლიტიკური და სოციალ-ეკონომიკური მდგომარეობის ერთ-ერთი მიზეზი, რომელსაც იგი აღწერს საქართველოში მოსვლისას, ვფიქრობთ, სელჩუკთა მარბიელი ლაშქრობები უნდა ყოფილიყო. თუმცა გიორგი მცირე ამ მიზეზს არ ასახელებს.

„გიორგი მთაწმინდელის ცხოვრებაში“ აღწერილია ალფ-არსლანის მიერ ახალქალაქის აოხრება და ის მძიმე ვითარება, რაც მის ლაშქრობას მოჰყვა სამხრეთ საქართველოში. ავტორის სიტყვები, „მოიწია რისხვა რომელსა ყველანი მეცნიერ ხართ“, გვაფიქრებინებს, რომ სელჩუკთა სისასტიკიდან გამომდინარე, მას ეზარება ამ ფაქტების დაწვრილებით აღწერა. ხუცესმონაზონი აღნიშნავს, რომ ახალქალაქის აოხრებას თვით გაუტეხელი ბაგრატ IV-ც კი სასოწარკვეთაში ჩაუგდია.

ქართული დოკუმენტური წყაროებიდან აღსანიშნავია 1029 წლით დათარიღებული ცნობა ბაგრატ IV-ის სულთანზე თავდასხმასთან დაკავშირებით: „აქა ბაგრატ კურაპალატი სულტანსა დაესხა“ (ქორდანია 1892: 169). ეს დოკუმენტი ქართულ საისტორიო წყაროთა შორის, ყველაზე ადრინდელია თურქული ტომებისა და ქართველთა ურთიერთობების შესახებ. წყაროს მიხედვით, ამ პერიოდში ბაგრატ

IV აქტიურ მონაწილეობას იღებს თურქ-სელჩუკთა წინააღმდეგ წარმოებულ ბრძოლებში (სავარაუდებელია სომხეთ-აზერბაიჯანის ტერიტორიაზე).

ალფ-არსლანის საქართველოში ლაშქრობას ეხება ქარელის რაიონის სოფელ თრეხვის გამოქვაბულში აღმოჩენილი თარიღიანი (1066 წ.) ქვაჯვარის წარწერა (გაფრინდაშვილი 1961), რომელიც ალფ-არსლანის ლაშქრობის დროს ქართველი ხალხის თავდაცვით საქმიანობაზე მოგვითხრობს და გადმოგვცემს საქართველოს პოლიტიკური და რელიგიური ცხოვრების ცალკეულ დეტალებს. წარწერიდან აშკარად იგრძნობა ის რთული ვითარება, რაც სელჩუკთა შემოსევამ გამოიწვია. რუისის ეპისკოპოსი ლეონტი მროველი იძულებულია თავად ჩაუდგეს სათავეში უაღრესად მძიმე საამშენებლო საქმეს. იმავე პერიოდს ეხება მეორე ეპიგრაფიკული ძეგლი, რომელიც სამაცნიერო ლიტერატურაში „მირაშხანის წარწერის“ სახელწოდებითაა ცნობილი (სილოგავა 2000: 231). წარწერაში მოთხრობილია 1064 წლის ზაფხულში თურქ-სელჩუკთა შემოსევა და ახალქალაქის აოხრება, ფარსმან თმოგველის მეფისადმი ერთგულება და მისი სიკვდილის ამბავი. დასახელებულია ტოპონიმები: ხორასანი, ჯავახეთი, მირაშხანი, მესხეთი, პირთა სახელები: გიორგა, ფარსმანი, გოჰარი.

თრეხვისა და მირაშხანის წარწერების ავტორები უშუალო მონაწილეები არიან იმ მძიმე პოლიტიკურ-ეკონომიკური მდგომარეობისა, რაც გამოიწვია ალფ-არსლანის საქართველოში ლაშქრობამ. ამიტომ ეს ძეგლები უძველესი და სანდო პირველწყაროებია საქართველოს ისტორიის შესაბამისი პერიოდის შესასწავლად.

არლფ-არსლანის საქართველოში ლაშქრობების შესასწავლად უცხოურ წყაროებს შორის განსაკუთრებული მნიშვნელობა აქვს სომხურ საისტორიო წყაროებს. მათში უხვადაა ცნობები სელჩუკების პირველი ლაშქრობებისა და მათი ბატონობის შესახებ ამიერკავკასიის ქვეყნებში. სომხური ისტორიული წყაროების მიმართ ინტერესს ზრდის ის ფაქტიც, რომ „მოყოლებული X საუკუნის დასასრულიდან, საქართველოს სახელმწიფოს სამეფო სამთავროებად დაშლამდე, ქართველი მეფეები იბრძვიან სომხეთიდან უცხოელ დამპყრობთა განსადევნად, სომხური მიწა-წყალი სხვადასხვა დროს განსხვავებული ოდენობით საქართველოს სამეფოს შემადგენელი ნაწილი ხდება; ამასთანავე საკუთრივ საქართველოში მრავლად მოიღატაკეს და მკვიდრდება უცხოელთა თარეშით განაწამები, მშობლიური ქვეყნიდან აყრილი სომხური მოსახლეობა და ყოველივე ეს, ბუნებრივია, ზრდის ისტორიული

სომხეთის ფარგლებში, ან მის გარეთ მცხოვრებ სომეხ ისტორიკოსთა თუ მოღვაწეთა ინტერესს საქართველოს მიმართ“ (აბდალაძე 1979: 32). სომხური წყაროების ცნობით, სელჩუკები, სწრაფმავალ ცხენებზე ისხდნენ და მათი გარეგნული სახე, გრძელი თმები და მოკაზმულობა აშფოთებდა ვასპურაკანის მოსახლობას; ისინი ცხენდაცხენ იბრძოდნენ და გრძელი შუბებით და ისრებით დიდ ზიანს აყენებდნენ ადგილობრივ მოსახლეობას (შენგელია 1968: 167).

XI საუკუნის სომეხი ისტორიკოსის არისტაკეს ლასტივერტეცის „ისტორიის“ მთავარი თემა თურქ-სელჩუკთა ლაშქრობებია (არისტაკეს ლასტივერტეცი 1974). მისი თხზულება იწყება XI საუკუნის ამბებით და გრძელდება 1071 წლამდე. ლასტივერტეცი გადმოცემული ამბების თანამედროვე და ხშირად თვითმხილველია, რაც მის ცნობებს განსაკუთრებით საინტერესოს ხდის. მან თავის თხზულებაში საკმაოდ დაწვრილებითი ცნობები შემოინახა არა მარტო სომხეთის, არამედ მისი მეზობელი ქვეყნების შესახებაც. მიუხედავად სასულიერო მწერლობისა და საეკლესიო დოგმების დიდი გავლენისა, არისტაკეს „ისტორია“ მრავალ ძვირფას ცნობას გვაწვდის სელჩუკთა ლაშქრობების, მათ მიერ ჩადენილი საშინელებებისა და სხვა საკითხების შესახებ. აღსანიშნავია ისიც, რომ „წინამორბედი სომეხი ისტორიკოსებისაგან განსხვავებით მან თავისი თხზულება დაწერა არა ვინმეს (მეფის, კათალიკოსის, ან სხვა მოღვაწის) თხოვნით, არამედ პირადი ინიციატივით, საკუთარი სურვილით მკითხველებისთვის გაეზიარებინა თავისი განცდები (ცაგარეიშვილი 1974: 8). არისტაკეს „ისტორია“ ფაქტობრივი მასალის სიუხვით გამოირჩევა. იგი დაწვრილებით აღწერს 1054 წელს თოდრულ-ბეგის და 1064 წელს ალფ-არსლანის ლაშქრობებს. მათი გაცნობით გარკვეული შთაბეჭდილება გვექმნება ამ ლაშქრობების მარშრუტების, მათი ბრძოლის მიზეზებისა და მეთოდების შესახებ. „ისტორიის“ ბოლო თავში ლასტივერტეცი ასახელებს სულთან ალფ-არსლანის სიკვდილის ფაქტს, რასაც 1072 წელს ჰქონდა ადგილი.

შესასწავლ საკითხთან დაკავშირებით საინტერესო ცნობებს შეიცავს მათეოს ურჰაეცის „ჟამთააღმწერლობა“, რომელიც შედგება სამი ნაწილისაგან, იწყება 952 წლიდან და მოდის 1136 წლამდე. იგი თავისი თხზულების დასაწერად იყენებდა როგორც უფროსი თაობის ნაამბობს, ასევე იმდროისთვის არსებულ წყაროებს, რომლებმაც ჩვენამდე ვერ მოაღწია. მათეოს ურჰაეცი განიხილავს სელჩუკთა პირველ ლაშქრობებს ამიერკავკასიაში, მათ ურფისაკენ გამოლაშქრებას 1035-1036

წლებში, ქართველთა და სომეხთა კოალიციურ ლაშქრობას სელჩუკთა წინააღმდეგ, 1045 წელს თურქ-სელჩუკთა დიდ ლაშქრობას დასავლეთის მიმართულებით, 1048 წელს ბერძენ-ქართველ-სომეხთა ერთობლივ ბრძოლას სელჩუკთა წინააღმდეგ, რომელთაც მეთაურობდნენ ბერძენი კეკავმენი, ვასაკის შვილი-გრიგოლი და რატის ძმა-ლიპარიტი. ურჰაეცი გადმოგვცემს აგრეთვე ამ ბრძოლაში ლიპარიტის ტყვედ ჩავარდნისა და გათავისუფლების ამბავს, 1054-1055 წლებში თოდრულ-ბეგის სომხეთსა და აზერბაიჯანში ლაშქრობას, მანასკერტის გმირულ დაცვას უფლისწულ ვასილის მეთაურობით, რომელიც მამით სომეხი იყო, დედით კი ქართველი. შემდეგ იგი ვრცლად მოგვითხრობს 1058-1059 წლებში სელჩუკების მიერ ქალაქების მალთის და სივასის აღებას. 1062-1063 წლებში ურჰაეცი გადმოგვცემს თოდრულ-ბეგის ბრძანებით სელჩუკთა ლაშქრობის შესახებ ანატოლიის მიმართულებით. „მისი თქმით, სელჩუკები უდიდესი ლაშქრით ბაგინის ტერიტორიაზე შემოიჭრნენ და უამრავი ქრისტიანი აკუწეს ხმლით, მთელი მოსახლეობა დაატყვევეს და გაანადგურეს. აქედან უფრო წინ წავიდნენ და თილქუმისა და ერგანის რაიონში, სადაც მათ არ მოელოდნენ, მოვიდნენ. როდესაც მოსახლეობა მშვიდი იყო, უცბად წამოადგნენ თავს; ეს ტერიტორია ძალიან მჭიდროდ იყო დასახლებული და მდიდარი რაიონიც იყო; მათ სასტიკად ააოხრეს და გაანადგორეს აქაურობა. შემდეგ მათეოს ურჰაეცს აღწერილი აქვს სელჩუკთა სისასტიკე ადგილობრივი ქრისტიანი მოსახლეობის მიმართ, რომელმაც ეკლესიას შეაფარა თავი და ლოცვა დაიწყო. სელჩუკებმა ალყა შემოარტყეს ეკლესიას და ყველანი ერთიანად ამოწყვიტეს. თვით მოძღვარიც კი თავისი შვილებით იქვე დახოცეს“ (შენგელია 1968: 215). მათეოს ურჰაეცი ანატოლიასა და ამიერკავკასიაში შექმნილ მძიმე მდგომარეობაში ბრალს ბიზანტიის ხელისუფალთ დებს. იგი დაწვრილებით აღწერს ალფ-არსლანის ლაშქრობებს ამიერკავკასიაში, მის მიერ ახალქალაქის აოხრებას, აქედან უამრავი ოქრო-ვერცხლის გატანას და ტყვეების წაყვანას, საქართველოში შექმნილ მძიმე მდგომარეობას, ანისის გარემოცვას და მის აღებას, მანასკერტის ბრძოლას და სხვ. მას საინტერესო ცნობები მოეპოვება აგრეთვე XII საუკუნის 1-ლი მეოთხედის საქართველოს შესახებ.

მათეოს ურჰაეცის თანამედროვეს, ქალაქ ანისის მღვდელს სამუელ ანეცს თავის ქრონოლოგიაში ამბები გადმოცემული აქვს სამყაროს შექმნიდან ვიდრე 1164 წლამდე. იგი საგანგებოდ აღწერს ალფ-არსლანისა და მალიქ-შაჰის ლაშქრობებს

დასავლეთის მიმართულებით. ქრონოლოგიაში დაცული ცნობები მეტად საყურადღებოა სელჩუკთა ანატოლიაში გაბატონებისა და ქრისტიანულ სახელმწიფოებთან ურთიერთობის თვალსაზრისით (შენგელია 1968: 48).

XIII საუკუნის სომეხი ისტორიკოსის ვარდან დიდის თხზულებებიდან, განსაკუთრებით საინტერესოა „მსოფლიო ისტორია“ (www.vostlit.info, восточная литература, Авторы и источники на букву „В“, Вардан Великий, „Всеобщая история“; ვარდან არაველცი 2002), რომელიც იწყება ქვეყნის დასაბამიდან და გრძელდება 1267 წლამდე. სომხეთის გარდა აქ ცნობებია დაცული პალესტინის, ბიზანტიის, არაბეთის, საქართველოს, თურქ-სელჩუკების, მონღოლებისა და სხვათა შესახებ. ჩვენთვის განსაკუთრებით საინტერესოა ვარდანის ცნობები, თოდრულ-ბეგის, ალფ-არსლანისა და მალიქ-შაჰის საქმიანობასთან დაკავშირებით. ვარდანი მოგვითხრობს 1021 წელს თოდრულ-ბეგის ამიერკავკასიაში ლაშქრობაზე და ნახჭევანთან 5 000 მეგრძოლით ლიპარიტის მასთან შეხვედრაზე. მისი ცნობით, ამიერკავკასიაში პირველი ლაშქრობის დროს სომეხთა მხედართმთავარმა ბეჯნის ციხის მფლობელმა, რომელსაც 5 000-მდე მეგრძოლი ჰყავდა, ქრისტიანებს მოუწოდა ერთიანი ბრძოლისაკენ. ვასაკი ამ ბრძოლაში დამარცხდა და გაიქცა. იგი სერგევილის რაიონში დაბანაკდა. სელჩუკები მას დაეწივნენ და მოკლეს. ვარდანი გადმოგვცემს სელჩუკების მიერ ლიპარიტის დატყვევებას, მის გათავისუფლებას, ტყვეობიდან დაბრუნების შემდეგ ბიზანტიის ჯარის დახმარებით ბაგრატ IV-ის დატყვევებას და იმპერატორთან გაგზავნას (აღნიშნული ცნობა სინამდვილეს არ უნდა შეესაბამებოდეს. ლიპარიტმა აიძულა ბაგრატი, თავისი ნებით წასულიყო ბიზანტიაში). ვარდან დიდი მოკლედ გადმოგვცემს დიდი სულთნების თურქ-სელჩუკთა სახელმწიფოს სათავეში მოსვლის ამბებს, მათ მიერ ახალი ტერიტორიების დაპყრობას, სულთნების დადებით და უარყოფით თვისებებს, მათ დამოკიდებულებას დაპყრობილი ხალხებისადმი, ალფ-არსლანის მიერ ახალქალაქის, სამშვილდისა და ანისის დიდი სისასტიკით აოხრებას, ამ ბრძოლებთან დაკავშირებულ მოვლენებს და სხვ.

სომხური საისტორიო მწერლობის ერთ-ერთი გამორჩეული წარმომადგენელია კირაკოს განძაკეცი. (www.vostlit.info Восточная литература, Авторы и источники на букву „К“, Гандзакеци Киракос, История Армении). იგი 1241 წელს შეუდგა „სომხეთის ისტორიის“ წერას. „ისტორია“ იწყება გრიგოლ განმანათლებლის

მოღვაწეობის აღწერით და გრძელდება 1265 წლამდე.IV-XII საუკუნეების ამბების გადმოსაცემად იყენებდა წინა პერიოდის ისტორიკოსთა შრომებს, მათ შორის ისეთ მასალებს, რომლებმაც ჩვენამდე ვერ მოაღწია. ამ პერიოდის აღწერისას ეხება იგი ჩვენთვის მნიშვნელოვან საკითხებს. თურქ-სელჩუკებს კირაკოსი სამხრეთიდან მოსულ ცეცხლოვან ქარიშხლად მიიჩნევს და ადამიანის მჭამელ მხეცებს უწოდებს. შემდეგ მოგვითხრობს სელჩუკთა ამიერკავკასიაში ლაშქრობაზე ალფ-არსლანის მეთაურობით. თვითონ ალფ-არსლანს ახასიათებს, როგორც ტირანს და სისხლისმსმელს, მის სიკვდილს კი ღვთის სამართლიანობად მიიჩნევს: „აღსრულდა ბევრის დამთმენისა და სამართლიანი ღმერთის განაჩენი, ამაყი და დაუცხრომელი მხეცის ალფ-არსლანის მიმართ. როცა იგი გაბრაზებული, ცხელი გულით ემუქრებოდა მთელ სამყაროს, მათ ვინც ჯერ კიდევ მუშტში არ ჰყავდა დაჭერილი, თვითონ იქნა მოულოდნელად მახვილით მოკლული. გაქრა უნამუსო დედამიწიდან და ვერ ეღირსა უფლის დიდებას“. (www.vostlit.info Восточная литература, Авторы и источники на букву „К“, Гандзакеци Киракос, История Армении, Глава-1).

საინტერესოა, რომ კირაკოს განმარტებით, ისევე როგორც ბევრი სხვა სომეხი ისტორიკოსი (ვარდან დიდი, მათეოს ურჰაეცი...), ალფ-არსლანის მომდევნო სულთანს, მალიქ-შაჰს დადებითად ახასიათებს. სომეხი ისტორიკოსები მას უწოდებენ კეთილ, სამართლიან, ქრისტიანებისადმი (განსაკუთრებით სომხებისადმი) სიმპატიით განწყობილ მმართველს.

კირაკოს განმარტების თხზულების მეორე ნაწილი, რომელიც XIII საუკუნეს ეხება, მეტად მნიშვნელოვანია, სანდო პირველწყაროა სელჩუკთა საამიროების წინააღმდეგ საქართველოს სამეფოს ბრძოლის ისტორიის, ქართველ-სომეხთა ურთიერთობის, ამიერკავკასიაში მონღოლთა ლაშქრობებისა და სხვა საკითხების შესასწავლად.

XI საუკუნის მახლობელი აღმოსავლეთისა და ამიერკავკასიის ისტორიისათვის საყურადღებო მასალა მოეპოვება სომხური ისტორიოგრაფიის წარმომადგენელს სტეფანოს ორბელიანს, რომელიც XIII საუკუნის II ნახევარში მოღვაწეობდა. თავისი პერიოდის ისტორიკოსებისაგან განსხვავებით, მას ყველა მოვლენა ღვთის ნებად არ მიაჩნია და რეალური საფუძვლით ცდილობს მის ახსნას. საინტერესოდ მოგვითხრობს ორბელიანთა გვარის გენეოლოგიას, ლიპარიტის ბრძოლას სელჩუკთა წინააღმდეგ ბერძნებთან ერთად, ხაზს უსვამს მის ძლევამოსილებას, ლაშქრის

სიმრავლეს, მოგვითხრობს მისი ტრაგიკულად დაღუპვის შესახებ. (სტეფანოზ ორბელიანი 1978; სტეფანოზ სივნიეთის ეპისკოპოსი 1971).

XIII საუკუნის მდიდარი სომხური ისტორიოგრაფიიდან აღსანიშნავია აგრეთვე მხითარ აირივანეცის „ქრონოგრაფია“, სადაც წარმოდგენილია სელჩუკი სულთნების ქრონოლოგიური სიები. აგრეთვე სელჩუკებთან დაკავშირებული მოკლე, მაგრამ თავისი მნიშვნელობით, მეტად საყურადღებო ფაქტები. მხითარი მოკლედ მოგვითხრობს ბაგრატ IV-ის, ალფ-არსლანისა და მალიქ-შაჰის შესახებ (www.vostlit.info Восточная литература, Авторы и источники на букву „А“, Аириванеци Мхитар, История, Второй труд; მხითარ აირივანეცი 1990).

სელჩუკთა სახელმწიფოს წარმოშობის, განვითარების, მეზობელ ქვეყნებთან მათი ურთიერთობის შესახებ ვრცლად მოცვითხრობენ არაბული წყაროები. ამჯერად ჩვენი ინტერესის ობიექტია ამ წყაროთა ის ნაწილი, რომელიც ეხება სელჩუკთა და ამიერკავკასიის ქვეყნების ურთიერთობას XI საუკუნის 70-იან წლებამდე. აღნიშნული პერიოდის შესახებ ძვირფას ცნობებს გვაძლევს აბუ ლ-ჰასან ალი ალ-ქარიმ მუჰამმად იბნ მუჰამმად იბნ აბდ ალ-ქარიმ იბნ აბდალ-ვაჰიდ აშ-შაიბანი (იბნ ალ-ასირი), რომელიც მოღვაწეობდა 1160-1234 წლებში. იგი რამდენიმე კაპიტალური ნაშრომის ავტორია. მათგან ყველაზე მნიშვნელოვანია „დასრულებული ისტორია“. თხრობა იწყება სამყაროს გაჩენიდან და მოდის 1232 წლამდე. იბნ ალ-ასირი მკვლევარი ისტორიკოსია. ის ერთი წყაროს ცნობას უდარებს სხვა წყაროების შესაბამის ცნობებს, განსხვავების შემთხვევაში ცდილობს დაადგინოს ჭეშმარიტება, ხოლო, როცა ამას ვერ ახერხებს, მოაქვს განსხვავებული ადგილები წყაროს მითითებით (სილაგაძე: 1979: 43).

იბნ ალ-ასირის ცნობები ამიერკავკასიის შესახებ რუსულ ენაზე გამოაქვეყნა პ. ჟუზემ (Жузе 1940) ცნობების ნაწილი, რომელიც საქართველოს ეხება ქართულად თარგმნა ი. მაჭავარიანმა (მაჭავარიანი 1897: 1-16; 1898: 22-24). სელჩუკთა და მათი საქართველოსთან ურთიერთობის ისტორიის შესასწავლად მის ცნობებს ფართოდ იყენებს ნ. შენგელია (შენგელია 1968: 2003).

იბნ ალ-ასირის ცნობით, XI საუკუნის 30-იან წლებში აზერბაიჯანის ტერიტორიაზე ოღუზი ტომები მომძლავრდა. რომელთაც მეთაურობდა ბულა, გოქთაში, მანსური და დანა. ამავე პერიოდში ოღუზთა ერთ ტომს სომხეთი აუოხრებია. მისი ცნობის მიხედვით, 1037-1038 წლებში ბაგრატ IV-ს თბილისის აღებაში ხელი შეუშალა სელჩუკების ლაშქრობამ სომხეთსა და აზერბაიჯანში.

იბნ ალ-ასირი გადმოგვცემს ქართველ-ბერძენთა ერთობლივ ბრძოლას 50 000-იანი ლაშქრით სელჩუკთა წინააღმდეგ, ლიპარიტის ტყვედ ჩავარდნის ამბავს, ლიპარიტს თავისუფლების სანაცვლოდ იინალისათვის შეუთავაზებია 300 ათასი დინარი და 100 ათასის საფასურის საჩუქრები, მაგრამ იინალი არ დათანხმებია.

იბნ ალ-ასირის მიხედვით, 1054-1055 წლებში თოღრულ-ბეგის ამიერკავკასიაში ლაშქრობის დროს, აზერბაიჯანში მისთვის მორჩილება გამოუცხადებიათ და მის სახელზე ხუტბა წაუკითხავთ. ასევე მოქცეულა დიარბექრის გამგებელი ად-დოვლე იბნ მერვანი. იბნ ალ-ასირი მოგვითხრობს აგრეთვე ალფ-არსლანის ანატოლიასა და ამიერკავკასიაში ლაშქრობის სამზადისზე, მისი ცნობით, ალფ-არსლანი ნახჭევანში მოვიდა და საგანგებოდ მოემზადა საქართველოში ლაშქრობისათვის. სელჩუკებმა საქართველოში გამოლაშქრებამდე აიღეს ბიურაკინის (ანზერდის), სურმარის და მარიამ ნიშად წოდებული ციხეები. შემდეგ დაწვრილებით აღგვიწერს ახალქალაქის აღებას. აღნიშნავს, რომ მუსლიმებმა ახალქალაქიდან, უთვალავი ნადავლი წაიღეს. არაბი ავტორის ცნობით, სულთანმა ქართველთა მეფეს წერილით აცნობა, რომ მას ან ისლამი უნდა მიეღო, ან ჯიზია უნდა გადაეხადა, მეფე ჯიზიას გადახდაზე დათანხმდა. იბნ ალ-ასირი მნიშვნელოვან ცნობებს გვაძლევს აგრეთვე თურქ-სელჩუკების მიერ ანისისა და მანასკერტის აღებაზე, ალფ-არსლანისა და ბიზანტიის იმპერატორ დიოგენეს ურთიერთობებზე და სხვ.

სელჩუკთა სახელმწიფოს ისტორიის შესწავლისათვის, ასევე ალფ-არსლანის საქართველოში ლაშქრობების შესახებ საინტერესო ცნობებს გვაწვდის სადრ ად-დინ აბუ ლ-ჰასან იბნ ალი იბნ ნასირ ალ ჰუსეინი (სადრ ად-დინ ჰუსეინი), ხვარაზმშაჰ ალა-ად-დინ თექეშის მოხელე. მას პირობითად მიიჩნევენ ავტორად თხზულებისა „ახბარუ დ-დავლათი ს-სელჩუკიათი“ („სელჩუკთა სახელმწიფოს ისტორია“). (www.vostlit.info Восточная литература, Авторы и источники на букву „Х“, Ал-Хусайни Садр-Ад-Дин, Сообщения о сельджукском государстве). თხზულების წერისას ავტორი სარგებლობდა სხვადასხვა ქრონიკებით. მათგან დაზუსტებით ცნობილია მხოლოდ იმად ედ-დინ ალ-ქათიბ ალ-ისფაჰანის ნაშრომი. თავისი პერიოდის გადმოცემისას იგი სხვა წყაროებისთვის უცნობ ბევრ ისტორიულ მოვლენას აღწერს. „წერილობითი წყაროების გარდა თხზულების ავტორი ხშირად იყენებდა ზეპირ გადმოცემებს. წყაროდან ჩანს, რომ ის მის მიერ აღწერილი ამბების მომსწრე და თვითმხილველი არ არის. იგი თავის ნაშრომში იხსენებს ორ პიროვნებას: იმამ

მუშერეფ შირაზის და ემინ ედ-დინ მოჰამედ ალ-ზენჯანის, რომელთა მიერ გადმოცემული ამბები შეტანილი აქვს თავის თხზულებაში“ (შენგელია 1968: 17).

სადრ ად-დინ ჰუსეინის ნაშრომს დიდი მნიშვნელობა აქვს სელჩუკთა სახელმწიფოს წარმოშობის ისტორიისათვის. იგი გვამღევს ცნობებს სელჩუკის მამის დუკაკის შესახებ, რომელიც გულადი და გონებამახვილი კაცი ყოფილა. მას პირველს მიუღია ისლამი. შემდეგ მოგვითხრობს სელჩუკზე, მის მოღვაწეობასა და შთამომავლებზე, მათ განსაკუთრებულ გაძლიერებაზე თოდრულ-ბეგისა და ჩადრი-ბეგის დროს, 1035 წელს სელჩუკების მიერ ღაზნელების პირველ დამარცხებაზე, სელჩუკების მიერ ღაზნელთა დაპყრობილი ტერიტორიების დანაწილებაზე, თოდრულ-ბეგის საქმიანობაზე, ალფ-არსლანის სულთანად კურთხევაზე, მის მიერ ყუთულმიშის სასტიკად დამარცხებაზე, მის მართლმსაჯულებაზე, ალფ-არსლანის დასავლეთის და აღმოსავლეთის მიმართულებით ლაშქრობაზე, მის სიკვდილსა და მის მიერ დატოვებულ ანდერძზე და სხვ.

სადრ ად-დინ ჰუსეინის თხზულებაში ვრცლადაა გადმოცემული თურქ-სელჩუკების ქრისტიანულ ქვეყნებთან ურთიერთობა, ალფ-არსლანის პირველი და მეორე ლაშქრობა საქართველოში, კერძოდ მისი მომზადება საქართველოში გამოსალაშქრებლად, ახალქალაქის ციხის დახასიათება, ქართველთა მიერ ალფ-არსლანის მოტყუება, მის მიერ ახალქალაქის იერიშით აღება და გადაწვა, უამრავი სიმდიდრის ხელში ჩაგდება, ალფ-არსლანისა და ბაგრატ IV-ის ურთიერთობა, ახალქალაქის აოხრების შემდეგ მისი სომხეთისკენ გალაშქრება და ანისის აღება. წყაროს ცნობით, ალფ-არსლანს საგანგებო გადაწყვეტილება მიუღია საქართველოში მეორედ ლაშქრობის შესახებ. არაბი მემკვიდრეობით მოგვითხრობს სელჩუკთა საქართველოში გამოლაშქრების წინ ბაგრატ IV-ის მიერ ბარდავის დარბევას (1067-1068წ), ალფ-არსლანის კახეთში შემოსვლას, ამ კუთხის განადგურებას და სიმდიდრის ხელში ჩაგდებას, კახეთის მეფის აღსართანის გამუსლიმანებას, თურქ-სელჩუკების აღმოსავლეთ საქართველოში გადმოსვლას, თბილისის დაპყრობას და იქ მეჩეთის აშენებას, დასავლეთ საქართველოში გადასვლას, ჯვრის ციხის აღებას, ბაგრატ IV-ის ღონისძიებებს ქვეყნის გადასარჩენად, ალფ-არსლანის საქართველოდან წასვლას, და მის მიერ ანატოლიაში წარმოებულ ლაშქრობებს, მანასკერტთან ბრძოლას, ალფ-არსლანისა და რომან დიოგენის ურთიერთობას და სხვ.

ამრიგად, ამ წყაროს მნიშვნელობა დიდია როგორც საქართველოს XI-XII საუკუნეების ისტორიის მთელი რიგი საკითხების, ასევე სელჩუკთა ისტორიის შესასწავლად. მასში თანამიმდევრულადაა გადმოცემული ისტორია დიდ სელჩუკთა სახელმწიფოს ჩამოყალიბებიდან ერაცის სელჩუკთა სახელმწიფოს გადაშენებამდე.

სელჩუკთა პირველი მოძრაობის, მათი ხორასანში დამკვიდრების შესახებ უმნიშვნელოვანეს საისტორიო წყაროს წარმოადგენს XI საუკუნის I ნახევრის ისტორიკოსის აბულ-ფაზლ მოჰამედ ბ. ჰუსეინ ბეიჰაყის თხზულება „მასუდის ისტორია“. იგი იყო ღაზნელთა სულთნის მასუდის საკანცელარიო საქმეების გამგებელი, ამიტომ მის მიერ აღწერილი სელჩუკთა ურთიერთობები ღაზნელთა სულთანთან დიდი სიზუსტით გამოირჩევა. ბეიჰაყი აღწერილი მოვლენების თვითმხილველია. მისი ისტორიის წყარო ის დოკუმენტებია, რომელთაც სახელმწიფო საქმიანობის დროს თვითონვე ადგენდა. „ბეიჰაყის თხზულება წარმოადგენს ერთ-ერთ საუკეთესო წყაროს სელჩუკთა პირველი მოძრაობის ისტორიისათვის. მასში დაწვრილებით არის გადმოცემული სელჩუკი უფლისწულების ბრძოლები ღაზნევიანებთან, აღწერილია რიგი ბრძოლების ეპიზოდები, მოცემულია ცნობები დენდანეკანის ბრძოლის შესახებ და სხვა“ (შენგელია 1968: 20).

ალფ-არსლანის დროს სელჩუკთა დაპყრობითი ომების შესახებ მნიშვნელოვან წყაროს წარმოადგენს XIII საუკუნის არაბი ისტორიკოსის ქემალ უდ დინ იბნ ულ-ადამის თხზულება „ბუგიეთ უთ თალებ ფი თარიხი ჰალეზ“. იგი შეიცავს სელჩუკთა სახელმწიფოს წარმოშობის ისტორიასაც. ქემალ უდ-დინ იბნ ულ-ადამი, სხვადასხვა დროს მუდარისად, ელჩად და ვეზირად ყოფნისას, ჩვენამდე მოუღწეველი, ძალიან საინტერესო პირველწყაროებით სარგებლობდა. მას თხზულებაში არაერთგზის აქვს მოტანილი ცნობები „მალიქ-ნამედან“ (შენგელია 1968: 18).

დიდ სელჩუკთა სახელმწიფოს ისტორიის შესწავლისთვის უაღრესად მნიშვნელოვან წყაროს წარმოადგენს სელჩუკთა დიდვეზირის ნიზამ ალ-მულქის (1018-1092) თხზულება „სიასეთ-ნამე“ („პოლიტიკის წიგნი“) (www.vostlit.info, Восточная литература, Авторы и источники на букву „Н“, Низам-Ал Мульк, Книга о правлении). ნიზამ ალ-მულქმა მნიშვნელოვანი კვალი დატოვა სელჩუკთა სახელმწიფოს ისტორიაში, იგი ორი სულთნის ალფ-არსლანისა და მალიქ-შაჰის

ერთგული დიდგვარი იყო, რომელიც, ფაქტობრივად, განაგებდა ვრცელი იმპერიის საშინაო და საგარეო საკითხებს. ნიჟამ ალ-მულქი მონაწილეობდა მცირე აზიისა და კავკასიის, მათ შორის, საქართველოს წინააღმდეგ წარმოებულ ბრძოლებში. გამოირჩეოდა აღმშენებლობითი მოღვაწეობითაც: აარსებდა ობსერვატორიებს, ბიბლიოთეკებს, გაჰყავდა გზები, არხები, აშენებდა ხიდებს, აარსებდა ახალ ქალაქებს. ვ. ბარტოლდი აღნიშნავდა, რომ ნიჟამ ალ-მულქი იმდენად დიდი ფიგურა იყო, რომ იგი შეიძლება თავისი დროის პოლიტიკურ მედროშედ მივიჩნიოთ (შენგელია 1968: 128). ზემოაღნიშნული მიზეზების გამო მისი თხოულება განსაკუთრებულ ინტერესს იძენს.

ნიჟამ ალ-მულქს „სიათ-ნამეში“ გადმოცემული და განხილული აქვს ის საკითხები, რომელებიც სახელმწიფოს გაძლიერებისათვის უნდა განხორციელებულიყო. ამიტომ ბუნებრივია, რომ მალიქ-შაჰმა მოიწონა იგი და სახელმძღვანელოდ მიიღო სახელმწიფოს მართვა-გამგეობისათვის. ნიჟამ ალ-მულქის თხოულება ძვირფას ცნობებს გვამღევს დიდ სელჩუკთა სახელმწიფო წყობილების, სამხედრო ორგანიზაციის, მმართველობის სისტემის, საზოგადოებრივი ცხოვრების მდგომარეობისა და სხვა საკითხების შესახებ. ბარტოლდი შენიშნავდა, რომ „სიათ-ნამე“ წარმოადგენს მთავარ წყაროს აღმოსავლურ-მუსლიმანური სახელმწიფოების პოლიტიკური წყობილების შესასწავლად (Бартольд 1963: 71). ნიჟამ ალ-მულქის თხოულებაში ვხვდებით აგრეთვე ცნობებს დიდი სელჩუკი სულთნების პიროვნული ხასიათის შესახებ.

საინტერესო წყაროს წარმოადგენს ზაჰირ ედ-დინ ნიშაბურის თხოულება „სელჩუკ-ნამე“, იგი იყო სულთან მასუდის (1133-1152) და სულთან არსლანის (1161-1177) აღმზრდელი. ავტორი ამბების გადმოცემას იწყებს პრველი სელჩუკი სულთნებით და სულთან თოდრულ იბნ არსლანის სულთნობის პირველი წლებით ამთავრებს. ზაჰირ ედ-დინ ნიშაბურის თხოულება საუკეთესო წყაროა XI-XII საუკუნეების სახელმწიფოსა და მათი გავლენის ქვეშ მყოფი ქვეყნების ისტორიის მთელი რიგი საკითხების შესასწავლად. იგი საკმაოდ ვრცლად გადმოგვცემს XI საუკუნის დიდი სელჩუკი სულთნების საქმიანობას, მათ ურთიერთობას საქართველოსა და ამიერკავკასიის ქვეყნებთან (შენგელია 1968: 23).

XI-XI საუკუნეთა მახლობელ აღმოსავლეთში სელჩუკთა ბატონობის ისტორიის შესახებ საყურადღებო წყაროს წარმოადგენს XII საუკუნის მიწურულისა და XIII

საუკუნის დასაწყისის ირანელი ავტორის აბუ ბექრ ნეჯმ ედ-დინ მოჰამედ ბ. ალი ბ. სულეიმან ბ. მოჰამედ ბ. აჰმედ ბ. ალ-ჰოსან ბ. ჰიმმეთ არ რავენდის თხზულება „რაჰატ უს სუდურ ვე აიეთ უს სურურ“- (გულთა სიამე და სიხარულთა ნიშანი) (www.vostlit.info Восточная литература, Авторы и источники на букву „Р“, Ар-Равенди Абу-Бекр, Отдохновение Сердец). თხზულებაში აღწერილია თურქ-სელჩუკთა ისტორია მათი ისტორიის არენაზე გამოჩენიდან 1199 წლამდე. დიდ სელჩუკთა სახელმწიფოს ისტორიის გადმოსაცემად რავენდი იყენებდა ზაჰირ ედ-დინ ნიშაბურის „სელჩუკ-ნამეს“. იგი წყაროში გადმოცემული ზოგიერთი მოვლენის თვითმხილველია, რაც კიდევ უფრო ზრდის ინტერესს მისი ცნობების მიმართ.

რავენდი გვამღევს ცნობებს სელჩუკთა გენეალოგიაზე, მათ თავდაპირველ საცხოვრებელ ადგილზე და ამ ადგილიდან განსახლების მიზეზებზე, ლაზნევიანთა სახელმწიფოსთან ურთიერთობაზე, ჩაღრი-ბეგის მიერ ლაზნეველების დამარცხებაზე, სელჩუკების გამარჯვებაზე დენდანეკანთან ბრძოლაში 1040 წელს და მათ კიდევ უფრო გაძლიერებაზე, სელჩუკთა მეთაურების მიერ დაპყრობილი ტერიტორიების განაწილებაზე, თოდრულ-ბეგისა და ბაღდადის ხალიფის ურთიერთობაზე, სულთნების ალფ-არსლანისა და მალიქ-შაჰის შესახებ და სხვ.

განსაკუთრებით საინტერესო და ღირებულია რავენდის ცნობები ერაცის სელჩუკთა ორი ბოლო სულთნის არსლანისა და თოდრულის პერიოდის (1160-1199) შესახებ, რადგან სელჩუკთა ისტორიის ამ დროის შესახებ სხვა წყაროები თითქმის არ მოგვეპოვება.

რავენდის თხზულებას დიდი მნიშვნელობა აქვს ჩვენთვის საინტერესო პერიოდის შესასწავლად. ის დაწვრილებით გადმოგვცემს XI საუკუნის სელჩუკთა სახელმწიფოს ისტორიას, მის ურთიერთობას საქართველოსთან, თოდრულ-ბეგის ალფ-არსლანის და მალიქ-შაჰის ლაშქრობებს. წყაროში მოკლედ არის მოთხრობილი ამიერკავკასიის ქვეყნების ამბები.

სელჩუკთა სახელმწიფოს ისტორიასა და მათი საქართველოსთან ურთიერთობის შესახებ მოგვითხრობს მონღოლთა ხანის ირანელი ისტორიკოსი ჰამდალაჰ იბნ აბუ ბაქრ მუსთოუფი ყაზვინი (1280-1350) (ტაბატაბე 1979: 55; ჯავახიშვილი 1983: 153; შენგელია 1968: 28; ფუტურბე 1937: 17; www.vostlit.info, Восточная литература, Авторы и источники на букву „К“, Казвини Хамдаллах, „Успада сердец“). მას

ეკუთვნის გეოგრაფიული ხასიათის თხზულება „ნოზჰათ ალ-ყოლუბ“ („გულთა სიამე“) და საისტორიო ხასიათის „თარიხე გოზიდე“ („რჩეული ისტორია“).

„ნოზჰათ ალ-ყოლუბ“ შეიცავს ორიგინალურ და საინტერესო ცნობებს ირანისა და ამიერკავკასიის ისტორიული გეოგრაფიიდან. უზადაა ცნობები აგრეთვე ამ ქვეყნების სოციალ-ეკონომიკური ისტორიის შესასწავლად. თხზულებაში ცალკეა ცნობები გამოყოფილი საქართველოს შესახებ, რომელსაც ავტორი უწოდებს „საქართველოსა და აფხაზეთის აღწერას“.

განსაკუთრებით საინტერესოა ჰამდალაჰ ყაზვინის ისტორიული შინაარსის თხზულება „თარიხე გოზიდე“, რომელიც მოგვითხრობს ალფ-არსლანის საქართველოში გამოლაშქრებაზე, მის და ბაგრატ IV-ის ურთიერთობაზე, ბეშქენის ტყვედ ჩავარდნაზე, ალფ-არსლანის სომხეთისაკენ გალაშქრებაზე, ალფ-არსლანისა და სომხეთის მეფის შვილის ქორწინებაზე და სხვ.

დიდ სელჩუკთა სახელმწიფოს დაარსებისა და პირველი სელჩუკი სულთნების საქმიანობის შესახებ მნიშვნელოვანი წყაროა XV საუკუნის ირანელი ისტორიკოსის ქერიმ ედ-დინ მაჰმუდ აყსარაის თხზულება „სელჩუკთა სახელმწიფოების ისტორია“. თხზულება დიდი მცულობის ნაშრომია და ოთხი თავისაგან შედგება. ჩვენთვის საინტერესოა მეორე ნაწილი, სადაც მოთხრობილია სელჩუკთა სახელმწიფოს დაარსების, სელჩუკი სულთნების საქმიანობის, მანასკერტის ბრძოლისა და სელჩუკების მცირე აზიაში დამკვიდრების შესახებ.

ჩვენთვის საინტერესო საკითხებთან დაკავშირებით მნიშვნელოვანი წყაროა XIV საუკუნის ანონიმი ისტორიკოსის მიერ სპარსულ ენაზე შედგენილი თხზულება „ანატოლიის სელჩუკთა სახელმწიფოს ისტორია“ (ანონიმი ავტორი 2003). განსაკუთრებით მისი შესავალი ნაწილი, სადაც მოკლედაა მოთხრობილი სელჩუკების ისტორიის სარბიელზე გამოჩენის შესახებ, დიდი სელჩუკი სულთნებისა და მათი მემკვიდრეების საქმიანობა, მათი საქართველოსა და ამიერკავკასიის ქვეყნებთან ურთიერთობის ზოგიერთი საკითხი.

საყურადღებო ისტორიული წყაროა თურქების მიერ კონსტანტინეპოლის დაპყრობამდე შედგენილი, დიდი სელჩუკი სულთნების მოღვაწეობის ამსახველი ქრონოლოგიური ნუსხები. „ამ ნუსხებში შეტანილია ცნობები დიდი სელჩუკი სულთნების ალფ-არსლანისა და მალიქ-შაჰის მიერ საქართველოს დაპყრობის შესახებ. წყაროში ბევრი საინტერესო ცნობაა დაცული მცირე აზიის სელჩუკებისა

და შემდგომი პერიოდის შესახებ, ვიდრე მურად II-მდე. აქ გადმოცემულია ისტორიული ამბები, გამოჩენილ პირთა და სახელმწიფო მოღვაწეთა გენეალოგიური ნუსხები, რომელთაც დიდი მნიშვნელობა აქვს XI-XV საუკუნეების მახლობელი აღმოსავლეთის ისტორიის ცალკეული საკითხების დასაზუსტებლად. ამ კალენდრებში დაცულია ზოგიერთი ისეთი ცნობა, რომელიც სხვა წყაროებში არ გვხვდება“ (შენგელია 1968: 33).

სელჩუკთა სახელმწიფოს შესახებ მნიშვნელოვანია XV საუკუნის სპარსულენოვანი ისტორიკოსის მრხონდის ცნობები (www.vostlit.info, Восточная литература, Авторы и источники на букву „М“, Мирхонд, Сад чистоты). მისი თხზულება „როუზათ ას-საფა“ („სიწმინდის ბაღი“) მსოფლიო ისტორიის კლასის ნაწარმოებია და შედგება 7 ტომისაგან. თხზულება იწყება სამყაროს შექმნიდან და გრძელდება ავტორის დრომდე. მირხონდი „როუზათ ას-საფას“ წერისას იყენებდა ისეთ წყაროებს, რომელთა დიდმა ნაწილმა ჩვენამდე ვერ მოაღწია. მათ შორისაა „მალიქ ნამე“, სადაც დაცულია ცნობები სელჩუკთა სახელმწიფოს წარმოშობა-განვითარების შესახებ.

ოსმალთა ისტორიკოსთა შორის დიდ სელჩუკთა სახელმწიფოს შესახებ საინტერესო ცნობები აქვს შემონახული XVII საუკუნის ისტორიკოსს აჰმედ იზნ ლუთფულაჰს, რომელიც ისტორიოგრაფიაში ცნობილია მუნეჯიმ-ბაშის სახელით, რაც ნიშნავს „მთავარ ასტრონომს“ (შენგელია 1968: 33). მას ეკუთვნის არაბულ ენაზე შედგენილი თხზულება „ჯამი ად-დუვალ“ („დინასტიათა კრებული“).

მუნეჯიმ-ბაში ჩვენთვის საინტერესო პერიოდთან დაკავშირებით მოგვითხრობს 1048-1049 წლებში სელჩუკთა ლაშქრობაზე რუმის მიმართულებით, მათ მიერ 100 000 კაცის დატყვევებასა და უამრავი ნადავლის (10 000-მდე ურემი) ხელში ჩაგდებაზე, სულთან თოდრულ-ბეგის მიერ დატყვევებული ლიპარიტის უსასყიდლოდ გაშვებაზე, 1054-1055 წლებში სელჩუკების მიერ აზერბაიჯანის არანისა და შირვანის გამგებლების დამორჩილებაზე, რუმის ვილაიეთში ლაშქრობაზე (რუმის ვილაიეთში საქართველო უნდა იგულისხმებოდეს), ალფ-არსლანის ღონისძიებებზე საქართველოში გამოლაშქრების წინ, მარიამ-ნიშად წოდებული ციხის აღებაზე, ალფ-არსლანის საქართველოში გამოლაშქრებაზე, ახალქალაქის აოხრებაზე, ალფ-არსლანის საქართველოდან წასვლის შემდეგ

მნიშვნელოვანი რაოდენობის ლაშქრისა და გამგებლის დატოვებაზე, ანისის აოხრებაზე და სხვ.

ამდენად, მუნეჯიმ ბაშს მნიშვნელოვანი ცნობები მოეპოვება სელჩუკებისა და ქართველების ურთიერთობაზე, აგრეთვე მახლობელი აღმოსავლეთის პოლიტიკური ერთეულების საქართველოსთან დამოკიდებულებაზე. მუნეჯიმ ბაშის არაბული ტექსტი შეისწავლა და თარგმნა ვ. მირონსკიმ (Minorsk 1953).

თურქ-სელჩუკთა სახელმწიფოს წარმოქმნის, განვითარებისა და დაპყრობითი ომების ისტორიის შესწავლისათვის დიდი მნიშვნელობა ენიჭება შუა-საუკუნეების სირიულ წყაროებს. სირიული ისტორიოგრაფიის გამორჩეული წარმომადგენელია მიხეილ სირიელი (1126-1196) (www.vostlit.info, Восточная литература, Авторы и источники на букву „М“ Михаил Сириец). მშობლიურის გარდა იგი ფლობდა არაბულ და სომხურ ენებს. დიდი საისტორიო შრომისა და მაღალი ერუდიციის შედეგია მისი თხზულება „ქრონიკა“, რომელიც შეიცავს მნიშვნელოვან ცნობებს მახლობელი აღმოსავლეთისა და შუა აზიის ხალხთა ისტორიის შესახებ. მათ შორის უმნიშვნელოვანესია ცნობები თურქ-სელჩუკთა შესახებ, რომლებმაც დიდი როლი ითამაშეს მახლობელი აღმოსავლეთისა და კავკასიის ხალხთა ისტორიაში. მიხეილ სირიელის თხზულება გვაძლევს საშუალებას, გავარკვიოთ XI-XII საუკუნეების თურქ-სელჩუკთა სოციალ-ეკონომიკური და პოლიტიკური ისტორიის ცალკეული საკითხები. სულთნების თოდრულ-ბეგისა და ალფ-არსლანის გამეფების (სირიელი სულთნებს მეფეებად მოიხსენიებს) თარიღები და მათთან დაკავშირებული სხვა მოვლენები. ავტორს აღწერილი აქვს მანასკერტის ბრძოლა, აგრეთვე XI საუკუნის II ნახევარში მცირე აზიაში შექმნილი პოლიტიკური ვითარება.

მიხეილ სირიელის თხზულება ფასეულია იმიტაც, რომ იგი იყენებდა წინა პერიოდის სირიელი და ბერძენი ავტორების ცნობებს, რომლებმაც ჩვენამდე ვერ მოაღწიეს. ასიროლოგი დიაკონოვი წერდა, რომ მიხეილ სირიელი არ ცდილობს გამოყენებული მასალის გადამუშავებას და მას თითქმის ორიგინალური სახით გვაწვდის (Дьяконов 1912: 2-3). „ქრონიკაში“ გადმოცემულია ზოგიერთი ისეთი მოვლენა, რომელიც სხვა საისტორიო წყაროებში არ გვხვდება.

შუა საუკუნეების სირიული კულტურის საუკეთესო წარმომადგენლის ბარ ჰებრაი აბულ-ფარაჯ იოან გრიგოლის (1226-1286) ნაშრომი ეხება ასტრონომიას, ისტორიას,

მათემატიკას, პოეზიას, ფიზიკას, მედიცინას, გრამატიკას, ფილოსოფიას, ბუნებისმეტყველებას, ღვთისმსახურებას და მეცნიერების სხვა დარგებს. მათ შორის ჩვენთვის მნიშვნელოვანია ისტორიოგრაფიული ხასიათის ნაშრომი მსოფლიო ისტორიის შესახებ.

„ბარ ჰებრაი თხრობას იწყებს სამყაროს გაჩენიდან, თხზულების პირველ შვიდ თავში აღწერილია წინა აზიის უძველესი საუკუნეების ნახევრად ლეგენდარული ისტორია. განხილულია ეგვიპტის, ბაბილონის, ირანის, საბერძნეთისა და სხვა ქვეყნების ისტორიის საკითხები. თხზულების VIII-IX თავები შეიცავს რომის იმპერიისა და ქრისტიანობის წარმოშობის ისტორიას, ბიზანტიის ურთიერთობას სასანიანთა სახელმწიფოსთან და სხვ. X თავი შეიცავს უკანასკნელ სასანიანთა, ბიზანტიის, არაბთა სახალიფოს ისტორიას. საკმაოდ ვრცლად არის მოთხრობილი სელჩუკთა დაპყრობითი ომების, მათი მახლობელ აღმოსავლეთში მოსვლისა და ბატონობის შესახებ. ასევე ვრცლადაა მოთხრობილი სელჩუკთა ურთიერთობაზე ქრისტიანულ სახელმწიფოებთან-ბიზანტიასთან, სომხეთსა და საქართველოსთან“ (შენგელია 1968: 45).

ბარ ჰებრაი სელჩუკთა სახელმწიფოს ისტორიის გადმოცემას 1036 წლიდან იწყებს. იგი მოგვითხრობს სელჩუკთა ბრძოლაზე ღაზნელთა წინააღმდეგ, თოღრულ-ბეგისა და ბაღდადის ხალიფას ურთიერთობაზე, ალფ-არსლანისა და მისი ძმის სულეიმანის დაპირისპირებაზე სამეფო ტახტისათვის, სელჩუკთა ლაშქრობაზე ამიერკავკასიაში, ლიპარიტის სელჩუკთა ტყვეობიდან დახსნაზე, ალფ-არსლანისა და ბაგრატ IV-ის დისშვილის ქორწინებაზე, ანისის აღებაზე, მანასკერტის ბრძოლაზე, ალფ-არსლანისა და მალიქ-შაჰის საქმიანობაზე, მალიქ-შაჰის გარდაცვალების შემდეგ შექმნილ ვითარებაზე და სხვ.

ჩვენთვის საინტერესო საკითხების შესასწავლად დიდი მნიშვნელობა ენიჭება XI-XII საუკუნეების ბიზანტიურ წყაროებს, სადაც დიდი ადგილი აქვს დათმობილი თურქ-სელჩუკების მახლობელი აღმოსავლეთისა და ამიერკავკასიის ქვეყნებთან ურთიერთობის საკითხებს. მნიშვნელოვანი ცნობები აქვთ დაცული: მიხეილ ატალიატესს, ნიკიფორე ვრიენიოსს, იოანე ზონარას, სკილიცე-კედრენეს, ანა კომნენესა და სხვ.

მიხეილ ატალიატესს ეკუთვნის ისტორიოგრაფიული ხასიათის თხზულება „ისტორია“, რომელშიც აღწერილია 1034-1079 წლების ამბები და რომელიც მან

უძღვნა ნიკიფორე ბოტანიატეს. ატალიატესი სელჩუკებს ჰუნ-ნეფთალიტებს უწოდებს, რომლებიც „მშვილდის კარგი მცოდნენი იყვნენ და მიზანში ისროდნენ არა ცუდად, და მოწინააღმდეგეებს თავზარს სცემდნენ შორს გასროლილი ისრებით“ (ატალიატე 1966: 23-24). მისი ცნობით, სელჩუკების შემოსევებისაგან „იბერიის მდიდარი ქვეყანა სრულიად განადგურდა, როგორც ვთქვით, იგი მანამდისაც უკვე დარბეული იყო“ (ატალიატე 1966: 31). აღნიშნული ცნობა მიუთითებს სელჩუკთა ლაშქრობების მძიმე ხასიათზე. ატალიატესის მიხედვით, ნეფთალიტ-ჰუნების ანუ თურქების მიერ აღმოსავლეთში ყველაფერი ნადგურდებოდა. ამის ერთ-ერთ მიზეზად ავტორი რომაელთა ჯარის სისუსტესა და უკანდახევას მიიჩნევს. მიხეილ ატალიატეს „ისტორია“ გამოიყენეს სკილეცეს გამგრძელებელმა, ნიკიფორე ვრიენიოსმა, ანნა კომნენემ და იოანე ზონარამ.

ატალიატესის თხზულება შეავსო და ქრონოლოგიურად გააგრძელა ნიკიფორე ვრიენიოსმა (1062-1137) (ვრიენიოსი: 1963). მისი თხზულება „ისტორიული მასალები“ მოიცავს 1034 წლიდან 1079 წლამდე პერიოდს. იგი მოგვითხრობს თურქული ტომების თავდაპირველი დასახლების ადგილზე, მათ ჩვევებსა და ბრძოლისუნარიანობაზე, თურქთა მხრიდან ბიზანტიის იმპერიისათვის საშიშროების თანდათანობით ზრდაზე, თურ-სელჩუკებთან ბრძოლებზე და სხვ. ვრიენიოსის „შრომის წყაროს ძირითადად წარმოადგენს მისი უფროსი თანამედროვეების ნაამბობი; ამასთანავე ის წერილობით წყაროებსაც იყენებს, აკეთებს ამონაწერებს. სელჩუკებისა და ბიზანტიის პოლიტიკური ურთიერთობის შესახებ ვრიენიოსი ძალიან დაწვრილებით გვიყვება. მიუხედავად ტენდენციურობისა. მისი ცნობები საყურადღებო მასალას შეიცავს XI საუკუნის 70-იანი წლების მახლობელი აღმოსავლეთის ისტორიის საკითხების გასაშუქებლად“ (შენგელია 1968: 37).

XI საუკუნის ისტორიკოსს გიორგი კედრენეს ეკუთვნის თხზულება „ისტორიული მიმოხილვა“. იგი წარმოადგენს მსოფლიო ისტორიას ქვეყნის გაჩენიდან 1059 წლამდე. კედრენეს თხზულების მეორე ნაწილი სიტყვა-სიტყვით იმეორებს იოანე სკილეცეს „ისტორიას“, რომელიც მოიცავს 811-1079 წლების ამბებს. შესაძლებელია იოანე სკილეცეს ისტორია გრძელდებოდეს არა 1079, არამედ 1059 წლამდე, ხოლო 1059 წლიდან 1079 წლამდე ისტორია ეკუთვნოდეს სხვა ავტორს, როგორც ამას ამტკიცებს სიმონ ყაუხჩიშვილი. ამ ავტორს იგი იოანე სკილეცეს გამგრძელებელს უწოდებს (ყაუხჩიშვილი 1963: 8). სკილეცე-კედრენეს თხზულება

გვამღევს ცნობებს სელჩუკთა სახელმწიფოს ისტორიის შესახებ, იგი ვრცლად მოგვითხრობს 1048 წელს ბერძენ-ქართველთა ერთობლივ ბრძოლაზე ლიპარიტის მეთაურობით სელჩუკების წინააღმდეგ, მისი დატყვევებისა და გათავისუფლების ამბავს, თოდრულ-ბეგის საქართველოში ლაშქრობის მიზეზებს და შედეგებს, კედრენეს სიტყვით, სელჩუკთა თავდასხმების შედეგად ყველაფერი ნადგურდებოდა. „იბერიის მდიდარი ქვეყანაც, რომელმაც უკვე წინათაც განიცადა რბევა და დასუსტებული იყო, საბოლოოდ დაეცა და განადგურდა“ (კედრენე 1963: 82). კედრენეს ცნობაში ნათლად ჩანს სელჩუკთა შემოსევის შედეგად საქართველოში შექმნილი მძიმე ვითარება. ქართველები მტრად თვლიდნენ არა მარტო რომაელების მტრებს, არამედ თვით რომაელებსაც. ამ ცნობიდან აშკარაა, რომ ბიზანტიელები საქართველოში დასაყრდენს ვერ ნახულობდნენ და აქ მტრად ითვლებოდნენ.

თურქ-სელჩუკებისა და მათი ბიზანტიის იმპერიასთან ურთიერთობების შესახებ მნიშვნელოვანი წყაროა XII საუკუნის ბიზანტიელი ისტორიკოსის ანა კომნენეს თხზულება „ალექსიადა“ (კომნენე 1966: 33; შენგელია 1968: 38). ანა კომნენე სარგებლობდა ნიკიფორე ვრიენიოსის ნაშრომით. XI საუკუნის უკანასკნელი მეოთხედის შესახებ მისი ცნობები უხვი და ორიგინალურია. ხშირ შემთხვევაში იგი არასწორად ასახელებს სელჩუკ მხედართმთავართა სახელებს და ქრონოლოგიასაც შეცდომით გადმოგვცემს. მიუხედავად ამისა, „ალექსიადას“ უდიდესი მნიშვნელობა ენიჭება ბიზანტიის კეისრის ალექსი კომნენეს თურქ-სელჩუკებთან ურთიერთობის შესასწავლად, რომელმაც მიზნად დაისახა სელჩუკთა განდევნა ბიზანტიის ტერიტორიიდან. ანა კომნენე თხზულების წერისას იყენებდა წერილობით წყაროებს და ზეპირ გადმოცემებს. ხოლო მისი წყაროს ფასეულობას კიდევ უფრო ზრდის ის ფაქტი, რომ იგი აღწერილი ამბების უმრავლესობის თვითმხილველი იყო.

ანა კომნენეს თანამედროვეა იოანე ზონარა (ზონარა 1966: 177). მისი „ისტორია“ დიდი მოცულობის თხზულებაა და შეიცავს ამბებს ქვეყნის დასაბამიდან ვიდრე 1118 წლამდე. ს. ყაუხჩიშვილი შენიშნავს: „იოანე ზონარას „მსოფლიო ქრონიკა“ ამ სახის ბიზანტიურ სხვა „ქრონიკებთან“ შედარებით მაღალი ღირსების თხზულებაა. ის სხვა ქრონიკებზე საფუძვლიანიცაა და, გარდა ამისა, შეიცავს მრავალ ჩვენამდე მოუღწეველ კარგ საისტორიო წყაროებს. მაშინ, როცა სხვა ჟამთააღმწერლები

კმაყოფილებოდნენ ძველი ბიზანტიური კრებულებით, როგორცაა, მაგალითად, იოანე ანტიოქიელისა, თეოფანე ჟამთააღმწერლისა და გიორგი ამარტოლის თხზულებები. იოანე ზონარა, პირიქით, პოულობს უფრო ვრცელ ძველ საისტორიო შრომებს და იქიდან ღებულობს ახალსა და საინტერესო მასალებს“. (ყაუხჩიშვილი 1966: 178-179). ზონარა ვრცლად მოგვითხრობს ბიზანტიელებისა და ქართველების ერთობლივ ბრძოლაზე 1048 წელს, სელჩუკების მიერ ლიპარიტის დატყვევებასა და მის განთავისუფლებაზე. მისი ცნობით, ლიპარიტის გათავისუფლების შემდეგ სელჩუკთა სულთანმა თოდრულ-ბეგმა თავისი წარმომადგენელი სერიფი გამოგზავნა კონსტანტინეპოლში, რომელმაც მეფეს სულთნის მოთხოვნა წარუდგინა გადასახადის შესახებ. უარის გამო სულთანი განრისხებულა, აღმოსავლეთით დაძრულა, დიდი ტერიტორიები დაუპყრია და ბიზანტიის მიმდებარე ქვეყნებამდე მიულწევია. იოანე ზონარას თხზულება საინტერესოა როგორც საქართველოსა და ბიზანტიის სელჩუკებთან დამოკიდებულების შესასწავლად, ასევე ბიზანტია-საქართველოს პოლიტიკური ურთიერთობის თვალსაზრისით.

ამრიგად, ჩვენ მოკლედ მიმოვიხილეთ ჩვენს ხელთ არსებული ქართული, სომხური, არაბული, სპარსული, სირიული, ოსმალური და ბერძნული წყაროები თურქ-სელჩუკების სახელმწიფოსა და მისი საქართველოსთან ურთიერთობის შესახებ ალფ-არსლანის პერიოდის ჩათვლით. სწორედ აღნიშნულ წყაროებსა და სამეცნიერო ლიტერატურას დავეყრდნობით ჩვენთვის საინტერესო საკითხების შემდგომი კვლევისას.

II თავი

ისტორიოგრაფია

ალფ-არსლანის საქართველოში ლაშქრობები და მასთან დაკავშირებული მოვლენები ქართულ ისტორიოგრაფიაში საკმაოდ კარგად არის შესწავლილი, მაგრამ ეს საკითხი დღემდე მონოგრაფიულად არ დამუშავებულა.

სელჩუკთა და ქართველთა ურთიერთობებით და მათ შორის ალფ-არსლანის ლაშქრობებით დაინტერესდა XVIII ს-ში მცხოვრები ქართველი ისტორიკოსი ვახუშტი ბატონიშვილი. ვახუშტის საისტორიო შრომა ორი ნაწილისაგან შედგება: პირველი ნაწილი „ძველი ციკლის“ (უძველესი დროიდან XIV ს-მდე) „ქართლის ცხოვრების“ დამუშავება და შევსება, მეორე ნაწილი კი საქართველოს ისტორიის იმავე ხანას ეხება, რომლის ისტორია მეფე ვახტანგ VI-ის მიერ შექმნილმა სწავლულ კაცთა კომისიამ შეადგინა (ქართლის ცხოვრების ახალი ციკლი XIV-XVII სს). ჩვენთვის საინტერესო საკითხებს იგი საისტორიო შრომის პირველ ნაწილში ეხება. ალფ-არსლანის ლაშქრობების გადმოცემისას იგი ძირითადად მისდევს „მატიანე ქართლისაჲს“ ავტორის თხრობას. თუმცა ამ ავტორისაგან განსხვავებით ასახელებს ალფ-არსლანის საქართველოში პირველი ლაშქრობის (1064), ბაგრატის ასულის ბიზანტიაში გათხოვებისა (1065) და ბაგრატის დისშვილისა და ალფ-არსლანის ქორწინების (1065) თარიღებს. ეს არცაა გასაკვირი, რადგან ვახუშტის მიერ „ქართლის ცხოვრების“ დამუშავების მთავარი მიზანი ამ თხზულების თარიღებით შევსება იყო. დიდი მეცნიერი ქართველ მემკვიდრეებს სწორედ თარიღების სიმცირეს უწუნიებდა. როგორც ჩანს, ვახუშტის „მატიანე ქართლისაჲს“ ცნობები ალფ-არსლანის ლაშქრობებთან დაკავშირებით საკმაოდ გულდასმით გადაუმუშავებია. მაგალითად, „მატიანე ქართლისაჲს“ ავტორმა არ იცის იმ პიროვნების სახელი, ვინც ბაგრატ IV-ის მღევრებს გამოქცეული ფადლონი იცნო და დაატყვევა: „დახუდა კაცი ვინმე მეცნიერი, რომელი იცნობდა ფადლონს, და ჰრქუა: „არა ხარ შენ მოციქული, არამედ ხარ ამირა ფადლონ“ („მატიანე ქართლისაჲს“ 2008: 293). ვახუშტი ბატონიშვილისთვის კი ამ პიროვნების სახელი ცნობილია: „იხილა იგი ნიანიაჲ, წარიყვანა და მიგუარა იგი ისააკს“ (ვახუშტი ბატონიშვილი 1973: 151).

ვახუშტი ბატონიშვილის ნაშრომი დიდი სამეცნიერო კვლევის შედეგია და განსაკუთრებულ ყურადღებას იმსახურებს. როგორც ი. ჯავახიშვილი შენიშნავდა, „მას „თავით თიქსით“ არაფერი დაუწერია, არამედ მთელი მისი მიმოხილვა რთული სამეცნიერო შრომის ნაყოფია, ქართულ საისტორიო და სხვაგვარ წყაროების შესწავლასა, დაკვირვებასა და კვლევაზეა დამყარებული. მაშასადამე, ვახუშტი ისე მოქცეულა, როგორც მოიქცეოდა თანამედროვე მეცნიერიც. მას აუღია ქართული წყაროები და იქითგან ამოუკრებია ყველა ცნობები, რომელიც- კი, მისთვის გამოსადეგი იყო და ამ ქრონოლოგიურად და დარგებად დალაგებულ ცნობებისა და მიხედვით მას საზოგადო სურათი აღუდგენია“ (ჯავახიშვილი 1977: 341).

საინტერესო კვლევა აქვს ჩატარებული თურქ-სელჩუკებისა და საქართველოს ურთიერთობის შესახებ თედო ჟორდანიას. მართალია, მისი კვლევა ძირითადად ალფ-არსლანამდე პერიოდს ეხება, მაგრამ იგი მაინც გახდა ჩვენი ყურადღების ობიექტი, რადგან წინა პერიოდის გაცნობის გარეშე შეუძლებელი იქნებოდა ჩვენი საკვლევი თემის სრულყოფილად გააზრება.

თ. ჟორდანია დიდ მნიშვნელობას ანიჭებს 1029 წლით დათარიღებულ დოკუმენტს, რომელიც გადმოგვცემს „აქა ბგ~რტ (ბაგრატ) კურაპალატი სულტანსა დაესხა“ (აფხაზთ ქრ.). იგი წერს: „ეს საყურადღებო ცნობა არცერთს ჩვენს ისტორიულ წყაროებში და არც ქ.~ცხ.-ში არ მოიპოვება. ეს იმით აიხსნება, რომ გიორგი I-ის ცხოვრება და პირველი ნაწილი ბაგრატ IV-ის მეფობისა აღწერილია „ქ.~ცხოვრებაში“ მხოლოდ სუმბატის ქრონიკისაგან, ხოლო სუმბატს მხოლოდ იმაზე მიუქცევია ყურადღება, რაშიც გამოიხატებოდა ქართველთა და ბერძენთა ურთიერთობა ანუ ის შინაური არევ-დარევა, რომელშიაც ერივინ ბერძენის მომხრე გვარი (ბალუაშნი და ტაოელ აზნაურნი). მართალია, თურქნი-სალჩუქიანნი ანუ თურქნი-სელჩუკნი აღმოსავლეთში გაძლიერდნენ 1048 წლიდან, როდესაც მათ დაიმორჩილეს უმეტესი ნაწილი ბიზანტიის იმპერიისა სამფლობელოსი ასიაში, სპარსეთი ინდოეთამდე, კასპიის ზღვის პირები, მაგრამ სელჩუკნი რომ ამას წინათაც მძლავრობდნენ, ეს სჩანს იქიდან, რომ 1020 წელს უკანასკნელის ვასპურაკნელის სომხის მეფის სენაქირიმის დროს (რომელიც იყო მამა ბაგრატ IV-ის დედის მარიამისი) სელჩუკნი შევიდნენ სომხეთში, და ამის შემდეგ, რასაკვირველია, საქართველოსაც არ დააყენებდნენ მოსვენებით, თუმცა-კი ჩვენი მემკვიდრე ზემოხსენებულის მიზეზის გამო, ამაზე სდუმს. აფხაზთა ქრონიკა კი, ცხადია, ავსებს ამ ნაკლს ჩვენის მათიანისას და გვიჩვენებს, რომ თურქნი 1029 წელს იმდენად

გამლიერებულან საქართველოს საზღვრებზე, რომ „ბაგრატ ყრმა“ (მაშინ ბაგრატი იქნებოდა 11-12 წლისა) თავს დასხმია სელჩუკთ სულთანსა ანუ ხვანთქარსა“ (ჟორდანიას 1892: 168).

თ. ჟორდანიას აზრით, 1050-1053 წლებში, როდესაც ბაგრატ IV კონსტანტინეპოლში იმყოფებოდა, სელჩუკებმა საქართველოს სამხრეთ ნაწილში ილაშქრეს თოდრულ-ბეგის მეთაურობით. 1055 წელს ლიპარიტის შვილის ივანეს მოწვევით სელჩუკებმა ხელახლა ააოხრეს ოლთისისა და არტაანის მხარე. ამ ლაშქრობის დროს სელჩუკებისთვის მეგზურობა ივანეს გაუწევია (Жордания 1895: 7). თ. ჟორდანია თავის მიერ გამოქვეყნებულ დოკუმენტში (ბაგრატ IV-ის მიერ 1057 წელს შიო მღვიმის ლავრისთვის შეწირულობის სიგელი) აღნიშნულ წარმართთა მიერ შიო მღვიმის მამულების აოხრებას მიაწერს თოდრულ-ბეგის ამიერკავკასიაში ლაშქრობის პერიოდს, რომელსაც ის 1050-1053 წლებით ათარიღებს.

თ. ჟორდანია მნიშვნელოვან კვლევას ეწეოდა საქართველო-სელჩუკთა ურთიერთობის ამსახველ დოკუმენტების გამოვლენის, მათი შემოსევების, თარიღების დადგენისა და სხვა საკითხების შესწავლის საქმეში.

ჩვენთვის საინტერესო საკითხებთან დაკავშირებით მნიშვნელოვანი კვლევა აქვს ჩატარებული დ. ბაქრაძეს. მან მონოგრაფიულად შეისწავლა საქართველოს მეფის ბაგრატ IV-ის მოღვაწეობის პერიოდი (ბაქრაძე 1880). დიმიტრი ბაქრაძე ისევე, როგორც თედო ჟორდანია, სელჩუკთა ამიერკავკასიაში მოსვლას XI ს-ის 30 წლებზე ადრე პერიოდში მიიჩნევს. იგი ბაგრატ IV -ის დედასთან მარიამთან დაკავშირებით წერს: „მარიამ ეკუთვნოდა სომხის გვარს არწრუნისას და იყო ასული უკანასკნელის ვასპურაქანის მეფისა სენაქერიმისა, რომელმაც 1020 წელში, თურქ-სელჩუკთა დასხმის დროს სომხეთზე, დაუთმო თავისი სამფლობელო იმპერატორს ვასილი მეორეს“ (ბაქრაძე 1880: 15). როგორც ჩანს, ბაქრაძე და ჟორდანია ამ შემთხვევაში სომხურ წყაროებს (მათეოზ ურჰაეცი, არწრუნი, სამუელ ანეცი) ეყრდნობიან. რომელთა მიხედვით, თურქ-სელჩუკთა სომხეთში პირველი ლაშქრობები 1016-1021 წლებით განისაზღვრება.

ბაქრაძე დაწვრილებით აღგვიწერს ბერძენ-ქართველთა ბრძოლას 1048 წელს სელჩუკების წინააღმდეგ, ამ ბრძოლაში ბერძენთა გაუტანლობას და ლიპარიტის გასაოცარ ვაჟკაცობას, მისი აზრით, მოკავშირეების დამარცხებისა და ლიპარიტის ტყვედ ჩავარდნის მიზეზი ბერძენთა ღალატი გამხდარა. კიდევ უფრო მნიშვნელოვანია

ბაქრადის ნაშრომი უშუალოდ ჩვენი საკვლევი საკითხის ალფ-არსლანის ლაშქრობებთან დაკავშირებით. იგი ასახელებს საქართველოში ალფ-არსლანის პირველი ლაშქრობის თარიღს, სელჩუკთა ლაშქრის რაოდენობას, ასევე გვამლევს ალფ-არსლანის დახასიათებას და გადმოგვცემს მისი ლაშქრის მოძრაობის მარშუტებს: „1064 წელი უბედური იყო საქართველოსთვის: საქართველოს დაეცნენ თურქნი სელჩუკნი. თურქნი ჩვენ კიდევ მოვიხსენეთ სულთანის თოგრილ-ბეგის დროს. თოგრილ-ბეგი მოკვდა და იმისი ადგილი დაიჭირა იმის ძმის-წულმა არპა-ასლანმა, რომელმაც მაშინვე აღმოიჩინა თავისი ხასიათი და რომელიც სრულებით არ მიემსგავსებოდა თავის ბიძას. არპ-ასლანი იყო შეპყრობილი დამარღვეველის სულით და მან დაუტევა ისტორიაში სისხლოვანი კვალი, ასი ათასის ჯარით ის მოესია სპარსეთით სომხეთს და სომხეთით შემოვიდა თრიალეთის მაზრაში, საიდანაც გაგზავნა გუნდი მხედრობათა სხვა-და-სხვა მესხეთის მხარისკენ-შავშეთს, კლარჯეთს და თაოს“ (ბაქრაძე 1880: 42). შემდეგ დ. ბაქრაძე ქართველ მემკვიდრეებზე დაყრდნობით გადმოგვცემს ახალქალაქის ტრაგედიას, სამშვილდისა და ანისის აღებას, ბაგრატ IV-ის დისშვილისა და ალფ-არსლანის ქორწინებას, ამ საქმეში ბაგრატის როლს. მისი აზრით, მიუხედავად იმისა, რომ „წელთაღწერა“ არაფერს გვიამბობს ბაგრატის დისწულის სიტურფეზე, იგი ძალიან ლამაზი უნდა ყოფილიყო, რადგან „მაჰმადის რჯულის აღმსარებლის მიზიდვა შეეძლო მხოლოდ გარეგან ღირსებას“ (ბაქრაძე 1880: 43).

დიმიტრი ბაქრაძე დაწვრილებით გადმოგვცემს ალფ-არსლანის საქართველოში მეორე ლაშქრობას. იგი წერს: „საქართველო ისე ბედნიერი არ იყო, რომ იმას ბაგრატის სიცოცხლეში ხანგრძლივი მშვიდობიანობა ეგემოვნა. შიგ საქართველოში დაწყნარდა ღელვა, მაგრამ სპარსეთის მხრით კიდევ ატყდა ჭექა-ქუხილი. არპ-ასლანი სამი წლის შემდეგ მეორედ მოაწყდა ჩვენს ქვეყანას. ამას მოჰყავდა თან ხუთასი (?) კაცი წყობა, რომელიც მიესია რანს, ჰერთს და კახეთს“ (ბაქრაძე 1880: 49). მისი აზრით, კახთა მეფის აღსართანის ალფ-არსლანთან გამოცხადება და გამუსლიმანება იძულებით ხასიათს ატარებდა. იგი ასახელებს ამ ლაშქრობის თარიღს (1068 წ.), მარშრუტებს და შედეგებს. საუბრობს ალფ-არსლანის საქართველოდან წასვლის მიზეზებზე, ბაგრატ IV-ის აქტიურ პოლიტიკაზე სელჩუკთა სულთნის საქართველოდან წასვლის შემდეგ. ბაქრაძე შენიშნავს, რომ „საქართველოს მეფემ შეძლო განძის ამირას ხელში ჩაგდება და აიძულა იგი, რომ თბილისი დაეთმო სითლ არაბისთვის ანუ სიდი-ელ-არაბისათვის; თვითონ დაიკავა რუსთავი, ფარცხისი, აგარანი, გრიგოლ წმიდა და ქავაზნი, გამოართო იმას

ფულად ორმოც-და-ოთხი ათასი დრაჰკანი და დაიჭირა ამანათად იმისი მმისწული და სამი განჯის დიდებული. თვით ემირი გაანთავისუფლა მხოლოდ სულთანის თხოვნით“ (ბაქრაძე 1880: 52). შემდეგ აღწერს ქართველთა და ოსთა მიერ ერთობლივად განჯის აოხრების ამბავს, ალფ-არსლანისა და ბაგრატ IV -ის ურთიერთობას. საინტერესოა, რომ დ. ბაქრაძის აზრით, ბერძნებთან „თავის ცხოვრების მიწურების ჟამს ბაგრატმა დაარღვია კავშირი, თუმცა არ ვიცით, რა იყო ამის მიზეზი. ვგონებთ, რომ მიზეზი მისცეს ბერძნებმა და არა ქართველებმა, ამისთვის, რომ ჩვენი ქვეყანა ყოველთვის ფასსა სდებდა ბიზანტიის მიდრეკილებას და მეგობრობას“ (ბაქრაძე 1880: 53). სამწუხაროდ, დიდი მეცნიერი არაფერს ამბობს თუ რაში გამოიხატებოდა ბერძნებთან კავშირის დარღვევა, მას საეჭვოდ მიაჩნდა, რომ ამ კავშირის დარღვევა საქართველოს მიზეზით მოხდებოდა. ვფიქრობთ XI ს-ის 70-იანი წლების დასაწყისში შექმნილი პოლიტიკური ვითარების ფონზე, როდესაც ბიზანტია იძულებულია მთელი რიგი ტერიტორიები აღმოსავლეთში სელჩუკებს დაუთმოს, ბაგრატ IV ბიზანტიასთან კავშირის გაწყვეტით შეეცდებოდა სელჩუკებთან დიპლომატიური ურთიერთობის შენარჩუნებას. დასუსტებულ ბიზანტიასთან არაფრისმომცემი კავშირით ბაგრატი სელჩუკების გაღიზიანებას მოერიდებოდა. ამასთან ერთად ბაგრატს კარგად ემახსოვრებოდა ბიზანტიის უარყოფითი როლი საქართველოს საშინაო საქმეებში (ბაღვაშთა მხარდაჭერა) და მათ მიერ XI საუკუნის დასაწყისში სამხრეთ საქართველოს ტერიტორიების დაკავების ფაქტი, ამდენად ბაგრატს საკმარისზე მეტი მიზეზი ექნებოდა, რომ ესარგებლა ბიზანტიის დასუსტებით და მასთან კავშირი გაეწყვიტა. ალბათ, აქტიური პოლიტიკის გამტარებელი ბაგრატ IV გეგმავდა ბიზანტიის მიერ დაკავებული საქართველოს ისტორიული ტერიტორიების შემოერთებასაც, რაც შემდგომში მისმა ძემ გიორგი II -მ განახორციელა.

დ. ბაქრაძე მაღალ შეფასებას აძლევს ბაგრატ IV -ის მოღვაწეობას: „იმან დაამშვიდა და დაამცირა საქართველოს დიდებულნი და დაუმორჩილა სამეფო უფლებასა; დასცა განჯის მთავარნი და თბილისის ემირნი; მოითმინა ორი საზარელი კვეთება სპარსეთის მძვინვარე სულთნის არპ-ასლანისა და აღამაღლა სამეფო ისე, რომ გამოიხსნა ბიზანტიის დამოკიდებულებიდან“ (ბაქრაძე 1880: 55). ბაქრაძე თავისი მონოგრაფიის შედგენისას ხელმძღვანელობდა ქართველი მემკვიდრის ცნობებით, ასევე სომხური და ბიზანტიური ქრონიკებით.

სელჩუკებისა და საქართველოს ურთიერთობის კვლევის საქმეში დიდი წვლილი მიუძღვის ი. ჯავახიშვილს (ჯავახიშვილი 1983). ქართული, ბიზანტიური, სომხური, არაბული და სპარსული წყაროების კრიტიკული შესწავლით, მან არაერთი მნიშვნელოვანი დასკვნა გააკეთა ამ საკითხებთან დაკავშირებით.

ი. ჯავახიშვილი ფიქრობდა, რომ უკვე XI ს.-ის 30-იანი წლების ბოლოს სელჩუკები ქართულ პოლიტიკაზე მნიშვნელოვან გავლენას ახდენდნენ. მას 1039-1040 წლებში ბაგრატ IV-ის მიერ თბილისის ალყის უეცარი მოხსნის მიზეზად სელჩუკების ამიერკავკასიაში გამოჩენა მიაჩნდა. ი. ჯავახიშვილის აზრით, ქართველ-ბერძენთა ერთობლივი ბრძოლა სელჩუკების წინააღმდეგ, როდესაც ლიპარიტი ტყვედ ჩავარდა, 1048 წლის ენკენისთვეში მომხდარა. ლიპარიტის დატყვევებით უსარგებლია ბაგრატ IV-ს და ურჩი დიდებულების დამორჩილება დაუწყია. იგი, ლიპარიტის ტყვედ ყოფნის პერიოდში, გულის მოგების მიზნით ბიზანტიის კეისარს დახმარებია თურქთა წინააღმდეგ. განძაში მყოფი სელჩუკები ქართველთა მიერ ბერძნების მიხმარებას შეუფიქრიანებია და უკან გაბრუნებულან. ი. ჯავახიშვილი შენიშნავს, რომ ლიპარიტს ტყვეობაში სამი წელიწადი გაუტარებია და 1051 წელს გაუთავისუფლებიათ. ამ საქმეში დიდი როლი ბიზანტიის კეისარს შეუსრულებია: „იმ წლითგან მოყოლებული, როცა ლიპარიტი სულთანმა ტყვედ წაიყვანა, ბიზანტიის კეისარი ყოველს ღონისძიებასა ხმარობდა, რომ თავისი ერთგული და ძლიერი ქართველი მოკავშირე ტყვეობითგან დაეხსნა“ (ჯავახიშვილი 1983: 147). ლიპარიტის ტყვეობიდან გათავისუფლების შემდეგ ბაგრატ IV-ის მდგომარეობა კვლავ დამძიმებულა. ლიპარიტის დატყვევების შემდეგ ბაგრატი გაძლიერებულა, ამასთანავე 1060 წელს მას კეისრისაგან სევასტოსობა მიუღია. საქართველოში ერთხნობით მყუდროება და მშვიდობიანობა დამკვიდრდა. მაგრამ ეს მყუდროებაც მალე დაირღვა: მცირე აზიასა და საბერძნეთის საზღვრებზე ამ დროს „იქმნეს დიდნი საქმენი, აღძვრანი დიდთა მეფეთანი“ ტოღრუღბეგს დარჩა მემკვიდრედ მამაზე ჩაკირ-ბეგზე, და ბიძაზე უფრო გამბედავი და გულადი შვილი ალფარსლანი, რომელმაც მცირე აზიაში მრავალი სახელოვანი ომი გადაიხადა, ვერც საქართველო გადაურჩა მის შემოსევას“ (ჯავახიშვილი 183: 151).

ალფ-არსლანის საქართველოში ლაშქრობა ი. ჯავახიშვილს მონოგრაფიულად არ დაუმუშავებია, მაგრამ სხვა საკითხებთან ერთად საკმაოდ კარგად აქვს შესწავლილი საქართველოს ისტორიის ეს პერიოდი. იგი მოგვითხრობს სელჩუკთა მოულოდნელ შემოსევაზე სამხრეთ საქართველოში, მათ მიერ ამ მხარის პროვინციების დარბევაზე,

ახალქალაქის ბრძოლაზე, ამ ბრძოლაში ქართველთა გმირულ თავდადებაზე, ქალაქის აოხრებაზე, აქედან დიდი ნადავლის გატანასა და უამრავი ტყვის წაყვანაზე. იგი ახალქალაქის აოხრების თარიღად 1065 წელს ასახელებს: „მტნე ქდ“-ს ცნობითგანა ჩანს, რომ სულტან ალფ-არსლანის საქართველოში მეორე დიდი შემოსევა მისის საქართველოში პირველის გალაშქრების „შემდგომად სამისა წლისა“ ყოფილა, ხოლო რაკი ამავე მატიანისაგან ვიცით, რომ მეორე დიდი ლაშქრობა ყოფილა ქრონიკონსა 288 ანუ 1068 წელს, მაშასადამე, ალფარსლანის პირველი შემოსევა და ქ. ახალქალაქის აოხრება 1065 წელს იქნებოდა. მათე ურჰაელის სიტყვითაც ეს ამბავი 1064-1065 წ. მომხდარა; ამასთანავე ეს თარიღი გიორგი მთაწმინდელის ცხოვრებასაც კარგად უდგება“ (ჯავახიშვილი 1983: 152). დიდ მეცნიერს ქართველი მემატიანის, მათეოს ურჰაეცისა და ჰამდალაჰ ყაზვინის ცნობების ურთიერთშედარებით მნიშვნელოვანი დასკვნები აქვს გაკეთებული ალფ-არსლანის საქართველოში პირველ ლაშქრობასთან დაკავშირებით. ამასთანავე უპირატესობას იგი ქართულ საისტორიო წყაროს ანიჭებდა: „თუ ქართულ-სომხურ-სპარსულს ცნობებს ამ ლაშქრობის შესახებ ერთმანეთს შევადარებთ, გამოირკვევა, რომ ქართველი ისტორიკოსების მოთხრობა ჯავახეთში საშინელი სისხლის ღვრის შესახებ მტკიცდება მათე ურჰაელის მოწმობით; ჰამდალაჰ ყაზვინის ამ ომის შესახებ დაწვრილებითი ცნობები არა აქვს, მაგრამ ისიც ადასტურებს, რომ ქართველები დამარცხებულები იყვნენ და ზოგიერთი დიდებულთაგანი ტყვედ იყვნენ წასხმული. სპარსელი ისტორიკოსის მოთხრობა ახალს ცნობას შეიცავს იმის თაობაზე, რომ სულტანმა ალფარსლანმა საქართველოს მიწაწყალი მიატოვა მხოლოდ ბაგრატ მეფესთან ზავის ჩამოგდების შემდგომ. „მტნე ქდ“-ც ამბობს: „მოუვლინა ახალქალაქით მოციქული სულტანმან ბაგრატ მეფესა, და აჰკიდა მზახობა, სთხოვა ასული მისის დისა და მიიქცა სულტანი ანისად“, ამ სიტყვებითგანაც ჩანს, რომ სულტანს ელჩის პირით მზახობაზე, მაშასადამე მშვიდობიანობაზე, ჩამოუგდია ლაპარაკი; მაგრამ მაინც ქართველი მემატიანის ცნობა მეტად მოკლეა და ამ მხრივ სპარსელი მემატიანის სიტყვები ჩვენს ცნობებს ავსებენ. ამას გარდა, ჰამდალაჰ ყაზვინის მოთხრობა ქართული მემატიანის იმ ცნობასაც, რომელიც ალფარსლანის სომხეთში ლაშქრობას ეხება, ადასტურებს: ქართველი ისტორიკოსივით იმასაც სულტანის გალაშქრება სომხეთში საქართველოს აოხრების ამბავის შემდგომ აქვს აღწერილი; ამ მხრივ, მაშასადამე, ქართული მატიანის მოთხრობა მათე ურჰაელისაზე უფრო სწორია. პირიქით, სომეხთა მეფის ასულის სულტანზე გათხოვების ამბავში მათე ურჰაელსავით

არც სპარსელს მემატთანესა ჰყავს საქართველოს მეფე მონაწილედ დასახელებული. მაინც „მტნე ქ“-ს ეს შემთხვევა ისე დაწვრილებით და ზედმიწევნითა აქვს მოთხრობილი, რომ უპირატესობა აქაც ვგონებ ქართველი ისტორიკოსის ცნობას უნდა მიენიჭოს“ (ჯავახიშვილი 1983: 153-154).

ი. ჯავახიშვილს ვრცლად აქვს აღწერილი ალფ-არსლანისა და ბაგრატ IV-ის დისწულის ქორწინების ამბავი, ამ საქმეში საქართველოს მეფის აქტიური მონაწილეობა. მისი აზრით, ბაგრატ მეფის დისწული იყო სომეხთა მეფის კვირიკეს ასული. ჯავახიშვილი შენიშნავს, რომ ვიდრე ბაგრატი თავის დისშვილს დააქორწინებდა ალფ-არსლანზე, თავისი ასული მართა მიათხოვა ბერძენთა მეფეს. „სპარსეთის სულტანისა და ბიზანტიის კეისრის ბაგრატ მეფესთან დამოყვრებას საქართველოსთვის მშვიდობიანობა და მყუდროება უნდა მოეტანა და ძლიერ მეზობელ სახელმწიფოთა შემოსევისაგან უნდა უზრუნველ ეყო“ (ჯავახიშვილი 1983: 154).

ი. ჯავახიშვილი ძირითადად ქართველ მემატთანეს ეყრდნობა ალფ-არსლანის საქართველოში მეორე ლაშქრობის აღწერისას. იგი დაწვრილებით გადმოგვცემს სელჩუკების მოულოდნელ შემოსვლას კახეთ-ჰერეთში, ბაგრატ IV-ის გადმოსვლას ქართლში, რომელიც ამ დროს კახეთში იყო გალაშქრებული, ალფ-არსლანისა და კახთა მეფის აღსართანის ურთიერთობას, ალფ-არსლანისა და მისი მოკავშირეების (კახთა მეფე აღსართანი, სომეხთა მეფე კვირიკე და თბილისის ამირა) ერთობლივ ლაშქრობას ქართლსა და არგვეთში, სელჩუკთა ლაშქრობის შედეგებს, ალფ-არსლანის საქართველოდან წასვლას, ბაგრატ მეფის მიერ განძის ამირის შეპყრობას და თბილისზე კონტროლის აღდგენას, ბაგრატის მიერ ფადლონის გათავისუფლების ამბავს (ჯავახიშვილის აზრით, დატყვევებული ფადლონის გაშვებას ბაგრატ მეფეს სპარსეთის სულთანს შეეხვეწა), ქართველ-ოსთა მიერ განძის მოოხრებას და სხვ.

განძის მოოხრებას და ფადლონის დასჯას ი. ჯავახიშვილი დიდ მნიშვნელობას ანიჭებდა: „რაკი სულტანის მეგობარი და მოკავშირე ფადლონი თავხედობისათვის ბაგრატ მეფემ სამაგალითოდ დასაჯა, ეხლა საქართველოს ბატონი უფრო უზრუნველყოფილი იყო აღმოსავლეთის მხრით და უფრო გაბედულად შეეძლო ემოქმედა. ამიტომაც იყო, როდესაც „შემდგომად ამისსა არონიებდა სულტანი მოციქულთა“ ბაგრატ მეფესთან „და უკრებდა ძლუნთა ბაგრატ მეფესა“, თანაც „ამოთა ენითა სთხოვდა ხარაჯასა“, საქართველოს მბრძანებელიც თავის მხრივ სულთანს ზრდილობიანად ექცეოდა, „ავლენდა იგიცა მოციქულთა და უკრებდა იგიცა ძლუნსა

და იყო მათ შორის სიტყუათა სიყვარული“, მაგრამ მორჩილების ნიშანი-კი იუკადრისა და „არა დაიდვა ბაგრატ მეფემან ხარაჯა“ საქართველოს პოლიტიკური დამოუკიდებლობა არ შეალახინა“ (ჯავახიშვილი 1983: 157).

სელჩუკთა შემოსევების ხასიათი და მათი ყოფის ძირითადი ნიშნები კარგად აქვს აღწერილი ნ. ბერძენიშვილს, მას გადმოცემული აქვს თუ როგორ განსხვავდებოდა ქართველთა და სელჩუკების მეურნეობა ერთმანეთისაგან, როგორი საფრთხის წინაშე იდგა განვითარებული ქართული მეურნეობა და კულტურა მათი შემოსევების დროს. მისი აზრით, თურქების შემოსევა არსებითად განსხვავდებოდა ბიზანტიელთა თუ არაბების შემოსევებისაგან. თურქები მომთაბარე-მეჯოგეები იყვნენ. ისინი გადმოსახლებით მოდიოდნენ და დაპყრობილ ქვეყნებში თავისი მეურნეობისათვის საჭირო მიწებს იჭერდნენ. ნ. ბერძენიშვილი შენიშნავს, რომ თურქ-სელჩუკების შემოსევებმა ერთიანად შეცვალა პოლიტიკური ვითარება ამიერკავკასიასა და მთელ ახლო აღმოსავლეთში. თურქობასთან ბრძოლაში საქართველომ, მართალია, მძიმე ზიანის ფასად, მაგრამ მაინც შეინარჩუნა სახელმწიფოებრივი ორგანიზაცია. კრიტიკულ მომენტში ფეოდალურ-მოზარდმა საქართველომ გამოიჩინა უნარი საზოგადოების შიგნით არსებითი ხასიათის სოციალურ-პოლიტიკური ღონისძიებების გატარებისა. ამის შედეგად მან შეძლო საკუთარ ძალთა სრული მობილიზაცია და თურქობის წინააღმდეგ ბრძოლაში კავკასიის განმანთავისუფლებლის როლში წარმატებით გამოსვლა (ბერძენიშვილი 1954: 123-124; ბერძენიშვილი 1971: 158-159).

ჩვენთვის საინტერესო საკითხებთან დაკავშირებით მნიშვნელოვანი კვლევა აქვს ჩატარებული რ. კიკნაძეს. მან პირველად ქართულ ისტორიოგრაფიაში მუნეჯიმ-ბაშის, სადრ ად-დინ ჰუსეინისა და სხვა აღმოსავლელი ავტორების ცნობები შეუდარა ქართულ წყაროებს და საგულისხმო დასკვნები გააკეთა.

როგორც ცნობილია, ანატოლიასა და ამიერკავკასიაში პირველი ლაშქრობის შემდეგ, ალფ-არსლანმა ამიერკავკასიის პოლიტიკური ერთეულების მეთვალყურეობა არანის გამგებელს აბულ-ასვარს მიაწოდო. კიკნაძე მუნეჯიმ-ბაშის მონაცემებზე დაყრდნობით ფიქრობს, რომ „აბულ ასვარმა ლაშქარი შემოიკრიბა და 1065წ. ივნისში ნაბოძები ქვეყნების შემოსამტკიცებლად დაიძრა. ის ჯერ ანისში მივიდა, წესრიგი დაამყარა, იქ თავისი გამგებელი დანიშნა, იარაღით, საწოვავითა და ხალხით მოამარაგა ქალაქი. მერე საქართველოშიც შეიჭრა, მოითარეშა იქაურობა და უკანვე გაბრუნდა განძაში“ (კიკნაძე 1960: 115).

მუნეჯიმ-ბაშის ცნობასთან დაკავშირებით, სადაც აღწერილია 1065 წლის ოქტომბერში გაერთიანებული კახელებისა და ოსთა ლაშქრის მიერ არანის დარბევისა და იქიდან დიდძალი დატყვევებული მუსლიმების წამოყვანის ფაქტი, რ. კიკნაძე წერს: „საფიქრებელია, რომ ეს ლაშქრობა ბაგრატ IV-ის მიერ ყოფილიყო მოწყობილი აბულ-ასვარის შემოსევის პასუხად. ოსთა მეფე დორდოლელი ბაგრატის ცოლისძმა იყო და ოსთა სამხედრო ძალა საქართველოს მეფეს მომავალშიც გამოუყენებია განძის მფლობელთა დასასჯელად. ოსებთან ერთად მოლაშქრე კახელების ნაცვლად ბაგრატის ლაშქარი უფრო მეტად არის მოსალოდნელი. რა თქმა უნდა, გამორიცხული არ არის, რომ საქართველოს მეფეს კახელებიც გამოეყენებინა აბულ-ასვარის წინააღმდეგ, მაგრამ რაკი ალფ-არსლანის მეორე შემოსევის წინ ბაგრატი „გალაშქრებული იყო აღებად კახეთისა“, კახელების მონაწილეობა მის მიერ მოწყობილ ლაშქრობაში საეჭვოა“ (კიკნაძე 1960: 115-116).

რ. კიკნაძეს მიაჩნია, რომ ალფ-არსლანის საქართველოში მეორე ლაშქრობის მიზეზი ქართველების მიერ არანის ოლქის დარბევა უნდა ყოფილიყო. იგი არ გამორიცხავს, რომ სადრ ად-დინ ჰუსეინის ცნობაში აღნიშნული ბაგრატ მეფის ლაშქრობა ბარდავში, და მუნეჯიმ ბაშის მიერ მოთხრობილი ქართველთა ლაშქრობა არანის ოლქში ერთსა და იმავე ფაქტს შეეხებოდეს. შევნიშნავთ, რომ სადრ ად-დინ ჰუსეინი ამ ლაშქრობას 1067, ხოლო მუნეჯიმ-ბაში 1065 წლით ათარიღებს, რაც ეჭვქვეშ აყენებს მათი მონათხრობების იდენტურობას. მითუმეტეს, როგორც კიკნაძე შენიშნავს, მუნეჯიმ-ბაშსაც აქვს გადმოცემული ალფ-არსლანის საქართველოში მეორედ ლაშქრობის ამბავი, რომელსაც იგი 1067 წლის ნოემბერ-დეკემბრით ათარიღებს. რაღა თქმა უნდა, 1065 წელს ქართველების მიერ არანის დარბევა ვერ გახდებოდა ორი წლის შემდგომ ალფ-არსლანის საქართველოში ლაშქრობის მიზეზი. ალფ-არსლანის საქართველოში ლაშქრობის ერთ-ერთი მიზეზი სადრ ად-დინ ჰუსეინის მიერ დასახელებული ბაგრატ IV-ის 1067 წელს ბარდავში ლაშქრობა უნდა ყოფილიყო. როგორც ჩანს, ქართველებს არანის ოლქში ალფ-არსლანის საქართველოში პირველ და მეორე ლაშქრობებს შორის ორჯერ ულაშქრიათ. პირველად ალფ-არსლანის პირველი ლაშქრობის შემდეგ 1065 წელს, ხოლო მეორედ ალფ-არსლანის მეორე ლაშქრობის წინ 1067 წელს.

რ. კიკნაძის აზრით, თბილისის ამირა, რომელიც თან ახლდა ალფ-არსლანს ქართლში ლაშქრობის დროს, იქნებოდა „ჯაფარის ერთ-ერთი ძეთაგანი, იგი ამ გზით ცდილობდა სულთნის გულის მოგებას და თბილისის სრულუფლებიან პატრონად გახდომას

(მანამდე ისიცა და მისი ძმაც ბაგრატის მიერ დასმული მოხელენი იყვნენ). მაგრამ ალფ-არსლანმა არ დაუფასა ჯაფარის ნაშეიერთ ერთგულება. უკან დაბრუნებისას მან თბილისზე ჩამოიარა და შეიპყრო ორივე, ხოლო თბილისიცა და მისი ოლქიც განძის პატრონ ფადლონს უბოძა“ (კიკნაძე 1960:117).

თურქ-სელჩუკების საქართველოში ლაშქრობების კვლევის საქმეში დიდი მნიშვნელობა ენიჭება გ. გაფრინდაშვილის მიერ აღმოჩენილ თრეხვისა და მირაშხანის ეპიგრაფიკულ წარწერებს. ორივე ეს წარწერა ალფ-არსლანის საქართველოში ლაშქრობას ეხება.

თრეხვის წარწერასთან დაკავშირებით მისი აღმომჩენი და გამომცემელი წერს; „სამშენებლო წარწერიდან ირკვევა, რომ ლეონტი მროველს ალფ-არსლანის მიერ საქართველოს აოხრების პირობებში 1066 წელს აუშენებია ქვაბი ღვთაების ხატისა და რუისის „საყდრის შვილთა“ თავშესაფარად“ (გაფრინდაშვილი 1961: 246). გ. გაფრინდაშვილმა წარწერის ავტორი ლეონტი მროველი XI ს-ის ცნობილ ქართველ ისტორიკოსთან, „ქართლის ცხოვრების“ პირველ შემქმნელთან გააიგივა. ეს თვალსაზრისი მკვლევართა უმრავლესობამ გაიზიარა.

გ. გაფრინდაშვილი შენიშნავს: „უკვე თრეხვის წარწერით, რომელიც პოლიტიკური ხასიათის ცნობებსაც შეიცავს, შეიძლება წარმოვიდგინოთ, თუ რა სურათია ამ დროს ქართლში. რა თქმა უნდა, რუისის საეპისკოპოსო ერთადერთი არ იყო, რომელიც ფიზიკური გადარჩენისა და კულტურული მემკვიდრეობის დაცვისათვის საიმედო თავშესაფარს ეძებდა. რუისის მაგალითზე ქვეყნის საერთო პოლიტიკური სურათია მოცემული. ქვეყნის ის რთული მდგომარეობა, რაც შეიქმნა ალფ-არსლანის შემოსევის გამო. „დღესა ჭირისასა ნავთსაყუდელად... ალფარსალან სულტანისაგან ოხრობისათა“ აშკარად მიგვითითებს იმაზე, თუ საით იყო მიმართული ამ ვითარებაში აზრი და შემოქმედება ქართველი ხალხისა, რომელიც ახალ-ახალ საშუალებებს ქმნიდა ფიზიკური განადგურებისაგან თავის დასაღწევად, ამასთან, რათა საბოლოოდ დაეგვირგვინებინა ქვეყნის პოლიტიკური გეარტიანებისა და კულტურული აღმავლობის ის ბრწყინვალედ წამოწყებული საქმე, რომელიც თავის დასასრულს უახლოვდებოდა. თრეხვის სამშენებლო წარწერიდან ჩანს, რომ საქართველოს სახელმწიფო და საეკლესიო მმართველობა სწორად აფასებდა თურქთა გამოჩენით ამიერკავკასიაში შექმნილ მდგომარეობას. თვით ლეონტი მროველს, როგორც ეპისკოპოსს, თურქ-სელჩუკებთან ბრძოლის ხანაში თავს დააწვა დიდი

საზოგადოებრივი საქმე, ქრისტიანობისა და ეროვნული დამოუკიდებლობის დაცვის საქმე, რაც უაღრესად რთულ და ძნელ პირობებში ენერგიული სამშენებლო მოღვაწეობით გამოიხატა“ (გაფრინდაშვილი 1961: 255).

თრეხვის წარწერაზე ადრე გ. გაფრინდაშვილმა მიაკვლია მირაშხანის წარწერას და 1953 წელს გამოაქვეყნა ამ წარწერის მოკლე შინაარსი. იგი წერდა: „წარწერაში მოთხრობილია თურქების სულთანის ალფ-არსლანის შემოსევა საქართველოში, კერძოდ ჯავახეთში, ჯავახეთის ახალქალაქის ციხის აღება და აოხრება“ (გაფრინდაშვილი 1953: 35-36). გაფრინდაშვილი ასევე შენიშნავდა, რომ ამ წარწერის მიხედვით, XI საუკუნის ცნობილი პოლიტიკური მოღვაწე ფარსმან თმოგველი, რომლის ცხოვრების დასასრული უცნობი იყო, დაღუპულა ახალქალაქის ციხის დამცველ მესხ აზნაურთა შორის, ამ ციხის მტრისაგან აღების დროს. ავტორს მოჰყავს ფარსმან თმოგველთან დაკავშირებული საისტორიო წყაროების („მატიანე ქართლისაჲ“, „ცხოვრებაჲ გიორგი მთაწმინდელისაჲ“, ზედა თმოგვის წარწერები, ათონის ქართველთა მონასტრის სააღაპე წიგნის ჩანაწერი) ცნობები და ასკვნის: „წარწერაში მოთხრობილია ამბავი ალფ-არსლანის შემოსევისა. ამ მხრივ იგი ერთადერთი ეპიგრაფიკული ძეგლია, რომელიც, სხვა წერილობითი წყაროების გვერდით, დამატებით საინტერესო ცნობებს გვაძლევს და ამასთანავე კიდევ უფრო ამტკიცებს აღნიშნული შემოსევების შესახებ არსებული წერილობითი წყაროების სიზუსტეს“ (გაფრინდაშვილი 1953: 36).

1996 წელს მირაშხანის წარწერა ადგილზე შეისწავლა სრულად გაშიფრა და გამოაქვეყნა ვალერი სილოგავამ. ტექსტი ასეთია: „† სახელითა ღმრთისათა, მე გიორგ[ა] ხუცესმან დაწწ[ერე] მას, ჟამს, ოდეს გას მოვიდ[ა] [...] ხორსანი ქალაქით.

ჟ მე, გიორგაჲ ფრიად ცოდვილს. მეწიფა მოვიდა ჯავახეთს და შეჰრისხ[ა] [ყ]ოველი ყოველს ქრისტესდა. მეტად ახალქალაქი[თ] წაიღო ას[წყ]უიდა და ტყუედ წაი[ლო], ყოველი მესხი აზნაური შიგნ დგა. ფარსმან პირ-ექ[მ]ნ[ა] მეფეს. მოკლეს და ყოველი ასწყუიდ[ეს].

უფალო, შეუნდვენ გოჰარის ცო[დვ]ან[ი], [ა]მენ; და მირაშხანელ[თა] ყოველთა შეუნდვენ, უფალო, ამენ; [მეცა] ფრიად ცოდ[ვი]ლი მომიკსენეთ, [გიორგა] ბერი“. (სილოგავა 2000: 231). ვ. სილოგავამ ამ წარწერასა და საერთოდ ალფ-არსლანის საქართველოში ლაშქრობებთან დაკავშირებით მნიშვნელოვანი დასკვნები გააკეთა. მისი აზრით, ვინაიდან წარწერის ტექსტი მოვლენათა უშუალო გავლენით გაკეთებული ჩანაწერის შთაბეჭდილებას ტოვებს, ამიტომ იგი შეიძლება XI საუკუნის მეორე

ნახევრით, ან სულაც 60-იანი წლებით შეიძლება დათარიღდეს. იქვე შენიშნავს: „წარწერის ტექსტში ამ ამბების თითქმის ყველა მთავარი მონაწილეა დასახელებული, გარდა უმთავრესის-სულტან ალფ-არსლანისა. აქ ეს ამბები მიეწერება „მეწიფას“ (შეიძლება სულტნის სახელი აღნიშნული იყო მეორე სტრიქონის ბოლოს, მაგრამ ეს ადგილი დაღუპულია). „მეწიფა“ ტექსტში ისეთ კონტექსტშია წარმოდგენილი, რომ იგი შეიძლება იყოს ან პირის საკუთარი სახელი, ან ზედსართავი სახელი, ან ხელისუფლის ტიტული (თითქოს, „კელმწიფე“). ამჟამად არსებული მასალების მიხედვით, გადაჭრით რაიმეს თქმა ძნელია“ (სილოგავა 2000: 236-237). ვ. სილოგავა მირაშხანის წარწერას მნიშვნელოვან საისტორიო წყაროდ მიიჩნევდა: „წარწერის ტექსტში ექვსი ტოპონიმი და ოთხი პირი (აქედან ერთი სამჯერ) იხსენიება. მასში მოთხრობილია საქართველოს ისტორიის ერთ-ერთი დრამატული ფაქტის-1064 წლის ზაფხულში თურქ-სელჩუკთა შემოსევის და ახალქალაქის აღების შესახებ. ცხადია, ერთი წარწერისათვის ეს ცოტა არ არის. წარწერაში დასახელებული ტოპონიმებია: ხორასანი, ჯავახეთი, ახალქალაქი, მირაშხანი, მესხეთი, გოგა(?) (გოგაშენი, „გა“), ხოლო პირთა სახელებია: გიორგა, ფარსმან, გოჰარი და კიდევ ერთი, არმოდწეული სახელი, რომელიც მეორე სტრიქონის ბოლოს იყო ამოკვეთილი“ (სილოგავა 2000: 241).

მირაშხანის წარწერას დიდი მნიშვნელობა ენიჭება ალფ-არსლანის საქართველოში ლაშქრობების შესასწავლად. „იგი ერთგვარი დოკუმენტური, ქრონიკალური ჩანაწერია, რომელიც მოგვითხრობს თურქ-სელჩუკთა საქართველოში 1064 წლის ზაფხულში პირველი ლაშქრობის შესახებ და ერთი დეტალით-ახალქალაქის აღების დროს ფარსმან თმოგველის დაღუპვის ცნობით-ავსებს ჩვენს ცოდნას ამ ამბებთან დაკავშირებით“ (სილოგავა 2000: 242).

ალფ-არსლანის საქართველოში პირველ ლაშქრობასთან დაკავშირებით საინტერესო კვლევა აქვს ჩატარებული შ. ლომსაძეს (ლომსაძე 1992). იგი შენიშნავს, რომ „ალფ-არსლან მუჰამედ იბნ დაუდ თოღრულ ბეგის ძე (1063-1072) ტახტზე ასვლისთანავე საქართველოზე ლაშქრობის სამზადისს შეუდგა. თანამედროვეთა გადმოცემით, იგი იყო უაღრესად გაუნათლებელი და უხეში, მაგრამ საკმაოდ გულადი სარდალი. სინამდვილეში სახელმწიფო საქმეებს მისი ვეზირი ნიზამ ალ მულქი უძღვებოდა, ალფ-არსლანი კი უმთავრესად ომებითა და მარცვა-გლეჯით იყო დაკავებული“ (ლომსაძე 1992: 147). შ. ლომსაძე ქართულ და უცხოურ საისტორიო წყაროებზე დაყრდნობით გადმოგვცემს ალფ-არსლანის საქართველოში პირველ ლაშქრობას, ახალქალაქის

ტრაგედიას, განსაკუთრებულ ყურადღებას უთმობს სელჩუკების მიერ სამხრეთ, საქართველოდან ტყვეების გაყვანას, ფიქრობს, რომ ტყვეთა რაოდენობა 80 000-ზე ნაკლები არ უნდა ყოფილიყო. „ყველა ცნობა ქართული, სომხური თუ სხვა, ხაზს უსვამს იმ გარემოებას, რომ სელჩუკებმა ახალქალაქ-ჯავახეთიდან და მის მიმდებარე მიდამოებიდან (არტაანი, ერუშეთი, სამცხე, თრიალეთი და სხვ.) დიდძალი ტყვე გაიყვანეს, აღსანიშნავია, რომ ახალქალაქის ადების შემდეგ ალფ-არსლანს ორი თვის განმავლობაში იქიდან ფეხი არ მოუცვლია. დაპყრობილ მხარეს თარეში გაუსია და დამატებით სურსათ-სანოვავისა და ტყვეების შეგროვება დაიწყო. სელჩუკთა თარეშმა მოიცვა ჯავახეთი, სამცხე, არტაანი, კოლა, ერუშეთი, შავშეთი, თრიალეთი, ქართლი. ეს იყო ე. წ. „დიდი თურქობის“ დასაწყისი“ (ლომსაძე 1992: 149). შ. ლომსაძეს მიაჩნია, რომ უკვე ამ დროს სელჩუკები საქართველოში თურქმან მომთაბარეთა ფეხის მოკიდების მიზნით, ადგილობრივ მოსახლეობას, დედა-წულიანად ყრიდა საცხოვრებელი ადგილიდან და ქვეყნის შიგნით შექმნილი სოციალურ-პოლიტიკური სირთულეების გადაჭრის მიზნით, თავიანთთვის სასურველ ადგილზე ასახლებდა. „საქართველოდან გარეკილი ტყვეები, ვინც კი გაუძლო განსაცდელს (ბორკილებს, გზას, შიმშილს) და ცოცხალი დარჩა, ალფ-არსლანმა თავიდანვე კომპაქტურად, სამხრეთ აზერბაიჯანში, ახარისა და ვარავიას ოლქებში დაასახლა, რომელთა შორის ბევრ მათგანს თითქმის 100 წლის მანძილზე უცვლელად ჰქონდა შენახული როგორც ქრისტიანობა, ისე ქართული ენა. სამწუხაროდ, მათი იქ ცხოვრებისა და ყოფითი დეტალების შესახებ ბევრი არაფერი ვიცით. ვიცით მხოლოდ, რომ გასახლების დროს მათთან ერთად ყოფილა წაყვანილი სამხრეთ საქართველოს დიდი ფეოდალი თუ ერისთავი ვინმე ბეშკენი, რომელმაც შემდეგ ზოგიერთი ჩვენებით, რჯული შეიცვალა და, როგორც სულთნის ერთგულმა მონამ, ყურებზე რგოლები შეიბა, რის საფასურადაც იქტას საფუძველზე მიიღო ქალაქები ახარი და ვარავია თავის ოლქებიანად“ (ლომსაძე 1992: 152). შ. ლომსაძე ფიქრობს, რომ ეს ბეშკენი უნდა იყოს „მატიანე ქართლისაჲს“ მიერ მოხსენიებული თუხარისის ერისთავი ბეშკენ ჯაყელი.

ახალქალაქის ბრძოლას შ. ლომსაძე განსაკუთრებულ მნიშვნელობას ანიჭებდა: „აქ წყდებოდა როგორც ჩვენი სახელმწიფოებრივი დამოუკიდებლობის, ისე კავკასიაში მისი პრესტიჟის საკითხი. თურქ-სელჩუკები ასე ორგანიზებულსა და დიდ ლაშქრობას პირველად ახორციელებდნენ საქართველოში. ამიტომ ამ ბრძოლაში გამარჯვებასაცა და დამარცხებასაც განსაკუთრებული მნიშვნელობა ჰქონდა. თუ ქართველობა შეძლებდა

მომხდურის მოგერიებას, ჩვენი ქვეყანა ასცდებოდა არა მარტო სელჩუკთა მოხარკეობას და ტყვევნა-ოხრებას, არამედ ბერძენთა შემდგომ შემოტევებსაც და ცენტრალური ხელისუფლების გაძლიერება განმტკიცებით კავკასიური მასშტაბის მთავარ ძალად გადაიქცეოდა. სამწუხაროდ, საქართველომ მაშინ ამ მისიის შესრულება ვერ შეძლო. დიდი მცდელობისა და მსხვერპლის მიუხედავად, იგი ახალქალაქთან ბრძოლაში დამარცხდა“ (ლომსაძე 1992: 149).

შ. ლომსაძე მსჯელობს ალფ-არსლანის საქართველოში მეორე ლაშქრობის შესახებაც. იგი შენიშნავს, რომ ალფ-არსლანთან და კეისართან დამოყვრებით „გულმოცემულმა და შედარებით დამშვიდებულმა ბაგრატმა 1066-1068 წ.წ. რამდენიმე ექსპედიცია განახორციელა სომხეთსა თუ ჰერეთ-კახეთ-რან-შირვანში. ამის მცნობი ალფ-არსლანი საქართველოსკენ გამოემართა... ქართლში ალფ-არსლანმა ჯავახეთის ტრაგედია გაიმეორა. ჯერ ქვეყანას მარბიელი გაუსია. მარბიელმა ქართლი რომ მოითარეშა, შემდეგ ზემო იმერეთში არგვეთს გადავიდა და სვერის ციხემდე ყველაფერს მუსრი გაავლო. სვერის ციხეში შეკეტილ ქართველმა მეციხოვნეებმა ახალქალაქელთა ბედი გაიზიარეს, სულის ამოხდამდე იბრძოლეს და მტერს დიდი ზიანიც მიაყენეს“ (ლომსაძე 1992: 251). შ. ლომსაძე შენიშნავს, რომ ალფ-არსლანმა ქართლ-იმერეთიდანაც უამრავი ქართველი გაასახლა შორეულ სპარსეთში.

სელჩუკებისა და საქართველოს ურთიერთობის საკითხზე მნიშვნელოვანი კვლევა ჩაატარა ნ. შენგელიამ. მან ამ საკითხს ორი მონოგრაფია (სელჩუკები და საქართველო XI -საუკუნეში, თბ., 1968; მცირე აზიის სელჩუკები და საქართველო, XI საუკუნის უკანასკნელი მეოთხედი- XIII საუკუნე თბ., 2003) მიუძღვნა. რითაც დიდი წვლილი შეიტანა არა მარტო საქართველოს, არამედ მთელი კავკასიისა და ახლო აღმოსავლეთის ქვეყნების შესაბამისი პერიოდის ისტორიის შესწავლის საქმეში. ქართულ ისტორიოგრაფიაში ნ. შენგელიამ პირველად შეისწავლა მთლიანობაში საქართველოსა და სელჩუკების პოლიტიკურ-ეკონომიკური ურთიერთობების საკითხები აღმოსავლური, ქართული და სხვა წყაროების შესწავლისა და ურთიერთშეჯერების საფუძველზე. იგი შენიშნავს: „სელჩუკთა სახელმწიფოს წარმოშობა უდიდესი მოვლენა იყო მახლობელი აღმოსავლეთის ხალხთა ცხოვრებაში. მათმა გამოჩენამ არსებითად შეცვალა XI-XII სს. მახლობელი აღმოსავლეთის პოლიტიკური რუკა. სელჩუკებმა დაიმორჩილეს მთელი რიგი კულტურული ხალხები შუა აზიიდან ვიდრე პალესტინამდე. მათ დაიპყრეს ირანი, ბიზანტიისა და ამიერკავკასიის მნიშვნელოვანი

ნაწილი, მთელ მახლობელ აღმოსავლეთში გაავრცელეს თავიანთი ძალაუფლება. სელჩუკთა დაპყრობით ომებს თან სდევდა მნიშვნელოვანი ცვლილებები მახლობელი და შუა აღმოსავლეთის ხალხთა ცხოვრებაში. სელჩუკებმა მნიშვნელოვანი როლი შეასრულეს ქართველი ხალხის ცხოვრებაშიც. მათ მჭიდრო პოლიტიკური და ეკონომიკური ურთიერთობა ჰქონდათ XI-XII სს. საქართველოსთან. XI საუკუნის შუა წლებიდან სელჩუკთა დამეზობლებით საქართველოს ახალ, უცხო, ეთნიკურად და სოციალური განვითარების თვალსაზრისით სავსებით განსხვავებულ ტომებთან უხდებოდა მეზობლობა მთელი სამი საუკუნის მანძილზე“ (შენგელია 1968: 5).

ნ. შენგელია ქართულ, ბიზანტიურ, არაბულ, სპარსულ, სირიულ და ოსმალურ წყაროებსა და იმდროინდელ ისტორიოგრაფიულ მონაცემებზე დაყრდნობით ვრცლად მოგვითხრობს სალჩუკთა სახელმწიფოს წარმოშობაზე, დიდ სელჩუკთა სახელმწიფო წყობილების ძირითად საკითხებზე, სელჩუკთა პირველ ლაშქრობებზე ანატოლიასა და ამიერკავკასიაში, სელჩუკების ურთიერთობაზე საქართველოსა და ბიზანტიასთან XI საუკუნის 60-70-იან წლებში, ალფ-არსლანის საქართველოში ლაშქრობებზე, მანასკერტის ბრძოლაზე, „დიდ თურქობაზე“, დიდ სელჩუკთა სახელმწიფოს დაშლაზე და სხვ.

ნ. შენგელიას აზრით, სელჩუკთა მარბიელი ხასიათის ლაშქრობები ამიერკავკასიაში, რომელსაც ჩაღრი-ბეგი მეთაურობდა, XI საუკუნის 30-იანი წლებიდან იწყება. „ამიერკავკასიის ქვეყნებში ჩაღრი ბეგის ლაშქრობის შემდეგ ადგილი ჰქონდა ოლუსთა მოდგმის ტომების სისტემატურ მომძლავრებას აზერბაიჯანის ტერიტორიაზე. საქართველოს მეფე ბაგრატ IV აქტიურად მონაწილეობდა ამიერკავკასიიდან სელჩუკთა განდევნის საქმეში, მისი მონაწილეობა სომხეთისა და აზერბაიჯანის მიერ სელჩუკების წინააღმდეგ წარმოებულ ომში აშკარად მოწმობს, რომ 30-იანი წლებისთვის საქართველოს საზღვარზე სელჩუკები გამოჩენილან. ამიერიდან სელჩუკები სისტემატურად მოდიან სომხეთისა და აზერბაიჯანის ტერიტორიაზე. სელჩუკთა განუწყვეტელი თავდასხმები საქართველოს მეზობელ სახელმწიფოებზე უარყოფით გავლენას ახდენდა საქართველოზე. ძალაუფლებურად იქმნებოდა უცხო ლაშქრის თავდასხმის საშიშროება საქართველოზე და საჭირო იყო ძალთა მობილიზაცია და მზად ყოფნა. სელჩუკთა პირველი ლაშქრობა საქართველოში 1032-1034 წლებშია სავარაუდებელი“ (შენგელია 1968: 354-355). ნ. შენგელია შენიშნავს, რომ თოდრულ-ბეგის დროს სელჩუკებმა დიდ წარმატებას მიაღწიეს დასავლეთის მიმართულებით

წარმოებულ ბრძოლებში. 1040-50 წლებში მათ დაიპყრეს რეი, ისპაჰანი, ჰამანდანი და სხვა პუნქტები. მისი აზრით, ამ დროს მთელს ანატოლიასა და ამიერკავკასიაში არ არსებობდა ისეთი სახელმწიფო, რომელიც მათ შეაჩერებდა. „დამპყრობლები კარგად იყენებდნენ ამ მდგომარეობას. ხდებოდა თურქული ეთნიკური ელემენტის თანდათანობით მომრავლება ამიერკავკასიის ქვეყნებში. 50-იანი წლებისათვის საქართველოს სამხრეთ რაიონებში უკვე გამოჩნდა მათი ტალღები. წყაროების მიხედვით, თვითონ თოდრულ-ბეგს ულაშქრია საქართველოში 1053 წელს, მანამდე, ცალკეული უფლისწულების მიერ სომხეთსა და აზერბაიჯანის ტერიტორიაზე ლაშქრობის დროს, საქართველოს სამხრეთ ნაწილში სელჩუკები არაერთგზის გამოჩენილან. სელჩუკთა მრავალიგზის ექსპედიციებს თან სდევდა მწარმოებელი საზოგადოების ფიზიკური და მატერიალური განადგურება. თოდრულ-ბეგის სიცოცხლის ბოლო წლებში სელჩუკებმა საქართველოს უკვე დიდი ზარალი მიაყენეს“ (შენგელია 1968: 355-356).

ნ. შენგელია დიდ ყურადღებას უთმობს ალფ-არსლანის თურქ-სელჩუკთა სახელმწიფოს სათავეში მოსვლისა და მისი საქართველოში ლაშქრობების ისტორიას. აღნიშნავს, რომ „ალფ-არსლანი ჯერ კიდევ მამის სიცოცხლეში იღებდა მთელ რიგ დაპყრობებში მონაწილეობას. ამ ბრძოლაში მან თავი გამოიჩინა, როგორც მამაცმა და გამბედავმა მეთაურმა. ანონიმი ავტორის ცნობით, თოდრულ ბეგმა ალფ-არსლანს თავის სიცოცხლეშივე მისცა გარკვეული ტერიტორიები: სირია, ერაყი და დამასკო. მამამისმა იგი სიცოცხლეშივე გამოაცხადა თავისი ტახტის მემკვიდრედ. ჩაღრი-ბეგ დაუდმა თავისი ძლევამოსილი ლაშქრობების დროს ბალხის, თოხარისთანის, თერმეზის, ყობადიანის და სხვა ვილაიეთების მართვა ალფ-არსლანს მიანდო, ხოლო, როდესაც ჩაღრი-ბეგი გარდაიცვალა, მთელი მისი ძალაუფლება მთლიანად ალფ არსლანს გადაეცა“ (შენგელია 1968: 106-107). ალფ-არსლანის სახელმწიფოს სათავეში მოსვლა, უმტკივნეულოდ არ მომხდარა. მას სხვადასხვა წინააღმდეგობების დაძლევა მოუხდა თავისი ძმისა და ბიძაშვილების სახით.

ალფ-არსლანს ტახტის მოპოვებისა და მისი განმტკიცების საქმეში უდიდესი დახმარება გაუწია მისმა პირველმა ვეზირმა ნიზამ ალ-მულქმა. ნ. შენგელია დიდ მნიშვნელობას ანიჭებს მის სახელმწიფო მოღვაწეობას, მას თურქ-სელჩუკთა სახელმწიფოს ფაქტიურ ხელმძღვანელად მიიჩნევს. მის სახელთან უშუალოდ იყო დაკავშირებული ამ სახელმწიფოს წარმატებები. „განათლებული და ჭკვიანი

დიდვეზირი უვიცი სულთნების ხელში შესანიშნავად ართმევდა თავს სახელმწიფო რთულ ბიუროკრატიულ აპარატს. იგი ბრწყინვალედ აკეთებდა იმას, რაც ალფ-არსლანმა და მელიქ-შაჰმა უცოდინარობის გამო ვერ შეძლეს“ (შენგელია 1968: 125). ნ. შენგელია შენიშნავს, რომ ნიზამ ალ-მულქის მცდელობა, ცენტრალური ხელისუფლებისათვის დაექვემდებარებინა მომთაბარე სელჩუკთა ტომები, მარცხით დასრულდა. იგი დაუღალავად ზრუნავდა ამ მომთაბარეთა ქვეყნის განაპირა მხარეებში-ბიზანტიისა და საქართველოს საზღვრებისაკენ განსახლებისათვის. „ალბათ, ამიტომაც იყო, რომ თვითონ უშუალოდ მონაწილეობდა მცირე აზიისა და კავკასიის ქვეყნების წინააღმდეგ წარმოებულ ომებში. მისი უშუალო მონაწილეობით სელჩუკთა ლაშქარი საქართველოშიც მოვიდა“ (შენგელია 1968: 130-131). ნიზამ ალ-მულქი მთელს მუსლიმანურ სამყაროში დიდი ავტორიტეტით სარგებლობდა, იგი ალფ-არსლანისა და მალიქ-შაჰის ერთგული მსახური იყო. ალფ-არსლანმა ნიშნად პატივისცემისა თავისი ცოლყოფილი, ბაგრატ IV-ის დისშვილი შერთო ცოლად. ასევე ხალიფამ მას რაზი-ამირ ალ-მუმინის ტიტული უბოძა, იმ დროს, როდესაც ასეთი ტიტული მხოლოდ უფლისწულებისათვის იყო განკუთვნილი. ნ. შენგელიას აზრით, ნიზამ ალ-მულქი იმდენად გაძლიერდა, რომ მისთვის წინააღმდეგობის გაწევას ვერც სულთანი და ვერც ხალიფა ვერ ბედავდნენ.

ნ. შენგელია განსაკუთრებულ ყურადღებას უთმობს თურქ-სელჩუკთა სულთნის ალფ-არსლანის საქართველოში ლაშქრობას. მკვლევარი ქართულ და უცხოურ წყაროებზე დაყრდნობით არაერთ მნიშვნელოვან დასკვნას აკეთებს ამ ლაშქრობებთან დაკავშირებით. „თოღრულ-ბეგის მიერ წარმოებული ბრძოლები საქართველოსა და ამიერკავკასიის ქვეყნების წინააღმდეგ უფრო განავითარა მისმა ძმისშვილმა ალფ-არსლანმა. ალფ-არსლანმა სასულთნო ტახტის დაკავებისთანავე ყურადღება გაამახვილა ბიზანტიის მიმართულებით დაპყრობით ომებზე. 1064 წლის გაზაფხულისათვის იგი უკვე საქართველოს საზღვარზე იდგა უზარმაზარი ლაშქრით. საქართველოში შემოსევამდე მან დაიპყრო სომხეთისა და აზერბაიჯანის მთელი რიგი ციხესიმაგრეები. სელჩუკთა ლაშქარს შეუერთდნენ აზერბაიჯანში ჩამოსახლებული თურქული მოდგმის ტომები. საქართველოს წინააღმდეგ ლაშქრობის დროს მას თან ახლდა ვეზირი ნიზამ ალ-მულქი და თავისი შვილი მელიქ-შაჰი“ (შენგელია 1968: 356).

ნ. შენგელია დაწვრილებით იკვლევს ალფ-არსლანის საქართველოში პირველი ლაშქრობის შესახებ არსებულ ქართულ და უცხოურ წყაროებს და ამის საფუძველზე

გადმოგვცემს, ალფ-არსლანის ლაშქრის მიერ სამხრეთ საქართველოს ტერიტორიების დარბევას, ახალქალაქის გმირულ დაცვას, მის აოხრებას, ახალქალაქიდან სელჩუკების მიერ უამრავი ტყვის გაყვანას და სიმდიდრის ხელში ჩაგდებას. იგი საქართველოში სელჩუკთა პირველ ლაშქრობას 1064 წლის ივნის-ივლისით ათარიღებს. ამ თარიღს იზიარებს ქართველი ისტორიკოსების უმრავლესობა. ნ. შენგელია ყურადღებას ამახვილებს ქართველთა მარცხის შემდეგ, ბაგრატ IV -ის აქტიურობაზე მისი დისწულის ალფ-არსლანისთვის მითხოვებასთან დაკავშირებით: „ბაგრატ მეფის ასეთი დაჟინებითი მეცადინეობა თავისი დისწულის სულთნისათვის მითხოვების საქმეში სავსებით გასაგებია, ბაგრატ მეფე ამით ყოველნაირად ცდილობდა საქართველოს კარზე მომხდარი მტრისაგან ქვეყნის აოხრება და განადგურება თავიდან აეცილებინა და ამიტომ გარკვეულ კომპრომისებზე მიდიოდა. იგი იძულებული იყო სულთანთან კარგი ურთიერთობა ჰქონოდა; სულთანთან დამოყვრებას ბაგრატ მეფე გარკვეულ პოლიტიკურ მიზნებს უკავშირებდა... იგი ამაში ქვეყნის აოხრების თავიდან აცილების ერთ-ერთ გამოსავალს ხედავდა“ (შენგელია 1968: 228). ნ. შენგელია შენიშნავს, რომ ალფ-არსლანის პირველი ლაშქრობა მხოლოდ საქართველოს სამხრეთ რაიონებს შეეხო. მტერი ქართლში არ გადმოსულა, ისე გაბრუნდა ანისის მიმართულებით. იგი დეტალურად აღწერს სელჩუკების მიერ ანისის აღებას, ამიერკავკასიიდან წასული ალფ-არსლანის საქმიანობას, შემდეგ განსაკუთრებულ ყურადღებას უთმობს ალფ-არსლანის საქართველოში მეორე ლაშქრობას, ფიქრობს, რომ ეს ლაშქრობა კიდევ იფრო მძიმე აღმოჩნდა საქართველოსა და ამიერკავკასიის სხვა ქვეყნებისათვის „ალფ-არსლანმა ჯერ კახეთი დაარბია, იქ სამი კვირა დარჩა, შემდეგ თბილისისაკენ გამოემგზავრა და გზად ყველაფერი ააოხრა. ქართლში გადმოსულმა სულთანმა მარბიელი ლაშქარი გაუსია საქართველოს შიდა პროვინციებს, ააოხრა ქართლი და შემდეგ არგვეთს გადავიდა“ (შენგელია 1968: 356). ნ. შენგელია სადრ ად-დინ ჰუსეინის მიერ მოხსენიებულ ჯვრის ციხეს სვერის ციხესთან აიგივებს და აღნიშნავს; „სვერის ციხეში ქართველებს ძლიერი ლაშქარი ჩაეყენებინათ და მტერს სასტიკი ბრძოლა გაუმართეს. სელჩუკებმა ციხის აღება მხოლოდ ნიზამ ალ-მულქის გულმოდგინებითა და მეცადინეობით მოახერხეს“ (შენგელია 1968: 241). ალფ-არსლანმა საქართველოში, ნ. შენგელიას აზრით, 1068 წლის დეკემბერი და 1069 წლის იანვარი გაატარა, ყველაფერი გაანადგურა და ფარსში წავიდა. „ბაგრატ მეფემ სულთანს არ მისცა ხარაჯი და არავითარი ვალდებულება არ იკისრა მის წინაშე“ (შენგელია 1992: 71).

მარქსისა და ენგელსის ქრონოლოგიურ ამონაწერებზე დაყრდნობით ნ. შენგელია წერს: „ჩანს, ალფ-არსლანი სიცოცხლის უკანასკნელ პერიოდში საქართველოში ლაშქრობის საქმეს თავის ერთ-ერთ მთავარ ღონისძიებად მიიჩნევდა და თავის შვილს-მელიქ-შაჰს ავალებდა მის დაპყრობას, როგორც საქართველოში ნამყოფს, ნაბრძოლებს და ადგილობრივ ვითარებაში გათვითცნობიერებულს“ (შენგელია 1968: 303).

ნ. შენგელიას მიაჩნია, რომ ალფ-არსლანის ამიერკავკასიაში ლაშქრობების შემდეგ ადგილობრივი მკვიდრი მოსახლეობის გვერდით არსებობას იწყებს თურქული ეთნიკური ელემენტი. იგი უარყოფითად ახასიათებს საქართველოსთვის, სელჩუკების გამარჯვებას მანასკერტის ბრძოლაში: „მანასკერტთან სელჩუკთა გამარჯვებას უდიდესი უარყოფითი მნიშვნელობა ჰქონდა საქართველოსა და ამიერკავკასიის ხალხთათვის. ამიერიდან, საქართველოს კულტურული ბიზანტიის ნაცვლად უმეზობლდებოდნენ მეჯოგე სელჩუკიან თურქთა ტომები, რომლებიც მაღალგანვითარებული, ინტენსიური მეურნეობის მქონე ქართულ ფეოდალურ საზოგადოებას უპირისპირდებოდნენ“ (შენგელია 1968: 352-353).

სელჩუკთა და ქართველების ურთიერთობის კვლევაში დიდი ღვაწლი მიუძღვის რ. მეტრეველს. იგი წერს „სელჩუკთა მოძრაობამ თავისი დადი დაასვა არა მარტო წინა აზიისა და კავკასიის ქვეყნებს, არამედ გავლენა იქონია ეგვიპტეზე, ბიზანტიაზე, სამხრეთ აღმოსავლეთ ევროპაზე, ხოლო ჯვაროსნული ლაშქრობების დროს მთელს დასავლეთ ევროპაზე“ (მეტრეველი 1990: 54).

რ. მეტრეველი შენიშნავს, რომ საქართველოში 60-70-იან წლებში საგარეო პოლიტიკური ვითარების გართულების უშუალო მიზეზი თურქული მოდგმის ტომების სელჩუკების გამოჩენა იყო. თურქ-სელჩუკთა დაპყრობები გაცილებით უფრო დამანგრეველი და დამღუპველი იყო, ვიდრე არაბთა ან ბიზანტიელთა შემოსევები და ბატონობა. მათი დაპყრობების გამო „შეფერხდა საქართველოს და საერთოდ კავკასიის გაერთიანება-ცენტრალიზაციის პროგრესული საქმე“ (მეტრეველი 1990: 74).

თურქ-სელჩუკთა საქართველოში ლაშქრობების ხასიათის წარმოსაჩენად რ. მეტრეველს მოჰყავს ციტატა „ქართლის ცხოვრებიდან“. „გამრავლდა შიში და ჭირი მათგან ჩუენ ზედა. რამეთუ იწყეს მიერითგან რბევად, ტყუენვად და მოოხრებად, წუად, სრვად და ტყუეობად ჩვენ ქრისტიანეთა“ (მეტრეველი 1990: 54). ვფიქრობთ, აღნიშნული ციტატა ყველაზე უკეთ ახასიათებს იმ რთულ ვითარებას, რაც საქართველოში სელჩუკთა შემოსევებით იყო გამოწვეული.

რ. მეტრეველს მიაჩნია, რომ „XI საუკუნის საქართველოს ძალა შესწევდა, რომ თურქ-სელჩუკთა ურდოებს გამკლავებოდა, მაგრამ ქართველთა მობილიზაცია არ ხერხდებოდა. მეფესთან დაპირისპირებული დიდგვაროვანი აზნაურები არათუ ერთიანდებოდნენ საერთო მტრის წინააღმდეგ, პირიქით, მტერს ეხმარებოდნენ. საქართველოს „ციხე შიგნიდან ტყდებოდა“ (მეტრეველი 2002: 425).

რ. მეტრეველს განსაკუთრებული დამსახურება მიუძღვის ბაგრატ IV-ის შემდგომი დროის (დავითისა და თამარის ეპოქა) საქართველოსა და თურქ-სელჩუკების ურთიერთობის კვლევის საქმეში. აღნიშნული პერიოდი ამჟერად ჩვენი კვლევის ფარგლებს სცილდება.

სელჩუკთა და ქართველების ურთიერთობებთან, მათ შორის ალფ არსლანის ლაშქრობებთან დაკავშირებით საფუძვლიანი კვლევა აქვს ჩატარებული ზ. პაპასქირს. იგი შენიშნავს, რომ სელჩუკები ამიერკავკასიაში გამოჩენის შემდეგ, XI საუკუნის 30-იანი წლებიდან თითქმის მუდმივ გავლენას ახდენდნენ საქართველოს სახელმწიფოს პოლიტიკურ აქტიურობაზე. საქართველოს სამეფო კარი ფხიზლად ადევნებდა თვალყურს ამიერკავკასიაში შექმნილ მდგომარეობას და გარკვეულ ზომებს იღებდა სელჩუკთა აგრესიის თავიდან ასაცილებლად (Папаскири 2001: 85). მისი აზრით, სელჩუკთა უშუალო აგრესიას საქართველო XI საუკუნის 50-იანი წლებისთვის ჯერ კიდევ არ განიცდიდა, პირიქით, ამ დროს მათი ფაქტორი გარკვეულწილად დადებითადაც მოქმედებდა საქართველო-ბიზანტიის ურთიერთობის დარეგულირებაში. რამდენადმე შეიცვალა მდგომარეობა XI საუკუნის 60-იანი წლების დასაწყისიდან, როცა ბაგრატ IV-მ წარმატებით დაძლია ფეოდალური ოპოზიციის წინააღმდეგობა. ამ დროიდან ბაგრატ IV-ის ყველა ნაბიჯი შინაპოლიტიკურ არენაზე სელჩუკთა ინტერესებში მოექცა. ეს პირველად კარგად გამოჩნდა 1062 წელს, როდესაც, არაბი ავტორის ცნობით, საქართველოს მეფემ თბილისი შეისყიდა და მთებში გზების გაფართოება ბრძანა, რათა ქრისტიანებს გაადვილებოდათ ისლამის ქვეყნებში გადასვლა. ბაგრატ მეფის ამ საქციელში „სელჩუკთა სასულთნოს მმართველ წრეებს სრულიად დასაბუთებულად შეიძლება დაენახათ ქართველთა მეფის მზადება ახალი სამხედრო აქციებისათვის. ვფიქრობთ, ამ დროიდან ხდება ამიერკავკასიის დაპყრობის გზაზე საქართველო სელჩუკთა მთავარი მოწინააღმდეგე“ (Папаскири 2001: 88).

ზ. პაპასქირი აღწერს ალფ-არსლანის საქართველოში პირველ ლაშქრობას 1064 წელს, რომელის დროსაც სელჩუკებმა დაარბიეს სამხრეთ საქართველოს ცალკეული რაიონები

და ააოხრეს ახალქალაქი. ქართველთა გმირობით დაფიქრებულმა ალფ-არსლანმა ქვეყნის შიგნით ლაშქრობა ვეღარ გაბედა და ბაგრატ IV-ს სამშვიდობო მოლაპარაკება შესთავაზა. ქართველების მარცხისა და სადრ ად-დინ ჰუსეინის თხზულებაში დაცული ცნობის მიუხედავად, საქართველოს მეფის ხარაჯის კისრებასთან დაკავშირებით, ზ. პაპასქირი გამორიცხავს ბაგრატ მეფის ყოველნაირ ანგარიშ-ვალდებულებას ალფ-არსლანის სასარგებლოდ. რაც შეეხება ალფ-არსლანისა და ბაგრატის დისშვილის ქორწინებას, იგი ამ საქმეში ბაგრატ IV-ის მონაწილეობას, მის გარკვეულ დიპლომატიურ წარმატებად მიიჩნევს. ამ დროს საქართველოს მეფემ შეძლო სამშვიდობის შემოერთება და კონტროლის დამყარება ტაშირ-ძორაკეთის სამეფოზე, ასევე მოახდინა ერთგვარი ძალის დემონსტრირება სელჩუკთა სულთნის თვალში. ბაგრატ IV-ის ამ სამხედრო აქციებს უნდა მოჰყოლოდა ჯაფარიანთა ხელისუფლების აღდგენა თბილისში, რომელიც სელჩუკთა უშუალო დახმარებით განხორციელდა. „ქართველი მეფის სამხედრო-პოლიტიკური აქციები აშკარად მოწმობს, რომ 1064-1068 წწ.- ალფ-არსლანის საქართველოში პირველ და მეორე ლაშქრობებს შორის პერიოდში, ბაგრატ IV-ს არანაირი ვასალური მოვალეობა არ ჰქონდა, პირიქით, ცხადია, რომ საქართველოს მეფე ამ დროს საერთოდ არ გაურბოდა დაპირისპირებას და სულაც არ მიდიოდა რაიმე დათმობაზე სელჩუკთა სულთანთან, როგორც ამას მიიჩნევს ნ. შენგელია. არამედ ატარებდა დამოუკიდებელ საკმარისად აქტიურ საგარეო პოლიტიკას პოზიციების გასამაგრებლად აღმოსავლეთ კავკასიაში. შემთხვევითი არაა, რომ სელჩუკთა შემოსევების წინა დღეს ქართველი მეფე კახეთ-ჰერეთის შემოერთებით იყო დაკავებული. მხოლოდ თურქთა შემოსვლამ აიძულა იგი, რათა შეეწყვიტა შემდგომი შეტევა და უკან დაბრუნებულიყო“ (Папаскири 2001: 90).

ზ. პაპასქირს ალფ-არსლანის საქართველოში მეორე ლაშქრობის უშუალო მიზეზად ბაგრატ IV-ის მიერ ბარდავის დარბევა მიაჩნია. იგი არ გამორიცხავს, რომ სელჩუკთა ასეთი ოპერატიული გამოჩენა მომხდარიყო კახთა მეფის აღსართანის ინიციატივით. ამაზე უნდა მიუთითებდეს სადრ ად-დინ ჰუსეინის თხზულებაში დაცული ფაქტი სულთნის შენაერთების მიერ ჰერეთის ტერიტორიიდან „აფხაზი ყაჩაღების“ განდევნის შესახებ. ასევე აღსართანის სასწრაფო გამოცხადება ალფ-არსლანთან და მორჩილების გამოცხადება (Папаскири 2001: 90). ზ. პაპასქირი იქვე შენიშნავს: კახთა მეფის გარდა ალფ-არსლანის ბანაკში აღმოჩნდნენ ტაშირ-ძორაკეთის მეფე კვირიკე და თბილისის ამირა. ეს ფაქტი კიდევ ერთი მტკიცებულებაა იმისა, რომ ამიერკავკასიაში

პრაქტიკულად ერთადერთი რეალური ძალა, რომელიც ღიად დაუპირისპირდებოდა სელჩუკებს იყო გაერთიანებული საქართველოს სამეფო.

ზ. პაპასქირი თანამიმდევრულად გადმოგვცემს ალფ-არსლანის საქართველოში მეორე ლაშქრობასთან დაკავშირებულ საკითხებს და არაერთ საგულისხმო დასკვნას აკეთებს. მისი აზრით, (რომელსაც სრულიად ვეთანხმებით) ალფ-არსლანის ლაშქრობის შემდეგ ბაგრატ IV-ის მიერ ფადლონის დატყვევება და თბილისის დაკავება დიდი დარტყმა იქნებოდა სელჩუკთა სულთნისთვის. იგი ამ დროს ბაგრატის თავისუფალ მოქმედებას ხსნის ახლო აღმოსავლეთში შექმნილი პოლიტიკური სიტუაციით, კერძოდ, სელჩუკებსა და ბიზანტიას შორის ურთიერთობის გამწვავებით. განსაკუთრებით საინტერესოა მისი მოსაზრება ალფ-არსლანის მიერ საქართველოს მეფესთან ელჩის გაგზავნითა და მშვიდობიანი მოლაპარაკების გზით ფადლონის განთავისუფლებასთან დაკავშირებით: „XI საუკუნის 60-იანი წლების ბოლოს, როდესაც ბაგრატმა განახორციელა თავდასხმითი ოპერაციები აღმოსავლეთ საქართველოში, ალფ-არსლანი დაკავებული იყო ბიზანტიის წინააღმდეგ გენერალური ბრძოლის მომზადებით. როგორც ჩანს, ამ გარემოებამ აიძულა სელჩუკთა სულთანი, გამოეჩინა გარკვეული სიფრთხილე ბაგრატთან ურთიერთობაში. ამის გარდა, ბაგრატის დასჯა არც ისე ადვილი იყო (რაშიც სელჩუკები დარწმუნდნენ საქართველოში ორჯერ ლაშქრობის დროს), ალფ -არსლანს უნდა გაეთვალა ომის დროს ბიზანტიის მხარდასაჭერად ბაგრატ IV-ის ბრძოლაზე. აქედან გამომდინარე გვაქვს საფუძველი ვიფიქროთ, რომ ალფ-არსლანის დიპლომატიური სვლა ბაგრატის მიმართ გათვლილი იყო ბიზანტიის წინააღმდეგ მომავალ ბრძოლაში ქართველი მეფის ნეიტრალიტეტის უზრუნველყოფაზე. ამიტომ საქართველოს მეფესთან კონფრონტაცია მსხვილი სამხედრო კამპანიის წინ, სელჩუკთა მხრიდან იქნებოდა დიპლომატიური შეცდომა“ (პაპასქირი: 1991: 20-24; Папаскири 2001: 92-95; Папаскири 2010: 227-228).

ზ. პაპასქირი ყურადღებას ამახვილებს საქართველოს მეფის ინიციატივით ქართველ-ოსთა ერთობლივ ლაშქრობაზე განძაში. აღნიშნავს, რომ საქართველო გამოდიოდა ანტისელჩუკური ფრონტის ინიციატორად ამიერკავკასიაში. ამ წარმატებულმა სამხედრო ოპერაციამ მნიშვნელოვნად გაზარდა „აფხაზთა“ და „ქართველთა“ მეფის ავტორიტეტი. საქართველოს სამეფო, სელჩუკთა ლაშქრობების მძიმე შედეგების მიუხედავად, რჩებოდა წამყვან პოლიტიკურ ძალად, რომელიც პრეტენზიას აცხადებდა ჰეგემონობაზე საერთო კავკასიური მასშტაბით.

სელჩუკთა და ქართველების ურთიერთობის საკითხები გარკვეულწილად აისახა საზღვარგარეთულ ისტორიოგრაფიაშიც. მათ შორის გამორჩეულია თურქული ისტორიოგრაფია. მისი ისეთი წარმომადგენლები როგორებიც არიან ა. ქოიმენი (Köymen 1963), ი. ქაფესოღლუ (Kafesoğlu 1953), მ. ჰალილ ინანჩი, (Yinanç 1944), ა. სევინი (Sevim 2002) და სხვ. მიუხედავად იმისა, რომ ისინი ხშირად ტენდენციურად (ამართლებენ, ბუნებრივ მოვლენად მიიჩნევენ სელჩუკთა დაპყრობით ომებს, არასწორად აფასებენ სელჩუკთა გავლენის ქვეშ მოქცეული ქრისტიანი ხალხის ისტორიას) განიხილავენ სელჩუკთა სახელმწიფოსთან დაკავშირებულ საკითხებს, მათ შრომებს მაინც დიდი მნიშვნელობა აქვს ჩვენი საკვლევი პერიოდის შესწავლისათვის.

სელჩუკების საქართველოში ლაშქრობებთან დაკავშირებით განსაკუთრებით საინტერესოა ა. სევინის გამოკვლევა. იგი შენიშნავს, რომ ჯერ კიდევ სულთან ალფ-არსლანის მამას, ჩალრი-ბეგს ულაშქრია სომხეთსა და სამხრეთ საქართველოში. ლიპარიტს მისთვის წინააღმდეგობა ვერ გაუწევია. ამ ლაშქრობის შემდეგ ჩალრი-ბეგი შუამდინარეთში დაბრუნებულა და თოღრულ-ბეგისათვის მიუწოდებია ინფორმაცია მეზობელი სახელმწიფოების შესახებ. ალი სევინის აზრით, სელჩუკებს სომხური და ქართული სახელმწიფოების დაპყრობა გაუადვილა ბიზანტიის იმპერატორების სისუსტემ. იგი მოგვითხრობს ბიზანტიელთა ბრძოლაზე ლიპარიტის სარდლობით სელჩუკთა წინააღმდეგ. ამ ბრძოლაში 1048 წლის 18 სექტემბერს მის მარცხსა და ტყვედ ჩავარდნაზე, თოღრულ ბეგის ანატოლიის მიმართულებით ლაშქრობებზე.

ა. სევინი ყურადღებას ამახვილებს ალფ-არსლანის სულთნობის პერიოდზე და მის საქართველოსთან ურთიერთობაზე. აღნიშნავს, რომ ალფ-არსლანმა ტახტის დაკავებისთანავე დაიწყო ლაშქრობა აღმოსავლეთ ანატოლიასა და საქართველოში. მას ეახლა ანატოლიაში მუდმივად მოლაშქრე ემირი თულთექინი და მიაწოდა ინფორმაცია ანატოლიაში მიმავალი გზების შესახებ. ალფ-არსლანმა დაიპყრო კანგარი, ქართლი და ჯავახეთი. ბაგრატ IV გაქცევით უშველა თავს, სულთანს ელჩი გაუგზავნა, მიიღო ისლამი და იკისრა ხარაჯის გადახდა. სულთანს თან ახლდა მალიქ შაჰი და ნიჰამ ალ-მულქი.

ა. სევინის მიხედვით, ანატოლიასა და ამიერკავკასიაში პირველი ლაშქრობის დროს დაპყრობილი ტერიტორიები ალფ-არსლანს შემდეგნაირად გაუნაწილებია: ვანის ტბის აუზი-ნახჭევანის ემირს ებუ დულაფს მისცა, ანისი და მისი სანახები-დუბელის ემირს მანუჩარას, საქართველოს ერთი ნაწილი განჯის ვალს-ფადლონს უბოძა, მეორე ნაწილი

კი თბილისის საამიროს შემოუერთა. ანატოლიიდან ალფ-არსლანის წასვლის ერთ-ერთი მიზეზი ალი სევიმის აზრით, სასულთნოში დაწყებული არეულობა გამხდარა. მას ანატოლიაში შემდეგი დაპყრობების მიზნით თავისი ამირები დაუტოვებია. იგი განიხილავს აგრეთვე ალფ-არსლანის საქართველოში მეორე ლაშქრობას და ამ ლაშქრობის თარიღად 1068 წელს ასახელებს. შემდეგ ყურადღებას ამახვილებს მალიქ-შაჰის საქართველოში ლაშქრობებზე, მის ურთიერთობაზე საქართველოს მეფე გიორგი II-სთან. აღწერს სელჩუკების მიერ შავშეთის, აჭარის, არტანუჯისა და მთელი ჭოროხის ხელში ჩაგდების ამბავს.

ამიერკავკასიისა და სელჩუკთა ურთიერთობის შესწავლის საქმეში მნიშვნელოვან ადგილს იკავებს აზერბაიჯანელი ისტორიკოსის რ. ჰუსეინოვის გამოკვლევა (Гусейн-Заде 2010). მისი აზრით, სელჩუკთა დაპყრობითი მოძრაობა დასავლეთის მიმართულებით იწყება 1040 წლიდან, დენდანიკანთან ბრწყინვალე გამარჯვების შემდეგ. ამ დროიდან ისინი თამაშობენ მნიშვნელოვან როლს აღმოსავლეთის, მათ შორის, კავკასიის-აზერბაიჯანის, საქართველოს, დაღესტნის ხალხთა ცხოვრებაში (რატომდაც არ ასახელებს სომხეთს. უნდა ითქვას, რომ ჰუსეინოვი სელჩუკებისა და კავკასიის ქვეყნების ისტორიის კვლევისას საერთოდ უგულვებელყოფს სომხეთის ფაქტორს).

რ. ჰუსეინოვი შენიშნავს, რომ ალფ-არსლანმა სელჩუკთა სახელმწიფოს სათავეში მოსვლისთანავე განახორციელა პირველი ლაშქრობა კავკასიაში. ამ ლაშქრობას ჰქონდა ორი მიზანი. პირველ რიგში მას სურდა სამხრეთ-დასავლეთი საზღვრის გამაგრება კავკასიაში, რათა თავიდან აეცილებინა ბიზანტიელთა თავდასხმები. მეორე მხრივ, იგი ცდილობდა, დახმარებოდა თავის ვასალებს სამხრეთ-აღმოსავლეთ კავკასიაში, რომლებიც ასრულებდნენ მესაზღვრეების ფუნქციას. საქართველოზე თავდასხმა სელჩუკებმა განახორციელეს ნახჩევანის გავლით. სავ-თეგინმა ალყაში მოაქცია ახალქალაქი, გაჟლიტა მცველები, აიღო იგი და გაძარცვა (ჰუსეინოვი არაფერს ამბობს ალფ-არსლანის მონაწილეობაზე ახალქალაქის აღების საქმეში). ამავე დროს აიღეს სელჩუკებმა რუსთავი, რომელიც დიდი წინააღმდეგობის გამო მთლიანად გადაწვეს. სხვა ქალაქებისა და პროვინციების გაძარცვის მიზნით, ბაგრატ IV-მ მისცა სულთანს ვასალური ფიცი, იკისრა ჯიზიის გადახდა (რა თქმა უნდა ვერ დავეთანხმებით რ. ჰუსეინოვს ქართველი მეფის მორჩილებასა და ჯიზიის გადახდასთან დაკავშირებით) და მიათხოვა თავისი დისშვილი.

რ. ჰუსეინოვი ასახელებს იმ ქალაქებს (თავრიზი, განჯა, ხოი, ანისი, ახალქალაქი და რუსთავი), რომლებმაც დიდი წინააღმდეგობა გაუწიეს ალფ-არსლანს. იქვე შენიშნავს, რომ ყველა დაუმორჩილებელი ქალაქი სელჩუკებმა, როგორც წესი, გამარცხეს, გადაწვეს და დაუმორჩილეს საოკუპაციო რეჟიმს.

რ. ჰუსეინოვი აღნიშნავს, რომ 1067 წლის ბოლოს ალფ-არსლანი კვლავ გამოჩნდა ცენტრალურ კავკასიაში. მასთან საჩუქრებით გამოცხადდა შარვანშაჰი. მეორე ლაშქრობა სელჩუკებმა საქართველოში განახორციელეს არანის გავლით. მისი აზრით, სელჩუკები პირველად ქალაქ თბილისს მოადგნენ, რომელიც იყო დიდი სავაჭრო და სამხედრო-სტრატეგიული ცენტრი. ქალაქის მმართველმა, ჯაფარიდმა ემირმა, სელჩუკებს ქალაქის კარები გაუხსნა, დიდ სულთანს მორჩილება გამოუცხადა და ჯიზიას გადახდა იკისრა. კახთა მეფემ მუსლიმობა მიიღო და ისიც ალფ-არსლანის მხარეზე გადავიდა. ქართლის მეფე ბაგრატ IV (ჰუსეინოვი მას შეცდომით საქართველოს მეფის ნაცვლად ქართლის მეფედ მოხსენიებს) შეეცადა წინააღმდეგობა გაეწია სელჩუკთათვის, მაგრამ გადამწყვეტ ბრძოლაში ქართველები დამარცხდნენ. ალფ-არსლანმა დაიკავა მთელი რიგი ციხე-სიმაგრეები ქართლსა და არგვეთში. სულთანმა ზამთარი ქართლში გაატარა, გაზაფხულზე კი განჯისა და ბარდის გავლით ხორასანში გაემგზავრა. თავის ათაბაგად თბილისსა და რუსთავში ალფ-არსლანმა დანიშნა ფადლონ შედედინი. „XI საუკუნეში დიდი სელჩუკი სულთნები პოზიტიურ ურთიერთობებს ინარჩუნებდნენ მხოლოდ შედედინების ემირებთან, რომლებიც ითვლებოდნენ ერთადერთ საყრდენებად და სელჩუკთა პოლიტიკის გამტარებლებად რეგიონში. ისინი ყველაზე მეტად ეწინააღმდეგებოდნენ ბიზანტიის მიზნებს კავკასიაში, რითაც ეხმარებოდნენ სელჩუკებს დასავლეთის მიმართულებით გადაადგილებაში. აი რისთვის დანიშნა სულთანმა თავის ათაბაგად თბილისსა და რუსთავში შედედინი. მას ჩააბარა აგრეთვე ანისიც“ (Гусейн-Заде 2010: 76-77).

რ. ჰუსეინოვს მიაჩნია, რომ სელჩუკთა მიერ კავკასიის რეგიონის დაკავება ნაკარნახევი იყო მისი სამხედრო-სტრატეგიული და ეკონომიკური მნიშვნელობით. აქ განხორციელებული სამხედრო აქციები იყო სელჩუკთა იმ გენერალური გეგმის ერთი ნაწილი, რომელიც ითვალისწინებდა ცენტრალური და წინა აზიის დამორჩილებას.

კვლევისას, ბუნებრივია, ვიყენებდით სხვა ავტორთა შრომებსაც, მაგრამ სადისერტაციო ნაშრომის ამ თავში მათი წარმოჩენა ვერ მოხერხდა.

III თავი

თურქ-სელჩუკთა სახელმწიფოს ჩამოყალიბება

თურქ-სელჩუკები ეკუთვნოდნენ ოღუზ თურქმანულ ტომებს და თავდაპირველად ცენტრალური აზიის სტეპებში ბინადრობდნენ, ხოლო შემდეგ არალის ტბასა და ურალს შორის მომთაბარეობდნენ. ისინი საზოგადოებრივი განვითარების გვაროვნულ საფეხურზე იდგნენ და მომთაბარე მეჯოგეობას მისდევდნენ. ოღუზები 24 შტოდ იყოფოდნენ. სელჩუკები მათ ერთ-ერთ შტო-კინიკის ეკუთვნოდნენ. ეს იყო ოღუზებში საკმაოდ წარჩინებული და მრავალმრიცხოვანი ტომი (შენგელია 1968: 62; Köymen: 1963: 13; Карпов 1945: 3). მათთვის აღებ-მიცემობის მთავარი საგანი იყო ცხვარი (Бартолд 1963: 564). ბერძენი ისტორიკოსი ნიკიფორე ვრიენიოსი თურქ-სელჩუკებს შემდეგნაირად ახასიათებს: „ეს ხალხი დამოუკიდებელი იყო და დასაბამითგან ხალხმრავალი და მამაცი, რომელიც რძით იკვებებოდა, და ჯერ არასდროს არ ყოფილა დამონებული არცერთი ხალხის მიერ“ (ვრიენიოსი 1963: 304).

ოღუზთა ტომებში IX-X საუკუნეებიდან ჩნდება პირველი სახელმწიფოებრივი ჩანასახი, რომლის სათავეში იდგა მეფე ანუ იაბლუ, ამასთანავე იწყება ბრძოლა პირველობისათვის. იაბლუ რეალურად არ იყო ერთპიროვნული მმართველი, ყველა ტომს თავისი მეთაური ჰყავდა. X საუკუნიდან მათში დაწინაურდა ბარანთა ტომის ლიდერი ალი-ხანი და იაბლუს ტიტულიც მან დაისაკუთრა. ამავე დროს გაძლიერდა სელჩუკის მამა-დუკაკი, რომლის მოღვაწეობის დროიდანაც იწყება სელჩუკთა სახელმწიფოს ისტორია. იგი ერთ-ერთი ყველაზე უფრო ხალხმრავალი მეთაურთაგანი იყო და იაბლუს ლაშქარში შედიოდა. დუკაკი ხშირად ერეოდა იაბლუსთან ერთად დიდმნიშვნელოვანი საქმეების გადაწყვეტაში და დიდი გავლენით სარგებლობდა მთელ ტომში (შენგელია 1968: 63). დუკაკისა და იაბლუს ურთიერთობის შესახებ მნიშვნელოვანი ცნობები აქვს დაცული მირხონდს, რომელსაც თავის თხზულებაში უცვლელად აქვს შეტანილი ჩვენამდე მოუღწეველი „მელიქ ნამეს“ ცნობები. მირხონდი „მელიქ-ნამეზე“ დაყრდნობით აღნიშნავს, რომ დუკაკს სახელმწიფო მართვა-გამგეობაზე სწორი შეხედულება ჰქონდა და შორსმხედველი პიროვნება იყო. იაბლუ (მირხონდი მას შეცდომით ხაზართა მეფედ

მოიხსენიებს) სისტემატიურად იწვევდა მას სახელმწიფო საქმეებში მონაწილეობის მისაღებად. მის მამაცობასა და კეთილშობილებაზე ყველგან ლაპარაკობდნენ (www.vostlit.info, Восточная литература, Авторы и источники на букву „М“, Мирхонд, Сад чистоты, Отривок 1). სადრ ად-დინ ჰუსეინი სელჩუკის მამის შესახებ წერს: „პირველი მათ შორის, ვინც მიიღო ისლამი, იყო ემირი დუკაკი. დუკაკი თურქულ ენაზე ნიშნავს „რკინის ისარს“. დუკაკი იყო მამაცი, გულადი, გონიერი და გონებათმავილი კაცი. ის ფლობდა მართვის უნარს. თურქთა მელიქმა ხელისუფლება დუკაკს გადასცა. ის განათებული იყო თავისი აზრისა და გონების ჩირადებით“ (www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин, Сообщения о сульджуском государстве, Главы 1-8). ზემოაღნიშნული წყაროებიდან აშკარაა, რომ სელჩუკის მამას დიდი გავლენა აქვს ოღუზთა ტომებში და აქტიურად მონაწილეობს სახელმწიფოს მართვა-გამგეობაში. წყაროებში მის შესახებ მცირე ცნობებია შემონახული. ანონიმი ავტორის თხზულებაში აღწერილია დუკაკის ქორწინება და მათი პირველი შვილის-სელჩუკის დაბადება. დუკაკი მაშინ გარდაიცვალა, როდესაც მისი შვილი სელჩუკი 17-18 წლისა იყო (შენგელია 1968: 65). დუკაკის გარდაცვალების შემდეგ იაბლუმ მის შვილს სელჩუკს სუბაშის (მხედართმთავრის) ტიტული უბოძა და რაზმის მეთაურად დანიშნა. სადრ ად-დინ ჰუსეინის ცნობით, „როცა ემირმა სელჩუკმა-ემირ დუკაკის შვილმა, მიაღწია სრულ ასაკს თურქთა მმართველმა მას ჩააბარა ჯარის მეთაურობა და მისცა სუბაშის ტიტული-ეს მათ ენაზე ნიშნავს „ჯარის უფროსს““ (www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин, Сообщения о сульджуском государстве, Главы 1-8). სელჩუკი იმდენად გაძლიერდა, რომ საფრთხე შეექმნა თვით იაბლუს ხელისუფლებას. წყაროებში (ბარ ჰებრაი, მირხონდი, სადრ ად-დინ ჰუსეინი) აღნიშნულია, თუ როგორ ცდილობს იაბლუს ცოლი დაარწმუნოს ქმარი, რომ გაძლიერებული სელჩუკის ნდობა და მასთან ერთად სახელმწიფოს მართვა შეუძლებელია. იმავე წყაროებში შეინიშნება სამფლობელოების გადანაწილების ნიადაგზე, იაბლუს უთანხმოება როგორც დუკაკთან, ისე მის შვილ სელჩუკთანაც. ზემოაღნიშნული მიზეზების გამო სელჩუკი იძულებულია, თავის მოკავშირეებთან ერთად უამრავი ქონებით დაიძრას სამარყანდის მიმართულებით. მირხონდის ცნობით: „იაბლუმ გადაწყვიტა სელჩუკის თავიდან მოცილება. სელჩუკმა ეს რომ შეიტყო, დაიწყო ფიქრი

თავის გადარჩენაზე. [ბოლოსდაბოლოს] მან გადაწყვიტა უცხო მხარეში წასვლა და გაემართა სამარყანდის მიმართულებით. თან წაიყოლა 100 მხედარი 1500 აქლემი და 50 000 ცხვარი. როცა მიაღწია ჯენდის მიდამოებს, უფალმა გაუნათა გული ღვთაებრივი სინათლით. მან გააგზავნა მაცნე ამ მხარის მმართველთან შემდეგი განცხადებით: ჩემი ამ მხარეში მოსვლის მიზეზი არის ისლამის მიმდევართა რიგებში ჩადგომა. დღევანდელი თხოვნაა, გამომიგზავნოთ ვინმე ავტორიტეტული ისლამის მცოდნე, ვინც შემასწავლის ყურანს და დამაყენებს ჭეშმარიტების გზაზე უდაბნოში გზაარეულ უმეცარს“ (www.vostlit.info, Восточная литература, Авторы и источники на букву „М“, Мирхонд, Сад чистоты, Отривок 1). ოღუზთა ტომის დასავლეთ აზიის მიმართულებით მასობრივი მოძრაობის დასაწყისად თურქ-სელჩუკთა პირველი ნაკადის ჯენდში გადასახლებაა მიჩნეული. იმხანად ეს ტერიტორიაც იაბლუს გავლენის ქვეშ ითვლებოდა. იმავდროულად, ჯენდში დასახლებულმა ოღუზებმა მუსლიმანობაც მიიღეს და ამიერიდან მათ და იაბლუს შორის ბრძოლამ ერთგვერი რელიგიური დაპირისპირების საფარველი მიიღო (სამუშია 2003: 209) ჰამდალაჰ ყაზვინის მიხედვით, სელჩუკები მავერანნაჰრში მოვიდნენ 985/6 წელს. მუნეჯიმ-ბაშის ცნობით, სელჩუკმა იაბლუსთან კავშირი გაწყვიტა და ისლამის ქვეყნისაკენ წავიდა; მან მუსლიმანობა მიიღო დაახლოებით 350 (961/2) წელს. თურქი მეცნიერი მ. ქოიმენი სელჩუკის მიერ ოღუზებთან კავშირის გაწყვეტასა და ჯენდში მოსვლას დაახლოებით 930-935 წლებში მიიჩნევს (Köymen: 1963: 24).

სელჩუკი იყო პირველი, რომელმაც გაწყვიტა კავშირი თურქთა წინამძღოლთან, მიიღო ისლამი, თავის გარშემო გააერთიანა ოღუზი ტომები და საფუძველი ჩაუყარა სელჩუკთა სახელმწიფოს. შემდეგ დინასტიის სახელწოდება-სელჩუკები-გავრცელდა მთლიანად მის მიერ გაერთიანებულ ტომებზე. გამუსლიმების შემდეგ, მთელი ისტორიის მანძილზე სელჩუკები სწორედ ისლამის სუნიტური მიმართულების დროშით აწარმოებდნენ დაპყრობით ომებს. „სელჩუკ“-ტერმინის ეტიმოლოგიის შესახებ საინტერესო დაკვირვება აქვს ჩატარებული უნგრელ მეცნიერს ლ. რასონის. ის აღმოსავლურ პირველწყაროებში დაცული ცნობების ანალიზის საფუძველზე ადგენს სიტყვა „სელჩუკის“ შესაძლებელ მნიშვნელობას. მისი აზრით, ყარა-თეგინში-პამირის ჩრდილო-დასავლეთ ნაწილში ჯერ კიდევ IX საუკუნეში ცხოვრობდნენ ოღუზები, რომელთათვის ცნობილი იყო „სელთაუს“ სახელწოდების მცენარი. „სელჩუკი“ შეიძლება წარმოშობილიყო ან მცენარის

სახელწოდება „სელ“-ისთვის თურქმენული „ჩუკ“-ის დართვით, ანდა შეიძლება ტოპონიმური სახელი გადაქცეულიყო ადამიანის საკუთარ სახელად და შემდეგ გავრცელებულიყო მთელ ტომზე (შენგელია 1968: 68; Семенов 1946: 17-18; Гордлевский 1960: 48).

სელჩუკის თურქთა წინამძღოლთან (იაბლუსთან) კავშირის გაწყვეტას მასთან დაპირისპირების გარდა ხელი შეუწყო სამოვრების ნაკლებობამ და ოჯახების სიმრავლემ. რავენდი შენიშნავს: „ის დიდებული ადამიანები ოჯახების სიმრავლისა და სამოვრების სიმცირის გამო მოვიდნენ მავერანნაჰრში. ზამთარში მათი სადგომი იყო ნურ ბუხარა, ხოლო ზაფხულში სამარკანდა“ (www.vostlit.info Восточная литература, Авторы и источники на букву „Р“, Ар-Равенди, Абу-Бекр Отдохновение Сердец).

ჯენდის მიდამოებში დასახლებული სელჩუკი წინდახედული პოლიტიკის წყალობით კიდევ უფრო გაძლიერდა. იგი ადგილობრივ მოსახლეობას ქაფიერ (არამუსლიმ) თურქთა თავდასხმისაგან იცავდა, რის გამოც ჯენდის გამგებლისა და მოსახლეობის ნდობა და მატერიალური მხარდაჭერა დაიმსახურა. მას დახმარებისთვის მიმართავდნენ თურქესტანისა და განაპირა ოლქების მცხოვრებნი. მუსლიმი მოსახლეობის უმრავლესობა მას მიემხრო, იგი იმდენად გაძლიერდა, რომ იაბლუსგან სრულ დამოუკიდებლობას მიაღწია. სელჩუკის მიერ გატარებულმა პოლიტიკამ საფუძველი შეუქმნა შთამომავლობას კიდევ უფრო წარმატებული საქმიანობისათვის. სელჩუკი იბნ ალ-ასირის ცნობით, სიცოცხლის ბოლომდე ჯენდში დარჩა და 1009-1010 წლებში დარდაიცვალა 107 წლის ასაკში. სადრ ად-დინ ჰუსეინის მიხედვით: „ემირმა სელჩუკმა იცოცხლა 100 წელი, მან ერთხელ სიზმარში ნახა, რომ ცეცხლში შარდავდა, ცეცხლის ნაპერწკლები იფანტებოდა აღმოსავლეთითა და დასავლეთით. მან ამის შესახებ ჰკითხა სიზმრის ამხსნელს, რომელმაც უთხრა, შენს საგვარეულოში გაჩნდებიან მეფეები, რომლებიც დაიპყრობენ შორეულ ქვეყნებს. სელჩუკი გარდაიცვალა ჯენდში და დატოვა ვაჟიშვილები: ემირი მიქაილი, ემირი მუსა, ემირი იაბლუ არსლანი, რომელსაც ეძახდნენ ისრაილს. ამ ემირების საცხოვრებელი ადგილი იყო მავერანნაჰრი და ნურ ბუხარა“ (www.vostlit.info Восточная литература, Авторы и источники на букву „X“, Ал-Хусайни Садр-Ад-Дин, Сообщения о сульджуском государстве, Главы 1-8). სელჩუკის გარდაცვალების შემდეგ ტერიტორიები მის შვილებს შორის განაწილდა. მიქაილი, რომელსაც სამფლობელოთა უდიდესი ნაწილი გადაეცა, იყო მათი საპატიო მეთაური.

სელჩუკის შვილებმა დიდი როლი შეასრულეს შუა აზიის ისტორიაში. ვფიქრობთ, მათი სიძლიერის ერთ-ერთი საგულისხმო მიზეზი ურთიერთშეთანხმებული მოქმედება იყო. ისტორიული წყაროების მიხედვით, მათი დაპირისპირება არ აღინიშნება. კიდევ უფრო დიდი როლი შეასრულეს თურქ-სელჩუკთა ისტორიაში სელჩუკის შვილიშვილებმა თოდრულ-ბეგმა და ჩადრი-ბეგმა, რომლებმაც რეალურად ჩამოაყალიბეს სელჩუკთა სახელმწიფო.

„ირანში თურქ-სელჩუკთა გამოჩენამდე საკმაოდ სერიოზული პოლიტიკური პროცესები მიმდინარეობდა. აბასიანთა სახელმწიფოს დაშლის შემდეგ ირანში იწყება ახალი პოლიტიკური ერთეულების ჩამოყალიბება. X-XI საუკუნეების მიჯნაზე ირანში არსებობდა სამანიდების, ლაზნეველებისა და ყარახანიდების სახელმწიფოები. სწორედ ამ პოლიტიკურ ერთეულებთან მოუწიათ ურთიერთობა თურქ-სელჩუკებს თავიანთი დასავლეთის მიმართულებით დაწყებული მიგრაციის პირველ ეტაპზე“ (სამუშია 2003: 209). სამანიდების სახელმწიფოს დაცემის შემდეგ, XI საუკუნის დასაწყისში, მავერანნაჰრი ყარახანიანთა ხელში გადავიდა. შესაბამისად, სელჩუკებიც მათი გავლენის ქვეშ მოექცნენ. ამ დროისათვის სელჩუკები უკვე დიდ სამხედრო ძალას ფლობენ და აშკარად უპირისპირდებიან ლაზნელთა სახელმწიფოს. ისინი ლაზნელებისაგან ითხოვენ ადგილებს გამრავლებული მოსახლეობის დასასახლებლად, აგრეთვე სამოვრებს მესაქონლეობისათვის. სამოვრების კრიზისი და ადგილობრივი მმართველების მიერ შევიწროვება გახდა სელჩუკებისათვის ახალი ადგილების ძიების მიზეზი. სელჩუკთა წარმომადგენლები ლაზნეველთა სულთანს 1025 წელს მიმართავენ თხოვნით: „ეს ტერიტორია ჩვენთვის საკმარისი არ არის, ეს სამოვრები ჩვენს საქონელს არ ჰყოფნის, ნება მოგვეცით, მდინარე გადავლახოთ და ნესასა და ბავერდს შორის დავბანაკდეთ. ტუსის მმართველმა არსლან ჰაჯიბმა (რომელმაც ააშენა სანგბასტის ციხე და აქვეა დამარხული), უთხრა სულთანს: არ გამოგვადგება მათთვის ხორასნის გზის ჩვენება; ისინი მრავალრიცხოვანი არიან და აქვთ სამხედრო აღჭურვილობა. არ ღირს მათი აქ შემოშვება, რადგან დაიწყება წარმოუდგენელი არეულობები, ამათი უკან დაბრუნება შეუძლებელი გახდება“ (www.vostlit.info, Восточная литература, Авторы и источники на букву „Р“, Ар-Равенди, Абу-Бекрн Отдохновение Сердец). წყაროების (ჰამდალაჰ ყაზვინი; სადრ ად-დინ ჰუსეინი, რავენდი) მიხედვით, ლაზნელთა სულთანმა მაჰმუდმა არ დაუჯერა ჰაჯიბ არსლანის რჩევას და სელჩუკებს

გამოუყო საცხოვრებელი ადგილი ნესას, ფერავსა და აბივერდის ტერიტორიაზე. სელჩუკები ხორასანში დამკვიდრდნენ. ისტორიული წყაროების მიხედვით, რთულდება გარკვევა თუ ვისი მეთაურობით და რა რაოდენობით გადავიდნენ ამ დროს სელჩუკები ირანის ტერიტორიაზე. სავარაუდებელია, რომ ეს არ უნდა ყოფილიყო დიდი ჯგუფი, ამ დროს სალჩუკთა ძირითადი ნაწილი ჩაღრი-ბეგის, თოდრულ-ბეგის და იბრაჰიმ იინალის მეთაურობით ყარახანიდების სამფლობელოებში მომთაბარებენ. XI საუკუნის 30-იანი წლებიდან შუა აზიაში მოთარეშე თურქ-სელჩუკებს უკვე სერიოზული პრობლემები ექმნებოდათ გაძლიერებულ ადგილობრივ ხელისუფლებასთან უთიერთობაში. მირხონდის ცნობით, თოდრულ-ბეგისა და ჩაღრი-ბეგის მეთაურობით სამარყანდისკენ გადაადგილებული სელჩუკების შესაჩერებლად ადგილობრივმა ხელისუფალმა ალი თეგინმა, სულთანსა და თურქესტანის მმართველებს ელჩები დაუგზავნა. სელჩუკებს შეეშინდათ გაერთიანებულ ჯართან შებრძოლებისა და იძულებულები გახდნენ იქაურობას გასცლოდნენ. ჩაღრი-ბეგმა ადგილობრივ ხელისუფლებასთან ბრძოლას არჩია მარბიელი ხასიათის ლაშქრობები მოეწყო შორეული ბიზანტიის პროვინციებისაკენ, ხოლო თოდრულ-ბეგი აღმოსავლეთით უდაბნოებისა და ძნელად გასავლელი სტეპების მიმართულებით დაიძრა. (www.vostlit.info, Восточная литература, Авторы и источники на букву „М“, Мирхонд, Сад чистоты, Отривок 1). მირხონდის ცნობიდან აშკარაა, რომ სელჩუკებს შუა აზიაში აღარ ედგომებოდათ, ისინი უკვე სხვაგან ეძებნენ საარსებო საშუალებას. ვფიქრობთ, აღნიშნული ვითარება გახდა სელჩუკთა დიდი ნაკადის დასავლეთის მიმართულებით დამკვრის მიზეზი, რომელთაც სელჩუკის შვილიშვილები თოდრულ-ბეგი და ჩაღრი-ბეგი ხელმძღვანელობდნენ. 1035 წლის გაზაფხულზე ისინი ხორასანში გადავიდნენ და ნესასა და ფერავს გარშემო დაბანაკდნენ. მათ შეუერთდნენ მაჰმუდ ღაზნევის ნებართვით რამდენიმე წლით ადრე გადმოსახლებული ოღუზ-თურქებიც (Агаджанов 1969 202-203). მირხონდის მიხედვით, ხორასანში დამკვიდრებულმა სელჩუკებმა მასუდს წარმომადგენელი გაუგზავნეს და მოკავშირეობა შესთავაზეს, სულთანმა მასუდმა კი მათ თავისი ტერიტორიის დატოვება მოსთხოვა, წინააღმდეგ შემთხვევაში კი ჯარით დაემუქრა. ამის შემდეგ სელჩუკებმა გადამალეს ოჯახის წევრები და ბრძოლისათვის მოემზადნენ (www.vostlit.info, Восточная литература, Авторы и источники на букву „М“, Мирхонд, Сад чистоты, Отривок 1). სელჩუკების

ხორასანში დამკვიდრებას ხელი შეუწყო ღაზნევიანთა სახელმწიფოს დასუსტებამ. მასუდ ღაზნევის ლაშქარი იშლებოდა და ბრძოლისუნარიანობას კარგავდა. თურქი ტომები, რომლებიც ამ ლაშქრის უმრავლესობას შეადგენდნენ, კრიტიკულ მომენტში მოწინააღმდეგის მხარეზე გადადიოდნენ. სულ უფრო და უფრო აძლიერებდნენ თავდასხმებს ღაზნევიანთა სახელმწიფოს საზღვრებზე სალჩუკების მიერ წაქეზებული თურქმენტა ტომებიც. ღაზნევიანთა ვეზირი ურჩევდა სულთანს, რომ „სელჩუკთა გული საპატიო ხალათებით უნდა მოვინადიროთ. ჩვენ დავპირდეთ მათ ნესას თავისი საზღვრებით, ფერავეს, რაბათს და სხვა ადგილებს და ამით ვასიამოვნოთ“ (www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин, Сообщения о сульджуском государстве, Главы 1-8). როგორც წყაროდან ჩანს, ვეზირი, სულთან მასუდისაგან განსხვავებით, კარგად ხედავდა რეალურ ვითარებას და პრობლემის მშვიდობიანად გადაწყვეტას ფიქრობდა. სულთანმა მას არ უსმინა და სელჩუკებთან შესაბრძოლებლად საგანგებოდ მოემზადა.

ბეიჰაყის, რავენდის, სადრ ად-დინ ჰუსეინის და მირხონდის ცნობით, მასუდმა ლაშქრის მეთაურად ჰაჯიბ ბეგდოლდი დანიშნა. სელჩუკებსა და ღაზნეველებს შორის ბრძოლა ფერავსა და შაჰრესთან შორის გაშლილ ველზე მოხდა 1035 წელს. მიუხედავად საგანგებო მომზადებისა, სულთნის ლაშქარი ამ ბრძოლაში სასტიკად დამარცხდა. სელჩუკებმა სხვა ნადავლთან ერთად ხელთ იგდეს სულთნის ხაზინა, რომელშიც ათი მილიონი დინარი ყოფილა. მათ ხელში გადავიდა ხორასანის დიდი ტერიტორია-ნესა, ფარევე და დეჰისტანი, სელჩუკ ბეგებს ებოძათ „დეჰისტანის“ ტიტულები. გარდა ამისა, სულთანმა მათ სამი საპატიო ხალათი გაუგზავნა ნიშნად პროვინციის გამგებლობისა, უბოძა ორრქიანი ქუდები, დროშა, ტანისამოსი, ცხენი, უნაგირი, ოქროს ქამარი, ყოველგვარი სახის ქსოვილები თითოეულს ოცდაათი (შენგელია 1968: 84). სადრ ად-დინ ჰუსეინის ცნობით, სელჩუკებმა აიძულეს სულთანი მასუდი, რომ ნიშაბურისა და მიმდებარე ტერიტორიის ხარაჯა მათთვის გადაეცა (www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин, Сообщения о сульджуском государстве, Главы 1-8).

„1036 წელის თებერვალში ღაზნევენთა სახელმწიფოს ზედაფენის ზეწოლის შემდეგ მასუდი ახალ ლაშქრობას აწყობს თურქ-სელჩუკთა წინააღმდეგ.

ლაზნეველთა მხედრობამ კვლავ მარცხი განიცადა, რასაც მოჰყვა სელჩუკთა ახალი მოთხოვნები. მაგრამ მათ პრეტენზიებზე მასუდმა უარით უპასუხა. ეს საბაზად იქცა და თურქ-სელჩუკები თავად გადავიდნენ შეტევაზე. მათ 1037 წლის 22 აპრილს აიღეს ქ. მერევი“ (სამუშია 2003: 210). მერევის აღებამ ფაქტობრივად საფუძველი ჩაუყარა სელჩუკთა დამოუკიდებელ სახელმწიფოს, რადგან ამ ქალაქში სელჩუკებმა მოითხოვეს ხუტბა წარმოეთქვათ ჩაღრი-ბეგ დაუდის სახელზე (Заходер 1945: 140). ამის შემდეგ სელჩუკები კიდევ უფრო გაძლიერდნენ. გაიზარდა მათი მოთხოვნებიც ლაზნევიანთა სახელმწიფოს მიმართ. სულთანმა მასუდმა გადაწყვიტა სელჩუკთა საბოლოოდ განდევნა ხორასანიდან. ამჯერად სულთანმა 30 000-იანი ლაშქრის მეთაურად ჰაჯიბ სუბაში დანიშნა, თვითონ კი ინდოეთში წავიდა სალაშქროდ. როგორც ჩანს, მასუდი ჯერ კიდევ კარგად ვერ აფასებს სელჩუკთა ძალებს. 1038 წელს სელჩუკებმა თოღრულ-ბეგის მეთაურობით დაამარცხეს ჰაჯიბ სუბაშის ლაშქარი და მთელი ხორასანი მათ ხელში გადავიდა. ამ ბრძოლის მსვლელობა და შედეგები დაწვრილებით აქვს აღწერილი ბეიჰაყის (www.vostlit.info, Восточная литература, Авторы и источники на букву „Б“ Беихакиб Абул-Л- Фазл, История Масуда).

რავენდის ცნობით, „სელჩუკები ამ გამარჯვების შემდეგ გამხნევდნენ, მოიკრიბეს ძალა და მთელ ხორასანს მოედევნენ, თოღრულ ბეგი ნიშაბურში მოვიდა და მასუდის ტახტზე დაჯდა. ნიშაბურის მცხოვრებნი შეშინებულები იყვნენ. შიკრიკი ქუჩებში გაჰყვიროდა, რომ სელჩუკები არავის დასჯიდნენ“ (www.vostlit.info, Восточная литература, Авторы и источники на букву „Р“, Ар-Равенди, Абу-Бекрн Отдохновение Сердец). თოღრულ-ბეგის სახელზე მეჩეთში ხუტბა იქნა წაკითხული. სელჩუკებმა დაპყრობილი ტერიტორიები დაინაწილეს. ჩაღრი-ბეგს მერვი ერგო, მუსა იაზლუს-სარახსი, თოღრულ-ბეგს-ნიშაბური.

„ნიშაბურში სულთან მასუდის ტახტზე თოღრულ-ბეგის ასვლით იწყება დიდ სელჩუკთა სახელმწიფოს ისტორია. ამ სახელმწიფოს ფუძემდებლად თოღრულ-ბეგია მიჩნეული, რადგან ოფიციალურად მან დაიჭირა სულთნის ტახტი და სულთნის ტიტული მიიღო. ნასერ-ე ხოსროვის ცნობით, თოღრულ-ბეგმა, რომ ნიშაბურში ტახტი დაიკავა, ბრძანა ქალაქის მოსახლეობა გადასახადისაგან გაეთავისუფლებინათ. შემდეგ მან ხალიფას ელჩი აახლა ბაღდადში და ოღუზთაგან მიყენებული ზარალის გამო დახმარება შესთავაზა. ეს კი სელჩუკთა სულთნის

მიერ ხალიფას ცნობას ნიშნავდა. ხალიფამაც ელჩი გაუგზავნა თოდრულ-ბეგს ნიშაბურში და მთელ ხორასანსა და თურქმენტა შორის მისი ძალაუფლება ოფიციალურად სცნო“ (შენგელია 1968: 86). მ. სვანიძე შენიშნავს: სელჩუკების ბელადმა თოდრულ-ბეგმა აიძულა ხალიფა ებოძებინა მისთვის სულთნის ტიტული. იგი იყო დიდ სელჩუკთა სახელმწიფოს დამაარსებელი და გახდა აღმოსავლეთისა და დასავლეთის მბრძანებელი (სვანიძე 1999: 9).

სელჩუკთა ამ წარმატების შემდეგ სულთან მასუდის მდგომარეობა კიდევ უფრო გაუარესდა. მისი პოლიტიკით უკმაყოფილო ადგილობრივმა მოსახლეობამ სელჩუკების მხარეზე დაიწყო გადასვლა. მათში თანდათან მკვიდრდებოდა განცდა სელჩუკთა უძლეველობის შესახებ. სადრ ად-დინ ჰუსეინის ცნობით, ხორასნის მმართველი მოახსენებდა სულთან მასუდს: „სელჩუკები ბრძოლის მსურველი, მეომარი ხალხია, მათთან ხმლებითა და ისრებით ვერაფერს გახდები, ისინი ისეთი მხედრები არიან, რომ სიკვდილი მათთვის არაფერია“ (www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин, Сообщения о сулджуском государстве, Главы 1-8). მასუდმა სასწრაფო ღონისძიებების გატარებისა და ძალთა მობილიზაციის შედეგად 50 000-იანი ლაშქრით, 1039 წლის მაისის თვეში შეძლო სელჩუკების დამარცხება სარახსალიაბადის ველზე, მაგრამ ამ გამარჯვებამ მდგომარეობა არსებითად ვერ შეცვალა. გადამწყვეტი ბრძოლა თურქ-სელჩუკებსა და ღაზნელებს შორის მოხდა 1040 წლის 22-24 მაისს, დენდანეკის ველზე, სარახსა და მერეკს შორის. ამ ბრძოლაში ღაზნელები სასტიკად დამარცხდნენ. დენდანეკანი მდებარეობდა მერეკის სამიწადმოქმედო ოაზისსა და მომთაბარეთა ველის საზღვარზე და მნიშვნელოვან როლს ასრულებდა სელჩუკთა სახელმწიფოს ჩამოყალიბებაში. ეს ადგილი ათ წელზე მეტი ხნის განმავლობაში წარმოადგენდა სელჩუკთა ძალების კონცენტრაციის ცენტრს. ზახოდერის გამოკვლევით, დენდანეკანის დღევანდელი სახელწოდება არის თაშ-რაბადი (Заходер 1943: 76).

ამ ბრძოლაში სელჩუკებმა, ბეიჰაყის ცნობით, უამრავი ქონება ჩაიგდეს ხელში. სულთანმა მასუდმა ასიოდე მხედართან ერთად გაქცევით უშველა თავს. მთელი მისი ხაზინა და ბანაკი სელჩუკებს დარჩათ. თოდრულ ბეგი სიმბოლურად ბრძოლის ველზე დასვეს ტახტზე. ამის შემდეგ აღმოსავლეთ ირანის მდიდარი რეგიონი (ხორასანი) საბოლოოდ გადავიდა სელჩუკთა ხელში და ღაზნეველთა

ძლიერებას წერტილი დაესვა. „მერვეში შეიკრიბნენ სელჩუკთა მეთაურები და თოღრულ-ბეგის ინიციატივით მნიშვნელოვანი გადაწყვეტილებანი მიიღეს. უპირველეს ყოვლისა, მათ ერთგულება შეჰფიცეს ერთმანეთს და საგანგებოდ ხაზი გაუსვეს ერთმანეთთან მტკიცე კავშირის აუცილებლობას. შემდეგ თოღრულ-ბეგის წინადადებით ხალიფა ალ-ქაიმს წერილი გაუგზავნეს ელჩის-აბუ ისაკ ალ-ფუკას ხელით. ამ წერილში ვრცლად იყო გადმოცემული უკანასკნელ ხანებში სელჩუკთა საქმიანობა და წარმატებები, ისლამის რელიგიისადმი მათი ერთგულება. წერილში აგრეთვე ეხებოდნენ ღაზნელების დამარცხებას, სელჩუკების ხორასანში დამკვიდრებასა და ხალიფასადმი ერთგულებას“ (შენგელია 1968: 93). წყაროების (რავენდი, ჰამდალაჰ ყაზვინი, მირხოზდი, სადრ ად-დინ ჰუსეინი) ცნობით, ამ შეკრებაზე სელჩუკებმა დაპყრობილი და დასაპყრობი ტერიტორიები შემდეგნაირად დაინაწილეს: ჩადრი-ბეგს ერგო ჯეიჰუნისა და ბალხს შორის მდებარე ტერიტორიები სარახსისა და ბალხის ჩათვლით. მან სატახტო ქალაქად მერვი გაიხადა. მუსა იაბლუმ მიიღო ბუსთა და სისტანს შორის მდებარე ტერიტორიები ჰერათით. სულთნის ტიტულით ნიშაბურში დარჩა თოღრულ-ბეგი, რომელმაც დაიტოვა ერაცი. იბრაჰიმ იინალმა მიიღო ყოჰესთანი, არსლან იაბლუს შვილმა ყუთულმიშმა-გურგანი და დამდანი. ჩადრი-ბეგის შვილმა ქავერდმა-ქერმანის რაიონი. სელჩუკი უფლისწულების საერთო მეთაურად ითვლებოდა ჩადრი- ბეგი.

ამდენად, სელჩუკთა ისტორია იწყება ოღუზ-თურქმანული ტომების ერთ-ერთი მეთაურის დუკაკის მოღვაწეობით, რომელიც დიდი გავლენით სარგებლობდა მთელ ტომში და კარგი ურთიერთობა ჰქონდა თურქთა წინამძღოლთან იაბლუსთან. კიდევ უფრო დაწინაურდა დუკაკის შვილი სელჩუკი. იგი X საუკუნის მეორე ნახევარში, ოჯახების სიმრავლის, სამოვრების ნაკლებობისა და თურქთა წინამძღოლთან (იაბლუსთან) უთანხმოების გამო უამრავი ქონებით დაიძრა დასავლეთის მიმართულებით, დასახლდა ჯენდში, გააერთიანა ოღუზი ტომები, მიიღო ისლამი და საფუძველი ჩაუყარა სელჩუკთა სახელმწიფოს. ის ითვლება ამ სახელმწიფოს დამაარსებლად და მისი სახელიდანვე წარმოდგა თვით ტომის სახელიც- თურქ-სელჩუკები. სელჩუკის დაწყებული საქმე წარმატებით გააგრძელეს მისმა მემკვიდრეებმა. XI საუკუნიდან ოღუზ-თურქმანული ტომები მასიურად დაიძრნენ ცენტრალური აზიიდან ირანისა და ახლო აღმოსავლეთის მიმართულებით. 1035 წელს სელჩუკთა დიდი ნაკადი თოღრულ-ბეგისა და ჩადრი-ბეგის

მეთაურობით ხორასანში გადავიდა. 1037 წლის მაისში მათ ქალაქი მერევი აიღეს და ფაქტობრივად, საფუძველი ჩაუყარეს სელჩუკთა დამოუკიდებელ სახელმწიფოს. 1038 წელს თოდრულ-ბეგმა დაამარცხა ღაზნელთა სულთან მასუდის 30 000-იანი ლაშქარი, შევიდა ნიშაბურში და მასუდის ტახტზე დაჯდა. მის სახელზე ხუტბა იქნა წაკითხული. ხალიფამ მას სულთნის ტიტული უბოძა. ამ პერიოდიდან იწყება დიდ სელჩუკთა სახელმწიფოს ისტორია, რომლის სათავეშიც იდგნენ სელჩუკთა გვარის სულთნები.

1040 წლის მაისში დენდანეკანთან გამარჯვებისა და სელჩუკ უფლისწულთა მიერ ტერიტორიების დანაწილებით საბოლოოდ ჩამოყალიბდა დიდ სელჩუკთა სახელმწიფო. ამის შემდეგ თურქ-სელჩუკებმა აქტიურად დაიწყეს საბრძოლო მოქმედება როგორც ცენტრალური და დასავლეთ ირანის, ასევე ბიზანტიისა და კავკასიის მიმართულებით. ფაქტობრივად, დიდ სელჩუკთა სახელმწიფო წარმოიქმნა დაპყრობითი ბრძოლების შედეგად, რომელსაც თან ახლდა თურქული ტომების გადასახლება აღმოსავლეთიდან დასავლეთისაკენ. „თავიდან სელჩუკთა სამხედრო და პოლიტიკური საყრდენი იყო მომთაბარე თურქმენთა, ოღუზთა და ნაწილობრივ ყივჩაღთა ლაშქარი. შემდგომი ლაშქრობებისას, უკვე თოდრულ ბეგის დროს, მომთაბარეთა არაღებულარული შენაერთები შეცვალა მუდმივმა ფეოდალურმა ლაშქარმა. სელჩუკი მმართველები თანდათან სცილდებიან თანატომელებს და უფრო და უფრო უახლოვდებიან დაპყრობილი ქვეყნების მიწადმოქმედ და მომსახურე არისტოკრატებს“ (Kuvondikov 2010 203). სელჩუკთა გამოჩენამ მსოფლიო ასპარეზზე შეცვალა პოლიტიკურ ძალთა ბალანსი, დიდი გავლენა იქონია დაპყრობილი ქვეყნების სოციალურ, ეკონომიკურ და კულტურულ მდგომარეობაზე. დიდ სელჩუკთა სახელმწიფომ თავისი ძლიერების მწვერვალს მიაღწია სულთნების ალფ-არსლანისა (1063-1072) და მალიქ შაჰის (1072-1092) მმართველობის დროს.

IV თავი

თურქ-სელჩუკები და საქართველო ალფ-არსლანამდე

ალფ-არსლანის ლაშქრობები საქართველოს ისტორიის მნიშვნელოვანი ნაწილია. მართალია, ქართულ ისტორიოგრაფიაში მის შესახებ ბევრი ითქვა და დაიწერა, მაგრამ კიდევ ბევრია სათქმელი. მონოგრაფიულად ეს საკითხი დღემდე არაა დამუშავებული. საკითხის კვლევას, ვფიქრობთ, მნიშვნელოვნად წაადგება თურქ-სელჩუკთა და ქართველთა ურთიერთობის შესწავლა ალფ-არსლანამდე.

ქართულ ისტორიოგრაფიაში დამკვიდრებული შეხედულებით, თურქ-სელჩუკების ამიერკავკასიაში ლაშქრობა XI საუკუნის 30-იან წლებში იწყება. სომხური საისტორიო წყაროების მონაცემებით (სადაც ერთმანეთშია არეული ჩადრი ბეგისა და თოდრულ ბეგის ლაშქრობები) კი მათი ამიერკავკასიაში გამოჩენის თარიღი 1016-1021 წლებით განისაზღვრება. ვარდან დიდის მიხედვით: „470 (1021) წელს სელჩუკები მოვიდნენ თოდრულ ბეგის მეთაურობით. ნახჭევანთან მათ ხუთი ათასი კაცით შეხვდა ლიპარიტი; როდესაც სელჩუკები მოვიდნენ დვინში და მოსახლეობაზე თავდასხმები დაიწყეს, მათ წინააღმდეგ გამოვიდა მამაცი ვასაკი და სასწაულები ჩაიდინა“ (www.vostlit.info Восточная литература, Авторы и источники на букву „В“- Вардан Великий, часть-3).

როგორც ნ. შენგელია აღნიშნავს, ვარდანის წყაროს უნდა ეყრდნობოდეს თურქი მეცნიერის ინანჩის გამოკვლევა: „სელჩუკებმა, როგორც კი ნახჭევანთან აღმოჩნდნენ, 1018-1021 წლებში, დაიწყეს ქართველთა ქვეყნის ძარცვა. სელჩუკთა წინააღმდეგ გამოვიდა ლიპარიტი 5 000 მეზრძოლით, მაგრამ ძალები არ ეყო, ვერ გაუმკლავდა მათ და გაიქცა, ხოლო მთელი ტერიტორია გასანადგურებლად სელჩუკებს დაუტოვა“ (შენგელია 1968: 168). მათეოს ურჰაეცის მიხედვით, ამიერკავკასიაში ჩადრი-ბეგს უნდა ელაშქრა 1018-1019 წლებში. არწრუნის მიხედვით, კი-1021 წლამდე. სამუელ ანეცს აღნიშნული აქვს 1016 წელი (შენგელია 1968: 170). 1016-1021 წლებში საქართველოში და საერთოდ ამიერკავკასიაში სელჩუკთა ლაშქრობების შესახებ ცნობები არ მოგვეპოვება ქართულ, არაბულ და ბიზანტიურ წყაროებში, რაც თავისთავად საეჭვოს ხდის სომხური საისტორიო წყაროების ცნობებს ამ პერიოდში თურქ-სელჩუკების ამიერკავკასიაში ლაშქრობებთან

დაკავშირებით. არც ამ პერიოდის თანამედროვე სომეხი ისტორიკოსის, არისტაკეს ლასტივერტეცის, „ისტორიაში“, რომლის ერთ-ერთი მთავარი თემა თურქ-სელჩუკთა ლაშქრობებია, არაფერია ნათქვამი ამ დროს თურქ-სელჩუკთა ლაშქრობების შესახებ. ამ დროის ქართული და სომხური სახელმწიფოების მთავარი პრობლემა ბიზანტიის იმპერიასთან გართულებული პოლიტიკა იყო. ამიტომ არისტაკეს ლასტივერტეცის და ქართველი ისტორიკოსის „მატიანე ქართლისაჲს“ ავტორის ყურადღება ბიზანტიისკენ არის მიპყრობილი.

ს. აღაჯანოვისა და კ. იუზბაშიანის მტკიცებით, 1016-1021 წლებში სომხეთში შემოჭრილი თურქთა ტომები არ ექვემდებარებოდნენ სელჩუკებს. ისინი სულ სხვა ტომები იყვნენ, რომელთა შესახებ ცნობები დაცულია სომხურ და ბიზანტიურ წყაროებში. ეს თურქული ტომები ჯერ კიდევ X საუკუნის მეორე ნახევარში იყვნენ ჩამოსახლებულნი აზერბაიჯანის ტერიტორიაზე და სწორედ ისინი დაესხნენ სომხეთს. მათი მტკიცებით, სელჩუკთა პირველ ლაშქრობას ამიერკავკასიაში ადგილი ჰქონდა XI საუკუნის 30-იან, კერძოდ, 1032-1034 წლებში (Агаджанов... 1965: 144-145). ბიზანტიის იმპერიაში მოქცეულ სომხურ პროვინციებზე ლაშქრობა ს. აღაჯანოვისა და კ. იუზბაშიანის აზრით, თურქ-სელჩუკებმა განახორციელეს აზერბაიჯანიდან 1037-1038 წლებში (Агаджанов и Юзбашян 1965: 157). რ. მეტრეველი შენიშნავს: „თურქ-სელჩუკების შემოსევები XI საუკუნის 30-იან წლებში დაიწყო. ისინი სწრაფად მოედვნენ ქვეყნის ყველა მხარეს, დაემუქრნენ ირანს, ბიზანტიას და კავკასიას. თურქ-სელჩუკთა ბატონობა მახლობელი აღმოსავლეთის კულტურული ხალხებისათვის უფრო საშიში და დამღუპველი იყო, ვიდრე არაბთა ბატონობა (ეს მათი ეკონომიკური და კულტურული ჩამორჩენილობით იყო გამოწვეული). სელჩუკთა მოძრაობამ თავისი დაღი დაასვა არა მარტო წინა აზიისა და კავკასიის ქვეყნებს, არამედ გავლენა იქონია ეგვიპტეზე, ბიზანტიაზე, სამხრეთ-აღმოსავლეთ ევროპაზე, ხოლო ჯვაროსნული ლაშქრობების დროს მთელს დასავლეთ ევროპაზე“ (მეტრეველი: 1978: 39).

ზემოაღნიშნული მსჯელობიდან გამომდინარე, ვფიქრობთ, თურქ-სელჩუკთა პირველ მასობრივ შემოსევებს ამიერკავკასიაში ადგილი უნდა ჰქონოდა XI საუკუნის 30-იან წლებში, გამორიცხული არ არის მათი უმნიშვნელო ტალღის გამოჩენა უფრო ადრე პერიოდშიც, რომელიც ალბათ დაზვერვით და მარბიელ ხასიათს ატარებდა.

ქართველთა და თურქ-სელჩუკთა ყველაზე ადრინდელი ურთიერთობების შესახებ ქართულ საისტორიო წყაროებიდან ცნობას გვაძლევს 1029 წლით დათარიღებული დოკუმენტი, რომელიც ბაგრატ მეოთხის სელჩუკთა წინააღმდეგ ლაშქრობას მოგვითხრობს. ქართული წყაროს გადმოცემით, 1029 წელს „აქა ბაგრატ კურაპალატი სულტანსა დაესხა“ (ჟორდანიას 1892: 169). ახლადგამეფებული მცირეწლოვანი ბაგრატის კურაპალატობა ამ დროისათვის საეჭვოდ მიგვაჩნია. „მატიანე ქართლისაჲს“ მიხედვით, კეისარ კონსტანტინე VIII-ის გარდაცვალებიდან (1028 წ.) „წელსა მესამესა წარვიდა დედოფალი მარიამ დედაჲ ბაგრატისი, აფხაზთა მეფისაჲ, საბერძნეთად ძიებად მშვიდობისა და ერთობისა, და კუალად ძიებად პატივისა კურაპალატობისა ძისათჳს თჳსისა ვითარცა არს ჩვეულებაი და წესი სახლისა მათისაჲ და მოყვანებისათჳს ძის ცოლისა. და ვითარცა მიიწია საბერძნეთად, წინაჲ ბერძენთა მეფისა, აუსრულა ყოველი სათხოველი სიხარულით: მოსცნა ფიცნი და სიმტკიცენი ერთობისა სიყუარულისათჳს, დაუწერნა ოქრო-ბეჭედნი, მოსცა პატივი კურაპალატობისაჲ და მოსცა ცოლად ბაგრატისთჳს ელენე დედოფალი. მო-რად-იწია მარიამ დედოფალი მამულსა ძისა თჳსისასა-ქუეყანასა ტაოს, მოართუა პატივი კურაპალატობისაჲ; აღასრულეს ქორწილი, უკურთხეს გვირგვნი ბანას“ („მატიანე ქართლისაჲს“ 2008: 280). ამდენად ირკვევა, რომ ბაგრატს კურაპალატობა 1031 წელს მიუღია.

1029 წელს ბაგრატ მეფის კურაპალატობის ტიტულის ეჭვის ქვეშ დაყენების მიუხედავად, ზემოაღნიშნულ ქართულ დოკუმენტურ წყაროში მოცემული თარიღი ბაგრატ მეფის სელჩუკებზე თავდასხმასთან დაკავშირებით სინამდვილეს უნდა შეესაბამებოდეს. სრულიად რეალური გვეჩვენება, მართალია, მცირეწლოვანი, მაგრამ უკვე, ორი წლის სამეფო ტახტზე მჯდომი, ბაგრატის ბრძოლაში მონაწილეობის მიღება. ასაკის გამო, უშუალოდ, რომც ვერ ებრძოლა ბაგრატს, ამ თავდასხმის იდეოლოგი მაინც იქნებოდა და დოკუმენტის ავტორს სიმბოლურად შეეძლო ეთქვა: „ბაგრატი დაესხა“. ქართულ დოკუმენტში აღნიშნული თარიღის (1029 წ.) სიზუსტეს ამყარებს მუნეჯიმ ბაშის ცნობაც, რომელიც გადმოგვცემს, რომ 420 წელს (1029) სელჩუკები აზერბაიჯანის ტერიტორიაზე შევიდნენ, ბევრი რაიონი გაანადგურეს და დაანგრიეს. ამ მხარეში მათ თურქთა ლაშქარს უწოდებენო (შენგელია 1968: 172). როგორც ჩანს, ამ პერიოდში ბაგრატ IV აქტიურ მონაწილეობას

იღებს თურქული ტომების წინააღმდეგ წარმოებულ ომებში სომხეთსა და აზერბაიჯანში.

წყაროების შესწავლის საფუძველზე ირკვევა, რომ თურქ-სელჩუკთა შემოსევები ამიერკავკასიაში XI საუკუნის 30-იანი წლებიდან მოყოლებული, თანდათან ფართო ხასიათს იღებს. მათი ურდოები სისტემატურად მოიწევდნენ ამიერკავკასიის ქვეყნებისაკენ. მართალია, თავდაპირველად სელჩუკთა თავდასხმები ძირითადად სომხეთისა და აზერბაიჯანის ტერიტორიებით შემოისაზღვრებოდა, მაგრამ თავისებურ გავლენას ახდენდა საქართველოს პოლიტიკურ ცხოვრებაზეც. ბაგრატ IV- ის მიერ 1036-1040 წლებში თბილისის ალყის უეცარი მოხსნის შესახებ ი. ჯავახიშვილი წერს: „იბნ ალ-ასირს შენახული აქვს ერთი ძვირფასი ცნობა, რომელიც ქართველთა უცნაური აჩქარების ალბათ ერთ-ერთ მიზეზად უნდა ყოფილიყო, არაბი მემკვიდრე ასე მოგვითხრობს: ქართველებმა შეიტყვეს, რომ სელჩუკიანნი ამირას მოსაშველელად მოდიოდნენ, რომ მათ გზა და გზა სომხეთი უკვე აეოხრებინათ; ამიტომ ქართველებმა სელჩუკიანთა შიშით ქალაქ თბილისს სწრაფად ალყა მოხსნესო. ეს გარემოება სრულიად ახალ შუქს აჰყვანს ქართველ დიდებულთა და ბაგრატის საქციელს. ალბათ, ისინი დარწმუნებულნი იყვნენ, რომ სელჩუკიანთა შემოსევა ქართველებს კეთილს არაფერს მოუტანდა და ქვეყნის აოხრებას ისევ ნებაყოფლობით დაზავება არჩიეს. ამ მხრივ ბაგრატისა და დიდებულთა გადაწყვეტილება გონივრული და ფრთხილი იყო. ვგონებ, სწორედაც ასე უნდა მომხდარიყო“ (ჯავახიშვილი 1983: 142).

მ. ლორთქიფანიძე ამ მოვლენებზე მსჯელობისას აღნიშნავს: „გადამწყვეტი გავლენა ბაგრატზე ლიპარიტის მოწინააღმდეგე დაჯგუფებამ მოახდინა, რომელსაც არ მიაჩნდა სასურველად ლიპარიტის გაძლიერება, შესაძლებელია, გარკვეული გავლენა ბაგრატის გადაწყვეტილებაზე მოახდინა ცნობამ ამირას დასახმარებლად სელჩუკიანთა ლაშქრის წამოსვლის შესახებ“. (ლორთქიფანიძე: 1979 163). ბ. სილაგაძე მიიჩნევს, რომ თბილისის ალყის მოხსნა ლიპარიტის მოწინააღმდეგე ფეოდალების ინსპირირებული იყო (სილაგაძე 1991: 222). ჯ. სამუშია ცალმხრივად აღნიშნავს, რომ „XI საუკუნის 40-იანი წლების დასაწყისში თურქული ტომების შემოსევის არავითარი საფრთხე საქართველოში არ არსებობდა. ისინი მოძრაობდნენ თბილისიდან კარგა მოშორებით და იმისათვის, რომ ოლუხები გარემოცულ ქალაქს მიშველებოდნენ, საჭირო იყო მათ გამოეცლოთ სამხრეთ კავკასია და მის მომიჯნავე

ტერიტორიაზე არსებული რამდენიმე პოლიტიკური ერთეული, რაც ერთობ რთული, შეიძლება ითქვას, წარმოუდგენელი სამხედრო რეიდი იქნებოდა. თურქ-სელჩუკთა შემოსევის საფრთხეს ამ პერიოდში არ გრძნობდნენ სამხრეთ აზერბაიჯანის მოსაზღვრე რეგიონები. მაგალითად, დვინის ამირა აბულ-ასვარი სწორედ 1040 წელს ებრძოდა ტაშირ-მორაგეტის მეფე დავითს. ისე გამოდის, რომ მხოლოდ ქართველებს შეშინებიათ და პანიკურ მდგომარეობაში ჩავარდნილან აზერბაიჯანში თურქ-ოღუზთა მარბიელის გამოჩენის გამო. ასეთი ვარაუდი უდაოა, გადაჭარბებულია. შეუძლებელია, საქართველოდან რამდენიმე ასეული კილომეტრით დაშორებულ რეგიონში სათარეშოდ წამოსული ოღუზთა მოსვლა ბაგრატ IV-სა და სამეფო კარს სერიოზულად მიეღო“ (სამუშია 2006).

1040-1041 წლის მარტში სელჩუკთა სომხეთში ლაშქრობაზე მოგვითხრობს მათეოს ურჰაეცი. მისი ცნობით, სელჩუკთა 150 000-იან ჯარს (ვფიქრობთ, გაზვიადებულია) 400-მდე გამაგრებული ადგილი დაუკავებია, სადაც ერთ წელიწადს დარჩენილან. მათ წინააღმდეგ ქართველებმა და სომხებმა კოალიციური ლაშქრობა მოაწყვეს, ბაგრატ IV-ს 4 000 ჯარისკაცი გამოუყვანია. ქართველ-სომეხთა გაერთიანებულმა ლაშქარმა არანის გამგებლის აბულ-სოვარის შემოტევა მოიგერია და დამარცხებული უკუაქცია (შენგელია 1968: 176). ბაგრატის ამ ბრძოლაში მონაწილეობა აშკარად მიუთითებს საქართველოსთვის იმ საშიშროებაზე, რომელიც მოსალოდნელი იყო თურქ-სელჩუკთა აზერბაიჯანსა და სომხეთში გაბატონების შემთხვევაში. საქართველოს მესვეურები ყველგან, სადაც ხელი მიუწვდებოდათ, ეძებდნენ მოკავშირეს. „საფარ ნამეში“ შემორჩენილი ცნობიდან ვიგებთ, რომ 1047 წელს, ნილოსის არხის გახსნისადმი მიძღვნილ ზეიმზე შორეულ ეგვიპტელ ფატიმიანთა კარზე ჩასულან ქართველ „მეფეთა ვაჟები“. ნასერ ხოსრუ ზეიმის აღწერისას წერს: „ერთი ჯგუფი შედგებოდა სხვადასხვა ქვეყნის უფლისწულთა და დიდებულთა შვილებისაგან, რომელნიც აქ იყვნენ ჩამოსულნი და ლაშქრისა და სპის ანგარიშში არ ითვლებოდნენ. ისინი იყვნენ მალრიბიდან, იემენიდან, რუმიდან, სლავთა ქვეყნიდან, ნუბიიდან, ჰაბაშადან. აქ იყვნენ ჩამოსულნი დელის მეფის (ხოსროვ) ძენი და მათი დედა, ქართველ მეფეთა ვაჟები, დეილემელთა უფლისწულები და თურქესტანის ხაკანის ვაჟები“ (ჟორჯოლიანი 1979: 52). ამ დროს ქართველების ეგვიპტეში ჩასვლა გარკვეული პოლიტიკური ურთიერთობის მანიშნებელი უნდა იყოს. გამორიცხული არ არის საქართველოს მესვეურების

მიზანი, ეგვიპტეში ჩასულ სხვა ქვეყნის წარმომადგენლებთან ერთად ყოფილიყო ანტისელჩუკური კოალიციის შექმნა. ვ. გაბაშვილი აღნიშნავს, რომ „ნასერ ხოსრუ შეცდომას არ უშვებს, როცა ქართველი მეფის მაგიერ ასახელებს ქართველი მეფეების ვაჟიშვილებს. გიორგი I-ისა და ბაგრატ IV-ის დროს კახეთს საკუთარი მეფე ჰყავდა და ჯერ კიდევ დამოუკიდებელი ქართული სამეფო არასდროს არ იყო იზოლირებული გარესამყაროსაგან. პირიქით, გამაერთიანებელი ძალების წინააღმდეგ ბრძოლის დროს კახეთის სამეფო ხშირად უკავშირდებოდა ამიერკავკასიის ამირებს და მახლობელი აღმოსავლეთის მაჰმადიანსავე მბრძანებლებს“ (გაბაშვილი 1968: 70). 1047 წელს ეგვიპტეში დიპლომატიური მისიით შეიძლება ყოფილიყვნენ ლიპარიტის შვილები ივანე და ნიანია, რომლებიც ამ დროს უკვე აქტიურად ერევანს პოლიტიკაში. აგრეთვე იქ შეიძლება ყოფილიყო უფლისწული გიორგი (ამ დროს იგი მცირეწლოვანი იქნებოდა). თუმცა ზუსტად გარკვევა აქ მოხსენებული პიროვნებებისა ჭირს, ცხადია, რომ ისინი სხვადასხვა პოლიტიკური ერთეულების წარმომადგენლები იყვნენ და მათ, ალბათ, ჰქონდათ როგორც ერთი მიზანი (თურქ-სელჩუკთა წინააღმდეგ ბრძოლა), ასევე განსხვავებულიც. თითოეული მათგანი, სავარაუდოა, ცდილობდა ეგვიპტის მხარდაჭერა მოეპოვებინა მეორის წინააღმდეგ (ჟორჟოლიანი 1979: 63). „საფარ-ნამედან“ მოყვანილი ცნობა განეკუთვნება 1047 წელს, როდესაც ანატოლია და ამიერკავკასია განიცდის სელჩუკთა შემოსევებს. ნასერ ხოსრუს მიერ ჩამოთვლილი ქვეყნების უმრავლესობა განიცდის სელჩუკთა აგრესიის საფრთხეს, ან უშუალო აგრესიას. თვითონ ეგვიპტეს ამ დროს სელჩუკთა აგრესია არ ემუქრება, თუმცა მათი ინტერესები უკვე დაპირისპირებულია, ერაყის დაპყრობის შემდეგ კი სელჩუკები საღვთო ომს აცხადებენ ფატიმიანთა წინააღმდეგ. გ. ჟორჟოლიანი შენიშნავს: „როგორც ჩანს, ნილოსის არხის გახსნისადმი მიძღვნილ ზეიმზე მონაწილე ქვეყნები დიდ მნიშვნელობას ანიჭებენ ეგვიპტის სახელმწიფოს საერთაშორისო ავტორიტეტს, მის სამხედრო ძლიერებას და მიაჩნიათ ის სელჩუკთა პოტენციურ მოწინააღმდეგედ. სწორედ ამ ნიადაგზე უნდა გაცხოველებულიყო დიპლომატიური ურთიერთობა ეგვიპტესა და მახლობელი აღმოსავლეთის ჩამოთვლილ ქვეყნებს შორის“ (ჟორჟოლიანი 1979: 65).

ბიზანტიელი ისტორიკოსის მიხედვით ატალიატეს ცნობით, „ჰუნ-ნეფთალიტებმა (სელჩუკებმა) ყველა იქ მყოფთ უჩვენეს უძლეველი ღონე, და აღმოსავლეთით

იბერიის საზღვრებს მიუახლოვდნენ, შეუტყეს, რამდენადაც შეეძლოთ, ძლიერად და ალყა შემოარტყეს რა სირიის სამფლობელოს, რომელთა სარდალი ცოცხალი შეიპყრეს, რომელსაც მეტსახელად ერქვა ლიხუდე. ხალხი განუწყვეტელ თავდასხმებს ახდენდა ყოველწლიურად და ამით არა მცირედი ვნება მიაყენა რომაელთა ქვეყანას“ (ატალიატე 1966: 23). ატალიატეს ამ ცნობიდან ირკვევა, რომ უკვე სელჩუკები საქართველოს საზღვრებთან ხშირად ჩანან. დასავლეთიდან ისინი ბიზანტიელების წინააღმდეგობასაც წააწყდნენ. ბიზანტიელები ხშირად იყენებენ ლიპარიტ ბაღვაშის დახმარებას. როგორც ი. ჯავახიშვილი აღნიშნავს, „იმის გარდა რომ ლიპარიტი თვითონ იყო ერმრავალი, ძლიერი და მდიდარი-მას ბიზანტიის კეისრისგანაც ზურგი ჰქონდა გამაგრებული; ესეც-კია, რომ ბერძნებისათვისაც ძალიან ხელსაყრელი იყო ლიპარიტის მეგობრობა. თითქმის ყოველს დიდს ლაშქრობაში, რომელიც-კი ბერძნებს აღმოსავლეთში შემთხვევით, ბიზანტიელების მოკავშირედ ლიპარიტი იყო (ჯავახიშვილი 1983: 146). „მატიანე ქართლისაჲ“ გადმოგვცემს ლიპარიტ ერისთავის ლაშქრობას დვინზე ბერძენთა დასახმარებლად 1047 წელს: „წავიდა ლიპარიტ მითვე ლაშქრითა დვინად, და ულაშქრა ბერძენთა მეფესა დვინელსა ზედა, და შემოიქცა თავის ქუეყანად“ („მატიანე ქართლისაჲ“ 2008: 286). 1047 წელს სელჩუკების მცირე აზიასა და ამიერკავკასიაში გამოჩენას ადასტურებს ბიზანტიური წყაროც. კედრენეს მიხედვით, „ასანი, რომელიც გაგზავნილ იქმნა სულთანის მიერ რომაელთა წინააღმდეგ, თავრეზისა და ეგრეთ წოდებული თბილისის (ტეფლის) გავლით, ჩავიდა ვასპურაკანში, გზაზე ყველაფერს ანადგურებდა და წვავდა, ვინც გზაში ხვდებოდა, სპობდა, საბავშვო ჰასაკის ყმაწვილებსაც არ ზოგავდა“ (კედრენე 1963: 68). ამჯერად ბიზანტიელებმა მოახერხეს მობილიზაცია. ვასპურაკანის მმართველმა აარონ ვესტმა ბრძოლას თავი აარიდა და დასახმარებლად სომხეთისა და იბერიის მმართველს, კეკავმენს უხმო. ორი თემის გაერთიანებულმა ლაშქარმა, საქმხედრო ეშმაკობის წყალობით, მდინარე სტრაგნის ნაპირებთან სასტიკად დაამარცხა თურქ-სელჩუკები (სამუშია 2003: 212). ეს თოდრულ-ბეგის დიდი მარცხი იყო. კედრენეს ცნობით, „რომ შეიტყო სულთანმა მომხდარი უბედური ამბავი, დიდ მწუხარებაში ჩავარდა და იმის ზრუნვაში იყო, თუ როგორ გამოესწორებინა ეს უბედურება“ (კედრენე 1963: 70). ერთი წლის შემდეგ, როდესაც სელჩუკები იბრაჰიმ იინალის სარდლობით ბასიანს შეესივნენ, ბერძნებმა კვლავ ლიპარიტს სთხოვეს დახმარება. ამ ბრძოლაში ბერძენ-ქართველთა

ლაშქარი დამარცხდა და ლიპარიტი ტყვედ აიყვანეს: „და შემდგომად წელიწდისა მოქცევისა გამოჩნდეს თურქნი სულტნისანი ბარაჰიმდისანი ქუეყანასა ბასიანისასა. გამოვიდა ბერძენთა მეფისა ლაშქარი, და უხმეს ლიპარიტს. და წარვიდა ლიპარიტ შუელად ბერძენთა ყოველთა ლაშქრითა ამის ზედაის კერძისათა. შეიზნეს ორდროსა და უკუმიასა ქუემოთ, და გააქციეს ყოველი სპაი საბერძნეთისა და ლიპარიტისაი თურქთა, იქმნა მოსრვაი დიდი. და შეიპყრეს ლიპარიტ და წარიყვენეს ხუარასანს სულტანსა თანა“ („მატიანე ქართლისაჲ“ 2008: 286).

„მატიანე ქართლისაჲს“ ამ ცნობას ლიპარიტ ბაღვაშის სელჩუკთა წინააღმდეგ ბრძოლისა ბერძენთა დახმარების მიზნით და მისი ტყვედ ჩავარდნის ამბავს ადასტურებს ბერძნული (გიორგი კედრენე; იოანე ზონარა), სომხური (არისტაკეს ლასტივერტეცი; სტეფანოს ორბელიანი; მათეოს ურჰაეცი) არაბული (მუნეჯიმ ბაში; იბნ ალ-ასირი) და სირიული (ბერ ჰებრაი) წყაროები.

არისტაკეს ლასტივერტეცი ამ ლაშქრობის შესახებ გადმოგვცემს: „ჩვენი წელთაღრიცხვის ოთხმოცდაჩვიდმეტ წელს (1048), რომელიც ჩვენი ტყვეობის მეორე წელი იყო, სპარსელთა ქვეყნიდან კვლავ დაიძრნენ რისხვით აღსავსე და საზარელი ღელვით აბოზოქრებული [ჯარები], მოვიდნენ და მოეფინენ კარინისა და ბასიანის ფართო ველებს. თავდამსხმელებმა ქვეყნის ორივე მხარე დაიპყრეს. დასავლეთით - ქალდიის გავარამდე, სპერამდე და ტაოსა და არშარუნიქის ციხესიმაგრეებამდე, ხოლო სამხრეთით ტარონისა ჰაშტეანქის გავარებამდე და ხორძეანის ტყემდე. ისინი შეჩერდნენ თოთხმეტი დღე და მოზღვავებულებმა დაფარეს მთები და ბუჩქოვანი ადგილები, დაიპყრეს მთელი ქვეყანა“ (არისტაკეს ლასტივერტეცი 1974: 75).

XIII საუკუნის სომეხი ისტორიკოსის სტეფანოზ ორბელიანის ცნობით, ამ ლაშქრობაში ლიპარიტს გამოუყვანია 700 წარჩინებული, 16 000 მეზრძოლი და 10 000 სამეფო ჯარი: „განვლეს აზნაურთა და დიდებულთა შვდასთა, რომელნი იყუნეს სამარადისო მონანი მისნი და ათექვსმეტმან ათასმან კაცმან მეომარმან, ხოლო სამეფოსა ძალთაგან ათმა ათასმან და წარვიდა ვანანდს“ (სტეფანოზ ორბელიანი 1978: 33). ვ. კოპალიანის აზრით, „700 დიდი აზნაური გაზვიადებული რიცხვი ჩანს. თუ XI საუკუნის ქართველი დიდი აზნაურის ეკონომიკური და პოლიტიკური მდგომარეობის ხვედრით წონას გავითვალისწინებთ, არ შეიძლებოდა

ლიპარიტს 700 დიდი აზნაური ჰყოლოდა“ (კოპალიანი 1962: 168). მისივე შენიშვნით, 10 000 კაციანი სამეფო ლაშქარი ბიზანტიის ლაშქარი უნდა იყოს, რომელიც ბიზანტიის იმპერატორმა გამოაყოლა 1045 წლის მიწურულს ანისიდან საქართველოში დაბრუნებულ ლიპარიტ ბაღვაშს და რომლებიც სასირეთისა და არყის ომებში მონაწილეობდნენ (კოპალიანი 1969: 250). კედრენეს ცნობით, თურქ-სელჩუკთა ლაშქარი დაახლოებით ასი ათასი მეომრისაგან შედგებოდა (კედრენე 1963: 70). სამართლიანად შენიშნავს ჯ. სამუშია, რომ „შეიძლება მასში მოყვანილი რიცხვი-100 ათასი-გადაჭარბებულია, მაგრამ სხვა წყაროებიდან მისი გადამოწმება სამწუხაროდ ვერ ხერხდება“ (სამუშია 2003: 213). სტეფანოზ ორბელიანის მიხედვით, იბრაჰიმ იინალის ლაშქარი შედგებოდა ხორასანის, ხვარაზმის, ფარსის, ქირმანის, ბუხარის, მაზანდარანის, ერაცის, ბაღდათის, ბასრას, არანისა და ატრაპატაკანის მოსახლეობისაგან. ლაშქრობაში მონაწილეობა მიუღიათ აგრეთვე ხაზარებსა და სკვითებს (სტეფანოზ სივნიეთის ეპისკოპოსი 1971: 204). იბნ ალ-ასირის ცნობით, კი იბრაჰიმ იინალის ლაშქარში მონაწილეობდა მავერაჰანიდან ჩამოსახლებული ოღუზთა ახალი ნაკადი (სილაგამე 1971: 68).

ლიპარიტ ერისთავის თურქ-სელჩუკების წინააღმდეგ ბრძოლაში მონაწილეობასთან დაკავშირებით ზონარა წერს: „და მას შემდეგ, რაც ლიპარიტმა დიდი ნაწილი იბერიისა იგდო ხელთ, გაგზავნა რომაელთა მიმართ [მოციქულები] და დახმარება აღუთქვა თურქთა წინააღმდეგ ბრძოლაში. თურქების ჯარი იდგა ერთ ადგილას და რომაელები მათთან შებრძოლებას ვერ ბედავდნენ მანამ, ვიდრე მათ, მეფის ბრძანებისამებრ არ შეურთდებოდა იბერიელთა ჯარი“ (ზონარა 1963: 236). ბერძენ-ქართველ-სომეხთა გაერთიანებულ ლაშქარსა და სელჩუკთა შორის ბრძოლა, წყაროების მიხედვით, (მატიანე ქართლისა, კედრენე, არისტაკეს ლასტივერტეცი, იბნ ალ-ასირი) 1048 წელს მომხდარა „ზემო ბასიანის ვრცელ ველზე, სოფლების- ოკომი/უკუმისა და ორდო/ორტუზს შორის“ (სამუშია 2003: 223). ი. ჯავახიშვილის აზრით, ეს ბრძოლა 1048 წლის ენკენისთვეში მომხდარა (ჯავახიშვილი 1983: 146). ამ თარიღს ასახელებენ: ვ. ბენეჟევიჩი (Бенешевич 1921: 7) რ. ჰუსეინოვი (Гусейнов: 1980: 121), ს. აგაჯანოვი (Агаджанов 1965: 15), მ. ლორთქიფანიძე (ლორთქიფანიძე 1976: 186), ზ. პაპასქირი (პაპასქირი 1990: 2001), გ. ჯაფარიძე (ჯაფარიძე 1998: 325). ჯ. სამუშია კიდევ უფრო აკონკრეტებს საკითხს და

ამ ბრძოლას 1048 წლის 17-18 სექტემბრით (შაბათ-კვირა) ათარილებს (სამუშია 2003: 227).

წყაროებიდან აშკარად ჩანს, რომ ამ ბრძოლის მთავარი გმირი ლიპარიტია. სელჩუკებმა მის წინააღმდეგ მიმართეს მთავარი ძალები და ტყვედ აყვანის შემდეგ გაიმარჯვეს კიდევ ბერძენ-ქართველთა გაერთიანებულ ლაშქარზე. დიმიტრი ბაქრაძე აღნიშნავს ბრძოლის დროს ბიზანტიელთა გაუტანლობასა და ლიპარიტის გასაოცარ ვაჟკაცობას. იგი წერს: „ბერძნები შურით უმზერდნენ იმის გასაოცარ ვაჟკაცობას და არ სურდათ, რომ დიდება ძლევისა ქართველისათვის მიეწერათ. ამისათვის ისინი უკუსდგნენ... გაცეცხლებულს ომში, როდესაც ლიპარიტი გამშაგებული სვრიდა, ერთმა იმისმემამულეთაგანმა... უკანიდან მოჰკვეთა ლიპარიტის ცხენს ორივე ფეხი. ლიპარიტი დაეცა, მაგრამ ერთი ხრმლის მოქნევით გააპო მოღალატე. ქართველნი ზოგნი იქვე დაიხოცნენ, ზოგი გაიბნენ“ (ბაქრაძე 1880: 31). როგორც ჩანს, დიმიტრი ბაქრაძე ლიპარიტის ვაჟკაცობასა და მისი ტყვედ ჩავარდნასთან დაკავშირებით სარგებლობდა სომხური წყაროებით. ბერძნული წყაროებისაგან განსხვავებით სომხურ წყაროებში გასაგებადაა აღნიშნული ბიზანტიელი სარდლების ღალატი. მათეოს ურჰაეცის ცნობით, „როდესაც ჰორომთა ჯარმა დაინახა ლიპარიტის სიმამაცე, მახვილს მისცეს იგი და დასტოვეს ლიპარიტი [მოწინააღმდეგეთა] შორის, თვითონ კი გაიქცნენ... ეს რომ დაინახეს უცხოელმა ჯარებმა, ერთად მობრუნდნენ ქართველთა ჯარებთან საბრძოლველად“ მათე ურჰაელი 1971: 200) ურჰაეცის ცნობას ადასტურებს სუმბატ სპარაპეტი (სუმბატ სპარაპეტი 1971: 203). მათეოს ურჰაეცი გვამღევს ცნობას აგრეთვე ლიპარიტის ტყვედ ჩავარდნის შესახებ, ბერძენთაგან მიტოვებულ ლიპარიტს, გაცხარებული ბრძოლის დროს „ერთი [მეომარი] ქართველთა ჯარიდან უკან დადგა, ირიბად გადაჰკრა და გადაუკვეთა ცხენს ორი ძარღვი“ (მათე ურჰაელი 1971: 200). ამის შემდეგ ლიპარიტი ცხენიდან ჩამოვარდა და მტერს ტყვედ ჩაუვარდა. ვფიქრობთ, მათეოს ურჰაეცის ეს ცნობა რეალობას უნდა შეესაბამებოდეს, როგორც ცნობილია, ამ დროს ლიპარიტსა და საქართველოს მეფე ბაგრატ IV-ს შორის ურთიერთობა უაღრესად დაძაბულია. გამორიცხული არ არის ლიპარიტის ლაშქარში მოხვედრილიყო ბაგრატის ერთგული ჯარისკაცი, რომელიც დაინტერესებული იქნებოდა ლიპარიტ ბაღვაშის დატყვევებით.

ზონარა ასე გადმოგვცემს ლიპარიტის დატყვევებისა და გათავისუფლების ამბავს: „ხოლო ლიპარიტი, რომელიც მეორე ფრთაზე იბრძოდა, მტრების მიერ იქნა დატყვევებული. როდესაც რომაელებმა [ბარბაროსების] დევნა შეწყვიტეს, ლიპარიტს დაელოდნენ, მაგრამ ვერავინ ნახეს ისეთი, რომელიც ლიპარიტს შეხვედროდეს. ამ მდგომარეობაში რომ იყვნენ, ერთმა [პიროვნებამ] აუწყა ლიპარიტის დატყვევება, ხელში ჩაგდება და მტერთა მიერ მისი [შეპოვებული] სასწრაფოდ გაგზავნის [ამბავი]. რომაელები ამის გაგებით ძალზე ნაწყენი დარჩნენ. ბარბაროსებმა ლიპარიტი სულთანს მიჰგვარეს. მაგრამ მეფემ (ე. ი. კეისარმა) შეიტყო თუ არა ლიპარიტის დატყვევება, კაცი გაუგზავნა სულთანს დიდი გამოსასყიდი თანხით და საჩუქრებით, ითხოვა ლიპარიტის განთავისუფლება და რომაელებსა და თურქებს შორის ზავის დადება. სულთანმაც თავის მხრივ ლიპარიტის ხელით საჩუქრებიც გაუგზავნა მეფეს და მისთვის გაგზავნილი თანხაც უკან დაუბრუნა და ბრძანება გასცა, რომ არც ერთ თურქ ჯარისკაცთაგანს მისთვის ხელი არ ეხლო“ (ზონარა 1966: 237-238). სამართლიანად შენიშნავს ნ.შენგელია: „სულთანი ამ „გულუხვობით“ უფრო დიდ მიზნებს ისახავდა. მას არ აკმაყოფილებდა მხოლოდ საჩუქრები. ლიპარიტის გათავისუფლებასთან ერთად, იოანე ზონარას ცნობით, სულთანმა საგანგებო ელჩი გაუგზავნა კეისარს, რომელსაც დიდი გადასახადი მოსთხოვა: „გამოემართა სერიფი დიდი ქალაქისაკენ (ე. ი. კონსტანტინეპოლისაკენ), მეფის სანახავად მოვიდა, წარუდგინა მას დიდი გადასახადი, სულთანი რომ ითხოვდა [რომაელებისაგან], და უკან გაბრუნდა. ამ დროიდან განრისხდა სულთანი რომაელებზე და გაემართა მათ წინააღმდეგ, ამიერიდანვე დაიძრა თურქთა ტომი აღმოსავლეთიდან, დაიპყრეს ყველა ადგილი და ბიზანტიის გაღმა მდებარე ქვეყნებამდე მიაღწიეს. აი. ამნაირად დაეუფლნენ თურქები იმ ადგილებს“. სწორედ ამ დიდ გადასახადებს ითხოვდა სულთანი ლიპარიტის გამოსასყიდლად და არა იმ მცირე ძღვენსა და საჩუქარს, რომელსაც კეისარი უგზავნიდა მას“ (შენგელია 1968: 193-194).

ამ ბრძოლის მეორე წელს სომხეთში სელჩუკთა დიდ ლაშქრობაზე საუბრობს არისტაკეს ლასტივერტეცი: „მეორე წელს მშვილდოსანთა და მახვილოსანთა ურიცხვი ჯარები შეგროვდნენ, როცორც არწივნი საჰმელზე და დიდი გამბედაობით სწრაფად შეიჭრნენ ჩვენს ქვეყანაში, სექტემბრის თვის ოთხშაბათ დღეს, წმინდა ჯვრის დღესასწაულისას“ (არისტაკეს ლასტივერტეცი 1974: 75).

შესაძლებელია, ამიერკავკასიაში ამ ლაშქრობის დროს მოადგნენ თურქ-სელჩუკები განჯას, რაზედაც საუბრობს „მატიანე ქართლისაჲს“ ავტორი. ქართველი მემატიანის ცნობით, ანატოლიაში იბრაჰიმ იინალის გამარჯვების შემდეგ თურქები განჯაში გამოჩნდნენ, ბიზანტიის კეისარმა სარდალი ლიხტური გამოგზავნა დიდი ლაშქრით. მას შეუერთდა ბაგრატ მეფეც, რომელიც კეისრის გულის მოგებას ცდილობდა. თურქებმა თავი აარიდეს კოალიციურ ჯართან ბრძოლას და განჯა დატოვეს. ამ ამბავს მემატიანე ასე გადმოგვცემს: „და დადგომილ იყვნეს განძას ქუეყანასა თურქნი, და წასაღებელად მიეწურა განძა. გამოგზავნა თავისა ნაცვლად ბერძენთა მეფემან ლიხტური ლაშქრითა დიდითა. და აწვიეს ბაგრატ ყოვლითა ლაშქრითა მისითა, და წაჰყვა თანა. დაემართნეს თურქთა და მივიდეს განძის კარსა, და მირიდეს თურქთა, და დაარჩინეს განძის ქუეყანაი და შემოიქცეს მშვიდობით“ („მატიანე ქართლისაჲს“ 2008: 286). როგორც ჩანს, ლიპარიტის ტყვედ ჩავარდნის შემდეგ ბიზანტიის კეისარი (კონსტანტინე მონომახი) იძულებული გახდა, სელჩუკების წინააღმდეგ მოკავშირეობა ბაგრატ IV-ისთვის ეთხოვა. მიუხედავად იმისა, რომ ამ მოკავშირეობამ დადებითი შედეგი გამოიღო, კეისარმა მას ანგარიში არ გაუწია. საქართველოში პოლიტიკური ინტრიგების მოწყობასა და ცენტრალური ხელისუფლების წინააღმდეგ ბრძოლას თავი არ დაანება. „ლიპარიტის მოკავშირეობას სულ სხვა და უფრო დიდი მნიშვნელობა ჰქონდა საკეისროსთვის, ვიდრე ბაგრატის მოკავშირეობას. ლიპარიტი მხოლოდ თურქთა წინააღმდეგ არ სურდა გამოეყვანა ბიზანტიას; ის პირველ რიგში, საქართველოს შიგნით ესაჭიროებოდა საკეისროს და ამიტომ ცდილობდა იმპერატორი მის გამოხსნას“ (მ. ლორთქიფანიძე 1979: 186). ბიზანტიის იმპერიის პოლიტიკური კურსი ამიერკავკასიაში სომხეთ-საქართველოს დაპყრობა და თავის ქვეშევრდომად გადაქცევა იყო, მაგრამ სელჩუკთა შემოტევებმა ბიზანტია მძიმე მდგომარეობაში ჩააყენა, რამაც გარკვეულ წილად შეასუსტა მისი პოლიტიკა ამიერკავკასიის მიმართ. სამართლიანად შენიშნავს ა. აბდალაძე: „ისე გამოდის, თითქოს, საქართველოს სამეფო ბიზანტიის იმპერიისაგან დაპყრობას ვერ გადაურჩებოდა, თურქ-სელჩუკთა შემოსევა რომ არ ყოფილიყო“ (აბდალაძე 1988: 264).

1051 წელს სელჩუკთა ტყვეობიდან გათავისუფლებულმა ლიპარიტმა „აღმოვლო ქართლი და მოვიდა ჯავახეთს. გაძლიერდა ლიპარიტი, რამეთუ მსახურებისათვის ბერძენთა მეფისა ტყუექმნილ იყო; წავიდა საბერძნეთს და ნახა ბერძენთა მეფე და

მოიროთო ბერძენთა მეფისაგან ძალი. და ვერღარა დაუდგა ბაგრატ.“ („მატიანე ქართლისაჲ“ 2008: 286) ქართველი მემკვიდრე აღნიშნავს ლიპარიტის უზომო გაძლიერებას, რომელსაც ანგარიშს უწევს როგორც სელჩუკთა სულთანის, ასევე ბიზანტიის კეისარის; „და ლიპარიტ მოიჭუნა ზემოსა კერძსა დაუკლებლად და იყო მოყუარედ მისა ხუარასანს თოღლუბეგ სულტანი და საბერძნეთს-ბერძენთა მეფე, და ზრდიდა ბაგრატის ძესა, გიორგის მცირესა, სახელითა მეფობისაჲთა. ხოლო ბაგრატს აქუნდა ლიხსა ქუმოთი კერძი დაწყობით“ („მატიანე ქართლისაჲ“ 2008: 287). ვფიქრობთ, მახლობელ აღმოსავლეთში სელჩუკთა და ბიზანტიელთა დაპირისპირებით შეიქმნა ისეთი მდგომარეობა, რომ ლიპარიტის მხარდაჭერას ორივე მხარისთვის დიდი მნიშვნელობა ჰქონდა.

1054 წელს თოდრულ-ბეგის სარდლობით, სელჩუკების ამიერკავკასიაში დიდ ლაშქრობაზე საუბრობს არისტარკეს ლასტივერტეცი. მის მიერ ჩამოთვლილ თურქ-სელჩუკთა მიერ დარბეული ტერიტორიების შემადგენლობაში საქართველოც შედის: „ჩვენი წელთაღრიცხვის ხუთას სამ წელს (1054), იმავე თვესა და იმავე რიცხვში, როდესაც ჩვენი ქვეყანა პირველად ტყვედ წაასხეს, გადაწვეს არწი და სხვა ქალაქები და დაბა-სოფლები. დაიძრა სიკვდილის მომტანი, სისხლის მსმელი და კაცის მკვლელი მხეცი-სულტანი ურიცხვი ჯარით, სპილოებით, ეტლებით, ცხენებით, ცოლებით, ვაჟებით და დიდძალი ქონებით. მან დასტოვა არქეში და ბერკრი, მოვიდა და დამკვიდრდა აპაჰუნიქის გავარის ქალაქ მანაზკერტთან და ყველა ფართო ველ-მინდვრებს დაეპატრონა. მან მარბიელი მოჰფინა ქვეყნის სამ მხარეს-ჩრდილოეთით აფხაზთა ციხემდე და პარხარის მთამდე და კავკასიის მთის ძირამდე, დასავლეთით-ჭანეთის ტყემდე, ხოლო სამხრეთით-სიმის მთამდე. მათ დაიპყრეს მთელი ქვეყანა [და მომკეს ყოველივე] პურის ყანის მარცვლების მომკელთა მსგავსად“ (არისტაკეს ლასტივერტეცი 1974: 87-88). სელჩუკთა ამ ლაშქრობამ ანატოლიასა და ამიერკავკასიაში გამოიწვია ამ მხარის საშინელი აოხრება: „მთელი ქვეყანა გვამებით აივსო: ნაშენი და უშენი, გზები და უდაბური ადგილები, ქვიანი და კლდოვანი, ტყიანი და გაშიშვლებული და ყველა სამოსახლო ადგილი ცეცხლს მისცეს. გადაწვეს სახლები და ეკლესიები, რომელთა ცეცხლის ალი უფრო მაღლა მიემართებოდა, ვიდრე ბაბილონისა. და ამგვარი მოქმედებით ააოხრეს მთელი ქვეყანა, არა თუ ერთხელ, არამედ სამჯერ ერთმანეთის მიყოლებით, სანამ სრულიად არ ამოწყდა მოსახლეობა და დადუმდა პირუტყვთა

ხმა“ (არისტაკეს ლასტივერტეცი 1974: 88). ყველაზე მეტად დაზარალდა ბიზანტიის სომხური პროვინციები, რასაც გულგრილად უყურებდა ბიზანტიის იმპერია. განსაკუთრებით სუსტი იყო მათი დახმარება სომხეთის სასაზღვრო ზოლისა და ციხე-სიმაგრეების გამაგრების საქმეში. ამის გამო ზარალდებოდა სომხეთის მოსაზღვრე სამხრეთ საქართველოს რაიონები. არისტაკეს ლასტივერტეცი აღნიშნავს: „ხოლო ტაოს ქვეყანაში შეჭრილი მტრები, მთელი ქვეყნის დამპყრობნი, მოვიდნენ მდინარე ჭოროხამდე, გადალახეს იგი, უკან მობრუნდნენ და მოვიდნენ ბაბერდის ციხე-ქალაქამდე. იქ მათ შეხვდა ჰორომთა ჯარის ერთი გუნდი, რომელიც ვარიაგებად იწოდებოდა; ისინი შეებრძოლნენ მტრებს. ღვთის წყალობით ჰორომთა ჯარებმა დაამარცხეს მტრები და მათი სარდალი მრავალ სხვა მებრძოლეთან ერთად მოკლეს, სხვები კი გაიქცნენ; მათ მთელი ნადავლი და ტყვეები წაართვეს მოწინააღმდეგეს, მაგრამ გაქცეულთა კვალდაკვალ დიდ მანძილზე დადევნება ვერ გაბედეს, რადგანაც შეშინდნენ, რომ შესაძლებელი იყო მრავალრიცხოვან ჯარებს შეხვედროდნენ“ (არისტაკეს ლასტივერტეცი 1974: 90).

სელჩუკთა ამ ლაშქრობას უნდა ეხებოდეს ბიზანტიური წყაროს ცნობაც. კედრანეს მიხედვით, თოდრულ-ბეგის ლაშქრობის მიზეზი მის წინააღმდეგ ყუთულმუსის აჯანყება გამხდარა: „სულტანი მას უკან დაედევნა და თავისი ჯარებით იბერიაში მივიდა: ეს რომ ყუთულმუსმა შეიტყო, გაიქცა საბასკენ და ბედნიერი არაბეთისკენ. სულტანი რომ იბერიაში ჩავიდა, რაც კი შეხვდა გზაზე, დაარბია და გადაწვა. ამიტომ მეფემ სასწრაფოდ დაიბარა დასავლეთიდან მიხაილ აკულუთოსი და იბერიაში გაგზავნა. ეს რომ იქ ჩავიდა, შეკრიბა ხალდიასა და იბერიაში გაბნეული ფრანგები (ფრანჯები) და ვარანგები და იჩქაროდა რამენაირად შეეფერხებინა სულტნის თავდასხმები. სულტანი აიყარა და თავრიზისაკენ წავიდა“ (კედრენე 1963: 83).

უშუალოდ თურქ-სელჩუკთა საქართველოში ლაშქრობის ყველაზე ადრინდელი პერიოდის შესახებ ქართული წყაროებიდან ცნობას გვაძლევს ბაგრატ IV-ის მიერ 1057 წელს შიო მღვიმის ლავრისთვის გაცემული შეწირულობის სიგელი. სიგელი ეხება სელჩუკთა მიერ შიო მღვიმის ლავრის მამულების აოხრებას. ბაგრატ მეფეს შიო მღვიმის ლავრისთვის სელჩუკთა თავდასხმისგან გამოწვეული ზარალის შემსუბუქების მიზნით მამულები შეუწირავს: „[ლაშქარი დიდი წარმართნი... და ვე[რ და] ვიმორჩილეთ ლაშქარნი, და ალაოვრეს მამულნი] წ(მი)დისა უდაბნოისა ლავრისა

მლუიმისანი.და [ესე წ(მიდა)თა მამათა მლუიმელთა ფრიად] დაუმძიმდა, რ(ომ)ლისათუისცა გულს-ვიდგინეთ შესა[ცსებელად აღოწრებულისა მამულისა წ(მი)დ(ი)სა ლავ] რისა და დაკლებულობისა მათისა განსაკურნებლად, მ[ოსაცსენებლად] სულსა პ(ირვე)ლ გარდაცვალებულთა მეფეთა, მამათა ჩე[მთა, და სალოცველად] სულისა ჩემისა და სალხინებელად ცოდვათა ჩემთა შევს[წირე წ(მი)დასა] მამასა შიოს, ლავრასა მლუიმისასა და წ(მიდა)თა მამათა მლუიმელთ[ა მანგლისის] კევს ადგილი ბორცუის ჯუარი, ყ(ოვ)ელითა მზღვრითა მისითა, მთ[ითა], ბარითა, წყლითა, ტყითა, კლდითა, წისქუილითა და ყ(ოვ)ლითა საკმრითა და უკმრითა. და გაუთავისუფლეთ ყ(ოვ)ლისა შესავლისა და გამოსა[ვა]ლისაგან: საჯელმწიფოისა, საერისთავოსა, სააზნაუროისა, საც[იხის]თოვისა, საკვეისუფლოისა, საბანჯრისა, საკიდისა, საკოშრისა ყ(ოვ)ლისა ღ(მრ)თისა დაბადებულისა შესავლისა და გამოსავლისაგან. და არა რაი ზ(ედ)აც თუინიერ სამსახურებელისა მის წმ(იდ)ისა ლავრისა მლუ(იმ)სა, რ(ამეთუ) თავისუფლობით შემიწირავს ყ(ოვ)ლისავე მეუნებლისა და დამაკლებლისაგან, რ(აით)ა, მეოხებითა წმ(იდ)ისა მამისა შიოისითა, ლოცვითა წმიდათა მამათა მლუიმელთაითა, მოგუენიჭოს ღ(მრ)თისა მიერ შენდობაი ამის ნაქმრისა და დაკლებისა მათისაი, წარმემართოს ლაშქრობაი ესე და ყ(ოვე)ლნივე დღენი ცხორებისა ჩემისანი ნებასა შინა ღ(მრ)თისასა მშუიდობით და მტერთა ჩემთა ზ(ედ)ა ძლევით აღვასრულნე. და შ(ემდგომა)დ სიკუდილისა მეოხ იყოს წ(ინაშ)ე ღ(მრ)თისა სულისა ჩემისათ(უი)ს წ(მი)დაი იგი და მადლი მათ ყ(ოვე)ლთა წ(მიდა)თა მამათაი“ (ენუქიძე...1984: 35-36).

ამ სიგელში მოტანილ ცნობას წარმართთა ლაშქრობასთან დაკავშირებით თ. ჟორდანია მიაწერს თოდრულ-ბეგის ამიერკავკასიაში ლაშქრობის პერიოდს, რომელსაც ის 1050-1053 წლებით ათარიღებს. ნ. შენგელია შენიშნავს, რომ ჟორდანია მ. ბროსეს გამოკვლევებს ეყრდნობა. მართალია. მარი ბროსე დაბეჯითებით აღნიშნავს სელჩუკთა მრავალრიცხოვანი ლაშქრის შემოსევას იბერიაში და მოსახლეობის განადგურებას, მაგრამ წყაროს არ იმოწმებს (შენგელია 1968: 202).

ვფიქრობთ, 1057 წელს შიომღვიმის ლავრისთვის შეწირულობის სიგელი ამიერკავკასიაში სელჩუკთა 1054 წლის ლაშქრობას უნდა ეხებოდეს (როგორც ჩანს, სელჩუკთა მარბიელი ლაშქრობის ტალღამ საქართველომდეც მოაღწია). ამ თარიღს ასახელებს არისტაკეს ლასტივერტეცი. იგი ამ მოვლენის თვითმხილველია და

დაწვრილებით აღგვიწერს ამ ლაშქრობის დეტალებს (მარშუტი, მსვლელობა, შედეგი).

სელჩუკთა ამ ლაშქრობას ანატოლიასა და ამიერკავკასიაში 1054-1055 წლებით ათარიღებენ მათეოს ურჰაეცი და მუნეჯიმ ბაში (შენგელია 1968: 202-203).. იბნ ალ-ასირის ცნობით, ამ დროს სელჩუკებმა აზერბაიჯანი დაიპყრეს. უფრო სწორად თოდრულ ბეგს მთელი ეს მხარე უბრძოლველად დაუკავებია. აქ მისთვის საჩუქრები მიუერთმევიათ და მისი უზენაესობის ცნობის ნიშნად მის სახელზე ხუტბა წავკითხავთ. შემდეგ თოდრულ-ბეგს რუმის ქვეყნებში გაულაშქრია, სადაც ბევრი ტყვე და ნადავლი უგდია ხელთ (www.vostlit.info, Восточная литература, Авторы и источники на букву „И“ Ибн-ал-Асир, Тирих-ал-Камиль, Полный свод всеобщей Истории).

თ. ჟორდანიას ცნობით, უფრო გვიან 1055 წელს ლიპარიტის ვაჟის ივანეს მოწვევით სელჩუკთა მიერ განადგურებულ იქნა მესხეთის ნაწილი, ახლანდელი ოლთისისა და არტაანის მხარე (Жордания 1895: 7). თ, ჟორდანია არც ამ ცნობის წყაროს ასახელებს და არც ივანე ლიპარიტის მის ასეთი საქციელის შესახებ საუბრობს. მათეოს ურჰაეცის ცნობით, 1058/59 წლისათვის სელჩუკთა შემოსევის დროს ლიპარიტის შვილი ივანე მუსლიმებს შეუკავშირდა და მათ წინ მოუძღვებოდა. ივანეს მიერ სელჩუკების მოწვევის მიზეზი, არისტარკეს ლასტივერტეცის მიხედვით, მისი ბიზანტიელებთან ურთიერთობის გაუარესება ყოფილა. თვითონ ივანეს ბრძოლაში მონაწილეობა არ მიუღია, მაგრამ მისი კაცის მემკვიდრეობით აუოხრებიათ თურქ-სელჩუკებს ტერიტორიები ჭანეთის ტყემდე. „მათ ხელთ იგდეს დიდძალი ნადავლი და ტყვე და დიდი წარატებით უკან მობრუნდნენ ბოროტების მოთავესთან და დიდი ძღვენით მადლობა მოახსენეს მას იმ გამარჯვებისათვის, რასაც გზაზე მიაღწიეს. შემდეგ ისინი საკუთარ ქვეყანაში წავიდნენ. ვინაიდან ბოროტების მსახურებმა იხილეს ქვეყანა უპატრონოდ და უზედამხედველოდ, სწრაფად მობრუნდნენ, იქითკენ გასწიეს; გადვიდნენ მანანალის გავარში და ორად დაიყვნენ. ერთი ნაწილი წავიდა ეკელეაცის გავარისაკენ და ღამით თავს დაესხნენ ქალაქს, რომელიც იპოვეს მოუმზადებელ და გაუფრთხილებელ [მდგომარეობაში]. იქ [დატრიალებული] და საშინელი ბოროტება არ შემოიძლია აღწერო; დილით გათენებისას ცრემლმომგვრელი და აღმაშფოთებელი სანახაობა იყო, რომელიც გმინვასა და გოდებას ჰგვრიდა ქვებსა და უსულო საგნებსაც კი“ (არისტაკეს ლასტივერტეცი 1974: 105).

ბიზანტიის კეისარ კონსტანტინე მეათე დუკას (1059-1067) დროს საქართველოში თურქ-სელჩუკთა დიდ ლაშქრობაზე მიუთებს გიორგი კედრენე: „რადგან ის (კონსტანტინე მეათე დუკა) ასეთ საქმეებზე იყო გადაყოლილი, ხოლო სამხედრო საქმეებზე სრულიად არ ზრუნავდა, აღმოსავლეთის მხარეები, განსაკუთრებით კი რომაული ქვეყნის მოსაზღვრე მხარეები მტრის ლუკმად იყო გამხდარი. ყველაფერი ირბოდა და ნადგურდებოდა თურქთა თავდასხმებისა და ძალადობის გამო, აგრეთვე იმის გამო, რომ აღვირახსნილი ჯარისკაცები ძალმომრეობას ხმარობდნენ და თავზარს სცემდნენ ხალხს. განუწყვეტელი თავდასხმისა და ძარცვა-გლეჯის გამო, ყველაფერი ნადგურდებოდა. ამიტომ იბერიის მდიდარი ქვეყანაც, რომელმაც უკვე წინათაც განიცადა რბევა და დასუსტებული იყო, საბოლოოდ დაეცა და განადგურდა“ (კედრენე 1963: 82). იმავეს იმეორებს იოანეს სკილეცეს გამგრძელებელი და თავის მხრივ უმატებს: „მასთან ერთად საფრთხე განიცადეს იმ მხარეებმა, რომელიც მას (ე. ი. იბერიას) აკრავდნენ: მესოპოტამია და ხალდია, აგრეთვე, ნელიტენენ და კოლონია და მდინარე ევფრატის გაყოლებით მდებარე მხარეებმა“ (სკილეცეს გამგრძელებელი 1966: 162).

როგორც ს. ყაუხჩიშვილი აღნიშნავს, გიორგი კედრანეს „ხრონოგრაფია“ არის მსოფლიო ისტორია ქვეყნის გაჩენიდან 1059 წლამდე (ყაუხჩიშვილი 1963: 7). ხოლო კონსტანტინე X დუკა მეფობდა 1059-1067 წლებში. ამ მონაცემებიდან გამომდინარე, გიორგი კედრანესა და იოანე სკილეცეს მიხედვით, სელჩუკთა საქართველოში ლაშქრობა შეიძლება 1059 წლით დავათარილოთ. ამავე პერიოდში ანატოლიასა და ამიერკავკასიაში სელჩუკთა დიდ შემოსევებზე საუბრობს მათეოს ურჰაეცი. თურქი ისტორიკოსის ინანჩის აზრითაც, „სელჩუკებმა 1059 წლისათვის ანატოლიაში ვანის ტბის ჩრდილოეთით და აღმოსავლეთით მდებარე ტერიტორიები ხელთ იგდეს, მდ. მურადი გადალახეს და მდ. ევფრატის შესართავამდე დალაშქრეს და სამხრეთით წავიდნენ“ (Yinanc: 52-53). აღნიშნულ პერიოდში თურქ-სელჩუკთა მიერ ბიზანტიის მთელი რიგი ტერიტორიების დაკავების შესახებ ცნობებია დაცული გიორგი მცირის „გიორგი მთაწმინდელის ცხოვრებაში“. როდესაც გიორგი მთაწმინდელი 1060 წელს ანტიოქიიდან საქართველოში გამოემგზავრა, გზაში შეიტყო საქართველოსკენ მომავალი სახმელეთო გზების დაკეცვის ამბავი და იძულებული გახდა საქართველოში ზღვით შემოსულიყო: „გამოვედით ანტიოქიით და მოვიწიენით ვიდრე დიდად

მდინარედ ევფრატად. და მუნ გვეუწყა, ვითარმედ მიშუებისათჳს ცოდვათა ჩუენთაჲსა თურქთა დაუპყრიეს ყოველი შუამდინარე და ისაური და საბერძნეთი. ხოლო ჩვენ, გვესმა რაჲ ესე, შევიქცეთ მიერ და სევასტიით კერძო მოვიდოდეთ: გვეგონა, ვითარმედ მათ კერძოთა მშჳდობაჲ არს. ხოლო უწინარეს ჩუენსა მისრულ იყვნეს თურქნი და აეღო ქალაქი იგი და დაეწუა. და ჩვენ არაჲ უწყოდეთ და მივდიოდეთ და კნინდა-და მცირედ ჳელთა მათთა შთავვარდებოდეთ, უკეთუმცა წყალობასა ღმრთისასა არა აღეპყრა ჳელი. რამეთუ ჳმაჲ გვესმა ყოველთა, ვითარმედ: „სადა წარხვალთ“ და, უწყის უფალმან, კაცი არა გვხილავს, გარნა თუ ჳმაჲ ანგელოზისაჲ იყო.

ესრეთ შევიქცეთ და მათთა მივჳმართეთ და დიდითა შრომითა და დღე და ღამე სლვითა კესარიად მოვედით. და მუნით წარმოვედით და ზღვასა მოვჳმართეთ, რამეთუ ჳმელით არღარა ეგებოდა, და ნებითა ღმრთისაჲთა ევხაიტს მოვიწიენით სამარტჯლოსა წმიდისა თევდორესსა. ხოლო მღდელთ-მოდღუარმან მის ადგილისამან კეთილად შეგვწყნარნა და გვსტუმრნა და დიდი სიყუარული გუაჩუენა, რამეთუ კაცი იყო წმიდაჲ და ღმერთ-შემოსილი. და დიდად ნუგეშინის-იცა მისლვითა ჩუენითა განსაცდელთა მათთჳს, და მრავალი წარმოთქუეს ურთიერთარს სულთა ცხორებისათჳს. და ესრეთ გამოვედით მიერ და მოვიწიენით სამისონს, ქალაქსა ზღჳს-კიდისასა. და მუნ გავყიდენით საჳედარნი ჩუენნი და ესრეთ ნავითა წარვემართენით კერძოთა აფხაზეთისათა და კეთილითა და ჳამოჲთა ნიავითა მოვიწიენით ფოთს და მიერ საჳედრითა ქუთათისს ჟამსა სთვლისასა“ (გიორგი მცირე 1967: 158-159).

გიორგი მთაწმინდელის საქართველოში მოსვლისას, თხზულებაში აღწერილია მეფის დიდი გამარჯვება აბასძეებზე, რომელთაც მეფის შეპყრობა სურდათ: „ხოლო მას ჟამსა იქმნა დიდი გამარჯვებაჲ მეფისაჲ, ოდეს-იგი შეწევნითა ღმრთისაჲთა წინააღმდგომნი თჳსისა მეფობისანი აბაზაჲს ძენი შეიპყრნა, რომელთათჳს ყოველთა უწყით ჳქმმარიტებით, ვითარმედ შეპყრობაჲ მეფისაჲ ეგულებოდა“ (გიორგი მცირე 1967: 160).

ამდენად, გიორგი მცირე აღგვიწერს, როგორც ქვეყნის გარეთ, ასევე საქართველოში მიმდინარე პოლიტიკურ მოვლენებს, მაგრამ არაფერს ამბობს თურქ-სელჩუკების შესახებ გიორგი მთაწმინდელის საქართველოში მოსვლის დროს. გამორიცხული არ არის იმ მძიმე სოციალურ-ეკონომიკური მდგომარეობის ერთ-

ერთი მიზეზი, რაც გიორგი მთაწმინდელს ხვდება საქართველოში, თურქ-სელჩუკთა მარბიელი შემოსევებიც იყოს, რაც მის საქართველოში შემოსვლის წინა პერიოდში უნდა მომხდარიყო. ნ. შენგელია აღნიშნავს: „XI ს-ის 60-იანი წლებისათვის სელჩუკებმა დიდი ზიანი მიაყენეს საქართველოს, მის ინტენსიურ მეურნეობას, მწარმოებელ საზოგადოებას. სელჩუკთა მარბიელმა თარეშებმა და საქართველოს მეზობელ ქვეყნებზე მრავალგზის თავდასხმებმა მძიმე მდგომარეობაში ჩააყენეს მცირე აზიისა და ამიერკავკასიის ადგილობრივი მოსახლეობა. წყაროებში მრავალგზისაა მითითებული, თუ როგორ ნადგურდებოდა ბიზანტიის იმპერიის სასაზღვრო რაიონები სელჩუკთა შემოსევების შედეგად. ბიზანტიის ლაშქარი უძლური იყო სერიოზული წინააღმდეგობა გაეწია მტრისთვის. წყაროებიდან ჩანს, რომ განაპირა პროვინციები ბიზანტიის ინერტული მოქმედების გამო ნადგურდებოდა. არ იყო შეთანხმებული მოქმედება გაერთიანებული სამხედრო ძალების მეთაურთა შორის. ამასთანავე, სელჩუკების წინააღმდეგ ბრძოლა მთელი ძალ-ღონის დაძაბვასა და განსაკუთრებულ ღონისძიებებს მოითხოვდა. სელჩუკები თითქმის ყოველთვის გამარჯვებულები გამოდიოდნენ ბიზანტიის ტერიტორიაზე თავდასხმის დროს. თურქი ისტორიკოსის ქოიმენის განცხადებით, სელჩუკთა ამ თავდასხმებს დადებითი მნიშვნელობა ჰქონდა მათთვის. მათ ამ თავდასხმებით ნიადაგი მოამზადეს უფრო დიდი და საფუძვლიანი ლაშქრობებისათვის“ (შენგელია 1968: 217). 1060 წლიდან ალფ-არსლანის ლაშქრობამდე საქართველოში სელჩუკების შემოსევები საისტორიო წყაროების მონაცემებით არ შეინიშნება.

ქართველთა და სელჩუკთა ურთიერთობის ქრონოლოგიური თანმიმდევრობა, საისტორიო წყაროების მიხედვით, ალფ-არსლანამდე ასეთია:

1. სომხური წყაროების მონაცემებით სელჩუკები ამიერკავკასიაში 1016-1021 წლებში გამოჩნდნენ. ვარდან დიდი აღნიშნავს, რომ 1021 წელს ნახჭევანთან სელჩუკებს 5 000 ჯარისკაცით შეხვდა ლიპარიტი და ბრძოლა გაუმართა. თურქი მეცნიერის იანინჩის გამოკვლევით, როდესაც თურქ-სელჩუკები ნახჭევანთან აღმოჩნდნენ 1018-1021 წლებში, დაიწყეს ქართველთა ქვეყნის მარცვა. სელჩუკთა წინააღმდეგ გამოვიდალი პარიტი 5 000 მეზრძოლით, მაგრამ ძალები არ ეყო და გაიქცა, ხოლო მთელი ტერიტორია გასანადგურებლად სელჩუკებს დაუტოვა. როგორც ჩანს, თურქი მეცნიერი სომხურ წყაროებს ეყრდნობა. 1018-1021 წლებში

სელჩუკთა მირ საქართველს მარცვა სინამდვილეს არ უნდა შეესაბამებოდეს. ქართულ საისტორიო წყაროებში ამ პერიოდში ქართველთა და სელჩუკთა რაიმენაირი ურთიერთობის დამადასტურებელი ცნობები არ მოგვეპოვება.

2. ქართული დოკუმენტური წყაროს ცნობით: 1029 წელს „აქა ბაგრატ კურაპალატი სულტანსა დაესხა.“ ამ თარიღს ამყარებს მუნეჯიმ ბაშის ცნობაც, რომლის მიხედვით, ამ დროს, სელჩუკები აზერბაიჯანში შევიდნენ და ბევრი რაიონი გაანადგურეს. ვფიქრობთ, ქართველების სელჩუკებზე თავდასხმა აზერბაიჯანის ტერიტორიაზე მოხდა. როგორც ჩანს, სამეფო კარზე კარგად აცნობიერებდნენ თუ რა მძიმე შედეგები მოჰყვებოდა საქართველოსთვის სელჩუკების დამკვიდრებას სომხეთ-აზერბაიჯანში.

3. ბაგრატ IV-ის მიერ თბილისის ალყის უეცარი მოხსნის მიზეზად 1039-1040 წლებში ივანე ჯავახიშვილს, იბნ-ალ-ასირის ცნობაზე დაყრდნობით, თურქ-სელჩუკთა ამიერკავკასიაში გამოჩენა მიაჩნდა. თუ ივანე ჯავახიშვილის ამ მოსაზრებას დავეთანხმებით, საქართველოში ამ დროს სელჩუკებს უკვე გარკვეულ ანგარიშს უწევდნენ.

4. მათეოს ურჰაეცის ცნობით, 1040-1041 წლებში ქართველებსა და სომხებს კოალიციური ლაშქრობა მოუწყვიათ სომხეთის ტერიტორიაზე. ბაგრატ მეფეს ამ ბრძოლაში 4 000 ჯარისკაცი გამოუყვანია. ქართველ-სომეხთა გაერთიანებულმა ლაშქარმა არანის გამგებლის აბულ-სოვარის შემოტევა მოიგერია და დამარცხებული უკუაქცია. ბიზანტიელი ისტორიკოსის ატალიატეს ცნობით, ამ პერიოდში სელჩუკები უკვე აღმოსავლეთ იბერიის საზღვრებს მიუახლოვდნენ.

5. „მატიანე ქართლისაჲს“ მიხედვით, 1047 წელს ლიპარიტი აწყობს ლაშქრობას დვინში თურქ-სელჩუკების წინააღმდეგ ბიზანტიელთა დასახმარებლად. ერთი წლის შემდეგ ლიპარიტი თავისი ჯარით კვლავ ეხმარება ბიზანტიას სელჩუკთა წინააღმდეგ ბრძოლაში. ამ ომში ბერძენ-ქართველთა ლაშქარი დამარცხდა და ლიპარიტი ტყვედ ჩავარდა. „მატიანე ქართლისაჲს“ ამ ცნობას ადასტურებს ბერძნული, სომხური, არაბული და სირიული წყაროები.

6. ნასერ ხოსრუს „საფარ ნამეს“ („მოგზაურობის წიგნი“) ცნობით, 1047 წელს, ეგვიპტეში ნილოსის არხის გახსნისადმი მიძღვნილ ზეიმს სხვა ქვეყნების წარმომადგენლებთან ერთად, ქართველებიც ესწრებიან. ამ ქვეყნების საერთო მიზანი ანტისელჩუკური კოალიციის შექმნა უნდა ყოფილიყო.

7. 1049 წელს სომხეთში სელჩუკთა დიდ ლაშქრობაზე საუბრობს არისტაკეს ლასტივერტეცი. შესაძლებელია, ამ დროს გამოჩნდნენ ისინი განჯაში. „მატიანე ქართლისაის“ ცნობით, იბრაჰიმ იინალის ანატოლიაში გამარჯვების შემდეგ სელჩუკები განჯას მოადგნენ. ბიზანტიის კეისარმა სარდალი ლიხტური გამოგზავნა დიდი ლაშქრით, მას შეუერთდა ბაგრატ მეფეც, რომელიც, ალბათ, კეისრის გულის მოგებას ცდილობდა. თურქებმა თავი აარიდეს გაერთიანებულ ჯართან შებრძოლებას და განძა დატოვეს.

8. არისტაკეს ლასტივერტეცის ცნობით, 1054 წელს სელჩუკებმა სულთან თოღრულ - ბეგის სარდლობით კვლავ ილაშქრეს ამიერკავკასიაში. მის მიერ ჩამოთვლილ დარბეული ტერიტორიების შემადგენლობაში საქართველოც შედის. ამ ლაშქრობას 1054-1055 წლებით ათარიღებენ მათეოს ურჰაეცი, მუნეჯიმ ბაში და იბნ ალ-ასირი.

9. თურქ-სელჩუკთა საქართველოში ლაშქრობას ეხება ბაგრატ IV-ის მიერ 1057 წელს შიომღვიმის ლავრისთვის შეწირულობის სიგელი. ამ სიგელში მოტანილ ცნობას წარმართთა მიერ შიომღვიმის ლავრის მამულების აოხრების შესახებ თ. ჟორდანია მიაწერს თოღრულ ბეგის ამიერკავკასიაში 1050-1053 წლებში ლაშქრობას. ჩვენ უფრო სარწმუნოდ მიგვაჩნია ამ მამულების აოხრება სელჩუკთა ამიერკავკასიაში 1054 წლის ლაშქრობის დროს, რომელსაც გადმოგვცემს არისტაკეს ლასტივერტეცი.

10. 1058-1059 წლებში, მათეოს ურჰაეცის ცნობით, სელჩუკთა შემოსევას ამიერკავკასიაში წინ მოუძღოდა ლიპარიტის შვილი ივანე. არისტაკეს ლასტივერტეცის მიხედვით, თვითონ ივანეს ბრძოლაში მონაწილეობა არ მიუღია, მაგრამ მისი კაცის მეშვეობით აუოხრებიათ სელჩუკებს ტერიტორიები ჭანეთის ტყემდე.

11. ბიზანტიის კეისარ კონსტანტინე X დუკას (1059-1067) დროს საქართველოში თურქ-სელჩუკთა დიდ ლაშქრობაზე მიუთითებს გიორგი კედრანე. მისი „ხრონოგრაფიის“ პერიოდისა და კონსტანტინე X დუკას მეფობის წლების გათვალისწინებით, ეს ლაშქრობა შეიძლება 1059 წლით დავათარილოთ. ამ პერიოდში სელჩუკთა ამიერკავკასიაში დიდ ლაშქრობაზე მიუთითებს თურქი ისტორიკოსი იანინჩი. სწორედ ამ დროს უნდა მომხდარიყო ბიზანტიიდან საქართველოსკენ მომავალი სახმელეთო გზის დაკეტვა, რომელსაც აღნიშნავს

გიორგი მთაწმინდელის ბიოგრაფი გიორგი მცირე, ვფიქრობთ, იმ მძიმე პოლიტიკურ-ეკონომიკური მდგომარეობის ერთ-ერთი მიზეზი, რომელიც გიორგი მთაწმინდელს საქართველოში მოსვლის დროს (1060 წ.) დახვდა, თურქ-სელჩუკთა ზემოაღნიშნული ლაშქრობა უნდა ყოფილიყო.

ამგვარად, ქართულ წყაროებში, ბაგრატ მეოთხის მიერ 1057 წელს შიომღვიმის ლავრისთვის შეწირულობის სიგელის გარდა, სელჩუკების შემოსევები საქართველოში არღ-არსლანის ლაშქრობებამდე არ გვხვდება. აღნიშნული ფაქტი, უცხოურ წყაროებში გადმოცემული სელჩუკების საქართველოში ლაშქრობების ხასიათის გაანალიზებასთან ერთად, იძლევა საშუალებას, რომ ვივარაუდოთ: XI საუკუნის 30-იანი წლებიდან არღ-არსლანის სულთნობამდე ამიერკავკასიაში სელჩუკთა ლაშქრობების ძირითადი ობიექტი აზერბაიჯანისა და სომხეთის ტერიტორია იყო, რაც თავისებურ უარყოფით გავლენას ახდენდა საქართველოს პოლიტიკურ მდგომარეობაზე. ხშირი იყო სელჩუკთა მარბიელი ხასიათის შემოსევები უშუალოდ საქართველოს ტერიტორიაზეც. დადი ზიანი ადგებოდა ქვეყნის ეკონომიკასა და კულტურას. ამ დროს პოლიტიკური მოთხოვნები თურქ-სელჩუკებს საქართველოს მიმართ ჯერ კიდევ არ ჰქონდათ. განსაკუთრებით გაიზარდა სელჩუკთა ინტერესი საქართველოს მიმართ თურულ-ბეგის შემდგომი სულთნების, არღ-არსლანისა და მალიქ-შაჰის, დროს, როდესაც დიდ სელჩუკთა სახელმწიფომ ძლიერების მწვერვალს მიაღწია.

V თავი

პოლიტიკური ვითარება საქართველოში ალფ-არსლანის ლაშქრობების წინ (1057- 1064 წწ.)

XI საუკუნის 50-იანი წლების დასასრულისა და 60-იანი წლების დასაწყისში საქართველოს სამეფო კარმა საშინაო და საგარეო პოლიტიკის მიმართულებით გარკვეულ წარმატებას მიაღწია. თურქ-სელჩუკთა გააქტიურების შემდეგ ანატოლიისა და ამიერკავკასიის მიმართულებით ბიზანტიის იმპერია იძულებული გახდა, მეტი ანგარიში გაეწია საქართველოსთვის და მასთან მოკავშირეობის გზას დასდგომოდა. ბიზანტიას სჭირდებოდა ძლიერი ქრისტიანული სახელმწიფო ამიერკავკასიაში, რომელიც სელჩუკებს დაუპირისპირდებოდა. ვფიქრობთ, აქცენტი ამჯერად ბიზანტიამ ლიპარიტ ბაღვაშის მაგივრად საქართველოს ენერგიულ მეფე ბაგრატ IV-ზე გადაიტანა, რის გამოც, სამწლიანი საპატიო ტყვეობის შემდეგ, 1057 წელს იგი გაათავისუფლა და საქართველოში დააბრუნა. ზ. პაპასქირის აზრითაც, კონსტანტინეპოლის კურსის ცვლილება საქართველოს მიმართ მახლობელ აღმოსავლეთში შექმნილი საერთაშორისო ვითარებით უნდა ყოფილიყო განპირობებული. „ბიზანტიის იმპერიის მმართველმა წრეებმა, თურქ-სელჩუკთა მხრიდან სულ უფრო მზარდი საშიშროების ვითარებაში, აშკარად დაინახეს საქართველოს სამეფოსთან, აღმოსავლეთში ერთადერთ ქრისტიანულ სახელმწიფოსთან, შემდგომი კონფროტაციის სრული უპერსპექტივობა და მასთან კეთილმეზობლური, სამოკავშირეო ურთიერთობის დამყარება ამჯობინეს, რომელიც მოგვიანებით დინასტიური ქორწინებითაც (ბაგრატ IV-ის ასულის მართა მარიამის მითხოვება მიხეილ დუკასათვის) იქნა განმტკიცებული“ (პაპასქირი 1990: 209). კეისრის მიერ ბაგრატ IV-ის გაათავისუფლებისათვის საერთაშორისო ვითარების გარდა, ხელი უნდა შეეწყო აგრეთვე 1057 წლიდან ბიზანტიის იმპერიაში დამყარებულ ხანგრძლივ ანარქიას. ვფიქრობთ, ბაგრატ IV-ის საქართველოში დაბრუნებასთან დაკავშირებით გარკვეული როლი შეასრულა ქართულმა ეკლესიამ, კერძოდ, მისმა ყველაზე გამორჩეულმა წარმომადგენელმა გიორგი მთაწმინდელმა. ა. აბდალაძე შენიშნავს: „ისევე, როგორც XI საუკუნის 50-იან წლებში მან ქართული ეკლესიის ავტოკეფალია დაიცვა ანტიოქიის საპატრიარქოს შემოტევისაგან, კეისრისა და

ბაგრატ IV-ის მორიგებაშიც, შესაძლოა, შეასრულა გარკვეული როლი. ამ მხრივ, იქნებ, ყურადღების ღირსი იყოს ის გარემოებაც, რომ ბაგრატ IV-ის კონსტანტინეპოლში იძულებითი ყოფნის წლებში გიორგი მთაწმინდელიც ხშირად ჩადის ბიზანტიის დედაქალაქში“ (აბდალაძე 1982: 276). ვახუშტი ბატონიშვილის ცნობითაც ბაგრატ IV-ის სამწლიანი საპატიო ტყვეობის დროს „მეფესა თანა იყო გიორგი მთაწმინდელი“ (ვახუშტი ბატონიშვილი 1973: 148). ნ. ბერძენიშვილი ფიქრობს, რომ კეისარმა ბაგრატი ლიპარიტის „თანხმობით“ გამოისტუმრა საქართველოში (ბერძენიშვილი 1974: 21). ჩვენ უფრო სწორად მიგვაჩნია ზ. პაპასქირის აზრი, რომელიც შენიშნავს „ძნელი დასაჯერებელია, რომ ბიზანტიის კეისარს ბაგრატი საქართველოში გამოესტუმრებინოს ლიპარიტის თანხმობით... საქართველოში ბაგრატის გამობრუნება ლიპარიტის ნება-სურვილზე რომ ყოფილიყო დამოკიდებული, ის ალბათ ყოველმხრივ შეეცდებოდა წინ აღდგომოდა ამას“ (პაპასქირი 1990: 206).

ბიზანტიის იმპერატორისა და ლიპარიტ ბაღვაშის ურთიერთობის გაუარესების შესახებ ისტორიული წყაროები არ მოგვეპოვება, მაგრამ ბიზანტია გარკვეულწილად უკმაყოფილო უნდა ყოფილიყო ლიპარიტის ორმაგი პოლიტიკით. „მატიანე ქართლისაჲს“ ავტორი გარკვევით აღნიშნავს, რომ ლიპარიტი „იყო მოყუარედ მისა ხუარასანს დოღლუბეგ სულტანი და საბერძნეთს-ბერძენთა მეფე“ („მატიანე ქართლისაჲს“ 2008: 287). რაღა თქმა უნდა, ბიზანტიისათვის ვერ იქნებოდა დასაყრდენი ამიერკავკასიაში სელჩუკთა სულთნის „მოყვარე“ ლიპარიტი, თუმცა როგორც თავის ისტორიულ მოკავშირეს გარკვეულ ანგარიშს უწევს მას. ბიზანტიის იმპერატორის უშუალო მონაწილეობით ლიპარიტმა და ბაგრატმა „ერთმანეთში ზავი შეკრეს იმ პირობით, რომ ბაგრატი იქნება ბატონი და მთავარი მთელი იბერიისა და აბაზგიისა, ხოლო ლიპარიტი-ერთი ნაწილის-მესხეთის მთავარი იქნება სიკვდილამდე, ხოლო ბაგრატს ცნობს ბატონად და მეფედ“ (კედრანე 1963: 68) ვერ გავიზიარებთ ვ. კოპალიანის აზრს, თითქოს ამ დროს ლიპარიტი ბიზანტიას სჭირდება გარდა სელჩუკებისა ბაგრატის წინააღმდეგაც (კოპალიანი 1969: 266). ნიშანდობლივია, რომ, როდესაც მესხმა ფეოდალმა სულა კალმახელმა 1058 წელს ლიპარიტი შეიპყრო და მეფეს გადასცა, ბიზანტიის იმპერატორმა არ იზრუნა მის გათავისუფლებაზე. ბერად აღკვეცილ ლიპარიტს მან მხოლოდ თავშესაფარი მისცა ბიზანტიაში. მისი ერთი ვაჟი ნიანია ანისს გარდაიცვალა, ხოლო მეორე ვაჟმა ივანემ, ბაგრატისაგან მიიღო „მამული არგუეთისა და

ქართლისა“ („მატიანე ქართლისაჲ“ 2008: 288). ნ. ბერძენიშვილი წერს: ლიპარიტის დატყვევება არ იყო მეფის სტრატეგიული გამარჯვება, რადგან ლიპარიტი იმ დიდმა აზნაურებმა დასცეს, რომელთაც მას ამას წინ მეფეზე გაამარჯვებინეს, ხოლო ეხლა „მოეწყინათ“ მისი ბატონობა. „ასე რომ, თუ ბაგრატმა ერთი „კლდეკარი“ მოშალა (ვერც მოშალა), მეორე „კლდეკარი“ (ოდრახე-ციხის-ჯვარი) შექმნა“ (ბერძენიშვილი 1965: 26). ჩვენი აზრით, ლიპარიტის დამარცხება სწორედ ბაგრატ IV-ის სტრატეგიული გამარჯვება იყო. მართალია, მეფემ სულა კალმახელს გაწეული სამსახურისთვის დიდი მამულები უბოძა: „მოვიდა ბაგრატ და ამის მსახურებისა ნაცვლად მეფემან უბოძა სულას მამულობით ციხისჯუარი და ოძრაჲე ბოდოკლდითა და სხუადცა მრავალი საქონელი და სამღდელოთმოდღუარნო, და რადცა უნდა“ (მატიანე ქართლისაჲ 2008: 288). მაგრამ ბაღვაშებისაგან განსხვავებით კალმახელთა დაპირისპირება ცენტრალური ხელისუფლებისადმი არც ბაგრატ IV-ის დროს და არც შემდგომში საისტორიო წყაროების მონაცემებით არ შეინიშნება, ისინი სამეფო ხელისუფლების ერთგულები არიან. ლიპარიტის დატყვევება და ბერად აღკვეცა „ბიზანტიის პოლიტიკის მარცხი იყო, საქართველოს პოლიტიკური გაერთიანების საქმეში კი წინგადადგმული ნაბიჯი“ (მეტრეველი 1990: 53). გამორიცხული არ არის ლიპარიტის შეპყრობა სულა კალმახელის მიერ ბაგრატ IV-ის მიზანდასახული პოლიტიკის შედეგი იყოს, ქართველი მემკვიდრის ცნობით, ბაგრატ IV-ისა და სულა კალმახელის კავშირი ლიპარიტის წინააღმდეგ, ჯერ კიდევ მის შეპყრობამდე შეინიშნება. სასირეთთან მარცხის (1047 წ.) შემდეგ როდესაც ბაგრატ IV-მ ვერ შეძლო მშვიდობიანი მოლაპარაკება ლიპარიტთან, „სულა, ერისთავმან კალმახისამან, გრიგოლ, ერისთავმან არტანუჯისამან, შეაერთეს სიტყუად და შეიწვევნეს მათ თანა სხუანიცა აზნაურნი მესხნი და უჭმეს მეფესა ბაგრატს. და წარმოემართა ლაშქრითა, გარდამოვლო გზად რკინისჯუარისაჲ, და შეკრბეს არყისციხეს. ცნა ესე ლიპარიტ და შეკრიბა თავისი ლაშქარი და მოირთნა კახნი და სომეხნი, და ბერძენიცა თანავე ჰყვეს. და მოუვდა უგრძნეულად არყის ციხეს, და შეიბნეს. და სძლია ლიპარიტვე და გააქცია მეფე. შეიპყრეს სულა, კალმახისა ერისთავი, და მრავლითა ტანჯვითა და ძელსა გასუმითა სთხოვეს კალმახი, და არა მისცა. მასვე ომსა შეიპყრეს გრიგოლ, ძე აბუსერისი, და სთხოვეს არტანუჯი სიკუდილისა ქადებითა, და მისცა. მოირჩუნა ლიპარიტ ზემოსა ქუეყანასა და აღიხუნა ციხენი და მიირთვნა თავადნი კაცნი, და გარეს-გარე წავიდა

ლიპარიტ მითვე ლაშქრითა დვინად, და ულაშქრა ბერძენთა მეფესა დვინელსა ზედა, და შემოიქცა თავის ქუეყანად“ (მატიანე ქართლისა 2008: 285-286). ამავე წყაროს მიხედვით, ლიპარიტის შეპყრობის მიზეზი ის გახდა, რომ მესხმა ფეოდალებმა ველარ აიტანეს მისი მეტისმეტი თვითნებობა „და მცირედისა ჟამისა შემდგომად ამისა სამეფოჲსა დიდებულთა მოეწყინა ბატონობაჲ ლიპარიტისი. სულა კალმახელი და ყოველნი მესხნი გამოექცეს ლიპარიტს და შეიპყრეს დღივს ლიპარიტ და ძე მისი ივანე“ („მატიანე ქართლისაჲ“ 2008: 287). ვფიქრობთ, ლიპარიტის დატყვევება, ბერად აღკვეცა და საქართველოდან გაძევება ბიზანტიის სახეცვლილი პოლიტის გაგრძელებაა საქართველოში. საერთაშორისო არენაზე პოლიტიკური ვითარების შეცვლის გამო, ბიზანტია დაინტერესებულია საქართველოში სამეფო ხელისუფლების ძლიერებით, რომელიც თურქ-სელჩუკებს დაუპირისპირდება. ამ დროს თურქ-სელჩუკები გარკვეულწილად დადებით როლს თამაშობენ ბიზანტია-საქართველოს პოლიტიკური ურთიერთობების დარეგულირების საქმეში.

ბიზანტიისა და საქართველოს ურთიერთობის გაუმჯობესებას ზ. პაპასქირი ბაგრატ IV-ის დიპლომატიური უნარით ხსნის: „ბაგრატ IV-ის დიპლომატიური ტალანტი განსაკუთრებით გამოვლინდა ბიზანტიაში მისი იძულებითი ვიზიტის დროს, როდესაც მან, ბიზანტიის იმპერატორთან „უმაღლეს დონეზე“ შეხვედრისას შემლო დაერწმუნებინა იმპერიის ხელისუფლება საქართველოს მეფესთან კონფროტაციის შემდგომი გაგრძელების სრულ უპერსპექტიოებაში და ამით მოახერხა ლიპარიტ ბაღვაშის იზოლაციაში მოქცევა. ამ დროიდან პრინციპულად შეიცვალა საქართველო-ბიზანტიის ურთიერთობის ხასიათი და მათ შორის ფაქტობრივად თანასწორუფლებიანი, სამოკავშირეო ურთიერთობა დამყარდა“ (პაპასქირი 2009: 125).

ლიპარიტ ბაღვაშის პრობლემის გადაჭრის შემდეგ ცენტრალური ხელისუფლების მორიგი წარმატება იყო აბაზასძეთა ფეოდალური სახლის დამხობა ბაგრატის მიერ 1060 წელს, რომლებიც იყვნენ „კაცნი ძლიერნი და ახოვანნი, სიმდიდრესა ზედა მკლავისა თვისისა მოქადულნი და სიმრავლესა ზედა ერისასა აზღვავებულნი“ (გიორგი მცირე 1967: 160). ამასთანავე 1060 წელს ბაგრატ IV-ს კეისრისაგან სევასტოსობა მიუღია (ჯავახიშვილი 1983: 151). გიორგი მცირე აბაზასძეთა განადგურებას ბაგრატის მირ „სასწაულად“ და მეფის „დიდ გამარჯვებად“ მიიჩნევს. „მას ჟამსა იქმნა დიდი გამარჯუებაჲ მეფისაჲ, ოდეს-იგი შეწევნითა

ღმრთისადთა წინააღმდეგომნი თჳსისა მეფობისანი აბათადს ძენი შეიპყრნა“ (გიორგი მცირე 1967: 160). აბასასძენი ისე აქტიურად მოქმედებდნენ, რომ საზღვარგარეთაც კი „ყოველთა უწყოდნენ“, რომ ისინი მეფის შეპყრობას ეპირებოდნენ (აფციაური 1980: 51). სავარაუდებელია, რომ ლიპარიტი და აბაზასძენი ერთი პოლიტიკური ჯგუფის წარმომადგენლები არიან, ლიპარიტთან ერთად ხშირად იხსენიება იოანე აბაზასძე. ნიშანდობლივია, რომ თბილისის ამირას წინააღმდეგ ბრძოლის დაწყების ინიციატორი ქართლის ერისთავი ივანე აბაზას ძეა ლიპარიტთან ერთად, და ეს ორივე ფეოდალი შემდეგ მეფის უძლიერესი მოწინააღმდეგე ხდება. მათი დამარცხების შემდეგ, როგორც ჩანს, იძულებულია ბაგრატ IV ერთგულება შეჰფიცოს და მის მხარეზე გადავიდეს ერისთავი ფარსმან თმოგველი. „მატიანე ქართლისაჲს“ მიხედვით, XI საუკუნის 40-იან წლებში, როდესაც ლიპარიტ ერისთავთა-ერისთავსა და ბაგრატ IV-ს შორის ურთიერთობა გამწვავდა, ფარსმან თმოგველი მეფის მოწინააღმდეგეთა ბანაკშია: „ციხეთა უფალნი კაცნი მტკიცე იყვნეს ერთგულობასა ზედა ბაგრატისასა, თანიერ ფარსმან თმოგუელისა და ბეშქენ ჯაყელისა, თუხარისისა ერისთავისა“ (მატიანე ქართლისაჲ 2008: 282). თურქ-სელჩუკების მიერ ახალქალაქის აოხრების დროს (1064 წ.), მირაშხანის წარწერის მიხედვით, კი ფარსმან თმოგველი მეფის ერთგულია და ახალქალაქის დამცველთა რიგებში იღუპება. ფარსმან თმოგველის გაერთოება მეფისადმი ლიპარიტ ბაღვაშისა და აბაზას ძეთა დამარცხების შემდეგ უნდა მომხდარიყო. ამის შემდეგ ბაგრატ IV იმდენად გაძლიერდა, რომ 1062 წელს თბილისის შემოერთებისათვის მას ანგარიშს უწყევნ განძის ძლიერი მბრძანებელი აბულ-ასვარი და კახეთის მეფე აღსართანი. „მუნეჯიმ-ბაშის სიტყვით, 1062 წელს შედედიანთა დინასტიის წარმომადგენელ აბულ-ასვარს (1049-1067 წლებში მბრძანებლობდა განჯაში) ეახლნენ თბილისის მოქალაქეთა თავკაცების წარმომადგენლები, აუწყეს თავიანთი მძიმე მდგომარეობა, ქალაქის გასაღები მიართვეს და სთხოვეს ჩაებარებინა ქალაქი და ციხე. ამასთან ერთად, ქალაქის საგანგებო გაჭირვებული მდგომარეობის გამო, მათ სთხოვეს განჯის პატრონს, სასწრაფოდ გაეგზავნა თბილისისათვის მცველი რაზმი, იარაღი და სანოვაგე. აბულ ასვარი უკეთესს ვერც ინატრებდა და გადაწყვიტა, მიეღო ეს წინადადება, მაგრამ მისი ვეზირი უფრო შორსმჭვრეტელი აღმოჩნდა. მან გააფრთხილა აბულ-ასვარი, ასეთი მოქმედების შედეგად შეიძლება ისიც დაკარგო, რაც უკვე გაგაჩნიაო, რითაც უთუოდ საქართველოს მეფესთან მოსალოდნელ ბრძოლაზე მიუთითებდა.

ამის გამო აბულ-ასვარმა აღარ მიიღო თბილისელთა წინადადება და დააბრუნა გასაღები (კიკნაძე 1958: 164). აბულ-ასვარის უარის შემდეგ თბილისის მოქალაქეებმა ქალაქი კახეთის მეფე აღსართან გაგიკის ძეს შესთავაზეს. აღსართანმა დიდი პატივით მიიღო თბილისის მოქალაქეთა წარმომადგენლები, ელჩები დაასაჩუქრა და გაისტუმრა (კიკნაძე 1960: 113). შემდეგ ბაგრატ IV-მ, რომელიც ისედაც ცდილობდა კახეთის შემოერთებას, აღსართანისაგან დიდი საფასურის გადახდით იყიდა თბილისი, სასწრაფოდ გააგზავნა გარნიზონი და მოამარაგა ხალხით, იარაღით და სურსათ-სანოვავით (Minorsk 1953: 20). ბაგრატი, როგორც ჩანს, იმდენად დაინტერესებული ყოფილა თბილისში გაბატონებით, რომ იგი საამისოდ დიდი თანხის გაღებასაც არ დარიდებია. მეფე იმჟამად თბილისზე უარს იმიტომაც არ იტყოდა, რომ მისი ძლიერი მოწინააღმდეგე, თბილისისათვის მებრძოლი კლდეკარის ერისთავი უკვე დამარცხებული ჰყავდა.

რ. კიკნაძის ვარაუდით, ბაგრატმა თბილისის შესყიდვის შემდეგ თვითონ კი არ დაიჭირა იგი, არამედ ჯაფარის შვილები შეარიგა და ისინი დასვა ქალაქის გამგებლად. ამ დროს ჯაფარის შვილების თბილისის გამგებლებად დასმა საეჭვოდ მიგვაჩნია, რადგან სწორედ მათ გამო ჩავარდა თბილისი მძიმე მდგომარეობაში. თბილისის მოქალაქეებმა ისინი ქალაქიდან გააძევეს და მათი უკან დაბრუნება გარკვეულ სირთულეებთან იქნებოდა დაკავშირებული. გაძლიერებული ბაგრატი დიდ საფასურად ნაყიდ თბილისში ჯაფარის შთამომავლების გამგებლებად დანიშვნისათვის არ იზრუნებდა. უფრო მართებულად მიგვაჩნია შ. მესხიას აზრი: „ჩვენ არ ვიცით, თუ რამდენხანს გასტანა ბაგრატ IV-ის მფლობელობამ თბილისში, მაგრამ საფიქრებელია, რომ იგი ორ-სამ წელიწადზე მეტ ხანს არ უნდა გაგრძელებულიყო. ჩვენი აზრით, თურქ-სელჩუკთა საქართველოში პირველი ლაშქრობა (1065 წ.) უნდა ყოფილიყო მიზეზი ბაგრატის მიერ თბილისის დატოვებისა და იქ ისევ ქალაქის მფლობელ ჯაფარიდთა ხელისუფლების-უდავოდ, ალფ-არსლანის ხელშეწყობით- აღდგენისა. ცხადია, შემთხვევითი არ არის ქართული და აღმოსავლური წყაროების საერთო ჩვენებანი ალფ-არსლანის საქართველოში ლაშქრობის დროს თბილისის ამირას მოკავშირეობისა და მისი თანხლების შესახებ“ (მესხია 1982: 241). ზ. პაპასქირი ვარაუდობს, რომ თბილისის შემოერთების შემდეგ საქართველო იქცა სელჩუკთა მთავარ მეტოქედ ამიერკავკასიაში. „საქართველოს მეფის მიერ თბილისის დაკავებამ, ეტყობა არც თუ ისე უსაფუძვლოდ,

მუსლიმანური სამყაროს შემფოთება გამოიწვია, ბაგრატ IV-ის მიერ თბილისში გატარებულ ღონისძიებებში, რომელსაც ხაზგასმით აღნიშნავს ალ-ფაკიჰი (გასცა ბრძანება გაეფართოვებინა გზები მთებში, რათა გაადვილებოდათ ურწმუნოებს იქიდან გადასვლა ისლამის ქვეყნებში), სელჩუკთა მმართველ წრეებს, სავსებით რეალურად შეეძლოთ დაენახათ საქართველოს მეფის მხრიდან ახალი სამხედრო აქციების განხორციელებისათვის თადარიგის დაჭერა. უნდა ვივარაუდოთ, რომ ამ დროიდან, ამიერკავკასიაში გაბატონების გზაზე სელჩუკების მთავარ მეტოქედ სწორედ საქართველოს სახელმწიფო იქცა. ამან კი საქართველო სელჩუკების ომი გარდაუვალი გახადა“ (პაპასქირი 1991: 11).

სამეფო ხელისუფლების ძლიერებისათვის დიდი მნიშვნელობა ჰქონდა ეკლესიის პოზიციას. საქართველოს გაერთიანებისათვის ბრძოლის დროს ეკლესია გაერთიანებისათვის მეზომოლ ძალებს უჭერდა მხარს, მაგრამ ქვეყნის გაერთიანების შემდეგ შეუვალობისათვის დაიწყო ბრძოლა და ამ მიმართულებით წარმატებასაც მიაღწია ჯერ კიდევ XI საუკუნის დასაწყისში. ბაგრატ III, რომელიც წარმატებით იბრძოდა ხელისუფლების ცენტრალიზაციისათვის, იძულებულია ეკლესიას დაუთმოს და შეუვალობა მიანიჭოს მას. ამის შემდეგ ეკლესიაში თანდათან გაძლიერდა ფეოდალური არისტოკრატის გავლენა, რასაც ხელი შეუწყო მემკვიდრეობის წესმა, რომლის ძალითაც უმაღლეს საეკლესიო თანამდებობათა დაკავება მხოლოდ მაღალი წოდების წარმომადგენლებს შეეძლოთ. ბაგრატ IV-მ დიდგვაროვან აზნაურთა წინააღმდეგ გარკვეული წარმატების შემდეგ XI საუკუნის 60-იანი წლების დასაწყისში სცადა ეკლესიის დამორჩილება სახელმწიფოსადმი და ამ მიზნით ათონის მთიდან სახელგანთქმული საეკლესიო მოღვაწე გიორგი მთაწმინდელი მოიწვია საქართველოში, რათა მისი დახმარებით გადაეყენებინა უმაღლეს საეკლესიო თანამდებობებიდან ის პირები, რომელთაც აღზევებას მიაღწიეს არა პირადი თვისებებით, განათლებით, მოღვაწეობით, არამედ სოციალური მდგომარეობით. რასაკვირველია, ასეთთაგან მეფის წყრომას იმსახურებდნენ განსაკუთრებით ისინი, ვინც ეწინააღმდეგებოდა ბაგრატ მეფის პოლიტიკას. (ლორთქიფანიძე 1979: 170). საქართველოში ჩამოსული გიორგი მთაწმინდელი აქტიურად შეუდგა საეკლესიო რეფორმის გატარებას. ამ დროს წოდებრიობა იმდენად გაბატონებული იყო ეკლესიაში, რომ მის წინააღმდეგ გალაშქრება საქართველოში მოულოდნელ და საკვირველ საქმედ მიიჩნიეს.

„მაბრალობლებმა“ არ დაინდეს თვით ისეთი დიდი ავტორიტეტიც კი, როგორც იყო გიორგი მთაწმინდელი, რომელმაც მრისხანედ გაილაშქრა ეკლესია-მონასტრებში დამკვიდრებული დიდგვარიანების წინააღმდეგ და საეკლესიო ცხოვრების დემოკრატიზაცია, სახარებისეული ქრისტიანული პრინციპების აღდგენა დაისახა მიზნად, რომელიც უარყოფდა ყოველგვარ წოდებრიობას ქრისტიანულ თემში (აფციაური 1980 101). ხუთწლიანი დაუღალავი შრომის წყალობით გიორგი მთაწმინდელმა ეკლესიაში წოდებრივი უპირატესობა მოსპო, მაგრამ საეკლესიო რეფორმა ბოლომდე ვერ მიიყვანა ქვეყნის მძიმე სოციალურ-ეკონომიკური და საგარეო მდგომარეობის გამო.

ამრიგად, XI საუკუნის 60-იანი წლებისათვის დიდგვაროვან აზნაურთა და სამეფო ხელისუფლებას შორის ბრძოლა ცენტრალური ხელისუფლების გამარჯვებით დამთავრდა. საქართველოს სახელმწიფომ მოახერხა ქვეყნის შიგნით მშვიდობის დამყარება. ყველაზე ძლიერი ფეოდალების აბაზასძეთა და ბაღვაშთა დროებითი დამხობა, აგრეთვე ძირითადი ქართული მიწების გაერთიენება. ქვეყნის შემდგომი პოლიტიკური გაძლიერება შეაფერხა მძიმე საგარეო პოლიტიკურმა ვითარებამ. რაც განპირობებული იყო საქართველოში თურქ-სელჩუკთა ლაშქრობებით ალფ-არსლანის სარდლობით. ამ ლაშქრობების წინ სამეფო ხელისუფლების უზომო ძლიერებაზე მიუთითებს „მატიანე ქართლისაჲს“ ავტორი: „და მოირჳმუნა ბაგრატ და განძლიერდა უფროჲს ყოველთა მეფეთა მის ქუეყანისითა. და ამან წარიხუნა ყოველი ციხენი ჰერეთისა და კახეთისანი, თჳნიერ კუეტარისა და ნახჭევანისა. და შემდგომად ამისა იქმნნეს დიდნი საქმენი აღძრვანი დიდთა მეფეთანი“ („მატიანე ქართლისაჲს“ 2008: 289).

VI თავი

ალფ-არსლანის პირველი ლაშქრობა საქართველოში

დიდ სელჩუკთა სახელმწიფოს ფუძემდებლის თოდრულ-ბეგის გარდაცვალების შემდეგ სულთნის ტახტი დაიკავა ალფ-არსლანმა (1063-1072). იბნ ალ-ასირის მიხედვით, იგი 424 (1032/33), რავენდის მიხედვით, კი 431 (1039/40) წელს დაიბადა. მან კიდევ უფრო წარმატებით განაგრძო და განავითარა თავისი წინამორბედის საქმეები. ი. ჯავახიშვილის შეფასებით, ალფ-არსლანი მამაზე, ჩადრი-ბეგზე და ბიძაზე თოდრულ-ბეგზე, უფრო გამბედავი და გულადი იყო, რომელმაც მცირე აზიაში მრავალი სახელოვანი ომი გადაიხადა (ჯავახიშვილი 1983: 151).

ალფ-არსლანი ბერძნულ-ქართულ-სომხური წყაროების მიხედვით, ძირითადად უარყოფით, ხოლო არაბულ-სპარსულ-ოსმალური წყაროების მიხედვით, დადებით პიროვნებად ხასიათდება. სადრ ად-დინ ჰუსეინი ალფ-არსლანს ახასიათებს როგორც მართლმსაჯულ, მოწყალე, სულგრძელ მმართველს: „სულთანი სამეფო ტახტის დაკავებისა და მართვაში დამოუკიდებლობის მოპოვების შემდეგ ქვეშევრდომებს თანაგრძნობით ექცეოდა, მათ მიმართ ღმობიერი იყო. მან გაათავისუფლა ისინი ყოველწლიური ორმაგი გადასახადებისაგან. ყოველი წლის რამაზანის თვეში ის გასცემდა ქვეშევრდომებისათვის ოთხი ათას დინარს: ათას დინარს ბალხელებზე, ათას დინარს მერეველებზე, ათას დინარს გასტელებზე და ათას დინარს ნიშაბურელებზე. ამას გარდა ათას დინარს გასცემდა სამეფო კარისთვის“ (www.vostlit.info, Восточная литература, Авторы и источники на букву „X“, Ал-Хусайни Садр-Ад-Дин).

აღმოსავლურ წყაროებში აღნიშნული სულგრძელობის მიუხედავად, ალფ-არსლანი სახელმწიფო მართვის საქმეებში მკაცრი და შეუვალი იყო. ნიზამ ალ-მულქი, სულთნის მრჩეველი და ქვეყნის ფაქტობრივი გამგებელი, აღნიშნავდა: ალფ-არსლანი იმდენად მტკიცე იყო მმართველობაში, რომ ძრწოლას იწვევდა და მეც ყოველთვის შიშით ვემორჩილებოდი, რადგან შაფიტების მოძღვრებას იგი ეჭვით უცქერდაო (Низам ал-Мулк 1949; 102). მიუხედავად დიდი ნდობისა, ნიზამ ალ-მულქი მაინც ფრთხილობდა ალფ-არსლანთან. მას ამის საფუძველი ჰქონდა, რადგან ისინი ისლამის რელიგიის სუნიტური სექტის სხვადასხვა მიმდევრობას ეკუთვნოდნენ; სულთანი იმამ აბუ ჰანიფას მიმდევარი იყო, ხოლო ნიზამ ალ-

მულქი შაფის მიმდინარეობას უჭერდა მხარს. ეს კი ალფ-არსლანისთვის დიდ ცოდვად ითვლებოდა (შენგელია 1968: 126).

ალფ-არსლანი იმდენად წარმატებული ყოფილა სამხედრო საქმეებში, რომ მიხეილ სირიელის მიხედვით, მისთვის ხალიფა ქაიმს „გამარჯვების მამა“ შეურქმევია. ეს ცნობა სირიელს არაბულ წყაროებში მოუძიებია (www.vostlit.info, Восточная литература, Авторы и источники на букву „М“ Михаил Сириец). ალფ-არსლანმა ჯერ კიდევ სულთნობამდე გამოიჩინა თავი, როგორც ძლიერმა მმართველმა და სამხედრო მეთაურმა. სადრ ად-დინ ჰუსეინის ცნობით, თოდრულ-ბეგმა ალფ-არსლანის დახმარებით შეძლო იბრაჰიმ იინალის აჯანყების დამარცხება. „ალფ-არსლანი იმყოფებოდა სიჯისტანში, როდესაც მოუვიდა ბიძის თოდრულ-ბეგის წერილი: ჩემს ძმას სურს ძალაუფლება წამართვას და ზიანი მიაყენოს ჩემს ხელისუფლებას. მე იძულებული ვარ, მოგმართო დახმარებისთვის და გთხოვო მხარდაჭერა. ალფ-არსლანი 10 დღეში უდაბნოს გავლით ჩავიდა ერაცის მისადგომებთან და გამოცხადდა სულთან თოდრულ-ბეგის ბანაკში. 451 წლის 19 ჯუმადს (1059 წლის 2 აგვისტო) დილით მათ მოამზადეს ლაშქარი ბრძოლისთვის. შუადღით ალფ-არსლანმა შეიპყრო იბრაჰიმ იინალი და დატყვევებული მიჰგვარა თავის ბიძას სულთან თოდრულ-ბეგს. ამის შემდეგ ალფ-არსლანი, მთელი წარმატებით, ცოცხალი და ჯანმრთელი გაემართა ხორასანისკენ. იმავე 1059 წლის 2 აგვისტოს, ოთხშაბათს იბრაჰიმ იინალი სიკვდილით დასაჯეს“. იმავე ავტორის მიხედვით, ჩადრი-ბეგ დაუდმა თავისი წარმატებული ლაშქრობების დროს ბალხის, თოხარისთანის, თერმეზის, ყობადიანის და სხვა ვილაიათების მართვა ალფ-არსლანს მიანდო (www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин). მამამისმა ალფ-არსლანი სიცოცხლეშივე გამოაცხადა ტახტის მემკვიდრედ, ხოლო გარდაცვალების შემდეგ მთელი ხელისუფლება მის ხელში გადავიდა. ანონიმი ავტორის ცნობით, თოდრულ-ბეგმა მას სიცოცხლეშივე გადასცა სირია ეგვიპტე და დამასკო (ანონიმი ავტორი 2003: 384). გამორიცხული არ არის თოდრულ-ბეგს ეს ტერიტორიები ალფ-არსლანისთვის იბრაჰიმ იინალის წინააღმდეგ დახმარებისთვის გადაეცა. ალფ-არსლანის ძლიერების მიუხედავად, მისი გასულთნება უპრობლემოდ მაინც არ მომხდარა. „ბონდარის გადმოცემით, როდესაც თოდრულ-ბეგი რეიში გარდაიცვალა, მისი დიდი ვეზირი ამიდ ალ-მულქი რეიდან 70კმ. დაშორებით იმყოფებოდა. იგი

სასწრაფოდ მოვიდა დედაქალაქში, სულთანი დაასაფლავა, ხალხი დააწყენარა და ტახტზე სულთნის ძმისშვილი სულეიმან ბენ დაუდი დასვა. ამავე ავტორის ცნობით, სულეიმანის დედა ჩაღრი-ბეგ დაუდის გარდაცვალების შემდეგ თოღრულ ბეგზე დაქორწინდა. თოღრულ ბეგმა კი სულეიმანი ტახტის მემკვიდრედ გამოაცხადა. ამიდ ალ-მულქმა ამიტომაც აიყვანა იგი თოღრულ ბეგის ტახტზე და საქმე ამით დაამთავრა. ამ ფაქტის გამო რავენდი სულეიმანს თოღრულ-ბეგის უმცროს შვილად მიიჩნევს. სულეიმანს ტახტზე ჯდომა დიდხანს არ დასცალდა. მისმა ძმამ ალფ-არსლანმა, რომელიც ჩაღრი-ბეგის საქმეებს განაგებდა, მისი გარდაცვალების შემდეგ და უკანასკნელი ორი წლის განმავლობაში ხორასნის ვალი იყო, ბიძამისის ტახტზე პრეტენზია განაცხადა. ბარ ჰებრაი შენიშნავს, რომ, რადგანაც სულეიმანის ძმა ალფ-არსლანი ძლიერი პიროვნება იყო, მან სულეიმანის სიცოცხლეს ბოლო მოუღო და მის ადგილზე მბრძანებლობა განაგრძო“ (შენგელია 1968: 106). ბუნებრივია, გაძლიერებული ალფ-არსლანი სულეიმანის ტახტზე ჯდომას ვერ შეეგუებოდა, ბეგების დიდმა ნაწილმაც მხარი მას დაუჭირა. დიდი ვეზირი ამიდ ალ-მულქი იძულებული გახდა თავის გადაწყვეტილებაზე უარი ეთქვა და ალფ-არსლანისთვის დაეჭირა მხარი. ხალიფა ალ-ქაიმის მიერ შეკრებილ მეჯლისში 1064 წლის 27 აპრილს ალფ-არსლანი საზეიმო ვითარებაში სულთანად აკურთხეს (www.vostlit.info, Восточная литература, Авторы и источники на букву „И“ Ибн-ал-Асир, Тирих-ал-Камиль, Полный свод всеобщей Истории). სულეიმანის გარდა მან დაამარცხა ტახტის მამიებელი ყველა ნათესავი. კერძოდ, ჰერათში მან ჩაახშო ბიძის-მუსა იაზლუსა და ქავერდის აჯანყებები. ქავერდი მას რამდენჯერმე აუჯანყდა. ბონდარის ცნობით, ალფ-არსლანის ძმა ქავერდი 1063 წელს ალფ-არსლანს აუჯანყდა, შირაზი იგდო ხელთ და იქ მყოფი დეილემიები ამოხოცა. იქიდან თავის შესაფარებლად ქერმანში, ბერდემირის სახელწოდების ციხეში ჩაიკეტა. ალფ-არსლანმა მის წინააღმდეგ გაილაშქრა, მაგრამ შეიწყალა იგი. ამის შემდეგ ალფ-არსლანმა ისთახრის ციხე აიღო. ციხისთავი დიდი საჩუქრებით ეახლა სულთანს. სულთანმა ქვეყანაში წესრიგი აღადგინა (შენგელია 1968: 108). ალფ-არსლანს ყველაზე დიდი წინააღმდეგობა ყუთულმიშმა გაუწია. ანონიმი ავტორის ცნობით, „როდესაც სულტნობა ალფ-არსლანის ხელში გადავიდა, ეს ამბავი მისმა ბიძაშვილმა ყუთულმიშმა ქუჰში შეიტყო და სულთნობაზე დავა დაიწყო. თურქი ჯარისკაცები მას მიემხრნენ. რეისაკენ გაემართნენ. როდესაც ისინი ერთმანეთს

შეებნენ, ყუთულმიშის ჯარი დამარცხდა და თვითონ გაქცევა მოინდომა, მაგრამ ცხენიდან ჩამოვარდა და მოკვდა. აქედან ალფ-არსლანი რეისა და ჰამადანში წავიდა, ჰამადანიდან კიდევ ისფაჰანში წავიდა“ (ანონიმი ავტორი 2003: 384). მათ დაპირისპირებაზე ვრცლად მოგვითხრობს სადრ ად-დინ ჰუსეინი: „მოვიდა ცნობა, რომ სულთნის ძმა (მამით) ყუთულმიში აჯანყდა და მოითხოვა სულთნის ხელისუფლება. მან შეკრიბა ლაშქარი დაუნდობელი ჯარისკაცებისაგან და დაიძრა რეისკენ მიმავალ გზაზე. იგი შეჩერდა ქალაქ სავესთან ახლოს. სულთანმა მის წინააღმდეგ გაგზავნა თავისი ავანგარდი ემირ საუ-თეგინის მეთაურობით. თვითონ სულთანი გამოვიდა ნიშაბურიდან 1064 წლის 3 იანვარს.

ყუთულმიშმა თავის ჯარისკაცებს მისცა თავისუფლად მოქმედების უფლება და გაანადგურა რეის დასახლება. მან გამოუშვა წყალი აბდალახაბადის მისადგომებიდან და ალ-მილხის მარილიანი მინდვრიდან. ეს იყო მარილიანი ჭაობი, რომელზე გავლაც მგზავრებს ძალიან უჭირდათ.

ორივე ჯარი ერთმანეთს მიუახლოვდა, ვეზირმა ნიზამ ალ-მულქმა აისხა იარაღი და მოამზადა თავისი ქვედანაყოფი. მარჯვენა ფრთაზე იყვნენ ემირები ქუთბ ად-დინ გიულსარიგი და ფახლავან შუნქურჯა. მარცხენა ფრთაზე იყვნენ ემირ ხაბაშას მამა ემირი ალთუნ-თაქი და ლაშქრის მეთაური ემირი საუ-თეგინი. სულთანთან ერთად ცენტრში იყვნენ ბალთაჯი, სუნქურჯა, აგაჯი და სხვა გამოჩენილი ემირები.

სულთანი შეჯდა ცხენზე და დაიწყო მთის ძირში გზის ძებნა, მაგრამ ვერ იპოვა და მიუშვა ცხენი წყლისკენ, ლაშქარიც მას მიჰყვა და გადალახეს საშინელი დინება. მელიქი ყუთულმიში და მისი ლაშქარი ელოდნენ, რომ ისინი დაიხრჩობოდნენ მარილიან ჭაობში. მოულოდნელად სუნქურჯა თავს დაესხა ყუთულმიშს, ხელთ იგდო მისი კარავი, დროშა კი დახია. ყუთულმიშმა მიიღო რამდენიმე ჭრილობა. ის გაემართა ერთ-ერთ თავის ციხესიმაგრე გირდკუხში. ყუთულმიშის ლაშქრიდან აღარავინ დარჩა. ყველა გაიქცა სადამდისაც თვალი მიუწვდებოდათ. სულთანმა გადაწყვიტა ტყვეების მკაცრად დასჯა. მაგრამ, როდესაც ნიზამ ალ-მულქმა მოუწოდა მოწყალებისაკენ, დიდსულოვნად აპატია და შეიწყალა ისინი. ომის დამთავრების შემდეგ ნახეს მელიქი ყუთულმიში, რომელმაც თავისი სიცოცხლე ცხვრების სადგომში დაასრულა. მისი ცხედარი გადაასვენეს რეიში და დაკრძალეს სულთან თოდრულ-ბეგის გვერდით“ (www.vostlit.info, Восточная литература, Авторы и источники на вукву „Х“ Ал-Хусайни Садр-Ад-Дин).

ყუთულმიშის საკითხის მოგვარებით ალფ-არსლანმა განიმტკიცა ხელისუფლება და მთელი ყურადღება დაპყრობით ომებზე გადაიტანა. თურქი ისტორიკოსის სელჩუკოლოგ ალი სევიმის აზრით: ალფ-არსლანმა როგორც კი დაიკავა ტახტი, დაიწყო მზადება ლაშქრობებისათვის აღმოსავლეთ ანატოლიასა და საქართველოში. მას ეახლა ანატოლიაში მუდმივად მოლაშქრე ემირი თულთეგინი და მიაწოდა ინფორმაცია ანატოლიაში მიმავალი გზების შესახებ (Sevim 2002: 46).

სადრ ად-დინ ჰუსეინის მიხედვით, „ალფ-არსლანი 456 წლის რეზიულეველის პირველ დღეებში (1064 წლის თებერვლის მიწურული) რუმის მხარეში გაემგზავრა (იგულისხმება ბიზანტიის იმპერია). სულთანს აცნობეს, რომ გაიძვერა ქურთთა რაზმებმა ჰოლვანის საზღვარზე (ქალაქი ერაცის ჩრდილო დასავლეთით, რომლის ახლოს მდებარეობს ასადაბადის იგივე ჰოლვანის უღელტეხილი) გზები გადაჭრეს და რომ ყველგან დიდ ბოროტებას ჩადიოდნენ. ამის გამო მან მოამზადა ჯარი, მათ წინააღმდეგ გააგზავნა და ყველა ისინი ხმლით ააკუწვინა. ამის შემდეგ სიკვდილს გადარჩენილი ქურთთა ერთი ჯამათი მოვიდა და იკისრა გზების დაცვა ყაჩაღებისაგან. სულთანმა ამ მიდამოების ემირობა ემირ ბეგ არსლანს მისცა. შემდეგ ჯარი ქალაქ მარანდში (ქალაქი ირანის აზერბაიჯანში, იგი ურმიის ტბის აუზში მდებარეობს) გაემგზავრა და იქ დარჩა. რუმების გზაზე იყო ერთი ემირი, ემირ თულთეგინის (თურქმენთა ერთ-ერთი ემირი, რომელიც ხანგრძლივად წარმატებით აწარმოებდა ბრძოლებს ბიზანტიის წინააღმდეგ და კარგად იცნობდა ადგილობრივ ვითარებას) სახელით ცნობილი. მის გარშემო შეკრებილი იყო თურქმენთა ერთი ჯამათი. რუმებმა მათგან ძალიან დიდი ზარალი განიცადეს და მათთან წარმოებულ ომებში დამარცხდნენ. ეს ემირი სულთნის სამსახურში ჩადგა და ხელმძღვანელობა და მეგზურობა გაუწია ჯარებს ამ ქვეყნების ციცაბო ადგილებისაკენ გატარებაში. მან სულთანს აცნობა, რომ რუმთა მფლობელობაში მყოფი ქართველთა ქალაქები მოიცვა ურჯულოებამ, აჯანყებამ და აღვირა ხსნილობამ, ამის გამო სულთანი ქართველთა ქვეყნების წინააღმდეგ გაემართა. თავის ნაცვლად სამხედრო ბანაკში მან საკუთარი შვილი სულთან უდ-დეველე მელიქ-შაჰი დატოვა“ (სადრ ად-დინ ჰუსეინი 1976: 188). როგორც ირკვევა, ჰუსეინი გულისხმობს, რომ ამ დროს საქართველო ბიზანტიის იმპერიის შემადგენლობაშია, რეალურად საქართველო ამ დროს ამიერკავკასიაში ერთადერთი დამოუკიდებელი, პოლიტიკური ძლიერების გზაზე დამდგარი ქვეყანაა. ვფიქრობთ,

ალფ-არსლანის დასავლეთისკენ გამოლაშქრების ძირითადი მიზეზი საქართველოში ლაშქრობა და ენერგიული ბაგრატ IV-ის ბიზანტიისაგან იზოლაცია უნდა ყოფილიყო. შემთხვევითი არ უნდა იყოს ის ფაქტი, რომ ლაშქრის იმ ნაწილს, რომელიც საქართველოს წინააღმდეგ უნდა დაძრულიყო, ალფ-არსლანი თვითონ ჩაუდგა სათავეში, ხოლო მეორე ნაწილის მეთაურობა, რომელთაც ბიზანტიის იმპერიის მოსაზღვრე ციხეები უნდა დაეპყროთ, მელიქ-შაჰსა და ნიზამ ალ-მულქს მიანდო. ალფ-არსლანის საქართველოში უშუალო ლაშქრობა ამ ქვეყნისადმი განსაკუთრებულ ინტერესზე მიუთითებს.

ხელისუფლების განმტკიცების შემდეგ, ალფ-არსლანის დასავლეთის მიმართულებით დაძვრის ძირითადი მიზეზი რომ საქართველოა, კიდევ უფრო კარგად ჩანს იბნ ალ-ასირის ცნობიდან, რომლის მიხედვით: ალფ-არსლანი რუმების წინააღმდეგ ლაშქრობის მიზნით 456 წლის რუბილეველის დასაწყისში (1064 წლის თებერვლის მიწურული) გაემართა რეიდან აზერბაიჯანის მიმართულებით და მოვიდა ქალაქ მარანდში. აქედან იგი თულ-თეგინმა ნახჭევანში მოიყვანა. ალფ-არსლანმა ხომალდების მომზადება და მდინარე არაქსის გადალახვა ბრძანა. ამ დროს მას შეატყობინეს ხოისა და სელმასის მოსახლეობის განდგომა; იგი იძულებული გახდა მათ წინააღმდეგ ხორასნის გამგებლის მეთაურობით ლაშქარი გაეგზავნა. ხორასნის გამგებელმა დაიმორჩილა ისინი და ამ ქვეყნის ლაშქარიც მას მოუვიდა ნახჭევანში. უამრავი ლაშქრის შეკრების შემდეგ ალფ-არსლანი დაიდრა ქართველთა ქვეყნისაკენ (www.vostlit.info, восточная литература, Авторы и источники на букву „И“, Ибн Ал-Асир, Полный свод всеобщей истории). „მუნეჯიმ ბაშის ცნობით, საქართველოში ლაშქრობის წინ არანის, შირვანის, ბაბ ალ-აბვაბის და სხვა ტერიტორიების გამგებლები და ამირები მივიდნენ ალფ არსლანთან, მორჩილება გამოუცხადეს და თავიანთი ლაშქრით სამსახური შესთავაზეს“ (შენგელია 1968: 219-220).

XI საუკუნის ძველქართულ წერილობით ძეგლებში როგორც ნარატიულში, ასევე დოკუმენტურში დაცულია მნიშვნელოვანი ცნობები, ცნობილი სელჩუკი სულთნის ალფ-არსლანის ლაშქრობების შესახებ. ასეთი რიგის დოკუმენტურ ძეგლებს მიეკუთვნება ორი სხვადასხვა დროის ძველქართული წარწერა აღმოჩენილი საქართველოს ისტორიულ რეგიონებში-ჯავახეთსა და შიდა ქართლში. ქართული ნარიტული წყაროებიდან მნიშვნელოვანია XI საუკუნის უცნობი ისტორიკოსის

თხზულება „მატიანე ქართლისაჲ“ და ამავე პერიოდის აგიოგრაფი მწერლის, გიორგი ხუცესმონაზონის თხზულება „ცხოვრება გიორგი მთაწმინდელისაჲ“. ქართველი ავტორები აღწერილი ამბების თანამედროვენი არიან, რის გამოც მათი ცნობები განსაკუთრებით საინტერესოა და ამავედროულად მეტ ნდობას იმსახურებენ.

აღმოსავლურ წყაროებში დაცული ცნობების ფონზე ალფ-არსლანის საქართველოში ლაშქრობისთვის საგანგებო მზადების შესახებ, საინტერესოა ქართველი მემკვიდრის გადმოცემა, მისი საქართველოში შემოჭრის მოულოდნელობასთან დაკავშირებით. იგი წერს: „ამისა მეფობისა ჟამთა შინა გამოვიდა სულტანი არფასარან, მეფე სპარსეთისაჲ, დასხმის გუარად, უგრძნეულად მოვიდა და შემუსრა კანგარი და თრიალეთი. და დღესა ერთსა მარბიელმან მისმან მიუწია ყუელისყურსა, გარდავიდა შავშეთს, კლარჯეთს და ტაოს ვიდრე ფანასკერტამდე. და მასვე დღესა ჩამოუწია თორს დაღვისკვეს, და თვით დადგა თრიალეთს სამ დღე“ („მატიანე ქართლისაჲ“ 2008: 289) დედასა და დასთან ერთად ტაოდან მომავალი საქართველოს მეფე ძლივს გადაურჩა თურქ-სელჩუკებს და ქართლში გადმოვიდა. საქართველოში ალფ-არსლანის ამ მარბიელი ლაშქრობის დროს, სადრ ად-დინ ჰუსეინის ცნობით, სელჩუკთა მეორე ლაშქარი მალიქ-შაჰისა და ნიზამ ალ-მულქის სარდლობით ბიზანტიის ციხე-სიმაგრეებს იპყრობდა. ერთ-ერთი ციხის, რომელსაც თურქი ისტორიკოსი ქოიმენი ბიურაკანის (ანბერდის) სახელით მოიხსენიებს (Köymen 1963: 256), დაპყრობის შემდეგ მათმა სურმარის (საქართველოს მოსაზღვრე ტერიტორიაზე არსებული ციხე-სიმაგრე) ციხე აიღეს, შიგ გარნიზონი ჩააყენეს და მარიამ-ნიშად წოდებული ციხის ასაღებად გაემართნენ. წყაროს მიხედვით, ეს ქალაქი იყო ქრისტიანების სალოცავი ადგილი, სადაც მღვდლები და ბერები ცხოვრობდნენ. აქ მოდიოდნენ სალოცავად ქრისტიანი მეფეები და მოსახლეობა. სელჩუკებმა ბევრი იწვალეს ამ ციხის ასაღებად, ნაჯახებით ციხის კედლების გახვრეტა მონდომეს, მაგრამ ციხის ლოდები რკინის სალტეებით იყო შეერთებული და ნაჯახებს პირი გაუფუჭდა. „იმ ღამეს შემთხვევით მიწისძვრა მოხდა, ციხის აღმოსავლეთი მხარე დაინგრა. ქრისტიანთა თავდაცვის საშუალებანი შესუსტდა. დილას, მზის ამოსვლის დროს, მალიქ-შაჰმა და ვეზირ ნიზამ ალ-მულქმა მიაღწიეს იმას, რომ ქვეყანაში შევიდნენ. მთელი ეკლესიები დაანგრიეს და ქრისტიანები ხმლით აკუწეს. ვინც ხმლებს გადაურჩა,

მათ ისლამი მიიღეს. შემდეგ დიდებული სულთანი ალფ-არსლანი მოვიდა, დაუმახა თავის შვილს მალიქ-შაჰს. ზემოხსენებულმა არაფერი იცოდა ღმერთისაგან ბოძებული გამარჯვების შესახებ, ამის შემდეგ მალიქ-შაჰი მამასთან ალფ-არსლანთან წავიდა, გზაში დაიპყრო ყველა ციხე, რომელიც შეხვდა და მამამისამდე მიაღწია“ (სადრ ად-დინ ჰუსეინი 1976: 189). როგორც ჩანს, ალფ-არსლანი საქართველოს სამხრეთი პროვინციების დარბევის შემდეგ ჯავახეთის ახალქალაქის ასაღებად საგანგებოდ ემზადებოდა. ამიტომაც იხმო თავისთან უკვე დიდ წარმატებებს მიღწეული მალიქ-შაჰი და ნიზამ ალ-მულქი. თურქი ისტორიკოსი ქოიმენი წყაროს მიუთითებლად აღნიშნავს, რომ მაშინ, როცა ნიზამ ალ-მულქი და მალიქ-შაჰი ბიზანტიელების წინააღმდეგ ბრძოლით იყვნენ დაკავებულნი, ალფ-არსლანმა საქართველო დაიმორჩილა და დაბრუნებულმა თავისი შვილის მიერ მოპოვებული წარმატებით გაიხარა (Köymen 1963: 256). სამართლიანად შენიშნავს ნ. შენგელია: „ზუსტი არ უნდა იყოს თურქი ისტორიკოსის მტკიცება-თითქოს ალფ-არსლანმა საქართველო დაიმორჩილა და მერე იხმო თავისი შვილი და ალ-მულქი ახალქალაქის დასაპყრობად“ (შენგელია 1968: 256). რა თქმა უნდა, ახალქალაქის დაპყრობამდე სამხრეთ საქართველოს მთელი რიგი პროვინციების დარბევა, რომელზედაც მიუთითებს ქართველი მემკვიდრე, არ ნიშნავს ამ ადგილების, მითუმეტეს, მთელი საქართველოს დაპყრობას, თუმცა მარბიელი ლაშქრობა საკმაოდ ძლევამოსილი უნდა ყოფილიყო. როგორც აღვნიშნეთ, თვით ბაგრატ IV ძლივს გადაურჩა თურქ-სელჩუკებს და ქართლში გადავიდა: „რამეთუ მას ჟამსა მომავალ იყო მეფე ტაოდთ, და თანა ჰყვანდეს დედაჲ და დაჲ და ძე მისი გიორგი; დადგრომილ იყვნეს ხეკრებულთა. და აყრისა მისსა ჟამსა მოუჭდა ლაშქარი სულტანისაჲ; მოვიდეს და წარმოდგეს ქედსა ზედა. ხოლო იგინი ჩამოესწრნეს ქართლს“ („მატიანე ქართლისაჲ“ 2008: 289).

„ჯავახეთის ახალქალაქი მიეკუთვნება შუაფეოდალურ ხანაში „ახალქალაქების“ წარმოშობის ეპოქას. IX-X საუკუნეებში იგი უკვე შესამჩნევი პუნქტი უნდა ყოფილიყო. მიუხედავად ამისა, იმ მუდმივი შფოთვის პირობებში, ამ ქალაქს ზღუდე დიდხანს არ ჰქონია. იგი განსაკუთრებულ პირობებში აუგიათ. ჯავახეთის ცენტრი, კოლა არტაანთან ერთად, ანტიკური ხანიდან წუნდაა. წუნდამია ჯავახეთის ცენტრი ახ. წ. V საუკუნეშიც, რადგან იქ ზის ამ რეგიონის ეპისკოპოსი. ცენტრი როდის გაქრა არ ჩანს, მაგრამ IX-X საუკუნეებში, ახალქალაქობის

პერიოდში, სხვა ქალაქი ჩნდება და სულ მალე ის ხდება ცენტრი“ (ზაქარაია 2002: 145).

ქართულ საისტორიო წყაროებში ახალქალაქი პირველად ბაგრატ IV-ის დროს არის მოხსენებული, მაგრამ ეს იმას როდი ნიშნავს, რომ იგი მანამდე არ არსებობდა. „მატიანე ქართლისაჲს“ ავტორის მიერ მოთხრობილი ისტორია ამ ქალაქის მნიშვნელობის თანდათან ზრდისა და ბაგრატ IV-ის დროისათვის განსაკუთრებულ გამძლიერებაზე მიგვითითებს (მესხია 1983: 89). „მატიანე ქართლისაჲს“ ცნობა იმის შესახებ, რომ 1044-1045 წწ „იწყეს ახალქალაქისა ზღუდეთა შენებად, რამეთუ მას ჟამსა უზღუდო იყო“, - დასახლებული ადგილის გაქალაქების მანიშნებელი უნდა იყოს, რადგან გალავანი XI-XII საუკუნეებში ქალაქის ერთ-ერთ მთავარ მახასიათებლად ითვლებოდა. ლ. ჭილაშვილის აზრით. ქალაქის მშენებლობის პირველ ეტაპზე მოსახლეობის დაცვა ციხეს უნდა უზრუნველყო. მაგრამ როცა იგი საკმარისი აღარ აღმოჩნდა დაცვისათვის, მაშინ დაიწყეს ქალაქის ზღუდით შემოფარგვლა. ახალქალაქის შემოზღუდვა გაქალაქების დასასრულს მოასწავებდა, რადგან უზღუდო ქალაქების არსებობა საქართველოში არ მტკიცდება (ჭილაშვილი 1970: 95-113). ნ. ბერძენიშვილის მიხედვით, კი საქართველოში არსებული უზღუდო პატარა ქალაქებიც: „ქვეყნის ძლიერი ეკონომიკური წინსვლის შედეგად ამ ეპოქაში ჩნდება და იზრდება ქალაქები უციხოდ, უზღუდოდ; ახალქალაქი „უზღუდო იყო და ეს სახელი კი ერქვა“ (ბერძენიშვილი 1964: 50-51).

ახალქალაქში გალავნის მშენებლობამდე მოსახლეობის თავდაცვის მიზნით, ციხის არსებობის შესახებ ე. ჯანდიერი შენიშნავს: „ახალქალაქის არქეოლოგიურმა შესწავლამ იმ აზრამდე მიგვიყვანა, რომ მის თავდაპირველ მცირერიცხოვან მოსახლეობას ეგებ მარტო ციხეც ჰყოფნოდა დასაცავად. საამისოდ ვფიქრობთ, ანგარიშგასაწევია ერთი არქეოლოგიური ფაქტიც: სამხრეთით, ციტადელის მთავარი ჭიშკრის ქვეშ გათხრისას გამოჩნდა დაფარული კედლის ნაწყვეტი, მასში ჩართული ბურჯით. ეს უკანასკნელი ნაგებია „ფსევდოციკლოპურად“- შერეულად, ჰორიზონტალურის-ვერტიკალურთან მიმართებაში მყოფი დიდრონი, უხეშად თლილი ბლოკების წყობით, რომელთა შორის ღრეჩოები წვრილი ნატეხი ქვითაა შევსებული. სწორედ მის თავზე გადის XI-XII სს. გაჭრილი ციხის მთავარი კარის ზღურბლი. ქვედა ფენაში გამოვლენილი ძველი ბურჯის ნაშთი არც მდებარეობით

და არც გეგმით არ შეეფარდება მიწის ზედაპირზე განლაგებული კომპებისა და ბურჟების მთავარ ძარღვს. ამ უკანასკნელთა აგებულებაში კი, მიუხედავად მრავალსაუკუნოვანი გადაკეთება შეკეთებისა (XVI-XIX სს), მაინც დარჩა XI ს. დაგეგმარებული ციტადელის გეგმიერი მონახაზი: თითქმის ყველა კომპის ძირში ვხედავთ ბაგრატ IV-სეული (1027-1072წწ) მშენებლობის კვალს; იმდროინდელი კომპები თუმცა ისევ „ფსევდოციკლოპური“ წესით არის ნაგები, მაგრამ უკვე ჰორიზონტალურ (და არა შერეულ!) რიგებად წყობილი დიდი ბლოკებით“ (ჯანდიერი 1969: 24) ვფიქრობთ, ჯავახეთის პოლიტიკურ და ეკონომიკურ აღორძინებას ფართო გასაქანი ბაგრატ III-ის დროს უნდა მისცემოდა, როდესაც იგი აღმოსავლეთ საქართველოს სამეფო დომენშია გაერთიანებული და ქართული სახელმწიფო აღმავლობის გზაზეა შემდგარი. როგორც ჩანს, ახალი მოთხოვნილება ვეღარ დააკმაყოფილა თმოგვმა და სხვა მცირე ადმინისტრაციულმა ცენტრებმა. ამიტომაც გაჩნდა ახალი ცენტრი ზემო ჯავახეთში, მნიშვნელოვანი გზების გადაკვეთაზე ახალქალაქის სახით. ჩვენი აზრით, გაზრდილი ეკონომიკური მოთხოვნილების გამო (აქ გადიოდა ის ძირითადი მაგისტრალები, რომლებიც ბიზანტიიდან და სომხეთიდან მოემართებოდნენ, აგრეთვე უმოკლესი გზა თორით შიდა ქართლისკენ და ტაბაწყურით თრიალეთისკენ), ახალქალაქის გაქალაქებამ დაასწრო მისი გაღავნის მშენებლობას. ბაგრატ III-ის შემდეგ გართულებულმა საგარეო და შინაპოლიტიკურმა ვითარებამ, საქართველოს სამეფო კარს არ მისცა ახალქალაქის გაღავნის დროულად დამთავრების საშუალება. რაღა თქმა უნდა, სრულიად რეალურად მიგვაჩნია, რომ უზღუდო ქალაქის დაცვის ფუნქციას ციხე შეასრულებდა.

ვახუშტი ბატონიშვილი ახალქალაქს ასე აღწერს: „ახალქალაქი არს ამ ორთა მდინარეთ შესართავს შორის. ესე იყო ქალაქი მოზღუდვილი და ციხე ძლიერი, არამედ შეიმუსრა მრავალგზის. გარნა აწ აღაშენა კუალად შავშეთის ბეგმან ქართლიდამ. ამ ახალქალაქს ზეით არს ამირანის გორა, მტკურის სამჯრის კიდეზედ. მუნ არს მტკუარსა ზედა კიდი. ამას ზეით არს ტბა საღამოსი, დიდი და აღვსილი თევზითა გემოიანითა ამისთვს, რამეთუ არს ანკარა და ქვიანი. ამის სამჯრით არს ტბა ფანავრისა, რომელი აღვწერეთ ქართლსა ზედა. და ამ ფანავარს გამოსდის ჯავახეთის მტკუარი, დაბას გასადინარსა.“ (ვახუშტი ბატონიშვილი 1973: 671).

„მატიანე ქართლისაჲს“ ავტორი ალფ-არსლანის მიერ სამხრეთ საქართველოს კუთხეების (კანგარი, თრიალეთი, ყუელისყური, შავშეთი, კლარჯეთი, ტაო) დარბევის შემდეგ ახალქალაქის აოხრებას შემდეგნაირად გადმოგვცემს: „წავიდეს ჯავახეთს და მოადგეს ახალქალაქს, რამეთუ მესხნი აზნაურნი და ზემოსა კერძისანი ძლიერად დგეს ახალქალაქს და ჰბრძოდეს სამ დღე. რამეთუ არა ზღუდითა მტკიცითა განსრულებულ იყო ახალქალაქი, ვერღარა დაუდგმიდეს ბრძოლითა ძლიერითა. აღიჭურნეს მყოფნი ქალაქისანი და განახუნეს კარნი და შეებნეს ძლიერად, მოსრნეს პირითა მახვლისაჲთა. და შევიდეს ქალაქად თურქნი და ტყვე ყვნეს ურიცხვნი სულნი ქრისტიანეთანი, აღიღეს განძი და ტყუე ძლიერი, და შეიღება წყალი ახალქალაქისაჲ სისხლითა“ („მატიანე ქართლისაჲს“ 2008: 289). ახალქალაქის ბრძოლა საინტერესოა როგორც მესხების გმირული ბრძოლით, ასევე ქართული საბრძოლო ხელოვნების ისტორიის თვალსაზრისითაც. როდესაც, ციხის დაუსრულებელი გალავნის გამო, სამდღიანი ბრძოლის შემდეგ, შეუძლებელი გახდა მტრის შეკავება, მეციხოვნეებმა კარები გააღეს და ისე ეკვეთნენ მტერს. ამ ხერხით წარმატებასაც მიაღწიეს. მართალია, მეციხოვნენ საბოლოოდ დამარცხდნენ, მაგრამ მტერსაც დიდი ზარალი მიაყენეს. რომ არა ამგვარი ტაქტიკური ხერხი, სელჩუკები ნაკლები დანაკარგებით შეძლებდნენ ახალქალაქის აღებას. მტერმა ამ ბრძოლაში უამრავი ტყვე და ნადავლი იგდო ხელთ. დაუსრულებელი გალავნის გარდა ახალქალაქის მცველების დამარცხების მიზეზი, ვფიქრობთ, ისევე როგორც ქართველი ხალხის მთელი ისტორიის უმრავლეს შემთხვევაში, აქაც მტრის რიცხოვრები უპირატესობა უნდა გამხდარიყო. სომეხი ისტორიკოსის ვარდან დიდის მიხედვით, ახალქალაქს ალფ-არსლანი 100 ათასი მოლაშქრით მოადგა (www.vostlit.info, восточная литература, Авторы и источники на букву „В“, Вардан Великий, Всеобщая история). „მატიანე ქართლისაჲს“ გვაძლევს ცნობას სელჩუკების ლაშქრობის დროს ახალქალაქის დაუსრულებელი გალავნის მშენებლობის დაწყების შესახებაც. XI საუკუნის 40-იან წლებში, როცა ლიპარიტმა უხმო ბაგრატ მეფის ძმას დემეტრეს ბერძენთა ლაშქართან ერთად და მოკავშირეებით მოადგა ატენის ციხეს, ციხის მცველებმა ბაგრატს უერთგულეს ფარსმან თმოგველისა და ბეშქენ ჯაყელის გარდა. ისინი გადავიდნენ ჯავახეთში და ახალქალაქის გალავნის მშენებლობა დაიწყეს: „გამოიყვანა ლიპარიტ დემეტრე, ძმაჲ ბაგრატისი, საბერძნეთით ბერძენთა მეფისა ლაშქრითა. და მიერთნეს სხუანიცა ვინმე დიდებულნი და აზნაურნი,

მოვლეს ზემოდ ქუეყანად და ჩამოვიდეს ქართლს, მოადგეს ატენს, არე-არე მოწუეს ქართლი. და ჰყვეს ლიპარიტს კახნი და ბერძენნი, და ვერ წაიღეს ატენი, რამეთუ ციხეთა უფალნი კაცნი მტკიცე იყვნეს ერთგულობასა ზედა ბაგრატისსა, თჳნიერ ფარსმან თმოგველისა და ბემქენ ჯაყელისა, თუხარისისა ერისთავისა. გავიდეს ჯავახეთს და იწყეს ახალქალაქისა ზღუდეთა შენებად, რამეთუ მას ჟამსა უზღუდო იყო“ („მატიანე ქართლისაჲ“ 2008: 282) ქართველი მემკვიდრის ამ ცნობის გამო ზოგიერთი მკვლევარი (გ. აფრასიძე, ლ. ჭილაშვილი, ე. ჯანდიერი) ახალქალაქის გაღავნის მშენებლობას მეფის მოწინააღმდეგე მხარეს მიაწერს (აფრასიძე 1984: 101; ჯანდიერი 1969: 54; ჭილაშვილი 1970: 101) დ. ბერძენიშვილი ამ საკითხთან დაკავშირებით შენიშნავს: მემკვიდრის მოტანილ ცნობაში ახალქალაქის ზღუდეთა მშენებლობის ინიციატორი დასახელებული არაა; თხრობა ფარსმან თმოგველისა და ბემქენ ჯაყელის სახელებს მოსდევს, რაც ქმნის საცდურს ეს საქმიანობა მეფის მოწინააღმდეგეთა ჯგუფს მიეწეროს, მაგრამ ვახუშტი თავის „ისტორიაში“ ამ ამბებს ასე აღწერს: ლიპარიტი და მისი მომხრენი „მოადგნენ ატენს, არამედ ციხე ვერ დაიპყრეს; ხოლო ბაგრატ მეფე მოვიდა ჯავახეთს, განამაგრა ახალქალაქი“. თვით მათიანის ზემოხსენებული ადგილი იძლევა კითხვასხვაობას- „გავიდა მეფე ჯავახეთს და იწყეს ახალქალაქისა ზღუდეთა შენებად“. ქართლის ცხოვრების ძველი სომხური თარგმანის მიხედვითაც, ბაგრატ მეფემ „ააშენა ახალქალაქის ზღუდე“. ბოლოს, თვით ახალქალაქის გათხრების დროს აღმოჩნდა გაღავნის კარიბჭეზე წარწერა: „ქრისტე, შეიწყალე მარიამ...“, ეს კი ბაგრატ IV-ის დედა, დედოფალი მარიამი უნდა იყოს. ამიტომ საფიქრებელია, რომ ახალქალაქის ზღუდეთა მშენებლობა მეფის ინიციატივა ყოფილიყო, რომელიც ჯავახეთის პატრონად თვლებოდა. მას არ შეიძლებოდა ყურადღება არ მიექცია ამ საკვანძო პუნქტისთვის, რადგან ის ზემო ჯავახეთის ცენტრში ძირითად მაგისტრალს აკონტროლებდა (ბერძენიშვილი 1985: 96-97).

ვფიქრობთ, დ. ბერძენიშვილის მსჯელობა საკმარის საფუძველს იძლევა იმისათვის, რომ ახალქალაქის გაღავნის მშენებლობის ინიციატორად საქართველოს მეფე ბაგრატ IV მივიჩნიოთ. „მატიანე ქართლისაჲს“ მიხედვით, ატენის ციხესთან ბრძოლაში, რომელსაც უშუალოდ მოსდევს ახალქალაქის გაღავნის მშენებლობის დაწყება, მეფე არ დამარცხებულა. იგი ლიპარიტს დაეზავა და ისევ გაძლიერდა: „არე ზამთრისა მოწევნულ იყო, ბერძენთა ენება შედმართ წასვლა. დაეზავა

ლიპარიტ აფხაზთა მეფესა, უბოძა მეფემან ქართლის ერისთაობად, წარვიდეს ბერძენნი საბერძნეთად და წარიტანეს დემეტრე თანა. და კუალად განძლიერდა და მოირჭუნა ბაგრატ მეფემან თავის მამულსა ზედა“ („მატიანე ქართლისაჲ“ 2008: 282-283). ამ ამბების შემდეგ, რომელსაც ი. ჯავახიშვილი 1044-1045 წლებით ათარიღებს (ჯავახიშვილი 1983: 143), გამორიცხული არ არის, გაძლიერებულ მეფეს ახალქალაქის გაღავნის მშენებლობის გადაწყვეტილება მიეღო. 1045 წელს ბაგრატმა სომეხი მესვეურებისაგან ქალაქი ანისი ჩაიბარა, 1046 წლის გაზაფხულზე კი ანაკოფიის ციხეს შემოარტყა ალყა. თბილისის ამირის ჯაფარის გარდაცვალების შემდეგ თბილისელმა ბერებმა ქალაქის ჩაბარება ბაგრატს სთხოვეს. ბაგრატმა ანაკოფიას თავი მიაწება და თბილისში შემოვიდა. შემდგომში, როგორც ცნობილია, ბაგრატმა ანისიც და თბილისიც ლიპარიტთან ურთიერთობის გამწვავების გამო დაკარგა. იგივე მიზეზი უნდა გამხდარიყო ახალქალაქის ზღუდის მშენებლობის შეწყვეტაც. შესაძლებელია XI საუკუნის 60-იან წლებში, ცენტრალური ხელისუფლების გაძლიერების დროს ბაგრატ IV-მ ისევ განაახლა ამ გაღავნის მშენებლობა, თუმცა თურქ-სელჩუკთა ლაშქრობის გამო ვერც ამჯერად მოხდა მისი დასრულება. დაუსრულებელი გაღავანი საბოლოო ჯამში ალფ-არსლანის ლაშქართან ახალქალაქის მეციხოვნეების დამარცხების ერთ-ერთი მიზეზი გახდა.

ალფ-არსლანის ლაშქრობის დროს ახალქალაქში ყოფილა ბაგრატ IV-ის მიერ საქართველოში საგანგებოდ მოწვეული გიორგი მთაწმინდელი. მას თან ხლებია 80 უდედმამო ბავშვი, რომელთა უმეტესობა თურმე „მონობისაგან გამოეყვანა, ხოლო სხუანი მონობისა უმწარესის ცხოვრებისაგან“. გიორგი მთაწმინდელთან ერთად ყოფილა აგრეთვე მისი ერთგული მოწაფე და ბიოგრაფი გიორგი ხუცესმონაზონი. იგი წერს „ხოლო რაჟამს-იგი სამხილებლად ცოდვათა ჩვენთათჳს ლომი იგი ყვრალი, ბაბილონით აღმოსრული, სიმტკიცესა ზედა მკლავისა თჳსისა მოქადული, მეორე ნაბუქოდონოსორ, უმჯულოდ, სურტან გამოვიდა საზღვართაგან თჳსთა მოსრვად ნათესავსა ქრისტიანეთასა, მას ჟამსა შინა ვიყვენით ჩუენ ახალქალაქს ჯავახეთისასა და მუნ ჰყვეს ყოველნივე იგი ობოლნი თჳსნი. და ვსხედით ყოველნივე წინაშე მისსა. შუადღეს ოდენ განკვრეებაჲ დაეცა ჟამ რაოდენმე და მეყსეულად განკრთომის სახეთ გვბრძანა ყოველთა, ვითარმედ: „უწყოდეთ, რამეთუ რისხვად ღმრთისაჲ მოწევნად არს ამას ქალაქსა ზედა“. და ბრძანა აღკაზმვად ყოველთაჲ, და იყო რაჲ მწუხრი, გამოვედით. და შემდგომად სამისა

დღისა მოიწია რისხვად იგი უგრძნეულად, რომელსა ყოველნი მეცნიერ ხართ, რამეთუ არათუ ახალქალაქისა ოდენ მკვდრნი მოისრნეს, არამედ დიდ-დიდნი და წარჩინებულნი მთავარნი და ერისთავნი სამეუფოისა ჩუენისანი ძვრ-ძვრათ მოისრნეს და წარწყმდეს“ (გიორგი მცირე 1967: 174). გიორგი მთაწმინდელს რაღაც წყაროებით, შეიძლება თვით მეციხოვნეთაგანაც შეუტყვია, რომ ალფ-არსლანი ახალქალაქის აოხრებას აპირებდა. ბავშვებისთვის უთქვამს „რისხვად მოწევნილ არს ამ ქალაქსა ზედა“ და იქიდან წასვლის გადაწყვეტილება მიუღია. თვითონ თხზულების მიხედვით, ახალქალაქის აოხრება გიორგი მთაწმინდელმა სასწაულებრივი წინათგრძნობით იწინასწარმეტყველა. როგორც ჩანს, ახალქალაქის აოხრება იმდენად ტრაგიკული ყოფილა, რომ მწერალს ეზარება მოვლენების დეტალებში აღწერა და აცხადებს: „მოიწია რისხვად“, რომელიც ყველამ იცითო. ახალქალაქის დაცვაში ქალაქის მკვიდრთა გარდა ჩვენი ქვეყნის სხვადასხვა კუთხის დიდებულებს მიუღიათ მონაწილეობა: „დიდ-დიდნი და წარჩინებულნი მთავარნი და ერისთავნი სამეუფოისა ჩუენისანი ძვრ-ძვრათ მოისრნეს და წაწყმდეს“. ახალქალაქის ტრაგედიას თვით გაუტეხელი ბაგრატ IV-ც კი ისეთ სასოწარკვეთაში ჩაუგდია, რომ მასთან სანუგეშებლად მისულ გიორგი მთაწმინდელისათვის უთქვამს: „უკუეთუმცა არ მეხილვა სიწმიდე შენი, კნინდამცა და მწუხარებისა მიერ მომკვდარ ვიყავო.“ (გიორგი მცირე 1967: 174).

ახალქალაქის ლაშქრობის შესახებ არის ლაპარაკი ეპიგრაფიკულ ძეგლში, რომელიც სამეცნიერო ლიტერატურაში „მირაშხნის წარწერის“ სახელწოდებითაა ცნობილი. აღნიშნული წარწერა 150 მეტრ სიმაღლეზე მდებარე გამოქვაბულში აღმოაჩინა გ. გაფრინდაშვილმა. გამოქვაბული მდებარეობს მტკვრის ხეობაში, ვარძიის გამოქვაბულების დასავლეთით დაახლოებით ხუთ კმ-ზე, მდინარის მარჯვენა ნაპირზე. კლდეს, სადაც გამოქვაბული მდებარეობს, სამერცხლეს უწოდებენ. გ. გაფრინდაშვილი ამ ადგილს, სადაც წარწერა აღმოჩნდა, „ახალ ნავარძიევს“ ან „ნავარძიევს“ უწოდებს, თუმცა, შემდეგში, მოგვიანებით გამოქვეყნებულ წერილებში მას „მირაშხანის ქვაბის კედელზე ამოკვეთილ წარწერად“ (გაფრინდაშვილი 1964: 9) ან „მირაშხანის ქვაბების წარწერად“ (გაფრინდაშვილი 1964: 8) მოიხსენიებს. საბოლოოდ, ამ წარწერამ სამეცნიერო ლიტერატურაში „მირაშხანის წარწერის“, ხოლო გამოქვაბულმა, რომელშიც იგია ამოკვეთილი, „მირაშხანის გამოქვაბულის“ სახელი დაიმკვიდრა. გ. გაფრინდაშვილი

წერდა: „წარწერაში მოთხრობილია თურქების სულტანის ალფ-არსლანის შემოსევა საქართველოში, კერძოდ ჯავახეთში, ჯავახეთის ახალქალაქის აღება და აოხრება“ (გაფრინდაშვილი 1953: 35) 1996 წლის ზაფხულში მირაშხანის წარწერა ადგილზე შეისწავლა ვ. სილოგავამ (სილოგავა 2000: 203). ტექსტი ასეთია: „† სახელითა ღმრთისაჲთა, მე გიორგ[ა] ხუცესმან დავწერე] მას, ჟამს, ოდეს გას მოვიდ[ა] [...] ხორსანი ქალაქით,

ჟ მე, გიორგაჲ ფრიად ცოდვილს. მეწიფა მოვიდა ჯავახეთს და შეჰრისხ[ა] [ყ]ოველი ყოველს ქრისტესდა. მეტად ახალქალაქი[თ] წაიღო ას[წყ]უიდა და ტყუედ წაი[ღო], ყოველი მესხი აზნაური შიგნ დგა. ფარსმან პირ-ექ[მ]ნ[ა] მეფეს. მოკლეს და ყოველი ასწყუიდ[ეს].

უფალო, შეუნდვენ გოჰარის ცო[დვ]ან[ი], [ა]მენ; და მირაშხანელ[თა] ყოველთა შეუნდვენ, უფალო' ამენ; [მეცა]. ფრიად ცოდ[ვი]ლი მომიჰსენ[ნეთ], [გიორგა] ბერი“. (სილოგავა 2000: 231).

წარწერის მიხედვით, მტრის შემოსევა იმდენად დრამატული ყოფილა, რომ ავტორი თავის თავს დასტირის და ცოდვილს უწოდებს. ქრისტიანული რწმენის გამო მთელი ჯავახეთი, განსაკუთრებით კი ახალქალაქი აუოხრებიათ და მოსახლეობა ტყვედ წაუყვანიათ. ამ დროს მესხი აზნაურები ახალქალაქში მდგარან. ფარსმანს მეფისთვის პირობა არ გაუტეხია, იგი მოუკლავთ და ყველანი გაუწყვეტიათ. ცხადია, რომ მირაშხანის წარწერა, „მატიანე ქართლისაჲს“ ავტორი და გიორგი ხუცესმონაზონი ერთსა და იმავე ამბებებს გადმოგვცემენ ალფ-არსლანის საქართველოში პირველ ლაშქრობის შესახებ. სამივე წყაროს ავტორი აღნიშნული ლაშქრობის თანამედროვეა.

მირაშხანის წარწერის გამომცემელი ვ. სილოგავა წერს: „წარწერის ტექსტი მოვლენათა უშუალო გავლენით გაკეთებული ჩანაწერის შთაბეჭდილებას ტოვებს. ამიტომ, ვფიქრობ, იგი შეიძლება დათარიღდეს XI-ის II ნახ-ით, ან სულაც 60-იანი წლებით.

წარწერის ტექსტში ამ ამბების თითქმის ყველა მთავარი მონაწილეა დასახელებული, გარდა უმთავრესის-სულტან ალფ-არსლანისა. აქ ეს ამბები მიეწერება „მეწიფას“ (შეიძლება სულტნის სახელი აღნიშნული იყო მეორე სტრიქონის ბოლოს, მაგრამ ეს ადგილი დაღუპულია), „მეწიფა“ ტექსტში ისეთ კონტექსტშია წარმოდგენილი, რომ იგი შეიძლება იყოს ან პირის საკუთარი

სახელი, ან ზედსართავი სახელი, ან ხელისუფლის ტიტული (თითქოს, „კელმწიფე“). ამჟამად არსებული მასალების მიხედვით გადაჭრით რაიმეს თქმა ძნელია“ (სილოგავა 2000: 236-237).

მირაშხანის წარწერაში მოხსენებული ფარსმანი, ის ფარსმან თმოგველი უნდა იყოს, რომელიც „მატიანე ქართლისაჲს“ მიხედვით, ბაგრატ IV-ის მოწინააღმდეგეთა ბანაკში ირიცხება. ვფიქრობთ, XI საუკუნის 60-იანი წლებისთვის, როცა ბაგრატმა დაამარცხა ცენტრალური ხელისუფლების მოწინააღმდეგე დიდგვაროვანი ფეოდალები (ლიპარიტები; აბაზასძეები), ფარსმანი იძულებული გახდა მეფისთვის ერთგულება შეეფიცა. ფარსმანისა და ბაგრატ IV-ის არაერთგვაროვანი დამოკიდებულება, როგორც ჩანს, კარგად იცის მირაშხანის წარწერის ავტორმა, ამიტომაც განსაკუთრებით აღნიშნავს მის ერთგულებას ახალქალაქის დაცვის დროს „პირ-ექმნა მეფესო.“

ბაგრატ IV-სა და ფარსმანს შორის რომ არაერთგვაროვანი და მერყევი დამოკიდებულება იყო, ეს ნათლად და არაორაზროვნად აისახა საისტორიო წყაროებში. „მატიანე ქართლისაჲს“ ავტორის ცნობით, XI ს-ის 40-იან წლებში, როდესაც ლიპარიტ ერისთავთა ერისთავსა და ბაგრატ IV-ეს შორის ურთიერთობა გამწვავდა, „ციხეთა უფალნი კაცნი მტკიცედ იყვნეს ერთგულებასა ზედა ბაგრატისასა, თვინიერ ფარსმან თმოგუელისა და ბეშქენ ჯაყელისა, თუხარისის ერისთავისა. გავიდეს ჯავახეთს და იწყეს ახალქალაქისა ზღუდეთა შენებად, რამეთუ მას ჟამსა უზღუდო იყო“. („მატიანე ქართლისაჲს“ 2008: 282) მაგარმ უკვე XI ს-ის 60-იანი წლების დასაწყისისათვის ფარსმანი მეფის ერთგულია, როგორც ჩანს, მის მიერვეა აგებული ახალქალაქის ზღუდე და ამ ქალაქის მფლობელია, არ ღალატობს მეფეს და თავს წირავს ციხის სხვა დამცველებთან ერთად. ამიტომაც აღნიშნავს საგაგნებოდ მის შესახებ წარწერის ავტორი „პირ-ექმნა მეფესაო“. ფარსმანის კვალი ჯავახეთში სხვაგანაც ჩანს, კერძოდ, იგი იხსენიება სათხის (ცისკარიშვილი 1959: 37-38) და ზემო თმოგვის (გვერწითელი 1947: 241) ეკლესიების წარწერებში. ზედა თმოგვის წარწერა შესრულებულია ფარსმან თმოგველის გარდაცვალების შემდეგ, რადგან ტექსტში მისი სულის შეწყალებაზეა საუბარი, იგი მისი სულის შეწყალებისთვისაა ამოკვეთილი. მაშასადამე, იგი თარიღდება XI საუკუნის 60-იანი წლების II ნახ-ით. ყოველივე ამის გამო ვ.

სილოგავას შესაძლებლად მიაჩნდა, რომ ფარსმან თმოგველი ზედა თმოგვის ეკლესიაში იყოს დაკრძალული (სილოგავა 2000: 239).

8 ივლისს, წმ. პროკოფის ხსენების დღეს, ფარსმან თმოგველისათვის აღაპი დაუწესებიათ ათონის ქართველთა მონასტერში: „თუესსა ივლისსა ზ, წმიდისა პროკოპისი. აღაპად განგვწესებია ფარსმან თმოგველისადა. ყოვლითა მოსწრაფებითა აღესრულებოდენ, რამეთუ მრავალნი წყალობანი ქმნნა ჩუენ ზედა წინაჲმე ბაგრატ აფხაზთა მეფისა“ (მეტრეველი 1998: 158).

მირაშხანის წარწერას დიდი მნიშვნელობა ენიჭება XI საუკუნის 60-იანი წლების საქართველოს ისტორიის სხვადასხვა საკითხების, განსაკუთრებით, თურქ-სელჩუკთა ლაშქრობების შესწავლის საქმეში. „იგი ერთგვარი დოკუმენტური, ქრონიკალური ჩანაწერია, რომელიც მოგვითხრობს თურქ-სელჩუკთა საქართველოში 1064 წლის ზაფხულში პირველი ლაშქრობის შესახებ და ერთი დეტალით-ახალქალაქის აღების დროს ფარსმან თმოგველის დაღუპვის ცნობით ავსებს ჩვენს ცოდნას ამ ამბებთან დაკავშირებით“ (სილოგავა 2000: 242)

მირაშხანის წარწერის აღმოჩენიდან ცოტა მოგვიანებით, 1957 წელს, გ. გაფრინდაშვილმა ალპინისტ ა. ნემსიწვერამის, ექიმ გ. ხეცურიანისა და მწერალ ლ. გოთუას მონაწილეობით მოწყობილი ექსპედიციის დროს თრეხვის ქვაბებში (ქარელის რ-ნი) მიაკვლია კიდევ ერთ წარწერას, რომელშიც მოთხრობილია თურქ-სელჩუკთა საქართველოში ლაშქრობის შესახებ. თრეხვი მდებარეობს ხვედურეთის ხეობაში, რომელსაც ვახუშტი ბატონიშვილი ასე აღწერს: „დასავლით გორიჯუარისა არს ჳევი სკრისა, და მიერთვის სამეზრიდამ მტკუარს. ამ ჳეობის დასავლით არს ხუედურეთის ჳეობა. გამოსდის საცხენისის მთას და მიერთვის სამეზრიდამ მტკუარს. და არიან ესე ორნი ჳეობანი ვენახოვანნი, ხილიანნი“ (ვახუშტი ბატონიშვილი 1973: 344). წარწერა შესრულებულია ქვაჯვარზე ნუსხახუცური დამწერლობით. ჯვარი დამზადებული ყოფილა წმ. მიქეილ მთავარანგელოზის სახელზე, როგორც ამას მოწმობს მისი წარწერა: „წმიდაჲ მიქელ მთავარანგელოზი“. წარწერის ძირითად ტექსტში ნათქვამია: „მე, ლეონტი მროველმან, დიდითა მოჭირვებითა აღვაშენე ესე ქუაბი ხატისათჳს ღმრთაებისა და დღესა ჳირისასა ნავთსაყუდელად რუისისა საყდრისა შვილთათჳს, ჟამთა შინა აღფარსლან სულტანისაგან ოჯრობისადა. ქრონიკონსა სჳვ“ (1066 წ.) (გაფრინდაშვილი 1961: 246) ამ წარწერის მიხედვით, ლეონტი მროველს ალფ-არსლანის მიერ საქართველოს

აოხრების პირობებში 1066 წელს აუშენებია ქვაბი ღვთაების ხატისა და რუისის „საყდრის შვილთა“ თავშესაფარად. ნიშანდობლივია, რომ ძველი ხელნაწერების მიხედვით, რუისის ტაძარი ღვთაების სახელობისაა. შემდეგ იგი პარალელურად ფერისცვალების ეკლესიად არის მოხსენებული. ვახუშტიც მას ხვთაების სახელით მოიხსენებს: „სამკრით ურბნისისა არს რუისის მთის ძირს, დაბა დიდი რუისი და ეკლესია ღვთაებისა, გუმბათიანი, დიდი, დიდშენი. ზის ეპისკოპოზი, მწყემსი ამ რუისისა ზეითის ქართლისა, ლიხ-ტაშისკარამდე, და აწ ესევე მწყისს ჯეობასა და სადგერს, ვინამთგან მაწყუერელი არღარა არს. შემუსრა ლანგთემურ; ალაშენა ეკლესია ესე ოც მეფემან ალექსანდრემ. შემდგომად კუალად განაახლა და შეამკო პთ დედოფალმან მარიამ“ (ვახუშტი ბატონიშვილი 1973: 373-374). წარწერის გამომცემელმა ლეონტი მროველი „ქართლის ცხოვრების“ კრებულის თავდაპირველ შემდგენელთან დააკავშირა. იგი წერს: „თუ მხედველობაში მივიღებთ ორი დიდი მეცნიერის ივ. ჯავახიშვილისა და კორნ. კეკელიძის მოსაზრებებს ლეონტი მროველის მოღვაწეობის დროის შესახებ, რაც სავსებით ემთხვევა ათონისა და პარიზის ხელნაწერების თარიღს და მათ ქვაჯვარის ქორონიკონს შეუდარებთ, აღმოჩნდება, რომ „მეფეთა ცხოვრების“ ავტორი და წარწერის იმავე სახელით ცნობილი პიროვნება ერთი და იგივეა“ (გაფრინდაშვილი 1961: 251). ამ თვალსაზრისს წინააღმდეგობა გაუწია ისტორიკოსთა ერთმა ნაწილმა, რომელთაც ლეონტი მროველი უფრო ადრეული პერიოდის ავტორად მიაჩნდათ. მაგრამ მკვლევართა უმრავლესობა ფიქრობს, რომ თრეხვის წარწერის ლეონტი მროველი და XI საუკუნის ქართველი ისტორიკოსი ერთიდაიგივე პირია. ამის ერთ-ერთ არგუმენტად შეიძლება მივიჩნიოთ ის ფაქტიც, რომ, მირაშხანის წარწერის ავტორისაგან განსხვავებით (რომელმაც ისიც კი არ იცის რომ ხორასანი მხარეა და არა ქალაქი), თრეხვის წარწერის ავტორი გამოცდილი ისტორიკოსი ჩანს. იგი მოკლედ და გასაგებად გადმოგვცემს ისტორიულ ფაქტებს. 1066 წელს ალფ-არსლანის საქართველოში ლაშქრობა სხვა საისტორო წყაროებით არ დასტურდება (ამ დროს ალფ-არსლანი არალის ზღვის აღმოსავლეთით და ჩრდილოეთით მცხოვრები თურქმენების დამორჩილებით იყო დაკავებული). გამონაკლისია მხოლოდ არაბი ანონიმი ავტორი, რომელიც მშრალად, ყველანაირი კომენტარების გარეშე აღნიშნავს, რომ ალფ-არსლანი 459 (1066-1067) წელს საქართველოს ვილაიეთში შევიდა და თავიდან ბოლომდე იავარყო (ანონიმი ავტორი 2003: 385).

სავარაუდებელია, რომ ეს ცნობა ეხება ალფ-არსლანის საქართველოში მეორე ლაშქრობას, რომელსაც ადგილი ჰქონდა 1068 წელს. ანონიმი ავტორი ასევე შეცდომით 467 (1074) წლით ათარიღებს ალფ-არსლანის სიკვდილს (ანონიმი ავტორი 2003: 385). 1066 წელს ქართლში თავდაცვითი მშენებლობა თურქ-სელჩუკების მიერ სამხრეთ საქართველოს დარბევისა და ახალქალაქის აოხრების გამოძახილი უნდა იყოს. ვფიქრობთ, თრეხვის ქვაბების მშენებლობა ახალქალაქის აოხრებიდან ახლო მომავალში უნდა დაწყებულიყო, ამიტომაც მიიჩნევს წარწერის ავტორი ქვაბების მშენებლობას „ჟამთა შინა ალფარსლან სულტანისაგან ოჯრობისადა“. წარმოდგენილად მიგვაჩნია უშუალოდ ალფ-არსლანის ქართლში ლაშქრობის პირობებში, მიუვალ ადგილზე (ქვაბებში შედწევა მთამსვლელური ტექნიკის გამოყენებით გახდა შესაძლებელი) ისეთი რთული სამუშაოს შესრულება, როგორც თრეხვის ქვაბების მშენებლობაა. ამ მშენებლობას აუცილებლად დასჭირდებოდა მშვიდობიანი დროის გარკვეული მონაკვეთი. სწორედ ასეთ დროს „კარზედ მომდგარი საშიში მტრისაგან თავდაცვის მიზნით ლეონტი მროველი თრეხვის მიუდგომელ კლდეებში აშენებს ქვაბთა სახიზარს-საცხოვრებელი და სამეურნეო (მარანი, წყალსაცავები და სხვ.) ნაგებობებით. „სწორი იყო ლეონტის გადაწყვეტილება, როდესაც სახიზრისათვის არჩევანი მიუდგომელ სიმაღლეზე განლაგებულ ბუნებრივ გამოქვაბულების გაფართოება-გადაკეთებაზე შეაჩერა... ქართლის გაშლილი ველებიდან, სადაც მტერი დათარეშობდა, მოშორებით ხვედურეთის ვიწრო ხეობის თავზე კლდეებში არსებულ სახიზრებს დამხმარე სამეურნეო ნაგებობებით ხანგრძლივად შეეძლო უშიშრად შეეხიზნა მშვიდობიანი მოსახლეობა. გარდა ამისა, ბუნებრივ გამოქვაბულთა გამოყენებამ, რის გამოც საჭირო გახდა ქვაბთა და ცალკეული ღიადებისა თუ კომპლექსის წინა მხარის ქვიტკირის კედლით ამოშენება, დააჩქარა მშენებლობა და თვით სამუშაოს ხარჯებიც შეამცირა. თუმცა თუ გავითვალისწინებთ ქვაბთა ქარაფის პირზე განლაგებას და მათთან მისადგომი გზების უქონლობას, დაბლა საშენი მასალის-ქვის დამზადება და ქვაბებში აზიდვა, ამასთან იქ მშენებლობის წარმოებაც დიდ ფიზიკურ სიძნელეებთან იქნებოდა დაკავშირებული; რაზედაც თვით ლეონტიც აკი მიუთითებს: „დიდითა მოჭირვებით აღვაშენო“. ლეონტის ეს სიტყვები გულისხმობს მშენებლობის წარმოების-სირთულეს, სისწრაფესა და გულმოდგინებას“ (გაფრინდაშვილი 1961: 254-255). სამართლიანად შენიშნავს ნ. შენგელია: „სწორედ

ასეთ მიუდგომელ ადგილებში შეეძლო ადგილობრივ მოსახლეობას შეეფარებინათ თავი. ამ პერიოდში მთელი ხალხის საქმიანობა და ყურადღება თავდაცვითი ნაგებობების მშენებლობისაკენ იყო მიმართული. როდესაც ლეონტი მროველი ქართლის გაშლილი ველებიდან მიუვალ ადგილებში აშენებდა ხალხისთვის თავშესაფრებს, მტერი ჯერ კიდევ არ იყო ქართლში გადმოსული. ალფ-არსლანის პირველი შემოსევა მხოლოდ სამცხის რაიონებს შეეხო. განსაკუთრებით დაზარალდა ახალქალაქი და მისი მიდამოები. მტერი ქართლში არ გადმოსულა, ისე გაბრუნდა ანისისაკენ. ამიტომ ვერ გავიზიარებთ წარწერის გამომცემლის აზრს. თითქოს ამ პერიოდში (ე. ი. 1066 წლამდე) ქართლის გაშლილ ველებში დათარეშობდა. სხვა ამბავია, როდესაც ალფ-არსლანი საქართველოში მეორედ მოვიდა 1068 წელს. მაშინ მთელ ქართლში სელჩუკები დათარეშობდნენ“ (შენგელია 1968: 229).

დეტალურად და დრამატულად აღწერს თურქ-სელჩუკების საქართველოში ლაშქრობას, კერძოდ კი ახალქალაქის აღების ამბებს XII საუკუნის არაბი ისტორიკოსი სადრ ად-დინ ჰუსეინი. იგი წერს საფიდარ-შაჰრის (აღჯაყალა, თეთრი ციხის აღების შემდეგ „სულთანმა მოინდომა ახალქალაქის სახელწოდების სხვა ქვეყნების დაპყრობაც. ციხის კედლის სიგრძე ასი წყრთა იყო, ხოლო სიგანე ამაზე უფრო მეტი. ამ ქალაქის გარშემო აღმოსავლეთით, დასავლეთით და ჩრდილოეთით მდებარეობს მთა; მთის მწვერვალზე ციხეებია. ჩვენ მიერ აღნიშნული კედელი კი სამხრეთ მხარესაა. ამ ციხის კედლის წინ ჯეიჰუნის მსგავსი მდინარე ჩადის. ზედ ხიდია აგებული. მტერმა ეს ხიდი აიღო და ამგვარად მუსლიმების სიხარბეს და იმედს ბოლო მოუღო. ამის შემდეგ სულთანმა ალფ-არსლანმა ამ მხარეში შესასვლელთან კარავი დასცა და ღვთისადმი ლოცვა და ვედრება აღავლინა. მისმა ლაშქარმა დიდი ხიდი ააშენა.. დაიწყეს ბრძოლა, ძალიან მაგრად შეებნენ ერთმანეთს. შემდეგ ამ ქვეყნიდან ორი კაცი გამოვიდა, დახმარება და შეწყნარება ითხოვა. მათ სთხოვეს სულთანს ემირის დანიშვნა, რომელიც მართალი და პატიოსანი კაცი იქნებოდა. სულთანმა ემირ იბნ მუჯაჰიდი და ებუ სუმრე გაუგზავნა. როდესაც მათ გაიარეს ციხის სასაზღვრო ხაზი, ქართველებმა მათ ალყა შემოარტყეს და დახოცეს. ეს საწყლები დარჩნენ ხმალსა და წყალს შუა.

ამის შემდეგ მსახური სავაფი ეახლა სულთანს და მოინდომა ეცნობებინა მისთვის, ქართველები თავს დაგვესხნენ და მუსლიმები დაამარცხესო. სულთანი ნამაზს ასრულებდა. მას შემდეგ, რაც სულთანმა მორჩილებით ნამაზი დაამთავრა,

კარვიდან გამოვიდა, ცხენზე შეჯდა და წავიდა. იგი მტრის სასტიკ წინააღმდეგობას მამაცურად გაუმკლავდა, მათ ქვეყანაში შევიდა და მტრებისგან გაათავისუფლა. ციხის ერთ-ერთ კოშკში რამდენიმე გულადი მეომარი დარჩენილიყო, რომლებმაც სულთანს დიდი წინააღმდეგობა გაუწიეს. სულთანმა ბრძანა, ამ კოშკის გარშემო შემა შემოეწყოთ, შემას ცეცხლი მოუკიდეს... ამის შემდეგ სულთანი თავის კარავში დაბრუნდა კმაყოფილი და მხიარული.

მუსლიმებს ხელში ჩაუვარდათ უსაზღვრო და უთვალავი სიმდიდრე. ღამით ძლიერი ქარი ამოვარდა. კოშკის გარშემო დანთებულ ცეცხლს ქარმა შეუბერა და ეს მხარე ცეცხლმა მოიცვა, თავიდან ბოლომდე გადაწვა. ამ ციხესთან ახლოს სხვა ერთი გამაგრებული ციხეც იყო. სულთანმა ესეც დაიპყრო. შემდეგ ქართველმა მელიქებმა სულთანს ბევრი საჩუქარი გაუგზავნეს და ზავი ითხოვეს. თავიანთი დანაშაული აღიარეს. ქართველთა მეფის ელჩებთან ერთად აიბეკისა და ემირ ელ ჰაჯიბის მეშვეობით სულთანმა ქართველთა მეფეს წერილით შეატყობინა, ან ისლამი უნდა მიიღო, ანდა ჯიზიაზე უნდა დათანხმდე, სხვა გამოსავალი არ არისო. ზემოხსენებულმა ჯიზია იკისრა“ (სადრ ად-დინ ჰუსეინი 1976: 189-190). ჰუსეინი ხაზს უსვამს ქართველების თავდადებულ ბრძოლას და მათ ერთ ამორალურ ტაქტიკურ საბრძოლო ხერხს. კერძოდ, ქართველებმა ჯერ მიიწვიეს სელჩუკთა წარმომადგენლები ქალაქის ჩასაბარებლად, შემდეგ კი მუხანათურად დახოცეს. ამ ხერხმა შედეგიც გამოიღო, მუსლიმები მარცხდებოდნენ, მაგრამ ალფ-არსლანი თვითონ ჩაუდგა სათავეში ლაშქარს და დიდი სისასტიკით ააოხრა ახალქალაქი. როგორც ჩანს, ქართველებმა ახალქალაქის დაცვისთვის ყველანაირ ხერხს მიმართეს, ეს ბუნებრივად მიგვაჩნია ვინაიდან ამ ბრძოლას გადამწყვეტი მნიშვნელობა ენიჭებოდა. აქ წყდებოდა როგორც ქართული სახელმწიფოს დამოუკიდებლობის, ასევე მისი საერთაშორისო ავტორიტეტის საკითხი. გამარჯვების შემთხვევაში ისახებოდა პერსპექტივა, რომ საქართველო გამოსულიყო თურქ სელჩუკებისა და ბიზანტიელებისგან მთელი კავკასიის გაათავისუფლების მედროშედ. საქართველო იმ პერიოდში ამიერკავკასიაში ერთადერთი დამოუკიდებელი ქვეყანა იყო, რომელიც გამარჯვების შემთხვევაში მთელი კავკასიის მთავარ ძალად გადაიქცეოდა. ამიტომაც მოაწყეს სელჩუკებმა საქართველოში ესოდენ ორგანიზებული და დიდი ლაშქრობა. ამ ბრძოლაში გამარჯვება-დამარცხებას განსაკუთრებული მნიშვნელობა ენიჭებოდა. ვფიქრობთ,

ახალქალაქში დამარცხება გახდა ძირითადი მიზეზი იმისა, რომ საქართველოს სამეფო კარმა ვერ შეძლო ამ პერიოდში ვერც წარმატებით დაწყებული გაერთიანების საქმის ბოლომდე მიყვანა და, მითუმეტეს, ვერც კავკასიის განმათავისუფლებლის როლში გამოსვლა.

სადრ ად-დინ ჰუსეინის ცნობას ახალქალაქის ბრძოლასთან დაკავშირებით ძალიან ჰგავს იბნ ალ-ასირის ცნობა. იგი წერს: ახალქალაქი „აღმოსავლეთით და დასავლეთით გამაგრებული იყო მთებზე აშენებული დიდი კედლებით და შენობებით, რომელზედაც იყო რამდენიმე გამაგრებული ციხესიმაგრე. ორი მხრით შემოსაზღვრული იყო გადაულახავი მდინარით. როგორც კი დაინახეს მუსლიმებმა მაშინვე მიხვდნენ, რომ შეუძლებელი იყო მისი აღება. მეფე ამ ქალაქისა ისევე როგორც სხვა ქალაქების მეფე, რომელიც მოვიხსენეთ, იყო ქართველი. სულთანმა მდინარეზე ფართო ხიდი ააგო და ბრძოლა გახურდა. ამ დროს ქალაქიდან გამოვიდა ორი ადამიანი, რომელთაც ითხოვეს დახმარება და სთხოვეს მეფეს მათთან გაეგზავნათ მეზრძოლთა რაზმი. მან გაუგზავნა წესრიგიანი რაზმი. ისინი როგორც კი გადავიდნენ ხიდზე, ქართველების ალყაში მოექცნენ. ბევრი მუსლიმი მოკლეს, რადგან გზა ვიწრო იყო და ვერ გაიქცნენ. გამოვიდნენ ქართველები ქალაქიდან და დაიწყო დიდი ბრძოლა. ამ დროს სულთანი ლოცულობდა. მას მოესმა ყვირილის ხმა, მაგრამ არ გაინძრა, სანამ ლოცვა არ დაასრულა. შემდეგ შეჯდა ცხენზე და შეუტია ურწმუნოებს. მუსლიმები ბრძოლის დროს იძახდნენ „ალაჰ; ახბარ“. ისინი გაიქცნენ და ქალაქში შევიდნენ. მათ თან მიჰყვნენ მუსლიმებიც. შემდეგ შევიდა სულთანი და დაიპყრო იგი. მოსახლეობის ნაწილმა თავი შეაფარა ქალაქის ერთ შენობას. სულთანმა ბრძანა შენობის ირგვლივ შემა შემოეწყოთ და ცეცხლი მიეცათ. შენობასთან ერთად დაიწვა ყველა, ვინც შიგნით იყო. ამის შემდეგ სულთანი დაბრუნდა კარავში. მუსლიმებმა ხელში ჩაიგდეს ნადავლი, რომლის დათვლა შეუძლებელია. დაღამებისას ამოვარდა ძლიერი ქარი, რომელმაც მთელ ქალაქს ცეცხლი მოსდო და მთლიანად გადაწვა. ეს იყო 456 რაჯაბს (1064 წლის ივნისი). სულთანმა აიღო ამ ქალაქთან მდებარე ძლიერი ციხესიმაგრე და გაემგზავრა ყარსისა და ანისის მიმართულებით. მასთან ახლოს მდებარეობდა ორი მხარე (ქალაქი?) ბარდა-დუბელი და ნური, რომელთა მცხოვრები შეეგებნენ მუსლიმებს და მიიღეს ისლამი. მუსლიმებმა ეკლესიები

დაანგრიეს და მეჩეთები ააშენეს“ (www.vostlit.info, восточная литература, Авторы и источники на букву „И“, Ибн Ал-Асир, Полный свод всеобщей истории).

მეტად დრამატულია ის სურათი, რომელსაც სომეხი ისტორიკოსი მათეოს ურჰაეცი (XI-XII სს) აღწერს ახალქალაქის აღებასთან დაკავშირებით. აბასლანმა (ე. ი. ალფ-არსლანმა),- წერს იგი - „სასტიკი ბრძოლებით ალყა შემოარტყა ახალქალაქს, როელიც იერიშით აიღო. მან უმოწყალოდ მახვილით მოსრა მთელი ქალაქი. კაცები, ქალები, ყველა მღვდელი, მონაზონი და მთავარი. მთელი ქალაქი სისხლით მორწყო. სპარსეთში ტყვედ წაიყვანა უამრავი ჭაბუკი და გოგონა, ხელთ იგდო უამრავი ოქრო-ვერცხლი და თვალ-მარგალიტი“ (სილოგავა 2000: 236).

ანისში განვითარებულ მოვლენებთან კავშირში გადმოგვცემს ალფ-არსლანის მიერ ახალქალაქის აღებას XIII საუკუნის ისტორიკოსი ვარდან დიდი: „ანისში სომეხთა მეფეების მეფობის შეწყვეტის შემდეგ, სომხეთში მოვიდა თოღრულ ბეგის ძმის შვილი ალფ-არსლანი. მხედართმთავარი, სულთანი, ოცდაოთხი პროვინციის დამანგრეველი, რის შედეგადაც იგი გახდა სულთანი. ის მეორედ მოვიდა ასი ათასი ლაშქრით, აიღო ახალქალაქი, სამშვილდე და მოიყვანა ცოლად ქალიშვილი კვირიკესი, დისშვილი ქართველთა მეფე ბაგრატისა. ანისის აღების დროს მიწაყრილში ათასი კაცი დახოცა და მათ სისხლში იბანავა. ამბობენ, რომ მან ეს გააკეთა მსხვერპლთ შეწირვის სახით თავის თაყვანისმცემლების პატივსაცემად. შემდეგ მოვიდა ხალიფას ელჩი, შეაბა მას ოქროს ყელსაბამი. შეკრა თორმეტი წნული ერთ კონად და თავისი მბრძანებლის უსაზღვრო მორჩილების ნიშნად რამდენჯერმე ოდნავ დაარტყა. ეს მოხდა 513 (1064) წელს, მეფე იოანეს გარდაცვალებიდან 23 წლის შემდეგ“ (www.vostlit.info, восточная литература, Авторы и источники на букву „В“, Вардан Великий, „Всеобщая история“).

ვარდანის ცნობით, ალფ-არსლანმა ახალქალაქთან ერთად აიღო სამშვილდეც. არაბული წყაროებიც (სადრ ად-დინ ჰუსეინი; იბნ ალ-ასირი) აღნიშნავენ, რომ ალფ-არსლანმა ახალქალაქის გარდა კიდევ ერთი ძლიერი ციხე-სიმაგრე აიღო, მაგრამ სახელს არ ასახელებენ. გამორიცხული არ არის, რომ არაბ ისტორიკოსებსაც მხედველობაში სამშვილდე ჰქონდეთ. ამ ფაქტს გარკვეულწილად ეწინააღმდეგება ქართველი მემატიანის ცნობა, რომლის მიხედვით ახალქალაქის აღების შემდეგ განვითარებული მოვლენების დროს საქართველოს მეფე ბაგრატ IV-მ სომეხები დაიმორჩილა და სამშვილდე თავის სამეფოს შემოუერთა („მატიანე ქართლისაჲ“

2008: 290). სომეხ ისტორიკოსს სტეფანოზ ორბელიანს ალფ-არსლანის ამიერკავკასიაში 1064 წლის დაპყრობით ომების მიზეზად, ჯერ კიდევ 1048 წელს თურქ-სელჩუკების მიერ ბერძენ-ქართველ-სომეხთა გაერთიანებული ლაშქრის დამარცხება და ქართველი აზნაურებისაგან ლიპარიტის მუხანათური ღალატი მიაჩნია. იგი წერს: „დაწყევლილი და უფლის მკვლელი ქართველი აზნაურები შეშინდნენ მისი (ლიპარიტის) საკვირველი ძალისაგან და გადაწყვიტეს ემტროთ ჯარების სარდლის ლიპარიტისთვის. მათ უმაღლვე მოჰკვეთეს მის ცხენს ძარღვები და მიწაზე ჩამოაგდეს ლიპარიტი. ხალხის სიმრავლემ შუაში მოიქცია იგი და მოკლეს იმ ადგილას. ამით მწუხარება და წყვდიადი თავს დაატყდათ ქრისტიანებს. ეს რომ ისმაიტელმა გაიგეს, დიდი სიხარულით კვლავ მობრუნდნენ, მახვილი აღმართეს და ამოწყვიტეს ქართველთა ჯარი. ზოგიერთები გაიქცნენ და გაიფანტნენ ქვეყნის სხვადასხვა მხარეში. ასე დაიღუპნენ სომეხთა და ქართველთა ქვეყნები, რადგანაც ყველა გავარს ტაჯიკები დაეუფლნენ. მცირე ხნის შემდეგ, 513 (1064) წელს, ალფ-არსლან სულთანმა აიღო ანისი, აიღეს აგრეთვე კარი, ისინი დაეუფლნენ შირაკის, ვანანდის, არშარუნიქისა და აირარატის ყველა გავარს, სისაკანის ქვეყანას და მთელ ტერიტორიას ტფილისის კარამდე. ასე, ამგვარად, დიდი წარწყმედისა და ქრისტიანთა საყოველთაო დაღუპვის კარი მაშინ გახსნეს წყეულმა და უფლისმკვლელმა ქართველების ჯარებმა“ (სტეფანოზ სივნიეთის ეპისკოპოსი 1973: 207-208). სტეფანოზის ამ თხრობიდან ფასეულია ცნობა 1064 წელს ალფ-არსლანის ამიერკავკასიაში ლაშქრობის შესახებ. იგი შეცდომას უშვებს, როდესაც სელჩუკთა ლაშქრის თბილისამდე მოსვლაზე საუბრობს, ამ დროს სელჩუკთა საქართველოში ლაშქრობა მხოლოდ სამხრეთ საქართველოს ტერიტორიით შემოიფარგლა. იგი 1049 წელს ასახელებს 1048 წლის მაგივრად ბერძენ-ქართველ-სომეხთა ერთობლივ ბრძოლას ლიპარიტის სარდლობით თურქ-სელჩუკთა წინააღმდეგ. ისტორიკოსი, როგორც ჩანს, ლიპარიტის მეხოტბეა, მაგრამ ისიც კი არ იცის, რომ იგი ამ ბრძოლაში კი არ დაიღუპა, არამედ ტყვედ ჩავარდა. „მატიანე ქართლისაჲს“ მიხედვით, „ლიპარიტ მიიცვალა საბერძნეთს, სამეფოსა ქალაქსა კონსტანტინეპოლს, და წამოიყვანეს დიდითა დიდებითა ერთგულთა და გაზრდილთა მისთა, მოიყვანეს და დამარხეს კაცხს, სამარხავსა მამათა მათთსა“ („მატიანე ქართლისაჲს“ 2008: 289).

საისტორიო წყაროთა უმრავლესობაში, რომლებიც ალფ-არსლანის საქართველოში ლაშქრობასა და ახალქალაქის აოხრებას ეხება, აღნიშნულია, რომ სელჩუკებმა საქართველოში უამრავი ნადავლი და ტყვე ჩაიგდეს ხელში. კონკრეტული ციფრები კი არც ერთ წყაროში არ სახელდება. შ. ლომსაძე წყაროს მიუთითებლად გამოთქვამს მოსაზრებას, რომ ტყვეთა რაოდენობა 80 000 ზე ნაკლები არ უნდა ყოფილიყო (ლომსაძე 1992: 152). სელჩუკთა მთავარი ამოცანა იყო გამარჯვების შემდეგ ადგილობრივი მშვიდობიანი მოსახლეობის აყრა-გადასახლება და მათ ადგილზე მომთაბარე თურქმენი ტომების დასახლება. წყაროთა უქონლობის გამო შეუძლებელი ხდება ქართველი ტყვეების შემდგომი ისტორიის კვლევა. ამ მხრივ გამონაკლისია ქართველი ფეოდალი ბეშკენი. XIII-XIV საუკუნეების ირანელი ისტორიკოსის ცნობით: „...სულთანმა ალბარსლანმა საქართველოზე გამოილაშქრა. ბრძოლის შემდეგ იმ ადგილის მმართველმა ბაგრატ გიორგის ძემ სულთანთან ზავი დასდო. საქართველოს ზოგი ამირათაგანი სულტანს ტყვედ ჩაუვარდა. ზოგმა მუსლიმანობა მიიღო. ერთი იმათაგანი ბეშთეგინი იყო. მონის საყელის ნაცვლად (სულთანმა) მას ცხენის ნალი გაუკეთა ყურში. მისი შთამომავლობაც აგრეთვე ატარებს ყურში დიდ რგოლს. ქალაქი ვერავი უწყალობა მას (ალბარსლანმა) და ეს ქალაქი ამჟამად ბეშთეგინად არის ცნობილი“ (ჰამდალლაჰ ყაზვინი 1937: 27).

როგორც ცნობიდან ჩანს, ბეშკენი ერთ-ერთი სამხედრო ტყვეა, რომელიც სელჩუკთა სამსახურში ჩადგა. შემდგომში კი ერთგული სამსახურის, საკუთარი ნიჭისა და უნარის წყალობით დიდ წარმატებას მიაღწია. ქალაქი ვარავი მას იკტას საფუძველზე უნდა მიეღო. როგორც ცნობილია, თურქ-სელჩუკების სამსახურში დაწინაურებული პირები სწორედ იკტით ღებულობდნენ მიწის ნაკვეთს, ზოგჯერ კი მთელ ოლქებს. თურქ-სელჩუკთა ხანაში იკტას ინსტიტუტმა რთული სახე მიიღო. „იკტას მფლობელობის საფუძველი წყალობა იყო. მაგრამ იკტათი გაპირობებული ვასალური დამოკიდებულება ახლა ჰქმნიდა რთულ ფეოდალურ იერარქიას. ახლანდელი იკტა X საუკუნის იკტასაგან იმითაც განსხვავდებოდა, რომ მისი გაცემა უპირატესად სამხედრო სამსახურის სანაცვლოდ წარმოებდა. თურქ-სელჩუკების დროს მკაფიოდ გამოკვეთილი სახით ჩამოყალიბდა სამხედრო-ლენური სისტემა“ (გაბაშვილი 1957: 133). იკტას მფლობელს უფლება ჰქონდა აეკრიბა პირადი სარგებლობისთვის კუთვნილი გადასახადი და ვალდებული იყო ომის დროს გამოეყვანა გარკვეული რაოდენობის მეომარი. XI საუკუნის მანძილზე იკტამ

მნიშვნელოვანი ცვლილებები განიცადა. განსაზღვრული გადასახადის დროებითი აკრეფის უფლებიდან იგი მთელი სიცოცხლით გადასახადის აკრეფის უფლებაში გადაიზარდა. შემდეგ კი მას მემკვიდრეობის უფლება დაემატა. ბეშქენის შთამომავლებმაც, როგორც ირკვევა, ერთ დროს სამხედრო სამსახურის სანაცვლოდ დროებით მფლობელობაში მიღებული მამული მოგვიანებით მემკვიდრეობის უფლებით დაისაკუთრეს. ყაზვინის ცნობის მიხედვით, სელჩუკთაგან ბეშქენისათვის ბოძებულ ქალაქს მალე სახელი უცვლია და ბიშქინი დარქმევია, რაც, ჩვენი აზრით, ბეშქენისა და მის მემკვიდრეების დაწინაურებულ მდგომარეობაზე მიუთითებს.

ვარავის ადგილმდებარეობა აღწერილი აქვს იმავე ჰამდალაჰ ყაზვინს თავის გეოგრაფიულ თხზულებაში, რომელსაც „ნუზჰატ ულ-ყულუბ“ („გულთა სიამე“) ეწოდება. იგი აღწერს ფიშქინის თუმანს და ამბობს: „ამ თუმანში შვიდი ქალაქი შედის: ფიშქინი, ხიავი, ანადი, არჯაყი, აჰარი, თექლეფე და ქალანბარი“. შემდეგ ჰამდალაჰ ყაზვინი აღწერს ქ. ფიშქინს და აღნიშნავს: „პირველად ვარავის უწოდებდნენ. როდესაც ფიშქინ ქართველი ამ ადგილის მმართველი გახდა ამ სახელით არის ცნობილი“ (თოფურია 1963: 122).

აჰარს აღწერს იაკუთი თავის „მუჯამ ალ-ბულდანში“. იაკუთის მიხედვით, „აჰარი არის ქალაქი დასახლებული, მრავალსიკეთიანი, მდებარეობს აზერბაიჯანის ოლქში არდებილსა და თავრიზს შორის. მის ემირს იბნ-ფიშქინს უწოდებენ. ქალაქიდან მრავალი ფაკიჰი და მუჰადისი გამოვიდა“ (თოფურია 1963: 122).

ბეშქენიანთა დინასტიის შესახებ საინტერესო ცნობებია დაცული XII საუკუნის სპარსელი ისტორიკოსის მუჰამედ ნესევის თხზულებაში „სირათ ას-სულთან ჯელალ ად-დინ მანქობერდი“ („ჯელალ ად-დინ მანქობერდის ცხოვრება“). თხზულების მიხედვით, ჰამანდაში ტყვედ ყოფნის დროს ნურსათ ად-დინი და სხვა ტყვეები დამცირების მიზნით ყოველდღე გამოჰყავდათ მოედანზე და ფეხზემდგომებს აყურებინებდნენ სულთნის (იგულისხმება ხვარაზმშაჰი) ცხენბურთის თამაშს. ერთ დღეს ხვარაზმშაჰის ყურადღება მიიპყრო არაჩვეულებრივად დიდი ზომის საყურე რგოლებმა, რომელსაც ნურსათი ატარებდა. შეკითხვაზე ნურსათმა უპასუხა, რომ პაპა მისი ტყვედ იგდო ალფ-არსლანმა, როდესაც საქართველო დალაშქრა. შემდეგ ალფ-არსლანმა გაათავისუფლა ტყვეები, სამაგიეროდ უბრძანა მათ ეტარებინათ დიდი საყურე რგოლები, რომლებზეც მორჩილების ნიშნად მისი სახელი იყო ამოტვიფრული. თურქ-

სელჩუკთა სახელმწიფოს დაშლის შემდეგ ყველამ მოიცილა საყურე პაპამისის გარდა. როდესაც ხვარაზმშაჰმა მოისმინა ეს ამბავი, მისი გული მოლბა. მან ურჩია ნურსათს გადასულიყო მის ლაშქარში. ამასთანავე დაასაჩუქრა ძვირფასი ნივთებით. ხვარაზმშაჰმა დაუბრუნა ნურსათ ად-დინს ქალაქები აჰარი და ვარავი, აგრეთვე უბოძა ქალაქი სარაჰი, რომელსაც იმ დროს აზერბაიჯანის ათაბაგი უზბეკი ფლობდა (www.vostlit.info, восточная литература, Авторы и источники на букву „А“, Ан-Насави, Шихаб ад-Дин Жизнеописание султана Джелаль ад Дина, Глава 8.).

მუჰამედ ნესევის თხზულებიდან ირკვევა, რომ XIII საუკუნის პირველ მეოთხედში ჩრდილო დასავლეთ ირანში პოლიტიკურ ასპარეზზე მოღვაწეობს ნურსათ ად-დინ მუჰამედ ბენ ბიშქინი. მისი წინაპარი ყოფილა ქართველი, რომელიც ტყვედ ჩავარდნია ალფ-არსლანს საქართველოში ლაშქრობის დროს. მათი დინასტია ორგანულად იყო დაკავშირებული სამხრეთ აზერბაიჯანის სოციალურ და პოლიტიკურ ორგანიზაციასთან და წარმოადგენდა სავსებით ჩამოყალიბებულ ფეოდალურ სამთავროს. ბეშქენიანთა დინასტიის წარმომადგენლები ჭრიდნენ საკუთარ მონეტას, რაც მათ დაწინაურებულ მდგომარეობაზე მიუთითებს ილდეღიზ ათაბაგებთან მიმართებაში. შ. ლომსაძის აზრით, XII საუკუნის ბოლოს ბეშქენიანთა გვარმა ხელთ იგდო მთელი აზერბაიჯანის ათაბაგობა. იგი წერს: „აზერბაიჯანის მეოთხე ათაბაგი აბუბექრა (1191-1210) იყო ბეშქენიდების გვარის შთამომავალი, რომელიც ადრევე ნაშვილები ჰყოლია ილდეღიზიდების დინასტიის წარმომადგენელს მუზაფერ ად-დინ ყიზილ არსლანს (1186-1191) და რომლის სიკვდილის შემდეგ ძმებს შორის ტახტისთვის ატეხილ ბრძოლაში აბუბექრს გაუმარჯვია და ყიზილ არსლანის სახელმწიფოს დაპატრონებია... აღსანიშნავია ისიც, რომ აბუბექრს ცოლად ჰყავდა ქართველი ქალი, საქართველოს სამეფო სახლის შვილი, ყურადსაღებია ისიც, რომ მის ერთ-ერთ შვილს სახელად რქმევია ბეშქენ ქველი“ (ლომსაძე 1992: 155).

მკვლევართა ერთი ნაწილის (პ. თოფურია, შ. ლომსაძე) აზრით, აღმოსავლურ წყაროებში დასახელებული ბიშქინი (ფიშქინი; ფიშთეგინი), რომელიც ალფ-არსლანმა დაატყვევა ახალქალაქის აოხრების დროს, უნდა იყოს XI საუკუნეში მცხოვრები ქართველი ფეოდალი ბეშქენ ჯაყელი. „მატიანე ქართლისაჲს“ მიხედვით, ატენის ციხის დაცვის დროს ბეშქენ ჯაყელი და ფარსმან თმოგველი ზაგრატ IV-ის მოწინააღმდეგეები არიან: „და ჰყვეს ლიპარიტს კახნი და ბერძენნი, და

ვერ წაიღეს ატენი, რამეთუ ციხეთა უფალი კაცნი მტკიცე იყვნეს ერთგულობასა ზედა ბაგრატისასა, თვნიერ ფარსმან თმოგუელისა და ბეშქენ ჯაყელისა, თუხარისის ერისთავისა“ („მატიანე ქართლისაჲ“ 2008: 282). ამ ორ ფეოდალს შორის კავშირზე მიუთითებს ისიც, რომ ორივე მოხსენებულია სათხეს წარწერებში. მირაშხანის წარწერის მიხედვით, ფარსმან თმოგველი უკვე მეფის ერთგულია და ახალქალაქის დაცვის დროს იღუპება. ვფიქრობთ, ახალქალაქის დაცვის დროს მეფის ერთგულთა რიგებშია ბეშქენ ჯაყელიც, ფარსმანისაგან განსხვავებით, როგორც აღმოსავლური წყაროებით ირკვევა, იგი ტყვედ ვარდება. შემდგომში კი რწმენის გამოცვლისა და ალფ-არსლანის ერთგულების ფასად მამულებს იღებს ჩრდილოეთ ირანში.

ალფ-არსლანის საქართველოში პირველი ლაშქრობისა და ახალქალაქის აოხრების თარიღად ივანე ჯავახიშვილი 1065 წელს მიიჩნევდა: „მატიანე ქართლისაჲს“ ცნობიდან ჩანს, რომ სულტან ალფ-არსლანის საქართველოში მეორე დიდი შემოსევა საქართველოში მისი პირველი გალაშქრების „შემდგომად სამი წლისა“ ყოფილა, ხოლო რაკი ამავე მატიანისაგან ვიცით, რომ მეორე დიდი ლაშქრობა ყოფილა ქრონიკონსა 288, ანუ 1068 წელს, მაშასადამე, ალფ-არსლანის პირველი შემოსევა და ახალქალაქის აოხრება 1065 წელს იქნებოდა. მათე ურჭაელის სიტყვითაც ეს ამბავი 1064-1065 წ. მომხდარა; ამასთან ეს თარიღი გიორგი მთაწმინდელის ცხოვრებასაც კარგად უდგება“ (ჯავახიშვილი 1983: 152). ი. ჯავახიშვილის ეს დათარიღება გაიზიარა იმდროინდელმა ქართულმა ისტორიოგრაფიამ. ჩვენ ვერ დავეთანხმებით დიდი მეცნიერის აზრს „მატიანე ქართლისაჲს“ მიხედვით, ალფ-არსლანის საქართველოში ლაშქრობის თარიღად 1065 წლის მიჩნევასთან დაკავშირებით. ქართველი მემკვიდრე ახალქალაქის აოხრების შემდეგ მოგვითხრობს ალფ-არსლანის გალაშქრებას ანისში, ბაგრატ IV-ის მიერ სომეხთა მეფის კვირიკეს შეპყრობას, სამშვილდის შემოერთებას, ბაგრატის ასულის მართას გათხოვებას, ბაგრატის დისწულის გათხოვებას ალფ-არსლანზე და მხოლოდ ამის შემდგომ გადადის ალფ-არსლანის საქართველოში მეორე ლაშქრობის თხრობაზე („მატიანე ქართლისაჲს“ 2008: 289-290). ამდენად, მატიანე ქართლისაჲს“ მიხედვით ირკვევა, რომ ალფ-არსლანის საქართველოში მეორე ლაშქრობა, რომელიც 1068 წლით თარიღდება, მომხდარა ბაგრატის დისწულის გათხოვებიდან „შემდგომად სამისა წლისა“ და არა ახალქალაქის აოხრების „შემდგომად სამისა

წლისა“. შესაბამისად, ქართველი მემატიანის მიხედვით, 1065 წლით შეიძლება დავათარიღოთ არა ალფ-არსლანის საქართველოში პირველი ლაშქრობა და ახალქალაქის აოხრება, არამედ საქართველოს მეფის ბაგრატ IV-ის დისშვილის გათხოვება სელჩუკთა სულთან ალფ-არსლანზე.

ვახუშტი ბატონიშვილი ალფ-არსლანის საქართველოში პირველ ლაშქრობას 1064 წლით ათარიღებს: „ამის შემდგომად გამოვიდა სპარსთა მეფე უეცრად დასხმის გუარ ქესა ჩიდ, ქართულსა სჰდ (1064წ.) შემოიარა კანგარი, თრიალეთი და დღესა ერთსა მოვიდა მარბიელი მისი ყუელის-ყურს, ტაოს, შავშეთს, კლარჯეთს, თორს, და ღვიის-ჳეს და თვთ დაადგრა თრიალეთს (ვახუშტი ბატონიშვილი 1973: 149). იმავე თარიღს ასახელებს დიმიტრი ბაქრაძე: „1064 წელი უბედური იყო საქართველოსათვის; საქართველოს დაეცნენ თურქნი სელჩუკნი. თურქნი ჩვენ კიდევ მოვიხსენეთ სულთანის თოგრილ-ბეგის დროს. თოგრილ ბეგი მოკვდა და იმისი ადგილი დაიჭირა იმისმა ძმის-წულმა არპა-ასლანმა, რომელმაც მაშინვე აღმოიჩინა თავისი ხასიათი და რომელიც სრულებით არ მიემსგავსებოდა თავის ბიძას. არპ-ასლანი იყო შეპყრული დამარღვეველი სულით და მან დაუტევა ისტორიაში სისხლოვანი კვალი. ასი-ათასის ჯარით ის მოესია სპარსეთით სომხეთს და სომხეთით შემოვიდა თრიალეთის მაზრაში, საიდანაც გაგზავნა გუნდი მხედრობითა სხვა-და-სხვა მესხეთის მხარისაკენ; შავშეთს, კლარჯეთს და თაოს“ (ბაქრაძე 1880: 42) შემდგომში საქართველოში ალფ-არსლანის პირველი ლაშქრობისა და ახალქალაქის აოხრების თარიღად 1064 წელი სხვადასხვა წყაროების ურთიერთშეჯერების საფუძველზე დაადგინა ნ. შენგელიამ. იგი წერს „იბნ ალ-ასირი, ალ-ჰუსეინი, მუნეჯიმ-ბაში, ერთხმად აღნიშნავენ 456 (1063/64) წელს. სომეხი ისტორიკოსი სამუელ ანელი თავის ქრონოლოგიურ ტაბულაში ალფ-არსლანის მიერ ანისის აღების თარიღად 1064 წელს ასახელებს. ალფ-არსლანმა კი ჯერ საქართველოში ილაშქრა და მერე გაემართა ანისისაკენ. სპეციალურ ლიტერატურაში ანისის აღების თარიღად მიჩნეულია 1064 წლის 16 აგვისტო. მაშასადამე, თუ სელჩუკთა მიერ ანისის აღება 1064 წლის ზაფხულში მოხდა, მაშინ საქართველოში ალფ-არსლანის პირველი შემოსევა ამავე წლის ივნის-ივლისში უნდა მომხდარიყო, რამდენადაც ანისში მათ ლაშქრობას საქართველოს სამხრეთ ნაწილის დალაშქვრა უსწრებდა წინ“ (შენგელია 1968: 228). შევნიშნავთ, რომ 1064 წელს ანისის აღების თარიღად სამუელ ანელის გარდა ასახელებენ სხვა სომეხი

ისტორიკოსებიც კერძოდ არისტაკეს ლასტივერტეცი (ლასტივერტეცი 1974: 126), სმბატ სპარაპეტი (www.vostlit.info, восточная литература, Авторы и источники на букву „С“, Смбат Спарамет, Летопис) და ვარდან დიდი (www.vostlit.info, восточная литература, Авторы и источники на букву „В“, Вардан Великий, „Всеобщая история“) არაბი ისტორიკოსი იბნ ალ-ასირი სელჩუკების საქართველოში ლაშქრობის თარიღთან (1064 წ.) ერთად თვესაც (ივნისი) ასახელებს. ამ თარიღის სასარგებლოდ მიუთითებს თურქი სელჩუკოლოგის ალი სევიმის მოსაზრებაც იმასთან დაკავშირებით, რომ ალფ-არსლანმა ტახტის დაკავებისთანავე დაიწყო ფიქრი აღმოსავლეთ ანატოლიასა და საქართველოში ლაშქრობაზე (Sevim 2002: 46). ამდენად, საკმარისი საფუძველი არსებობს იმისათვის, რომ ალფ-არსლანის საქართველოში პირველი ლაშქრობისა და ახალქალაქის აოხრების თარიღად 1064 წლის ზაფხული მივიჩნიოთ.

ახალქალაქის აოხრების შემდგომ განვითარებულ მოვლენებს ისტორიული წყაროები სხვადასხვანაირად გადმოგვცემენ. სადრ ად დინ ჰუსეინის მიხედვით, ბაგრატ IV-მ ალფ-არსლანის სასარგებლოდ ხარკი იკისრა (სადრ ად-დინ ჰუსეინი 1976: 190). ქართულ-ბერძნულ-სომხური წყაროებით ამ დროს საქართველოს დახარკვა არ დასტურდება. სპარსი ისტორიკოსი ჰამდალლაჰ ყაზვინი აღნიშნავს, რომ „ბრძოლის შემდეგ იმ ადგილის მმართველმა ბაგრატ გრიგოლის ძემ სულტანთან ზავი დასდო“ (ჰამდალლაჰ ყაზვინი 1937: 27). ვერ დავეთანხმებით აზერბაიჯანელ ისტორიკოსს ჰუსეინოვს, თითქოს სელჩუკების მიერ ახალქალაქის აოხრების შემდეგ, „ბაგრატ IV-მ საქართველოს სხვა პროვინციებისა და ქალაქების გადარჩენის მიზნით, ალფ-არსლანს ვასალობის ფიცი მისცა და ჯიზიის გადახდა იკისრა“ (Гусейн-Заде 2010: 72). უსაფუძვლოა ასევე თურქი ისტორიკოსის ალი სევიმის მოსაზრებაც, რომ „ალფ-არსლანმა დაიპყრო კანგარი, ქართლი და ჯავახეთი. ბაგრატ IV-მ გაქცევით უშველა თავს, სულთანს ელჩი გაუგზავნა, მიიღო ისლამი და იკისრა ხარაჯის გადახდა“ (Sevim 2002: 48). ქართველი მემატიანის მიხედვით, ახალქალაქის აოხრების შემდეგ ალფ არსლანმა ბაგრატ IV-ს ელჩი გაუგზავნა მშვიდობა შესთავაზა და დისშვილი სთხოვა ცოლად. შემდეგ კი „მიიქცა სულტანი ანისად, შემოსრა და წაუღო ანისი, მოსრნა და ტყუე ყვნა ურიცხვნი სულნი და წარვიდა ქუეყანად თვსად სპარსეთად. და ანისი წარუღო ბერძენთა და მისცა მანუჩეს, ძესა აბულასვარისსა.

ხოლო დისწული ბაგრატისი, რომელსა ითხოვდა სულტანი, იყო ძმისწული სომეხთა მეფისა კვრიკესი. სთხოვა ბაგრატ და არა მოსცა სომეხთა მეფემან. მიგზავნა ბაგრატ მოციქულად დიდძალად ერისთავი ვარაზ-ბაკურ | გამრეკელი. იბირნა კაცნი სომეხთა მეფისანიცა და სამშლდეს შემომავალი სომეხთა მეფე კვრიკე და ძმა მისი | სუმბატ შეიპყრეს ქუეშის ჭალასა და აცნობეს ბაგრატს. და წავიდა ქვაჭურელთაჲთ მსწრაფლ, და მოგუარნეს პერობილნი კლდეკართა ქუეშე. სთხოვა სამშლდე და არა მოსცეს, რამეთუ ერთი ძმა მათი ადარნასე შესრულ იყო სამშლდეს. ხოლო მიიყვანეს სამშლდეს და ამართეს ძელი და გასუეს სომეხთა მეფე კვრიკე სამ დღე. ითხოვეს მშვიდობა და მოსცეს სამშლდე. ხოლო მოსრულ იყვნეს ორნი ერისთავნი სომეხთა მეფისანი: ლუკიის ერისთავი და კაქვაქარისა. აძლევდა და მოსცემდა სამთა ციხეთა სუმბატ, ძმა კვრიკესი: ორბეთს და კოშკსა და ვარზაქარსა. ხოლო შეეწყალნეს ბაგრატ მეფესა: მისცნა და უთავისუფლნა ყოველნი ციხენი თჳნიერ სამშლდისა; და არცა სხუანი ციხეთა უფალნი, კაცნი დიდებულნი, შემოუშუნა, არამედ სამშლდე ოდენ იურვა სახლად თჳსად, და ეგრეთვე ჰმონებდეს სომეხნი.

ხოლო დიდმან ბაგრატ მეფემან გაათხოვა ასული თჳსი მართა და შერთო ბერძენთა მეფესა. ხოლო შემდგომად ამისა გაათხოვა დისწული თჳსი და შერთო სპარსთა მეფესა, სულტანსა“ („მატიანე ქართლისაჲ“ 2008: 289-290). როგორც ქართველი მემკვიდრის ცნობიდან ირკვევა, საქართველოს მეფე ახალქალაქის აოხრების შემდეგ საკმაოდ აქტიურად მოქმედებს. გართულებული პოლიტიკური მდგომარეობის მიუხედავად, ბაგრატ IV-მ შემლო სომეხთა დამორჩილება და სამშვილდის შემოერთება, შემდეგ კი თავისი ასული მართა ბერძენთა მეფეზე გაათხოვა, დისწული კი სელჩუკთა სულთან ალფ-არსლანზე. ბაგრატი ცდილობდა, სულთანთან ნორმალური ურთიერთობა ჰქონოდა, მასთან დამოყვრებით იგი ქვეყანაში მშვიდობის შენარჩუნებას ფიქრობდა და ამიტომაც მოქმედებდა ასე რადიკალურად. პოლიტიკური დატვირთვა ჰქონდა ბიზანტიის კეისარზე მართას გათხოვებასაც, რომელსაც, გიორგი ხუცესმონაზონი ასე გადმოგვცემს „მი-რად-იცვალა თეოდორა დედოფალი, მეყსეულად მართა ასული ბაგრატისი სამეუფოდ შემოიყვანეს. და ვითარცა იხილა წმიდამან აჲმან მართა, სასმენელად ყოველთა წინასწარმეტყუელა და თქუა, ვითარმედ: „უწყოდეთ ყოველთა, ვითარმედ დღეს დედოფალი შემოვიდა“. ხოლო მაშინ დაყო მცირედი ჟამი და კუალად ზევე

წარიყვანეს მართა. ხოლო ოდეს მოიწია ჟამი, კუალად მოსთხოა დუკიწმან და სძლად თვსად სამეუფოსა ამას ქალაქსა შემოიყვანა“ (გიორგი მცირე 1967: 141).

ალფ-არსლანისა და ბაგრატის დისშვილის ქორწინება დასტურდება მათეოს ურჰაეცის, ვარდან დიდისა და ყაზვინის ცნობებითაც, მაგრამ ეს ავტორები არაფერს ამბობენ ამ საქმეში ბაგრატ IV-ის მონაწილეობაზე. მათეოს ურჰაეცის მიხედვით „სელჩუკებმა ჯერ სომხეთი აიღეს, აგვანში მოვიდნენ, მოსახლეობა გაჟლიტეს, შემდეგ აგვანის მეფეს გორიგეს (კვირიკეს?) ქალიშვილი მოთხოვეს. მეფე შიშით იძულებული გახდა დათანხმებულიყო. ამის გამო სულთანმა მასთან მუდამ მშვიდობასა და მეგობრობას ინარჩუნებდა. ალფ-არსლანმა აგვანის მეფე დიდი პატივითა და საჩუქრებით გაგზავნა ქალაქ ლორეში. ამის შემდეგ ალფ-არსლანი დიდი ლაშქრით შევიდა საქართველოში, მოსახლეობა გაანადგურა, ჯავახეთში გადავიდა და იქ დაბანაკდა“ (შენგელია 1968: 223). (შევნიშნავთ, რომ მათეოზ ურჰაეცის გარდა ყველა სხვა საისტორიო წყაროს მიხედვით სელჩუკებმა ჯერ სამხრეთ საქართველოში ილაშქრეს, შემდეგ კი სომხეთში).

ვარდან დიდის გადმოცემით, ალფ-არსლანს ჯერ საქართველოს სამხრეთი რაიონები აუოხრებია და მხოლოდ ამის შემდეგ მოუთხოვია კვირიკესათვის ქალიშვილი: „აიღო ახალქალაქი, სამშვილდე და მოიყვანა ცოლად ქალიშვილი კვირიკესი, დისშვილი ქართველთა მეფე ბაგრატისა (www.vostlit.info, восточная литература, Авторы и источники на букву „В“, Вардан Великий, „Всеобщая история“).

ჰამდალლაჰ ყაზვინის ცნობით, საქართველოდან წასვლის შემდეგ „სულტანი გაემართა არმენიის დასაპყრობად და იმ ადგილის მეფესთან ზავი დასდო და მისი ქალი ცოლად ითხოვა. რამდენიმე ხნის შემდეგ სულტანი გაეყარა მას. ნეზამ ოლ-მოლქს უბრძანა აეყვანა ის ცოლად. ნიზამ ოლ-მოლქს იმ ქალისაგან შვილები ეყოლა. ხოჯა აჰმედი იმ ქალისაგან იყო“ (ყაზვინი 1937: 27).

საისტორიო წყაროთა მიერ შემონახული ცნობები ალფ-არსლანის მიერ არჩეული საცოლეს ირგვლივ განსხვავებულია. წყაროთა ერთი ნაწილის მიხედვით, ალფ-არსლანის საცოლე სომეხთა მეფის კვირიკეს ასულია (მათეოს ურჰაეცი, ვარდან დიდი). მეორე ნაწილის მიხედვით, ალფ-არსლანის საცოლეს მამის სახელი უცნობია (ჰამდალლაჰ ყაზვინი). ქართველი მემკვიდრის ცნობით, ალფ-არსლანის საცოლე იყო ქართველთა მეფის ბაგრატის დისშვილი და სომეხთა მეფის კვირიკეს ძმისშვილი. („მატიანე ქართლისაჲ“ 2008: 189). ი. ჯავახიშვილის აზრით, ბაგრატ

მეფის დისწული იყო სომეხთა მეფის კვირიკეს ასული (ჯავახიშვილი 1983: 153). ამ საკითხებთან დაკავშირებით საინტერესოა ჰალბატისა და სანაჰინის სომხური მონასტრების ეპიგრაფიკული წარწერები. სანაჰინის წარწერაში აღნიშნულია: „შჳბ (1063) წელსა, მამამთავრობასა ტერ დეოსკოროსი, მეფობასა კვირიკესი და სმბატისა, მე ჰრანუმ დედოფალმა, დავით მეფის ქალიშვილმა ავაშენე ეკლესია“ (დარჩიაშვილი 1982: 68). ჰალბატის ეკლესიის 1089 წლით დათარიღებული წარწერა გვამცნობს: „მე ტერსარგისმა, ჰალბატის წინამძღვარმა აღვმართე საუფლო ნიშანი, მორწმუნეთა იარაღად და ჩვენი მეფეების კვირიკეს, სმბატისა და მათი თესლის დავითის დასაცავად“ (დარჩიაშვილი 1982: 68). წარწერების შინაარსიდან გამომდინარე შ. დარჩიაშვილი ავითარებს აზრს, რომ აღნიშნულ ხანაში ლორე-ტაშირის სომეხთა სამეფოში ორ მეფობას ჰქონდა ადგილი, კვირიკესთან ერთად მეფობდა მისი ძმა სმბატიც. შემდეგ კი ასკვნის: „აღფ-არსლანის მიერ საცოლედ შერჩეული პიროვნება არა კვირიკეს, არამედ სმბატის ქალიშვილი უნდა ყოფილიყო, რადგანაც ცნობილია, რომ კვირიკეს საერთოდ არ ჰყოლია ქალიშვილი, რაც შეეხება წყაროებში მოხსენიებულ „სომეხთა მეფის ქალიშვილს“, აქ სომეხთა მეფედ სმბატი უნდა ვიგულისხმოთ, როგორც სომხურ წყაროებში გვხვდება. ამდენად, მისაღებია „მატიანე ქართლისაჲს“ ცნობა, რომელიც სომეხთა მეფის ქალიშვილს კვირიკეს ძმისწულად აცხადებს“ (დარჩიაშვილი 1982: 69). როგორც ჩანს, სომეხთა მეფე კვირიკე უფრო ავტორიტეტული და გავლენიანი პიროვნებაა, ვიდრე მისი ძმა სმბატი, ამიტომაც შენიშნავს „მატიანე ქართლისაჲს“ ავტორი: „ხოლო დისწული ბაგრატისი, რომელსა ითხოვდა სულტანი, იყო ძმისწული სომეხთა მეფისა კვირიკესი“ („მატიანე ქართლისაჲს“ 2008: 290). აღფ-არსლანის საქართველოში პირველი ლაშქრობის დროს ბაგრატს თან ახლდა თავისი და გურანდუხტი: „რამეთუ მას ჟამსა მომავალ იყო მეფე ტაოთ, და თანა ჰყვანდეს დედაჲ და დაჲ და ძე მისი გიორგი“ („მატიანე ქართლისაჲს“ 2008: 289). სწორედ ეს გურანდუხტი უნდა იყოს სომეხთა დედოფალი და აღფ-არსლანის რჩეულის დედა. შემთხვევითი არ არის, რომ ქართველი მემკვიდრე ერთგან გურანდუხტს დედოფლად იხსენიებს: „ვიდრელა იყო ბაგრატ საბერძნეთს, ითხოვა ლიპარიტ ძე ბაგრატისი, გიორგი, მეფედ, რადთა მოსცეს იგი დედამან მისმან და დიდებულთა მის ქუეყანისთა. მოიყვანეს საყდარსა რუისისასა და აკურთხეს მეფედ. და მოიყვანეს მზრდელად მისა ლიპარიტ და პატრონად დაჲ ბაგრატისი, გურანდუხტ დედოფალი“ („მატიანე

ქართლისაჲ“ 2008: 287). მართალია, საისტორიო წყაროებში გურანდუხტი პირდაპირ არსად არ მოიხსენიება სომეხთა მეფის მეუღლედ, მაგრამ მათი ჩვენებით (ვარდანი, ბარ ჰებრაი, მატიაწე ქართლისაჲ) ალფ-არსლანის საცოლე ბაგრატ IV-ის დისშვილი ყოფილა. ამავე დროს, წყაროების მიხედვით, იგი სომეხთა მეფის ქალიშვილია.

ნ. შენგელია ბარ ჰებრაის ცნობაზე დაყრდნობით ალფ-არსლანისა და ბაგრატის დისწულის ქორწინების თარიღად 1066 წელს მიიჩნევს, იგი წერს: „ბარ ჰებრაი 1066 წლის ამბების გადმოცემის დროს აღნიშნავს, რომ „ქართველთა მბრძანებლის ბაგრატის დისწული სულთან ალფ-არსლანთან დასაქორწინებლად იქნა მოყვანილი. მან ქორწილი ქალაქ ჰამადანში გადაიხადა. მცირე ხნის შემდეგ ალფ-არსლანი ამ ქალს გასცილდა და იგი თავის ერთ-ერთ წარჩინებულთან დააქორწინა“. ამგვარად, ბარ ჰებრაის მიხედვით, ქალი სულთნისთვის მიუყვანიათ 1066 წელს, ვიდრე ბაგრატ მეფე და გაგიკ სომეხთა მეფე შეთანხმდნენ ქალის გათხოვების საკითხზე და ვიდრე ქალს ჰამადანში ჩაიყვანდნენ, საკმაო დრო უნდა გასულიყო. ამას გარდა, ბარ ჰებრაის ცნობებს ადასტურებს ქართული წყაროც. ქართველ მემკვიდრეებს ვრცლად აქვს მოთხრობილი ბაგრატის დისწულისა და ამავე დროს კვირიკე სომეხთა მეფის ძმისწულის სულთნისათვის მითხოვების ამბავი. ბაგრატ მეფეს დასჭირდა მრავალი ღონისძიების მიღება კვირიკე მეფის მიმართ, რათა იგი დათანხმებოდა თავისი ძმისწულის მითხოვებას სელჩუკთა სულთნისათვის“ (შენგელია 1968: 226-227).

ვახუშტი ბატონიშვილი ალფ-არსლანისა და ბაგრატის დისწულის ქორწინებას 1065 წლით ათარიღებს. იგი ამ საქმეში ბაგრატის მონაწილეობის ამბავს შემდეგნაირად გადმოგვცემს: „დისწული ბაგრატისა, რომელსა ითხოვდა სულთანი, იყო ძმისწული სომეხთა მეფისა კვირიკესი და არა მოსცა იგი ბაგრატს; ამისთჳს აბირნა ბაგრატ კაცნი და სამშჯლდეს შემომავალნი შეიპყრნეს კვირიკე და მმა მისი სუმბატ, მოართუეს ბაგრატ მეფესა; მოადგა მეფე სამშჯლდეს; მოსცეს სამშჯლდე, ოფრეთი და სხუანი ციხენიცა; არამედ ბაგრატ შეიწყალა კვირიკე და მისცნა ყოველნი, სამშვილდისაგან კიდე; გარნა იგი დაიპყრა სახლად თჳსად; შემდგომად მისცა ასული თჳსი მარიამ ბერძენთა მეფესა ცოლად ქჳსა ჩჳდე, ქართულსა სჳჲ (1065), და დისწული მისცა სპარსთა მეფესა ცოლად, ამასვე ქჳნს წარვიდა გიორგი მთაწმინდელი მთაწმიდასა“ (ვახუშტი ბატონიშვილი 1973: 150). როგორც ზემოთ აღვნიშნეთ, „მატიანე ქართლისაჲს“ მიხედვითაც, ბაგრატის დისშვილისა და ალფ-

არსლანის ქორწინება 1065 წლით შეიძლება დავათარილოთ. მართალია, ქართველი მემკვიდრე პირდაპირ არ მიუთითებს ამ თარიღზე, მაგრამ იგი ალფ-არსლანის საქართველოში მეორე ლაშქრობის თარიღად 1068 წელს ასახელებს. ამავე დროს მიუთითებს, რომ ეს ლაშქრობა მოხდა ბაგრატის დისწულის ალფ-არსლანზე გათხოვებიდან „შემდგომად სამისა წლისა“ („მატიანე ქართლისაჲ“ 2008: 290-291).

ბაგრატის დისწულისა და ალფ-არსლანის ქორწინების თარიღად 1065 წლის მიჩნევა 1066 წელთან შედარებით უფრო ლოგიკურია ბაგრატის აქტიური და რადიკალური მოქმედებიდან გამომდინარე. ვფიქრობთ, ქართველთა მეფეს, ქვეყნის უსაფრთხოების დაცვის მიზნით, ალფ-არსლანის მოთხოვნის შესრულებისათვის ახალქალაქის აოხრებიდან ერთ წელზე მეტი არ დასჭირდებოდა.

ალფ-არსლანმა ახალქალაქის აოხრების შემდეგ საქართველოში ლაშქრობას თავი მიანება და ანისის მიმართულებით გაილაშქრა. ალბათ, ქართველთა დიდმა წინააღმდეგობამ აიძულა იგი, უარი ეთქვა ქვეყნის სიღრმეში ლაშქრობაზე. ამ საქმეში გარკვეული როლი უნდა შეესრულებინა ბაგრატის თანხმობას და შემდგომ აქტიურ მოქმედებას თავისი დისწულის სულთანზე გათხოვებასთან დაკავშირებით. სადრ ად-დინ ჰუსეინისა და იბნ ალ-ასირის ცნობით, ანისში ლაშქრობამდე ალფ-არსლანს საქართველოს სამხრეთ საზღვარზე მდებარე რაიონების მოსახლეობამ მორჩილება გამოუცხადა და ისლამი მიიღო. ამით სულთანი კმაყოფილი დარჩა, ეკლესიები დაანგრია და მეჩეთები ააშენა (www.vostlit.info, восточная литература, Авторы и источники на букву „И“, Ибн Ал-Асир, Полный свод всеобщей истории; www.vostlit.info, Восточная литература, Авторы и источники на букву „Х“, Ал-Хусайни Садр-Ад-Дин). ვ. მინორსკი შენიშნავს, რომ ეს ტერიტორიებია ალავერდი, რომელიც ლორეს ჩრდილოეთით მდებარეობს. ბერდუჯის, დებედას ანდა ბორჩალოს მარცხენა ნაპირზე (Minorsk 1953: 30). აზერბაიჯანელი სელჩუკოლოგის ჰუსეინოვის აზრით, ახალქალაქის ალფის შემდეგ სელჩუკებმა დაიმორჩილეს ქალაქი რუსთავი, დიდი წინააღმდეგობის გამო იგი გადაწვეს (Гусейн-Заде 2010: 72). ალფ-არსლანის მიერ ანისის აღება დაწვრილებით აქვს აღწერილი არისტაკეს ლასტივერტეცს. მისი თქმით, ქალაქის სიმტკიცის გამო მტერი უკან გაბრუნებას აპირებდა, მაგრამ მთავართა შორის ჩამოვარდნილი უთანხმოების გამო, მათ მოახერხეს გალავნის შიგნით შეღწევა და საშინელი ხოცვა-ჟლეტვა მოაწყვეს: „იქ ნახავდით ყოველი ასაკის ადამიანის გლოვასა და მწუხარებას, რადგანაც დედებს

მკერდიდან აგლეჯდნენ ყრმებს და შეუბრალებლად ქვებს ურტყამდნენ, ხოლო დედები სისხლით და ცრემლით ასველებდნენ პირმშოებს. ერთი მახვილი სპობდა მამასა და შვილს. მოხუცებულებმა და ახალგაზრდებმა, მღვდლებმა და დიაკვნებმა ერთი მახვილის სასიკვდილო საკვები მიიღეს. გვამებით აივსო ქალაქი კიდით კიდემდე ისე, რომ გზა მოკლულთა გვამებზე გადიოდა“ (არისტაკეს ლასტივერტეცი 1974: 127). მათეოს ურჰაეცი გადმოგვცემს, რომ „მთელი ქალაქი ერთ წუთში სისხლის ზღვად იქცა. სომეხი წარჩინებულები და უფლისწულები ბორკილგაყრილები სულთანთან მოიყვანეს. ჭაბუკები და ლამაზი ქალები ტყვედ წაასხეს ირანში“ (შენგელია 1968: 232-233). ვარდან დიდის მიხედვით, ანისის აღების დროს სულთანმა დაჭრილთა სისხლში იბანავა. ქალაქის აღების შემდეგ კი ხალიფასაგან ქებისა და მორჩილების წერილი მოუვიდა (www.vostlit.info, восточная литература, Авторы и источники на букву „В“, Вардан Великий, „Всеобщая история“). სადრ ად-დინ ჰუსეინის ცნობით, სელჩუკებმა ვერაფერი მოუხერხეს ქალაქის გალავანს. ისინი ისე თავგამოდებით იბრძოდნენ ანისისათვის, რომ „თავი გაანებეს ჭმას, სმას, ძილს და ყველაფერს და ომი გააგრძელეს... ბოლოს მუსლიმებმა მოახერხეს კედლის გამაგრებული მხარეების დანგრევა და მათ ქვეყანაში შევიდნენ. მისი მცხოვრებლები თავიანთი ცხენების ფლოქვებით გათელეს. შემდეგ სულთანმა ამ ქვეყანაში გააშენა ერთი მეჩეთი, და მას შემდეგ, რაც შექმნა ჯარი ერთი ემირის ხელმძღვანელობით, თვითონ ჯერ ისფაჰანს, ხოლო შემდეგ ქირმანს გაემგზავრა“ (სადრ ად-დინ ჰუსეინი 1976: 191). იბნ ალ-ასირის ცნობით, ანისის აღებით „გამოწვეული სიხარული მთელ ქვეყანას მოედო და მუსლიმანებმა გაიხარეს. გამარჯვების ამბავი წაიკითხეს ბაღდადში ხალიფას სასახლაში. მან გამოგზავნა მადლობა ხალიფას სახელით, სადაც აქებდა ალფ-არსლანს და ლოცულობდა მისთვის. მან ანისში ემირი დანიშნა და იქაურობა დატოვა. ქართველთა მეფემ ითხოვა მისგან მშვიდობა. ალფ-არსლანმა უპასუხა, რომ გააფორმებდა სამშვიდობო ხელშეკრულებას იმ პირობით თუ იგი ყოველწლიურად ჯიზიას გადაიხდიდა. ისიც დათანხმდა“ (www.vostlit.info, восточная литература, Авторы и источники на букву „И“, Ибн Ал-Асир, Полный свод всеобщей истории).

ქართველი მემატიანის გადმოცემით, ახალქალაქის აოხრების შემდეგ ალფ-არსლანმა ბაგრატს დისწული სთხოვა ცოლად, შემდეგ კი „მიიქცა სულტანი ანისად, შემუსრა და წაუღო ანისი, მოსრნა და ტყუე ყვნა ურიცხვნი სულნი და

წარვიდა ქუეყანად თვსად სპარსეთად. და ანისი წარულო ბერძენთა და მისცა მანუჩეს, ძესა აბულასვარისსა“ (მატიანე ქართლისაჲ 2008: 289-290). ანისის აღებამ კიდევ უფრო გაზარდა მუსლიმანურ სამყაროში ალფ-არსლანის სახელი, ბიზანტიელებმა კი დაკარგეს აღმოსავლეთში ერთ-ერთი მტკიცე ციხე-ქალაქი. ალფ-არსლანმა ანისი საგამგებლოდ არანის გამგებელს მანუჩარ ბენ აბულ-ასვარს გადასცა, რომელმაც იგი პლაცდარმად გაიხადა მიმდებარე ტერიტორიების დასამორჩილებლად. ქართველი მემკვიდრისა და სადრ ად-დინ ჰუსეინის მიხედვით, ალფ-არსლანმა ანისის აღებით დაამთავრა თავისი ლაშქრობა ანატოლიასა და ამიერკავკასიაში და თავის ქვეყანაში დაბრუნდა. მათეოს ურჰაეცის ცნობით, კი ამერკავკასიიდან გამგზავრებამდე ალფ-არსლანი ყარსისაკენ გაემართა. ყარსის მმართველმა გაგიკმა, ხერხი იხმარა, სელჩუკებს მორჩილება გამოუცხადა და ქვეყანა აოხრებას გადაარჩინა. „ყარსიდან ალფ-არსლანის გამგზავრების შემდეგ გაგიკმა უარყო სელჩუკ სულთანთან ვასალური დამოკიდებულება და გაემგზავრა ბიზანტიის იმპერატორთან, რომელმაც მას ზამანდავის რაიონი უბოძა. გაგიკი მთელი თავისი სახლობით ამ რაიონში გადასახლდა“ (შენგელია 1968: 234).

ალფ-არსლანი ქვეყნის შიგნით განვითარებული მოვლენების გამო ანატოლიიდან ისპაანში დაბრუნდა, დაპყრობილი ტერიტორიები კი თავის ქვეშევრდომ ამირებსა და მუსლიმანური პროვინციების გამგებლებს დაუტოვა, რომლებიც, თავის მხრივ, განაგრძობდნენ დაპყრობით ომებს. აბულ-ასვარს, რომელსაც დავალებული ჰქონდა ამიერკავკასიის პოლიტიკურ ერთეულებზე მეთვალყურეობა, საქართველოშიც უნდა ელაშქრა. რ. კიკნაძე მუნეჯიმ ბაშის ცნობებზე დაყრდნობით წერს: „აბულ ასვარმა ლაშქარი შემოიკრიბა და 1065 წ-ის ივნისში ნაბოძები ქვეყნების შემოსამტკიცებლად დაიძრა. ის ჯერ ანისში მივიდა, წესრიგი დაამყარა. იქ თავისი გამგებელი დანიშნა, იარაღით, სანოვაგითა და ხალხით მოამარაგა ქალაქი. მერე საქართველოშიც შეიჭრა, მოითარემა იქაურობა და უკან გაბრუნდა განძაში. აბულ-ასვარს რომ ნამდვილად დაულაშქრავს საქართველო, ეს ჩანს მუნეჯიმ-ბაშის შემდეგი თხრობიდანაც. ის აღნიშნავს, რომ იმავე წლის ოქტომბერში ოსები გამოვიდნენ ბაზალანიდან, გადაიარეს შაქისა და ჯურზანის (კახეთის) საზღვრები და კახელებთან ერთად არანს შეესივნენ. შამქორის მიდამოებში მათ ორასზე მეტი კაცი მოკლეს, განძასაც მიაღწენ და ყველა დახოცეს, ვინც კი ახლო-მახლო სოფლებში მოიხელეს. აბულ-ასვარი თავისი სარდლებით განძაში იმყოფებოდა, მაგრამ რაკი

ლაშქარი გაშვებული ჰყოლია, ვერ გაბედა გარეთ გამოსვლა და შებრძოლება. აქედან ოსები და კახელები ბარდავისკენ წავიდნენ და სამი დღე დაჰყვეს ქალაქის კართან. მათ მოახრეს ბარდავის ოლქი და ხენეკინამდე მივიდნენ. მოლაშქრეებმა არანიდან დიდძალი დატყვევებული მუსლიმანი წამოიყვანეს და გამობრუნდნენ. საფიქრებელია, რომ ეს ლაშქრობა ბაგრატ IV-ის მიერ ყოფილიყო მოწყობილი აბულ-ასვარის შემოსევის პასუხად. ოსთა მეფე დორღოლელი ბაგრატის ცოლის ძმა იყო და ოსთა სამხედრო ძალა საქართველოს მეფეს მომავალშიც გამოუყენებია განძის მფლობელთა დასასჯელად“ (კიკნაძე 1960: 115).

აბულ-ასვარის საქართველოში ალფ-არსლანის შემდეგ ლაშქრობა შეიძლება ერთ-ერთ არგუმენტად მივიჩნიოთ იმასთან დაკავშირებით, რომ თურქ-სელჩუკებმა საქართველოში 1064 წლის ზაფხულში ლაშქრობის დროს ვერ მოახერხეს ქვეყნის დამორჩილება-დახარკვა. წინააღმდეგ შემთხვევაში აბულ-ასვარს, რომელიც ალფ-არსლანის მოკავშირე იყო და რომელიც, ვფიქრობთ, მისი მითითებით მოქმედებდა, აღარ დასჭირდებოდა საქართველოში ლაშქრობა. ბაგრāti ალფ-არსლანის ლაშქრობის შემდგომაც აქტიურად მოქმედებს. ამიტომაც გასცა საკადრისი პასუხი აბულ ასვარს.

ალფ-არსლანმა მიუხედავად მთელი რიგი წარმატებებისა, ვერ შეასრულა თავისი ძირითადი ამოცანა. ანატოლიისა და ამერკავკასიის მიმართულებით პირველი ლაშქრობის დროს, ვერ შეძლო ამერკავკასიის ერთადერთი დამოუკიდებელი ქვეყნის- საქართველოს დამორჩილება-დახარკვა. მართალია. მტერმა სასტიკად დაარბია სამხრეთ საქართველო, მიწასთან გაასწორა ახალქალაქი, ხელთ იგდო უამრავი სიმდიდრე და ტყვე, შეაჩერა წარმატებით დაწყებული ფეოდალური გერტიანების პროცესი, მაგრამ ქართველების დიდი წინააღმდეგობისა და ბაგრატ IV-ის გაუტეხელი სულის გამო სულთანმა ვეღარ განაგრძო ქვეყნის შემდგომი დაპყრობა. საქართველომ დიდი მსხვერპლის ფასად შეინარჩუნა მთავარი-სახელმწიფოებრიობა და ეროვნული დამოუკიდებლობა. ახალქალაქის გმირული დაცვა და სამხრეთ საქართველოს მოსახლეობის თავდადებული ბრძოლა დამპყრობლების წინააღმდეგ ერთ-ერთი გამორჩეული ფურცელია ქართველი ხალხის ეროვნული დამოუკიდებლობისათვის ბრძოლის მრავალსაუკუნოვან ისტორიაში.

ალფ-არსლანის საქართველოში პირველ ლაშქრობასთან დაკავშირებით ზოგადი დასკვნები ასეთია:

1. დიდ სელჩუკთა სახელმწიფოს ფუძემდებლის თოდრულ-ბეგის გარდაცვალების შემდეგ სულთნის ტახტი დაიკავა ალფ-არსლანმა (1063-1072). იბნ-ალ-ასირის მიხედვით, იგი 424 (1032/3), რავენდის მიხედვით, კი 431 (1039/40) წელს დაიბადა. ალფ-არსლანი ქართულ-ბერძნულ-სომხური წყაროების მიხედვით, უარყოფით, ხოლო არაბულ-სპარსულ-ოსმალური წყაროების მიხედვით დადებით პიროვნებად ხასიათდება.
2. ხელისუფლების განმტკიცებისთანავე ალფ-არსლანმა დაიწყო ლაშქრობა ანატოლიისა და ამიერკავკასიის მიმართულებით. ამ ლაშქრობის მთავარი მიზანი აღმავლობის გზაზე დამდგარი საქართველოს დაპყრობა, ბაგრატ მეფის დამორჩილება და მისი ბიზანტიის იმპერიისაგან იზოლირება უნდა ყოფილიყო. ალფ-არსლანის საქართველოში უშუალო ლაშქრობა ამ ქვეყნისადმი განსაკუთრებულ ინტერესზე მიუთითებს.
3. პირველი ლაშქრობა ალფ-არსლანმა სამხრეთ საქართველოს მიმართულებით განახორციელა. სელჩუკებმა დაარბიეს კანგარი, თრიალეთი, ყუელისყური, შავშეთი, კლარჯეთი, ტაო და ქართველების დიდი წინააღმდეგობის მიუხედავად (რომელსაც ერთხმად აღნიშნავენ როგორც ქართული ასევე უცხოური წყაროები), მიწასთან გაასწორეს ახალქალაქი. მტერმა ამ ბრძოლაში უამრავი ტყვე და ნადავლი იგდო ხელთ. დაუსრულებელი გალავნის გარდა, ახალქალაქის მცველების დამარცხების მიზეზი, ვფიქრობთ, ისევე როგორც ქართველი ხალხის მთელი ისტორიის უმრავლეს შემთხვევაში, აქაც მტრის რიცხოზოვი უპირატესობა უნდა გამხდარიყო. სომეხი ისტორიკოსის ვარდან დიდის მიხედვით ახალქალაქის აღების დროს ალფ-არსლანს 100 000 კაციანი ლაშქარი ჰყავდა.
4. საისტორიო წყაროების ანალიზის, ურთიერთშედარებისა და ისტორიოგრაფიული მონაცემების მიხედვით, ალფ-არსლანის საქართველოში პირველი ლაშქრობა, შესაბამისად, ახალქალაქის აოხრება, შეიძლება, 1064 წლის ზაფხულით დავათარილოთ.
5. სამხრეთ საქართველოს პროვინციების დარბევა და ახალქალაქის აოხრება არ ნიშნავს ამ მხარის, მითუმეტეს, მთელი საქართველოს დამორჩილებას. სადრ ად-დინ ჰუსეინის ცნობა, რომლის მიხედვით, ბაგრატმა ალფ-არსლანის სასარგებლოდ ხარკი იკისრა, ქართულ სომხურ-ბიზანტიური წყაროებით არ დასტურდება. უფრო სწორი უნდა იყოს

ამ პერიოდის თანამედროვე ქართველი მემკვიდრის ცნობა, რომლის მიხედვით, ახალქალაქის აოხრების შემდეგ ალფ-არსლანმა ბაგრატ IV-ს ელჩი გაუგზავნა, მშვიდობა შესთავაზა და დისშვილი სთხოვა ცოლად, შემდეგ კი ანისისკენ გაილაშქრა. ალბათ, ქართველთა დიდმა წინააღმდეგობამ აიძულა იგი, უარი ეთქვა ქვეყნის სიღრმეში ლაშქრობაზე. ამ საქმეში გარკვეული როლი უნდა შეესრულებინა ბაგრატის თანხმობას და შემდგომ აქტიურ მოქმედებას თავისი დისშვილის სულთანზე გათხოვებასთან დაკავშირებით.

6. საქართველოს მეფე ახალქალაქის აოხრების შემდეგ საკმაოდ აქტიურად მოქმედებს. გართულებული პოლიტიკური მდგომარეობის მიუხედავად მან შეძლო სომეხთა დამორჩილება და სამშვილდის შემოერთება, შემდეგ კი თავისი ასული მართა ბერძენთა მეფეზე გაათხოვა, დისშვილი კი სელჩუკთა სულთან ალფ-არსლანზე. ბაგრატი ცდილობდა, სულთანთან ნორმალური ურთიერთობა ჰქონოდა, მასთან დამოყვრებით იგი ქვეყანაში მშვიდობის შენარჩუნებას ფიქრობდა.

7. „მატიანე ქართლისაჲს“ მიხედვით, ბაგრატის დისშვილისა და ალფ-არსლანის ქორწინება შეიძლება 1065 წლით დავათარილოთ. მართალია, ქართველი მემკვიდრე პირდაპირ არ აღნიშნავს ამ თარიღს, მაგრამ იგი ალფ-არსლანის საქართველოში მეორე ლაშქრობის თარიღად 1068 წელს ასახელებს. ამავე დროს მიუთითებს, რომ ეს ლაშქრობა მოხდა ბაგრატის დისწულის ალფ-არსლანზე გათხოვებიდან „შემდგომად სამისა წლისა“ („მატიანე ქართლისაჲს“ 2008: 290-291). ამავე თარიღს ასახელებს ვახუშტი ბატონიშვილიც (ვახუშტი ბატონიშვილი 1973: 150). ბაგრატის აქტიური მოქმედებიდან გამომდინარეც ლოგიკურად, ეს ქორწინება ახალქალაქის აოხრების შემდგომ ახლო პერიოდში, ყოველ შემთხვევაში 1065 წელზე გვიან არ უნდა მომხდარიყო.

8. 1064 წლის აგვისტოში ალფ-არსლანმა ქალაქი ანისი აიღო და ამით დაამთავრა პირველი ლაშქრობა ანატოლიასა და ამიერკავკასიაში. ამიერკავკასიის პოლიტიკური ერთეულების მეთვალყურეობა არანის გამგებელს აბულ-ასვარს ჩააბარა, თვითონ კი შინაარეულობის გამო ისპაანში დაბრუნდა.

9. ალფ-არსლანმა ანატოლიისა და ამიერკავკასიის მიმართულებით პირველი ლაშქრობის დროს, სასტიკად დაარბია სამხრეთი საქართველო, მიწასთან გაასწორა ახალქალაქი, ხელთ იგდო უამრავი სიმდიდრე და ტყვე, შეაჩერა წარმატებით დაწყებული ფეოდალური გაერთიანების პროცესი, მაგრამ მან ვერ შეასრულა ძირითადი

ამოცანა. საქართველომ დიდი მსხვერპლის ფასად შეინარჩუნა მთავარი-
სახელმწიფოებრიობა და ეროვნული დამოუკიდებლობა.

VII თავი

ალფ-არსლანის მეორე ლაშქრობა საქართველოში

ალფ-არსლანმა პირველი ლაშქრობის დროს ანატოლიასა და ამიერკავკასიაში დაპყრობილი ტერიტორიები მუსლიმანური პროვინციების გამგებლებს გადასცა (ვანის ტბის აუზის დაპყრობილი ტერიტორიები-ნახჭევანის ამირა სადაყ აშ-შაიბანს. ანისი აბულ-ასვარს), თვითონ კი სასწრაფოდ ისფაჰანს დაბრუნდა. ისფაჰანიდან კი ქერმანის მიმართულებით გაემგზავრა. მისი ანატოლიიდან მოულოდნელად წასვლის მიზეზი ქვეყნის შიგნით დაწყებული არეულობა უნდა ყოფილიყო. როგორც ცნობილია, ალფ-არსლანმა ტახტის განმტკიცების მიზნით ცალკეული პროვინციები სამმართველოდ შვილებს და მრავალმრიცხოვან ნათესავებს დაურიგა. მართალია, ამგვარმა მოქმედებამ თავიდან დადებითი შედეგი გამოიღო, მაგრამ შემდგომში დაპირისპირებები და ქვეყნის შინააშლილობა გამოიწვია.

სადრ ად-დინ ჰუსეინის ცნობით, ალფ-არსლანი ქერმანში შეხვდა თავის ძმას მელიქ ქავერდ ბინ მელიქ დავუდ ბინ მიქაილ ბინ სელჩუკს (დიდი სელჩუკი სულთნების შთამომავალი, ქირმანის სელჩუკთა სახელმწიფოს ფუძემდებელი), შემდეგ „ხორასანს გაემგზავრა და იქიდან კი-მინკიშლალს წავიდა. ემირ ყიფჩალი გარემოიცვა და ძალით ჩამოიყვანა თავის ციხიდან. შემდეგში, რადგანაც ზემოხსენებულმა სულთანი დააკმაყოფილა, მან ნება დართო თავის ციხეში დაბრუნებულიყო და გაათავისუფლა. ამის შემდეგ, რადგანაც მას ძალიან სურდა თავისი პაპის-სელჩუკის საფლავის ნახვა, ჯენდსა და სირანისკენ გაემართა. რადგანაც აქ ჯენდ ხანი მრავალი საჩუქრით შეხვდა, კვლავ გურგანჩი ჰარზემას დაბრუნდა და იქაური ემრობა თავის შვილს არსლან არგუნს მისცა. ჯერ მერვს, შემდეგ რაიგანში ჩამოვიდა, აქ ტახტის მემკვიდრეობა თავის შვილს სულთან ჯელალ უდ დევლე-მელიქ შაჰს მისცა და იქ დამსწრე ემირებს საპატიო ხალათები ჩააცვა“ (სადრ ად-დინ ჰუსეინი 1976: 191).

იბნ ალ-ასირის მიხედვით, ალფ-არსლანი ისფაჰანიდან მერევეში გაემგზავრა, სადაც თავისი შვილი ყარახანიანთა გამგებლის ასულზე დააქორწინა. იმავე დროს მეორე შვილი ღაზნის გამგებლის ქალიშვილზე დააქორწინა. „ალფ-არსლანმა გააერთიანა ორი დინასტია-სელჩუკებისა და მაჰმუდის, რითაც საბოლოოდ

ჩამოაგდო თანხმობა და მშვიდობიანობა“ (www.vostlit.info, Восточная литература, Авторы и источники на букву „И“ Ибн-ал-Асир, Тирих-ал-Камиль, Полный свод всеобщей Истории). იბნ ალ-ასირი 1065 წლით ათარიღებს ალფ-არსლანის ჩასვლას ჯენდში და იქ სელჩუკის საფლავის მონახულებას. ამავე წლით ათარიღებს და დაწვრილებით აღწერს იგი მალიქ-შაჰის ტახტის მემკვიდრედ გამოცხადების ცერემონიალს.

სადრ ად-დინ ჰუსეინი გადმოგვცემს, რომ 1066 წელს ალფ-არსლანი ისევ ისფაჰანის მიმართულებით დაძრულა. ამის მიზეზი გამხდარა ისფაჰანის გამგებლის ყარა-არსლანის აჯანყება, რომელიც თავის გამოუცდელ ვეზირს, მუხამედ იბნ იბრაჰიმს შეუცდენია. ალფ-არსლანმა ერთი შეტევით დაამარცხა აჯანყებულები. ყარა არსლანმა ორი მხედრით ჯირუფთას შეაფარა თავი და სულთანს შეწყალება სთხოვა, მას სულთნის კეთილმოწყალებისა და ალაჰის იმედი ჰქონდა. სულთანმა მას დანაშაული აპატია და ისევ ქერმანის მმართველად დატოვა. ამის შემდეგ ალფ-არსლანი ფარსისაკენ გაემართა, გზად ისთახრის ციხე დაიპყრო, მისი გამგებელი აიძულა ქვევით ჩამოსულიყო და მთელი სიმდიდრე ხელში ჩაიგდო. (www.vostlit.info, Восточная литература, Авторы и источники на букву „X“, Ал-Хусайни Садр-Ад-Дин).

ალფ-არსლანის ანატოლიიდან წასვლის შემდეგ, აქ დატოვებული ამირები წარმატებით განაგრძობდნენ დაპყრობებს. „1065-1066 წლებში აქ დატოვებულმა სელჩუკმა ამირებმა გუმუშთეგინმა, აფშინმა და ხორასნის სალარმა მთელი რიგი თავდასხმები მოახდინეს ანატოლიის პროვინციებში და გაანადგურეს და ააოხრეს ქალაქები: მალათია, ერგანი, ხლათი, სივერექი, ამიდი, მაიაფარიკინი, ურფა, ჰარანი, ნიზიბი, სურუჯი, დელუქი, რაბანისა და ანტიოქიის მიდამოები. ამ რაიონებში დაიპყრეს მთელი რიგი ციხესიმაგრეები. ისინი პირნათლად ასრულებდნენ ალფ-არსლანის მიერ დასახულ ამოცანებს. წყაროებში ვრცლად არის გადმოცემული ალფ-არსლანის ანატოლიაში არყოფნის დროს სელჩუკი მხედართმთავრების მიერ ჩატარებული ლაშქრობების შესახებ“ (შენგელია 1968: 236). ალფ-არსლანი ჯერ კიდევ არ იყო ანატოლიიდან წასული, როდესაც მას განუდგა ერთგული განძის ამირა ფადლონი. დ. ბაქრაძის განმარტებით, „ამ სახელს ქართველი მწერლები უწოდებდნენ იმ ემირებს ანუ ხალიფის მოადგილეებს, რომელნიც იყვნენ შთამომავალნი ქურთის ტომის ბენნა-შედდისა. ფადლონები ფლობდნენ ყარაბაღს,

ადერბეიჯანს და შირვანის ნაწილს. ფადლონები ცხოვრობდნენ ხან განჯაში, ხან დოვინში და ხან ანში. ოდესმე ისინი იყვნენ დიად შემძლებელნი. უკანასკნელს იმათგანს 1123 წ. დავით აღმაშენებელმა ჩამოართვა სამფლობელო და თვით ის გადმოასახლა საქართველოში, სადაც თამარ მეფეს დროიდან შეიქმნა წინაპრად აფხაზეთის მთავრებისა შარვაშიძეებისა. ფადლონები იყვნენ დაუცხრომელნი საქრისტიანოს მტერნი: ისინი აწუხებდნენ საქ-ოს დავით კურაპალატისა და ბაგრატ III-ის დროსვე. ისინი უფრო საშიში იყვნენ იმათის მოსაზღვრე მხრისათვის, ჰერეთისა და კახეთისათვის, რომელსაც დაესხმოდნენ და საიდამაც ბრუნდებოდნენ დიდის საშოვარით და ტყვეების სიმრავლით“ (ბაქრაძე 1880: 17).

აღფ-არსლანის ამიერკავკასიაში პირველი ლაშქრობის დროს ფადლონი გამოცხადდა მასთან და მორჩილება გამოუცხადა. სადრ ად-დინ ჰუსეინი გადმოგვცემს: „ფადლონი განჯისა და მისი სანახების ვალი იყო. ვეზირი ნიზამ ალ-მულქი მისი ქვეყნებისაკენ გაემგზავრა. ფადლონი შეეგება მას და მის უზანგს ემთხვია, მასთან მოვიდა და სულთანს ეახლა. სულთანმა მას ფარსის ვილაიეთი უბოძა. აქ ერთი ციხეა, რომელიც ღმერთის მიერ ქვისაგანაა ნაგები. არც ერთი მშენებლის მიერ არაა იგი აგებული და აქამომდე ამ ციხეს არავინ დაუფლებია. ფადლონი ამ ციხეში იყო გამაგრებული. ეშმაკმა ამ კაცს ცხვირში რაღაც ჩაბერა და მისი მოჯანყე ძარღვები მოძრაობაში მოიყვანა. ვეზირი ნიზამ ალ-მულქი ამ ციხის კალთებს მოადგა და ომის ცეცხლი დაანთო. მტრის ჯარმა ნიზამ ალ-მულქის ლაშქარს დაუშინა ისეთი ისრები, რომლებიც რკინას ხვრეტდნენ და გადიოდნენ. ნიზამ ალ-მულქის ჯარები კი ამის საპასუხოდ ქვებსა და ისრებს ისროდნენ. როდესაც გაცხარდა ბრძოლა, ვეღარ გაუძლეს და მეციხოვნეებმა შეწყალება ითხოვეს, რამაც ყველა გააოცა. ამის გამომწვევი მიზეზის ძიება დაიწყო. ბოლოს გაირკვა, რადგანაც ციხის ჭები წყლისგან დაცლილი იყო, ესენი უწყლობის გამო იძულებულნი გახდნენ შეწყნარება ეთხოვათ. ფადლონმა თავი შეაფარა ციხის შუაში მტკიცედ ნაშენ კოშკს და იქ გამაგრდა. ვეზირ ნიზამ ალ-მულქმა ემირ ჰაზარასბი (ნიზამ ალ-მულქის ერთ-ერთი ემირი, რომელიც მას თან ახლდა საქართველოსა და ამიერკავკასიაში ლაშქრობის დროს) მოიხმო და მიმართა: შენი ცხენოსნებითა და ქვეითებით გაემართე იმ ადგილს, სადაც ფადლონი დაიბადა, მისი ნათესავები და ცოლი დაიჭირე და ყველა ისინი გაანადგურე. ფადლონმა გაიგო ნიზამ ალ-მულქის ეს ღონისძიება. მის მშობლიურ ადგილზე წასასვლელ

გზაზე დაბრკოლება რომ შეექმნა, თავისი ლაშქრით ციხიდან ჩამოვიდა და ნიზამ ალ-მულქის ლაშქრის წინამძღოლს ჰაზარასბის შეხვდა. ამაზე ჰაზარასბი ცხენიდან ჩამოვიდა, ქვეითად იარა და იქ ბალახებში დაიმალა. ვეზირ ნიზამ ალ-მულქის ლაშქრიდან ერთ-ერთმა იგი (ფადლონი) დაინახა და დაიჭირა. თმაზე წაავლო ხელი და თრევა-თრევით დატყვევებული ნიზამ ალ-მულქს მოჰგვარა. ნიზამ ალ-მულქმა ბრძანა ზემოხსენებულის დაპატიმრება. ამ დროს დიდებული სულთანი ალფ-არსლანი ქირმანში იყო- იმ საღამოს სიზმარი ნახა, რომ ნიზამ ალ-მულქმა ციხე აიღო, მოსახლეობა ციხიდან ჩამოიყვანა და ფადლონი დაატყვევა. როდესაც მან გაიღვიძა, სიზმარი სიზმრის ამხსნელს უამბო. მათ უთხრეს, რომ ეს კარგი სიზმარია. მათი სიზმრის ახსნა სხვა არა არის რა თუ არა ცხადი რამე. ცოტა ხანი გავიდა და სულთანთან მოვიდა ნიზამ ალ-მულქის მახარობელი და მას მოჰყვა დატყვევებული ფადლონი. სულთანმა ფადლონს აპატია. ამ გამარჯვებაზე შეიხ ალი ბინ ჰასან ბაჰარზიმ წიგნი დაწერა“ (სადრ ად-დინ ჰუსეინი 1976: 191-192). წყაროში მითითებული არ არის თუ რატომ აპატია სულთანმა ფადლონს ეს ღალატი. ვფიქრობთ, ალფ-არსლანი ამ დროს უკვე ემზადება ამიერკავკასიაში სალაშქროდ და მას ფადლონი სჭირდებოდა ამ ქვეყნების წინააღმდეგ როგორც მაჰმადიანი, ყველაზე ერთგული დასაყრდენი ამიერკავკასიის პოლიტიკური ერთეულების მმართველთა შორის. შემთხვევითი არ უნდა იყოს, რომ სწორედ ფადლონის ხელახლა გაერთოელების შემდეგ მოაწყო ალფ-არსლანმა მეორე ლაშქრობა ანატოლიისა და ამიერკავკასიის მიმართულებით. ამ ლაშქრობის ძირითადი მიზეზი საქართველო უნდა ყოფილიყო. სადრ ად-დინ ჰუსეინი პირდაპირ აღნიშნავს, რომ ალფ-არსლანს მტკიცედ ჰქონდა გადაწყვეტილი საქართველოში საგანგებო ლაშქრობა (სადრ ად-დინ ჰუსეინი 1976: 192). ალფ-არსლანის საქართველოში მეორე ლაშქრობის კონკრეტული მიზეზი უცნობია. ნ. შენგელია წერს: „ჩვენ არ ვიცით, თუ რამ მიიყვანა ალფ-არსლანი ამ გადაწყვეტილებამდე, მაგრამ საფიქრებელია, რომ მეზობელი მუსლიმანური ერთეულები, რომლებიც ალფ-არსლანის მოკავშირედ და ერთგულებად ითვლებოდნენ, ბაგრატ მეფის მიერ შევიწროვებული უნდა ყოფილიყვნენ... საქართველოში ალფ-არსლანის მეორე ლაშქრობას, ბაგრატის ბარდავში გალაშქრება უძღოდა წინ. არაბული წყაროს ცნობით, „460 (1067/68) წელს ქართველთა მეფე ბაგრატი ბარდავს შეესია და იავარჰყო“. ადვილი შესაძლებელია ბაგრატის მიერ

იავარქმნილი ბარდავის გამგებელმა საშველად ალფ-არსლანს მიმართა“ (შენგელია 1968: 238). რ. კიკნაძის აზრითაც „ქართველთა არანში ლაშქრობით განრისხებული ალფ-არსლანი მათ დასასჯელად წამოსულა“ (კიკნაძე 1960: 115). ბაგრატ IV-ის მიერ მუსლიმანური პოლიტიკური ერთეულების შევიწროვების გარდა ალფ-არსლანის საქართველოში მეორე ლაშქრობას, ჩვენი აზრით, უფრო მნიშვნელოვანი მიზეზი უნდა ჰქონოდა, კერძოდ: ალფ-არსლანმა თავის პირველი ლაშქრობის დროს ვერ შეძლო საქართველოს როგორც ამიერკავკასიის ერთადერთი დამოუკიდებელი და ბიზანტიის მოკავშირე სახელმწიფოს დამორჩილება. სწორედ აღნიშნული პრობლემის გადაწყვეტა უნდა ყოფილიყო მისი ანატოლიისა და ამიერკავკასიის მიმართულებით მეორე ლაშქრობის ძირითადი მიზეზი. ამ დროს აშკარად უპირისპირდება ერთმანეთს ბიზანტიისა და სელჩუკთა სახელმწიფოების ინტერესები ანატოლიასა და ამიერკავკასიაში. ალფ-არსლანისათვის, ბაგრატთან დამოყვრების მიუხედავად (ბაგრატმა ალფ-არსლანს ცოლად შერთო თავისი დისშვილი, თუმცა სულთანმა მალე გაეყარა მას და ნიზამ ალ-მულქს შეართვეცინა), აშკარა გახდა, რომ აუცილებელი იყო საქართველოს დამორჩილება.

სადრ ად-დინ ჰუსეინის მიხედვით, საქართველოსკენ მომავალ სელჩუკთა ლაშქარს ალფ-არსლანმა ემირი სუთეჟინი უსარდლა: „ემირ სუთეჟინი, რომელიც ამისათვის მოწყობილი ჯარის მეთაურად ჩადგა, წინ მიდიოდა როგორც წინამძღოლი. აფხაზთა ჯარი შედგებოდა რუმთა ქვეყნების მამაცი ადამიანებისაგან. ესენი ეფრენჩის და შექის მცხოვრებლები იყვნენ. შექი ერთი ნაჰიეა და მისი მელიქი აღსართანი იყო“ (სადრ ად-დინ ჰუსეინი 1976: 192). ზ. ბუნიატოვის მიერ რუსულად ნათარგმნ სადრ ად-დინ ჰუსეინის თხზულებაში ნათქვამია, რომ ყველაზე ძლიერები რუმთა ლაშქარში იყვნენ ფრანკები (ფარანჯები) და შაქელები (www.vostlit.info, Восточная литература, Авторы и источники на букву „X“, Ал-Хусайни Садр-Ад-Дин). ვ. ვასილევსკი კი ამავე თხზულების კომენტარებში აღნიშნავს, რომ „ფრანკი (ფარანჯი, ფარანგი, ვარანგი)–რუმთა ქვეყნიდან“ ავტორი უნდა გულისხმობდეს ქართველთა მეფის სამსახურში მყოფ 3 000 ვარიანს. (www.vostlit.info, Восточная литература, Авторы и источники на букву „X“, Ал-Хусайни Садр-Ад-Дин).

რ. მეტრეველი შენიშნავს, „ქართველთა და ვარანგთა ურთიერთობის შესახებ მეტად საირტერესო ცნობაა დაცული „მატიანე ქართლისა“-ში. თხზულებაში, იქ სადაც ლაპარაკია საქართველოს მეფეს ბაგრატ მეოთხესა (1027-1072) და

კლდეკარის ერისთავის ლიპარიტ ბაღვაშს შორის (ამ უკანასკნელს ბიზანტიის იმპერია უჭერდა მხარს) ურთიერთობის უკიდურესად გამწვავების შესახებ, აღნიშნულია: „და მოვიდეს ვარანგნი სამი ათასი კაცი, და დააყენა ბაშს; გარდამოიტანა თანა შვიდასი კაცი. და მოვიდა ბაგრატ შიდათ ლაშქრითა; და ამათ ვარანგთა, მესხნი ვერღარა მოილოდინეს, მოვიდეს და შეიბნეს თავსა სასირეთისა ჭალისასა; გაიქცა შიდა ლაშქარი, და ომსა ამასვე შეიპყრეს აბუსერი და სხუანიცა დიდებულნი მისთანა, ვერღარა უძლეს ბრძოლად ვარანგთა“ ისტორიკოსებში არ არის აზრთა ერთიანობა იმის შესახებ თუ ვის მხარეზე იბრძოდნენ ვარანგნი. ერთნი (ნ. მარი, ნ. ბერძენიშვილი და სხვ.) მიიჩნევენ, რომ ისინი იყვნენ ლიპარიტის მხარეს, მეორენი (მ. ჯანაშვილი, დ. ბაქრაძე, ვ. ვასილევსკი, ი. ცინცაძე და სხვ.) თვლიან, რომ ვარანგნი ბაგრატ მეოთხესთან იყვნენ“ (მეტრეველი 1988: 76). რ. მეტრეველს მიაჩნია, რომ, „მატიანე ქართლისას“ ზემომოტანილი ტექსტის მიხედვით, ვარანგნი სწორედ საქართველოს მეფეს ბაგრატს უმაგრებდნენ მხარს. (მეტრეველი 1988: 76).

ბაგრატ IV-ის მხარეზე მეტბრძოლ ძალად თვლიდა ვარანგებს ვახუშტი ბატონიშვილიც, რომელიც აღნიშნავდა: „ხოლო ბაგრატს მოერთნენ სამი ათასი ვარანგნი; მოიტანა მეფემან შვიდასი მათგანი და შიდა ქართველნი, გარნა მესხნი ვერღარა მოიცადა და ლიპარიტცა მოვიდა კახით და სომეხთა მეფით დავითით; შეიბნენ სასირეთისა ჭალასა შინა; არამედ იძლივნენ ბაგრატისანნი და შეიპყრეს კუალად აბუსერი და სხვანი დიდებულნიცა და ვარანგთა ვერღარა უყვეს ბრძოლა“ (ვახუშტი ბატონიშვილი 1973: 147). რაღა თქმა უნდა, გამორიცხული არ არის, რომ „ვარანგნი“, რომლებიც ბაგრატის მხარეზე იბრძვიან ლიპარიტთან დაპირისპირებისას, მეფეს თან ხლებოდნენ ალფ-არსლანის საქართველოში მეორე ლაშქრობის დროსაც, თუმცა, წყაროთა სიმცირის გამო, გადაჭრით რაიმეს თქმა ძნელია. „მატიანე ქართლისაჲ“-ს ავტორს ვარანგების შესახებ ამ დროს ნათქვამი არაფერი არ აქვს. საინტერესოა თვითონ ტერმინ „ვარანგის“ მნიშვნელობაც. სულხან-საბა ორბელიანის ლექსიკონში იგი განმარტებულია, როგორც „ვარგნი, თუ მრავლის შემძლენი“ (ორბელიანი 1993: 133). რ. მეტრეველის მიხედვით, ვარანგნი რუსის სინონიმია: „რუსის“ ბადალი ტერმინებია ქართულ მატიანეებსა თუ საბუთებში მოხსენებული „ვარანგი“ (ვარიაგი) და სკვითი (მეტრეველი 1988: 75).

როგორც აღვნიშნეთ, არაბული წყაროს (სადრ ად-დინ ჰუსეინი) მიხედვით, ალფ-არსლანის საქართველოსკენ მეორედ გამოლაშქრების მიზეზად ბაგრატისაგან მუსლიმანური პოლიტიკური ერთეულების შევიწროვება სახელდება. ქართველი მემკვიდრისათვის ამ ლაშქრობის მიზეზი უცნობია (ყოველ შემთხვევისთვის ამ მიზეზს არ ასახელებს). იგი აღნიშნავს, რომ სულთნის ბაგრატის დისშვილთან ქორწინების სამი წლის შემდეგ, მან შემოუარა რანს და მოულოდნელად შემოვიდა ჰერეთში, რომლის დიდებულებიც ბაგრატის ერთგულები იყვნენ. ამ დროს ბაგრატი გალაშქრებული იყო კახეთის ასაღებად. კახთა მეფე აღსართანმა მიატოვა ციხეები და თავი კავკასიას შეაფარა. როდესაც ბაგრატის მოწინავე რაზმმა მას უამბო სელჩუკთა შემოსევის შესახებ, მეფე სასწრაფოდ აიყარა და ქართლში გადმოვიდა: „გამოვიდა სულტანი, შემოვლო რანი და უგრძნეულად შევიდა ჰერეთად. და მის ქუეყანისა დიდებულნი იყვნეს მორთულ და ერთგულ ბაგრატისა. და მას ჟამსა იყო მცირედითა საქონლითა მეფე კახეთისაი აღსართან, მე გაგიკისი. და ყოველთა დაყარნეს ციხენი მათნი და ივლტოდეს კავკასიად. და იყო ბაგრატ გალაშქრებული აღებად კახეთისა. და ლაშქარი მისი წინა გაგზავნილი იყო ვეჟინის ერისთავისა თანა წირქუალელსა. შემოიქცეს მშვიდობით და უამბეს შემოსლვაჲ სულტანისაჲ და დაყრაჲ ციხეთაჲ. შემოიქცა სწრაფით და მოვიდა ქუეყანად თვსად ქართლად“ („მატიანე ქართლისაჲ“ 2008: 290-291). ბაგრატის ქართლში სასწრაფოდ გადმოსვლა თავისთავად მიუთითებს ალფ-არსლანის მოულოდნელ გამოჩენაზე, როგორც ჩანს, ბაგრატი არ იყო მზად სელჩუკთა წინააღმდეგ საბრძოლველად. ზ. პაპასქირი არ გამორიცხავს, რომ სელჩუკთა ასეთი ოპერატიული გამოჩენა მომხდარიყო კახთა მეფის აღსართანის ინიციატივით. ამაზე უნდა მიუთითებდეს სადრ ად-დინ ჰუსეინის თხზულებაში დაცული ფაქტი სულთნის შენაერთების მიერ, ჰერეთის ტერიტორიიდან „აფხაზი ყაჩაღების“ განდევნის შესახებ. ასევე აღსართანის სასწრაფო გამოცხადება ალფ-არსლანთან და მორჩილების გამოცხადება (Папаскири 2001: 90).

სადრ ად-დინ ჰუსეინი გადმოგვცემს, რომ შექში (უნდა იგულისხმებოდეს კახეთ-ჰერეთის აღმასავლეთი პროვინცია) რუმელებმა და აფხაზებმა (ქართველებმა) ალფ-არსლანის ლაშქარს წინააღმდეგობა გაუწიეს. სელჩუკთა სულთანს საკმაოდ ძალისხმევა დასჭირდა მათ დასამორჩილებლად: „შექის გარს ერტყა მუხნარი და ტყიანი ადგილები, რომლებზედაც რუმთა და აფხაზთა ყაჩაღები და ქურდები

იმალებოდნენ. სულთანმა მენავთეებს უბრძანა. რათა ეს ჭაობიანი და ჭოჭი ადგილები გადაეწვათ. როდესაც ეს ადგილები გადაწვეს, სულთანმა დაინახა, რომ ამ გადამწვარი ადგილის შუაში იყო ორი ციხე, რომელიც შედგებოდა რკინის ფირფიტებისა და სპილენძის ხრახნებით გამაგრებული ქვისაგან. მაგრამ, მიუხედავად სხვადასხვა ღონისძიებებისა, ამ ციხეებთან მიდგომა შეუძლებელი შეიქმნა. ამის გამო სულთანი ძალიან დაღონდა. ამ ორი ციხის პატრონსა და შექის მელიქს შორის ოდითგანვე დიდი შური და მტრობა იყო. ამ ორი ციხის პატრონი ციხიდან ქვევით ჩამოვიდა. მუსლიმობა მიიღო და ციხეები ჩააბარა. შემდეგ სულთანმა ამ ქვეყნის ყველა მხარეში მდებარე ციხეები სათითაოდ დაიპყრო, აიღო მთელი ეს ქვეყანა და რაც კი იპოვა, ყველაფერი გაანადგურა. იმდენი სიმდიდრე ჩაიგდო ხელში, რომ მისი აღწერა შეუძლებელია“ (სადრ ად-დინ ჰუსეინი 1976: 192).

ქართველი მემკვიდრის ცნობა ბაგრატ IV-ის კახეთ-ჰერეთსა და განსაკუთრებით არაბული წყაროს ცნობა მისი საქართველოსგან საკმაოდ შორს ბარდავში ლაშქრობა, ალფ-არსლანის მეორე ლაშქრობის წინ საქართველოს სამეფოს გაძლიერებაზე მიუთითებს. როგორ ჩანს, ენერგიულმა ბაგრატ IV-მ საკმაოდ კარგად გამოიყენა ალფ-არსლანის პირველი ლაშქრობის შემდეგ ქვეყანაში დროებით დამყარებული მშვიდობა. სრულიად სამართლიანად შენიშნავს ზ. პაპასკირი: „ქართველი მეფის სამხედრო-პოლიტიკური აქციები აშკარად მოწმობს რომ 1064-1068 წწ.- ალფ-არსლანის საქართველოში პირველ და მეორე ლაშქრობებს შორის პერიოდში, ბაგრატ IV-ს არანაირი ვასალური მოვალეობა არ ჰქონდა. პირიქით, ცხადია, რომ საქართველოს მეფე ამ დროს საერთოდ არ გაურბოდა დაპირისპირებას და სულაც არ მიდიოდა რაიმე დათმობაზე სელჩუკთა სულთანთან, როგორც ამას მიიჩნევს ნ. შენგელია, არამედ ატარებდა დამოუკიდებელ საკმარისად აქტიურ საგარეო პოლიტიკას პოზიციების გასამაგრებლად აღმოსავლეთ კავკასიაში. შემთხვევითი არაა, რომ სელჩუკთა შემოსევების წინა დღეს ქართველი მეფე კახეთ-ჰერეთის შემოერთებით იყო დაკავებული. მხოლოდ თურქთა შემოსვლამ აიძულა იგი რათა შეეწყვიტა შემდგომი შეტევა და უკან დაბრუნებულიყო“ (Папаскири 2001: 90).

„მატიანე ქართლისაჲს“ მიხედვით, კახეთ-ჰერეთში შემოსულ ალფ-არსლანს, კახთა მეფე აღსართანი ეახლა, ისლამი მიიღო და ხარკის გადახდა იკისრა. კმაყოფილმა სულთანმა ყველა ციხე ამ მხარეში მას გადასცა: „ხოლო აღსართან

მიერთო სულტანსა, მიუძღუანა ძღუენი დიდი, და აღუთქვა ხარაჯად, და მისცა ყოველნი ციხენი დაყრილი სულტანმან მასვე: და რომელნი აფხაზთა მეფისა კაცთა დაყარნეს, და რომელნი თვთ აღსართანისთა[ნი], მისცა ყოველნი“ („მატიანე ქართლისაჲ“ 2008: 291). იგივე ამბავს არაბი ისტორიკოსი სადრ ად-დინ ჰუსეინი შემდეგნაირად გადმოგვცემს: „ეფრენჯის, იგივე შექის მელიქი ეს აღსართანი მრავალი ცხენოსნით მოვიდა და სულთნის სასახლის წინ დადგა. სულთანმა ეს რომ დაინახა, თავის ხალხს უთხრა: „ის შიგ შემოიყვანეთ და დაასვენეთ, რადგან იგი დიდად სახელოვანი და განთქმული მელიქია“. როდესაც აღსართანი მას ეახლა, სულთანს მიმართა და მოახსენა: „მე ნაწყენი ვარ, იმის გამო, რომ შენიშვნა მომეცით. ის, რამაც მე შენთან მომიყვანა არის აზრი, რომელიც გამიჩნდა ისლამის სარწმუნოების შესახებ და იმ გადაწყვეტილებამ, რომ გავწყვიტო კავშირი ქრისტიანობასთან“. ეს უთხრა თუ არა სულთანი ტახტიდან ჩამოვიდა და ზემოხსენებულს შეეგება, გადაეხვია და თავზე ემთხვია. ისიც ამის საპასუხოდ სულთანს ფეხზე ეამბორა და ორივემ ტირილი დაიწყო. მათ გულში ღრმა მწუხარებამ გაიღვიძა. მელიქი აღსართანმა ისლამი მიიღო. ამის შემდეგ სულთანმა თავისი ხაზინიდან გამოიღო ძვირფასეულობა და მის წინ დაყარა. მას შემდეგ, რაც სათანადო პატივისცემა აღმოუჩინა, იქვე მდგომ ცხენზე შესვა. ემირები და ჰაჯიბები მათ გვერდით ქვეითად გაჰყვნენ. ამრიგად, ისინი მოვიდნენ კარავში, რომელშიც გაშლილი იყო დიდი ბრწყინვალეობით მორთული სუფრები და ზედ ეწყო ყოველგვარი სიმდიდრე. შემდეგ სულთანმა მას გაუგზავნა მუსლიმი ღვთისმეტყველი, რომელიც ასწავლიდა ისლამის წეს-ჩვეულებებს, ნამაზის შესრულებას და ყურანის სურების კითხვას. ბრძანა, რომ იგი განებანათ და ამ ვილაიეთების ემრობა მას უბოძა“ (სადრ ად-დინ ჰუსეინი 1976: 193). ხაზგასასმელია, რომ არაბი ისტორიკოსი ბაგრატს მეფედ, ხოლო აღსართანს მელიქად მოიხსენიებს, რაც ბაგრატის უპირატეს მდგომარეობაზე მიუთითებს. სულთანს აღსართანი სჭირდება როგორც ერთგული მოკავშირე ბაგრატის წინააღმდეგ. სწორედ ეს უნდა იყოს ერთ-ერთი მიზეზი სულთნის ესოდენ დიდი წყალობისა აღსართანის მიმართ. ქართველი მემკვიდრის ცნობით, აღსართანის გაერთოელებიდან სამი კვირის შემდეგ სულთანი გამოემართა აფხაზთა (ქართველთა) წინააღმდეგ. მას თან ახლდნენ სომეხთა მეფე კვირიკე, თბილისის ამირა და აღსართანი. ისინი ქართლში შემოვიდნენ 1068 წლის 10 დეკემბერს

სამშაბათ დღეს: „და შემდგომად სამისა კვრისა წარმოემართა აფხაზთა მეფესა ზედა. და მიერთნეს სომეხთა მეფე კვრიკე და ტფილელი ამირა და აღსართან; შემოჰყვეს ქართლს თანა ჯაჭვთა. გაუშვეს მარბიელი ცისკრად, და სამწყხაროდ აღივსო ყოველი ქართლი თუესა დეკემბერსა ათსა, დღესა სამშაბათსა. ხოლო ქორონიკონი იყო ორას ოთხმოცდარვა“ („მატიანე ქართლისაჲ“ 2008: 291).

დ. ბაქრაძე ალფ-არსლანის საქართველოში მეორე ლაშქრობასთან დაკავშირებით წერს: „საქართველო ისე ბედნიერი არ იყო, რომ იმას ბაგრატის სიცოცხლეში ხანგრძლივი მშვიდობიანობა ეგემოვნა. შიგ საქართველოში დაწყნარდა ღელვა, მაგრამ სპარსეთის მხრით კიდევ ასტყდა ჭექა-ქუხილი. არპ-ასლანი სამის წლის შემდეგ მეორედ მოაწყდა ჩვენ ქვეყანას. ამას მოჰყავდა თან ხუთასი ათასი (?) კაცი წყობა, რომელიც მიესია რანს, ჰერეთს და კახეთს. კახელებმა მოასწრეს მთებში ასვლა; იმათი მეფე ახსარტანი იძულებულიყო მტერს მისცემოდა; ამასთანავე იმან ასიამოვნა არპ-ასლანი სჯულის დატევებით. არპ-ასლანი გაემართა უშორეს და თან გაიდევნა ახსარტანის გარდა სომეხთა მეფე და თბილისის ემირი. ეს შემთხვევა მოხდა 1068 წ. ჯარი გავიდა იორს და დაბანაკდა მცხეთის მახლობლად. აქედამ არპ-ასლანმა მხედრობის გუნდი გაგზავნა სხვა-და-სხვა ქართლის მხარეებში და აგრეთვე იმერეთისკენ არგვეთში“ (ბაქრაძე 1880: 49-50).

როგორც რ. კიკნაძე გადმოგვცემს: „მუნეჯიმ-ბაშსაც აქვს მოთხრობილი ალფ-არსლანის საქართველოში მეორე ლაშქრობის ამბავი. მისი სიტყვით, 459 წ. სულ-ჰიჯას თვეს (1067 წლის ოქტომბერ-ნოემბერი) ალფ-არსლანი არანში მოვიდა და ფადლ იბნ შავურმა (ქართული წყაროების ფადლონი აბულ-ასვარის ძე) მორჩილება გამოუცხადა და თავის საუნჯეთა გასაღებებიც გადასცა. აქვე მოვიდა შარვანის პატრონი ფარიბურზ იბნ სალარიც საჩუქრებითა და მორჩილებით. 460წ. მოჰარამის თვეში (1067 წლის ნოემბერ-დეკემბერი) სულთანმა კახეთისკენ დაიძრა, იქიდან კი ქართლში გადავიდა, ბევრი ხალხი დახოცა, დაატყვევა და დიდი ნადავლი აიღო. მან მრავალი ციხე დაიპყრო საქართველოში“ (კიკნაძე 1960: 117). გამორიცხული არ არის მუნეჯიმ ბაში ალფ-არსლანის საქართველოში მეორე ლაშქრობის თარიღთან დაკავშირებით სადრ ად-დინ ჰუსეინის ცნობებით სარგებლობდეს. ჰუსეინის ცნობით, 460 წელს (1067წ. XI-XII; 1068წ. I-X), როდესაც ბაგრāti ბარდავს შეესია, ალფ-არსლანმა მტკიცედ გადაწყვიტა მის წინააღმდეგ გალაშქრება (სადრ ად-დინ ჰუსეინი 1976: 192). შევნიშნავთ, რომ XVII საუკუნის ოსმალთა ისტორიკოსის

მუნეჯიმ ბაშის არაბულ ენაზე შედგენილი თხზულება ძირითადად წარმოადგენს წინა პერიოდის საისტორიო წყაროებში დაცული ცნობების კრებულს.

ალფ-არსლანის საქართველოში მეორე ლაშქრობის თარიღად, ამავე პერიოდის ქართველი მემკვიდრის მიერ დასახელებული 1068 წელი ყველაზე უფრო სანდოდ მიგვაჩნია. იგი ასახელებს არა მარტო ალფ არსლანის ქართლში შემოსვლის წელს, არამედ თვესა და რიცხვსაც (10 დეკემბერი). რაც კიდევ უფრო სარწმუნოს ხდის მის ცნობას. ალფ-არსლანის საქართველოში მეორედ ლაშქრობის დროს ქვეყანა ეკონომიურად მომძლავრებული ყოფილა, სელჩუკები ქართლში ექვსი კვირა დარჩენილან, მთელი ეს მხარე მოუოხრებიათ, გადასულან დასავლეთში და სვერის ციხემდე ულაშქრიათ, ვისაც მთაში გაქცევა მოუსწრია ძლიერი ყინვისგან დახოცილან. თვითონ სულთანიც ძალიან შეწუხებულა მკაცრი ზამთრისაგან. „მატიანე ქართლისაჲს“ ავტორი შთამბეჭდავად გადმოგვცემს სელჩუკთა საქართველოში ლაშქრობის შედეგებს: „და იყო ქართლსა შინა პური და ღვინო, და დაყო ექუსი კვრად, და იწყო ოჭრებად და ჯოცად კაცისა, და გარდავიდა მარბიელი მისი არგუეთს. მიუწიეს და დაარბივეს ვიდრე სუერის ციხემდე. და მოისრა ურიცხვ სული ქრისტიანეთაჲ და ტყუე იქმნა; და იქმნა სამაგელ ქუეყანაჲ ქართლისაჲ სახილველად კაცთა. მოოჭრდეს ყოველნი ეკლესიანი და სიმრავლითა მძორდსაითა არღარა დაედგმოდეს ქუეყანასა თვალნი. და ცოდვათა ჩუნთა მოსაგებელსა რისხვასა ღმრთისასა ზეცით ცაჲ წამებდა, და სისხლის მწვმელი ღრუბელი აღმოსავლეთით მოეფინა ქართლსა ზედა. და იქმნა ღამე უკუნი, ვითარცა ნათელი დღისაჲ, და იყო ხილვაი მისი საშინელი და შემადრწუნებელი, და არე-არე სისხლის წვმაჲ ეხილვა კაცთა. და იქმნა ზამთარი სასტიკი; რომელი გარდაეხუეწა ზამთარსა და მიმართა მთათა, მოსწყდა იგიცა სიფიცხისაგან ზამთრისა. ხოლო ყოველსა ქართლსა შინა დადგა ლაშქარი. და თვთ თავადი სულტანი დადგა კარბსა და მერე ჩამოდგა შერთულთა, და აწირვა სიძნელემან ზამთრისაგან და ბუქთა ძლიერთა“ („მატიანე ქართლისაჲს“ 2008: 291-292).

აზერბაიჯანელი ისტორიკოსის რ. ჰუსეინოვის აზრით, ქართლის მეფე ბაგრატ IV შეეცადა წინააღმდეგობა გაეწია სელჩუკებისთვის, მაგრამ გადამწყვეტ ბრძოლაში ქართველთა ლაშქარი დამარცხდა (Гусейн-Заде 2010: 76). ვერ დავეთანხმებით რ. ჰუსეინოვის ამ მოსაზრებას, ჯერ ერთი ბაგრატი არა მარტო ქართლის, არამედ საქართველოს მეფეა, მეორეც გადამწყვეტი მარცხი (მხედველობაში გვაქვს მარცხი,

რომლითაც მთელი საქართველო სელჩუკების ხელში გადავიდოდა) ბაგრატ IV-ს სელჩუკებთან არ განუცდია. ალბათ ეს „გადამწყვეტი მარცხი“ აქვს მხედველოვაში რ. ჰუსეინოვს, როდესაც წერს: „დიდმა სულთანმა ალფ-არსლანმა 1067 წელს მიიღო ვასალური ფიცი საქართველოს მეფე ბაგრატ IV-საგან“ (Гусейн-Заде 2010 166). უფრო წინ თავის მონოგრაფიაში რ. ჰუსეინოვი აღნიშნავს, რომ 1068 წელის იანვარში ალფ-არსლანი მოვიდა განჯაში, მას ეახლა არანისა და ნახჩევანის ემირი ფადლონ II, აღიარა მისი სიუზერენიტეტი და გადასცა საჩუქრები. მალე ალფ-არსლანმა არანიდან განახორციელა მეორე ლაშქრობა საქართველოზე (Гусейн-Заде 2010: 76). ამ შემთხვევაში დიდი მეცნიერის ნაშრომში შეუსაბამობაა: თუ 1068 წელს ალფ-არსლანი განჯაში მოვიდა და შემდეგ მოაწყო მეორე ლაშქრობა საქართველოში, მაშინ როგორ ან რისთვის მიიღო ბაგრატ IV-მ 1067 წელს სულთნის მიმართ ვასალური ფიცი, როდესაც ის ჯერ კიდევ საქართველოში არ არის.

არაბული წყაროს მიხედვით, კახეთში საქმეების მოგვარების შემდეგ „სულთანი გაემართა აფხაზთა მეფე ბაგრატის წინააღმდეგ და თავის ჯარებს მისცა (სრული) თავისუფლება ამ ვილაიეთებში, რომ ეხოცათ და გაენადგურებინათ. ამგვარად ბოლოს თბილისში ჩამოვიდა.. აქ მან დაინახა სულეიმან დავუდის ძის (მშვიდობა იყოს მასზე) მიერ აშენებული ცხელი აბანო, რომლის წყალი სრულებით უცეცხლოდ თვითონ გადმოდიოდა ცხლად ეს დუნაიზე პირველად გაკეთებული აბანოა. თბილისის კედლის სიგრძე 40 წყრთაა და სიგანეც ამდენივეა. აქ ქრისტიანეთა ერთი ეკლესიაა. ამ ქრისტიანების შეხედულებით, მისი მნიშვნელობა ისეთივეა, როგორც მუსლიმებისათვის ქაბას მნიშვნელობა. სულთანმა ეს ქალაქიც დაიპყრო და იქ ერთი ჯამე გააშენებინა. აფხაზთა საზღვარზე ერთი ციხე იყო, რომელსაც კალათ ულ-სალიბს ეძახდნენ. ამ ციხეს ისეთი მამაცი ჯარი იცავდა, რომელსაც ხმლისა და შუბის არ ეშინოდა და ომს არ გაურბოდა. მასში შიგნით მრავალი ეკლესია და იესოსა და მარიამის (მშვიდობა იყოს მასზე) ოქროს ხატები და აგრეთვე მათ მოციქულთა ვერცხლის ხატები, აგრეთვე ვერცხლის გარდამოხსნის ცნობილი სუფრის ხატებიც იყო. ღმერთი შეგვეწია და ნიზამ ალ-მულქის მცდელობითა და მოღვაწეობით ეს ციხე დავიპყარი. იქაური ქონება მუსლიმების ხელში გადმოვიდა. ციხეში მყოფნი მიიფანტ-მოიფანტნენ“ (სადრ ად-დინ ჰუსეინი 1976: 193). ნ. შენგელია შენიშნავს, რომ არაბი ავტორი სვერის ციხეს ჯვრის ციხეს ეძახის და დასავლეთ საქართველოში მიიჩნევს. მისი აზრით, კალათ

ულ-სალიბის ციხე ანუ ჯვრის ციხე, იგივე სვერის ციხე უნდა იყოს. როგორც ჩანს, ამ ორი სახელის იდენტურობის გამო დამკვიდრდა ქართულ ისტორიოგრაფიაში აზრი სელჩუკების მიერ სვერის ციხის აღებასთან დაკავშირებით. საქართველოს ისტორიის ნარკვევების III ტომში მითითებულია: ქართლის აოხრების შემდეგ „თურქთა რაზმები დასავლეთ საქართველოში გადავიდნენ და ზემო იმერეთიც დალაშქრეს, სვერის ციხეს შემოადგნენ. აქ იყო თავმოყრილი ქართველების უმთავრესი ძალები. დიდი მსხვერპლის ფასად თურქებმა სვერის ციხე მაინც აიღეს“ (ლორთქიფანიძე 1979: 200). ვახუშტი ბატონიშვილი ამ ციხეს შემდეგნაირად აღწერს: „კაცხის წყალს ზევით ყვირილას მოერთვის აღმოსავლიდამ სუერის კევი. გამოსდის კოლბეურის სამჭრით წარსრულს გორაებს და მოდის აღმოსავლიდამ დასავლეთად. ამ კევზედ არს ციხე სუერი, არაოდეს ძალით აღებული. ესე დგას კლდესა ზედა და გარემოს მისსა ფრიად დიდ ხრამოვანსა. თქმულ არს, ჟამსა ყრუსასა დადგა ციხე არგუეთისა სუერი“ (ვახუშტი ბატონიშვილი 1973: 759). გ. ცქიტიშვილი სვერის ციხესთან დაკავშირებით წერს: ციხე დგას სოფლის ჩრდილო განაპირას, სვერის ხევის მარცხენა, სამხრეთ მხარეს, ციცაბო ფერდობზე ამოზიდულ კლდეზე. კლდე წაგრძელებულია აღმოსავლეთ დასავლეთით და გარემოსაგან მკვეთრადაა გამოყოფილი ფრიალოებით. ამ კლდეზე აგებული ციხე, რომელიც გეგმით მთლიანად კლდეს ემორჩილება და მასთანაა შეხამებულ შერწყმული, პრაქტიკულად სრულიად მიუვალია. ციხის მიდამოებში, მის აღმოსავლეთით და დასავლეთით ოთხიოდე კილომეტრზე მდინარე მოედინება ღრმა ხრამში, რომლის ჩრდილოეთ ფლატეში გამოქვაბულებია გამოკვეთილი. ხრამის სიგანე ციხესთან 200 მეტრს არ აღემატება. მდინარის კალაპოტიდან ციხემდე სიმაღლე დაახლოებით 150 მ-ია. ციხის კლდის ფრიალოების სიმაღლე სხვადასხვაა- 5-დან- 20-ოდ მეტრამდე. ფრიალოებამდე მისასვლელები კი ციცაბო აღმართებია ირგვლივ. კლდის და მაშასადამე ციხის ფართობი მცირეა. დაახლოებით 50X15 მ.“ (ცქიტიშვილი: 1970 34-38). ვფიქრობთ, ციხის მიუვალობისა და მკაცრი ზამთრის გამო ალფ-არსლანს გაუჭირდებოდა სვერის ციხის აღება. „მატიანე ქართლისაჲს“ მიხედვით, სელჩუკებმა დასავლეთი საქართველო დაარბიეს „ვიდრე სუერის ციხემდე“. ვახუშტი ბატონიშვილი შემთხვევით არ უნდა მოიხსენიებდეს სვერის ციხეს, როგორც „აროდეს ძალით აღებული“. ი. ჯავახიშვილიც ქართველ მემკვიდრეებზე დაყრდნობით აღნიშნავს, რომ

„სულტანმა და მოკავშირეებმა გაუშვეს მარბიელი რაზმები, რომელთაც მოაოხრეს ჯერ ქართლი, მერე გადავიდნენ არგუეთს და დაარბიეს ქუეყანა ვედრე სუერის ციხემდე“ (ჯავახიშვილი 1983: 154). სადრ ად-დინ ჰუსეინის თხზულებაში დაცული ცნობის მიხედვით, სალიბის (ჯვრის) ციხის შიგნით მრავალი ეკლესია ყოფილა. გ. ცქიტიშვილის მიერ აღწერილ სვერის ციხეში კი ფართობის სიმცირის გამო მრავალი ეკლესიის არსებობა პრაქტიკულად შეუძლებელია. უნდა აღინიშნოს ისიც, რომ ერთ-ერთი ისტორიული გზა, რომლითაც სელჩუკთა ლაშქარი დასავლეთ საქართველოში მოხვდებოდა აბისი-წაღვლი-ჭერათხევის გავლით ლიხის ქედის, კაპრების სახელით ცნობილ სერზე მდებარე სოფელ ჯვარზე გადიოდა. იქნებ სწორედ აქ მდებარეობდა სალიბის (ჯვრის) ციხე, რომელსაც სადრ ად-დინ ჰუსეინი თავის თხზულებაში მოიხსენიებს და რომლის აღებაც სელჩუკებს ძალიან გაჭირვებიათ. ამ ვარაუდს კიდევ უფრო სარწმუნოს ხდის ის გარემოება, რომ ჰუსეინის მიხედვით, სალიბის (ჯვრის) ციხე აფხაზთა საზღვარზე მდებარეობდა. არაბი ისტორიკოსი აფხაზთა საზღვარში დასავლეთ და აღმოსავლეთ საქართველოს საზღვარს უნდა გულისხმობდეს, რომელიც ლიხის ქედზე, ამ კონკრეტულ შემთხვევაში სოფელ ჯვარზე გადიოდა.

ზემოაღნიშნული მიზეზები საეჭვოს ხდიან სუერისა და სალიბის (ჯვრის) ციხის იდენტურობას, შესაბამისად, სელჩუკების მიერ სვერის ციხის აღებას, თუმცა საკითხის დამატებით შესწავლამდე გადაჭრით რაიმის თქმა შეუძლებელია. ასეა თუ ისე, სელჩუკებმა მკაცრი ზამთრის პირობებში მოახერხეს ქართლიდან დასავლეთში გადასვლა და სვერის ციხემდე მივიდნენ. რომელი გზითაც არ უნდა ელაშქრათ სელჩუკებს ამ მიმართულებით, ლიხის ქედი უნდა გადაელახათ, რაც მათი მხრიდან დიდ ძალისხმევას მოითხოვდა (რა თქმა უნდა, მხედველობაში გვაქვს მკაცრი ზამთარი, რომელსაც ერთხმად აღნიშნავენ ქართული და არაბული წყაროები). გ. ცქიტიშვილი შენიშნავს, რომ შუა საუკუნეებში ქართლიდან იმერეთში რამდენიმე გზა გადიოდა: „ერთი გზა ფრონეს ხეობის აყოლებით და პერანგას მთის გავლით ყვირილის ხეობაში, ჯრიაში ჩადიოდა და ჩიხა-საჩხირეს მივიდოდა; მეორე გზა-ერთი მხრით აბისი-წაღვლის გავლით და ლაფნისწყლის აყოლებით და, მეორე მხრით-ალზე გავლით, ჭერათხევის აყოლებით სოფ. ჯვარს გაივლიდა (ჯვარი მდებარეობს ლიხის ქედის იმ მონაკვეთზე, რომელსაც კაპრების სერი ჰქვია) და კორბეულის გავლით სვერს ჩადიოდა. სვერიდან გზა ერთი მხრით წინსოფლის

ჩავლით ნავარძეთ-კაცხზე მიდიოდა და შემდეგ სკანდა-ჩხარის გავლით ქუთაისს უწევდა; მეორე მხრით, თვალუეთ-ჩხრიაულ-გეზრულ-სანახშირის გავლით შორაპანში ჩადიოდა. ამ გზას განშტოება ჰქონდა გესრულთან“ რომელიც ბოსლევისაკენ მიდიოდა და შემდეგ საზანო-ზოვრეთი-ტელეფას გავლით ჩხართან უერთდებოდა ჩხარ-ქუთაისის გზას; მესამე გზა ჭერათხევიდან ლიხზე გადადიოდა კორტოხის გადასასვლელით და ძირულის ხეობაში ჩადიოდა სოფ. ჭალოვანთან. ჭალოვნიდან ან ძირულას დაუყვებოდა და ვერტყვილა-ამაშუკეთის გავლით შორაპნისაკენ წავიდოდა ან კორბოულ-უსახელო-ნიგოზეთის გავლით ისევ სვერამდე უწევდა; მეოთხე გზა ჭერათხევიდან სამხრეთით დედაბერას გადასასვლელით და ულუმბის მონასტრის გავლით, ღოდორა-ლიჩზე გადიოდა და ძირულის ხეობის დაყოლებით ამაშუკეთ-შორაპნისაკენ მიდიოდა“ (ცქიტიშვილი 1970: 34-38).

ქართველი მემკვიდრის ცნობით, დიდმა ზამთარმა და ბუქმა სულთანს მძიმე მდგომარეობაში ჩააგდო. ალბათ ამ მდგომარეობით და ქართველთა დიდი გმირობით იყო იმედმოცემული ბაგრატ IV, როდესაც ივანე ლიპარიტის ძე მიუგზავნა სულთანს მშვიდობის სათხოვნელად. სულთანმა მოციქული უკან გაუგზავნა ბაგრატ IV-ს და მშვიდობის სანაცვლოდ ხარკის გადახდა მოსთხოვა, მაგრამ ყინვიანი ზამთრის გამო პასუხს ვეღარ დაელოდა და ქართლიდან წავიდა. უკან მიმავალმა რუსთავი და თბილისი ფადლონს ჩააბარა. ამავე წყაროს მიხედვით, საქართველოში ლაშქრობის დროს სულთანის ლაშქარი 500 ათასი კაცისაგან შედგებოდა: „და მიგზავნა მოციქულად ივანე, ძე ლიპარიტისი, მეფემან ბაგრატ ძიებად მშვიდობისა. ხოლო სულტანმან შეაქცია იგი აფხაზეთად ბაგრატისა, სთხოვა ხარაჯად და უქადა მშვიდობად ხოლო სიფიცხლისაგან ზამთრისა ვერღარა მოილოდინა და წარვიდა ქართლით. და ჩამავალმან წარულო ტფილისი და რუსთავი მისცა ფადლონს, განძისა პატრონსა. არათუ მეფეთა ჩუენთა მტერობისათჳს ოდენ გამოსწყჳდა ტფილისი და რუსთავი ამას სამეფოსა, არცა ამისთჳს ქმნა, თუმცა იგი ამირანი ორგულად დადგომილ იყვნეს კარსა მისსა ზედა, არამედ კეთილისა და მსახურებისა ნაცვლად ბოროტსა უყოფდიან ყოველსა კაცსა, რამეთუ მინდობილ იყვნეს იგინი ძალსა უღმერთოებისა მათისასა, და იყვნეს იგინი ყოვლით კერძო მცბიერ. და ამის ქართლისა ოჯრებასა შინა იყო ლაშქრისა მისისა სიმრავლე ხუთასი ათასი.“ („მატიანე ქართლისაჲ“ 2008: 292).

სადრ ად-დინ ჰუსეინის ცნობით: სელჩუკების მიერ კალათ ულ-სალიბის (ჯვრის) ციხის აღების შემდეგ „ბაგრატმა სულთანს ელჩი გაუგზავნა და შეწყნარებაზე შემოეხვეწა. სულთანმა მისი ეს სურვილი შეასრულა, მაგრამ ბოლოს ბაგრატმა ეს ინანა და ისევ ეშმაკს აჰყვა და განიზრახა აჯანყების მოწყობა. იმ დღეებში თოვა დაიწყო. სულთანი ამის გამო საბრძოლველად მზადებას შეუდგა. როცა თოვლმა დნობა დაიწყო, ბაგრატმა ისევ პატიება ითხოვა, სულთანმა ეს აღარ მიიღო და დასაჯა. ბაგრატმა ჯარი შეკრიბა. მაგრამ ეს ჯარი ზამთრის სუსხისგან დაიღუპა. მათ სხვადასხვა უბედურება დაატყდათ თავს. შემდეგ მან დაანგრია ის ქვეყანა, რომელშიაც ცხოვრობდა სულთან ნემრუდ ბინ ქენანი და საიდანაც მას უნდოდა ცაში ასვლა, და მის მიდამოებში გააშენა ქვეყანა და მეჩეთი. სულთანი საქართველოში ხუთი თვე დარჩა. სულთანს თურქთა ხაკანის გარდაცვალება აცნობეს. ამის შემდეგ სულთანი ჯერ განჯას და შემდეგ ბარდავს წავიდა. მდინარე არასზე ის უგემოდ და უკაპიტნოდ გადავიდა... შემდეგ სულთანი ფარსში წავიდა და დღესასწაული იქ გაატარა“ (სადრ ად-დინ ჰუსეინი 1976: 193-194).

სამართლიანად შენიშნავს ნ. შენგელია „არ უნდა იყოს არაბი ავტორი სწორი, როდესაც აღნიშნავს, სულთანი საქართველოსი ხუთი თვე დარჩაო. დეკემბრის დასაწყისში შემოსულ სულთანს ხუთი თვის შემდეგ ზამთრის სიფიცხე ისე არ შეაშინებდა, რომ ამის გამო საქართველო დაეტოვებინა. ამ მხრივ უფრო ზუსტია ქართველი მემკვიდრე, რომელიც სულთნის საქართველოში ყოფნას ცხრა კვირით განსაზღვრავს; სულთანმა სამი კვირა ჯერ კახეთში გაატარა, შემდეგ ექვსი კვირა ქართლში დაჰყო. დეკემბერ-იანვარი სულთანმა საქართველოში გაატარა, და იანვრის ბოლოს სუსხიანმა ყინვებმა აიძულეს იგი სასწრაფოდ წასულიყო თავის ქვეყანაში“ (შენგელია 1968: 242-243).

როგორც ქართული, ასევე არაბული წყაროს მიხედვით, აშკარად ჩანს, რომ სულთანმა ბაგრატ IV ვერ დაიმორჩილა. ქართველთა მეფემ დიდი მსხვერპლის ფასად ალფ-არსლანის მეორედ ლაშქრობის დროსაც შეძლო ეროვნული დამოუკიდებლობის შენარჩუნება. ქართული წყაროს მიხედვით, სულთნის საქართველოდან წასვლის მიზეზი დიდი ზამთარი, არაბულის კი თურქთა ხაკანის გარდაცვალება გამხდარა. რა თქმა უნდა, ამ ორივე გარემოებას შეეძლო ხელი შეეწყო ალფ-არსლანის საქართველოდან წასვლისათვის, თუმცა ამის მთავარი მიზეზი ბაგრატ IV-ისა და ქართველების დიდი წინააღმდეგობა იქნებოდა. უკან

მიმავალმა სულთანმა თბილისი და რუსთავი თავის ძველ მფლობელებს ჩამოართვა და განძის ამირას გადასცა, მიუხედავად იმისა, რომ თბილისის ამირა საქართველოში ლაშქრობის დროს მისი ერთგული მოკავშირე იყო. როგორც რ. კიკნაძე შენიშნავს, სულთანმა არ დაუფასა ჯაფარის ნაშეერთ ერთგულება (კიკნაძე 1960: 117). როგორც ჩანს, სულთანმა ფადლონი უფრო საიმედო და ძლიერ გამგებლად მიიჩნია, რომელიც საქართველოს პროვინციების დასამორჩილებლად და მეთვალყურეობის გამწევად უფრო აქტიური და ძლიერი იქნებოდა, ვიდრე თბილისისა და რუსთავის ამირები. აზერბაიჯანელი ისტორიკოსი ჰუსეინოვი შენიშნავს, რომ „XI საუკუნეში დიდი სელჩუკი სულთნები პოზიტიურ ურთიერთობებს ინარჩუნებდნენ მხოლოდ შედედინების ემირებთან, რომლებიც ითვლებოდნენ ერთადერთ საყრდენებად და სელჩუკთა პოლიტიკის გამტარებლად რეგიონში. ისინი ყველაზე მეტად ეწინააღმდეგებოდნენ ბიზანტიის მიზნებს კავკასიაში, რითაც ეხმარებოდნენ სელჩუკებს დასავლეთის მიმართულებით გადაადგილებაში. აი რისთვის დანიშნა სულთანმა თავის ათაბეგად თბილისსა და რუსთავში შედედინი. მას ჩააბარა აგრეთვე ანისიც“ (Гусейн-Заде 1010: 76-77). „მატიანე ქართლისაჲს“ მიხედვით, სულთნის წასვლის შემდეგ საქართველო გაზაფხულის წყალდიდობამ დააზარალა: „და წარვიდა სულტანი ქუეყნად თვსად, და ვითარცა მოიწია არე გაზაფხულისაჲ, შეიქმნა სიმდიდრე წყალთაჲ ძლიერი, და მტკვარი ვერღარა ეტია ნადინებსა თვსსა, მოეფინა ველთა და წარიღო მრავალი სული, რომელი დარჩომოდა სულტანსა“ (მატიანე ქართლისაჲ 2008: 292).

ალფ-არსლანის მეორე ლაშქრობა კიდევ უფრო მძიმე შედეგებით დასრულდა საქართველოსთვის, კახეთ-ჰერეთიდან შემოსულმა მტერმა დასავლეთით სვერის ციხემდე ილაშქრა. ექვსი კვირის განმავლობაში, რომელიც სულთნის ლაშქარმა საქართველოში გაატარა, მდიდარი ქვეყანა მიწასთან გასწორდა, მოსახლეობის ნაწილი განადგურდა, ნაწილი ტყვედ იქნა წაყვანილი, ამას ზედ დაერთო ჯერ მკაცრი ზამთარი შემდეგ გაზაფხულის წყალდიდობა. მთელი რიგი პუნქტები: ხორნაბუჯი, არადეთი, გაგი, აგარანი, ქავაზინი, თბილისი, რუსთავი, ალფ-არსლანმა საქართველოდან წასვლის შემდეგ სამართავად განძის ამირას გადასცა.

ქვეყანაში შექმნილი მძიმე მდგომარეობის მიუხედავად, ბაგრატ მეოთხე აქტიურად მოქმედებს. ქართველი მემკვიდრის მიხედვით, როგორც კი ფადლონმა დაიწყო თბილისისა და მისი შემოგარენის შევიწროვება ბაგრატი გადმოვიდა

ქართლში და „ჩადგა დიდგორთა, რამეთუ საზაფხულოდ მეფეთა სადგომი არს ადგილი იგი“. ფადლონმა არაფრად მიიჩნია მეფის დიდგორში ყოფნა, 33 000 კაცით თბილისში შემოვიდა და ისნის ველზე დაბანაკდა. აქედან კი მუხრანისაკენ გაემართა და „არბივნა ქართლისა ნაპირნი“.

როგორც ჩანს, მიუხედავად იმისა, რომ ალფ-არსლანმა თბილისი, რუსთავი და ალბათ, მთელი აღმოსავლეთი საქართველო სამართავად განძის ამირას გადასცა, ბაგრატ IV თავს მაინც ერთიანი საქართველოს მეფედ თვლის. იგი ვერ ეგუება ფადლონის თბილისში დაბანაკებას და ქართლის დარბევას. ქართველ ისტორიკოსსაც უკვირს, რომ ფადლონმა მეფის დიდგორში ყოფნას ყურადღება არ მიაქცია, ისე დაბანაკდა თბილისში, ისნის ველზე 33 000-იანი ლაშქრით. როგორც კი საქართველოს მეფემ ფადლონისაგან ქართლის დარბევის ამბავი შეიტყო, მის წინააღმდეგ გაგზავნა ივანე ლიპარიტის ძე, ნიანია ქუაბულის ძე, ყუელის ერისთავი მურვან ჯაყელი და სხვა აზნაურები მცირერიცხოვანი რჩეული რაზმით. ამ ჯარმა ფადლონს ქართლში ვეღარ მიუსწრო, იგი უკან გამობრუნდა. ქართველები მტერს დაედევნენ, წილკნის კართან უკანმიმავალ ლაშქარს წამოეწივნენ, შეებნენ და პირველსავე შეტევაზე ფადლონი გააქციეს. „და მიადგა ფადლონის ლაშქარი გაქცეული ხრამსა ნარეკუავისასა, მივოცდეს და იპყრობდეს აფხაზთა მეფისა ლაშქარნი, და აღმოიგო ხრამი იგი ცხენითა და კაცითა“ (მატიანე ქართლისაჲ 2008: 293). ფადლონის გაქცეულმა ლაშქარმა ტყის საშუალებით სცადა თავის დაღწევა. გზა და გზა ქართველი მეომრები მტრის ჯარისკაცებს იჭერდნენ და ტყვედ მოჰყავდათ. „და შემოუსწრნეს წინა იწროსა ღართისასა, და მცირედნი ვინმე გაესწრნეს. და სდევნა ლაშქარმან ბაგრატისმან ვიდრე მთამდე ხერკისა. მოსრეს და ტყუე ყვეს ლაშქარი ფადლონისი“. („მატიანე ქართლისაჲ“ 2008: 293). თვითონ ფადლონი თხუთმეტიოდე ცხენოსნით ქართველებს გაექცა, წილკნის გზას გაჰყვა, არაგვს გაღმა გავიდა, აქედან კი ნარღუევის გზით ერწოში მივიდა „და თქუა თავი თვსი მოციქულად, ვითარმედ: ფადლონის მოციქული ვარ და მახარობლად მივალ აღსართანის თანა; აფხაზთა მეფის ლაშქარი გავაქციეთ“. ერთმა კაცმა ფადლონი იცნო და შეიპყრო. ფადლონმა ამ კაცს დიდძალი ოქრო-ვერცხლი და მამული შესთავაზა თუ არ დააბეზღებდა. მან ფადლონს უპასუხა: „ვერ ვიქმ საქმესა მაგას, რამეთუ მკვდრი ვარ ამის ქუეყანისაჲ, აწ ისმინე ჩემი და მომყევ თანა, და მე მიგიყვანო აღსართანის თანა, და მან გაგგზავნოს ქუეყანასა შენსა“. ამ

კაცმა ფადლონი ჟალეთში მესხ აზნაურს ისააკ ტოლოშელის ძეს მიჰგვარა. მან „გადარცუა ერი ფადლონისანი“. თვით ფადლონი შესვა ჯორზე და ბაგრატ მეფის ნაცვლად სასწრაფოდ აღსართანს მიჰგვარა თელავში. ისე რომ „არა იცენა ისაკ მკვიდრობად აფხაზთა მეფისად“. აღსართანმა ფადლონი „მსწრაფლ წარიყვანა ხორნაბუჯს, რამეთუ აფხაზთა მეფისაგან ეშინოდა უკან ჩამოდგომისა. მიუპყრეს ხორნაბუჯს ფადლონი, და მისცა ხორნაბუჯი. წარიყვანეს არადეთად და მისცა არადეთი აღსართანსვე“ („მატიანე ქართლისად“ 2008: 294).

როგორც ჩანს, ხორნაბუჯი და არადეთი ალფ-არსლანმა საქართველოდან წასვლის წინ განძის ამირას ჩააბარა. შემდგომში კი ხელსაყრელი მდგომარეობით ისარგებლა კახთა მეფემ და ეს ორი პუნქტი სასწრაფოდ ჩაიბარა ფადლონისაგან, რადგან ეშინოდა, რომ მისთვის ბაგრატ მეფეს არ დაესწრო. აღსართანი გარკვეულწილად უკმაყოფილო უნდა ყოფილიყო ალფ-არსლანისა, ეტყობა სულთანმა ისევე, როგორც თბილისის ამირას, არც მათ დაუფასა ერთგულება. ფაქტია, რომ მან ხორნაბუჯი და არადეთი საქართველოდან წასვლისას განძის ამირას გადასცა, რაც აღსართანის განაწყენებას გამოიწვევდა. უკმაყოფილო უნდა ყოფილიყო სომეხთა მეფე კვირიკეც. ალბათ, ამით აიხსნება მისი ნეიტრალური პოზიციის დაჭერა ალფ-არსლანის საქართველოში მეორე ლაშქრობის შემდგომ განვითარებულ პოლიტიკურ მოვლენებში. ყოველ შემთხვევაში, სელჩუკთა მეორე ლაშქრობის დროს ალფ-არსლანის მოკავშირეები კახთა მეფე, სომეხთა მეფე, თბილისის ამირა და განძის ამირა, სულთნის საქართველოდან წასვლის შემდეგ, „მატიანე ქართლისაჲს“ მიხედვით, შეთანხმებულად არ მოქმედებენ. უფრო მეტიც, აღსართანმა ბოჭორმისა და უჯარმის სანაცვლოდ უპრობლემოდ გადასცა ბაგრატ IV -ს განძის ამირა ფადლონი: „ხოლო ბაგრატ შეშინდა გაშუებასა ფადლონისა, მისცა ბოჭორმად და უჯარმო კახთა და წამოიყვანა ფადლონი“ („მატიანე ქართლისად“ 2008: 294) აშკარაა, რომ აღსართანს, ერთი მხრივ, არ აწყობს ფადლონის გაძლიერება, მეორეს მხრივ, კი ანგარიშს უწევს საქართველოს მეფეს და ცდილობს ისარგებლოს შექმნილი პოლიტიკური ვითარებით (ხელში ჩაიგდებს ბოჭორმას, უჯარმას, ხორნაბუჯს და არადეთს).

დატყვევებული და უმოკავშირეოდ დარჩენილი ფადლონი „გასუეს ძელსა და მიუპყრეს ტფილისსა; და აიღეს ჭირვეულად ტფილისი, რამეთუ მუნ შინა მდგომი კაცი თვთ გაამირებასა ლამობდა. და არა დაიჭირა ბაგრატ თავისად ტფილისი,

არამედ დმანისს დატყვევებული სითლარაბი ძებნა, შემოიყვანა ტფილისად და მისცა მას ტფილისი. ხოლო თავისად აღიხუნა ციხენი: რუსთავი, ფარცხისი, აგარანი, გრიგოლწმიდანი, ქავაზინი, და ორმოცდაოთხი დრაჰკანი, და მძევალნი: ძმისწული მისი, ძე მანუჩასი, და სამთა თავადთა განძისათა“ („მატიანე ქართლისაჲ“ 2008: 294). ბაგრატ IV-ისა და ფადლონის დაპირისპირება 1069 წლის გაზაფხულ-ზაფხულში, ალფ-არსლანის საქართველოდან წასვლის შემდგომ ახლო პერიოდში უნდა მომხდარიყო. ქართველი მემკვიდრის თხზულების მიხედვით, სწორედ საქართველოში ადრე გაზაფხულზე მოსული წყალდიდობის შემდეგ „იწყო ფადლონ ამპარტავანებასა და ურჯულებასა“ („მატიანე ქართლისაჲ“ 2008: 292). შ. მესხია აღნიშნავს, რომ „1069 წ. ზაფხულსა თუ შემოდგომის დამდეგს ბაგრატ IV-მ მოახერხა ფადლონის ხელში ჩაგდება“ (მესხია 1982: 243).

ქართველი მემკვიდრის ცნობიდან ირკვევა, რომ ფადლონის დაპატიმრების შემდეგ თბილისში გაამირება ვინმე ადგილობრივ მკვიდრს მოუწოდებოდა. რა თქმა უნდა, მას თავისი მომხრეები ეყოლებოდა. თავისი მოკავშირეები ეყოლებოდა განძის ამირასაც. ალბათ, მათი წინააღმდეგობის გატეხვის მიზნით გასვა ფადლონი ძელზე ბაგრატ IV-მ. როგორც ჩანს, თბილისში ერთმანეთს დაპირისპირებული რამდენიმე დაჯგუფება არსებობდა. სამწუხაროდ, ისტორიული წყაროები არავითარ ცნობებს არ გვაძლევენ, თუ რატომ არ დაიჭირა უშუალოდ თბილისი აღების შემდეგ ბაგრატმა. სავარაუდებელია, რომ სწორედ თბილისში შექმნილი დამაბული პოლიტიკური ვითარების გამო, არ შემოიერთა იგი საქართველოს მეფემ. მან ქალაქი დმანისელ სითლარაბს ჩააბარა, რომელიც, ი. ჯავახიშვილის აზრით, „მემამულე“ ე. ი. თბილისის ამირათა ჩამომავალი ყოფილა“ (ჯავახიშვილი 193: 156). შექმნილი პოლიტიკური ვითარებიდან გამომდინარე სავსებით შესაძლებელი გვეჩვენება დავასკვნათ, რომ ბაგრატ IV -ის ამ გადაწყვეტილების მიზანი იქნებოდა ერთის მხრივ, შიდა პოლიტიკური ვითარების მოგვარება თბილისში და მეორე მხრივ, თავისი გავლენის განხორციელება მასზე.

შ. მესხია მიიჩნევს, რომ სითლარაბი, რომელსაც მეფემ თბილისი ჩააბარა, არ შეიძლება, მისი მოხელე ყოფილიყო: „მეფის მიერ ქალაქში დანიშნულ მოხელეს, ქალაქის გამგებელს, ცხადია, მეფის ერთდროული თუ ყოველწლიური ხარკი არ შეიძლება მართებოდა. ასევე ძნელი წარმოსადგენია, რომ მეფეს თავისი მოხელისათვის მძევალი ჩამოერთმია. ასე რომ სითლარაბი ჯაფარიდების

„მემამულეა“ და თბილისში ამგვარადვე, მის მფლობელად, „მემამულედ“ დამკვიდრებული. მაგრამ თბილისის ამ ახალ მფლობელს ხელს ადებდა მისი დამსმელი, საქართველოს მეფე და ამით იგი თბილისზე თავის გავლენასაც ახორციელებდა. ამრიგად, 1069 წლიდან თბილისს, მის გამგებელ უზუცესებს არსებითად ორი ბატონი უჩნდებათ: ერთხელ კიდეც ამჯერად საქართველოს მეფის დახმარებით, აღსდგა თბილისში ჯაფარიდთა შთამომავლობის მფლობელობა და ამავე დროს თვით მეფის გავლენაც, მაგრამ არა დიდი ხნით- XI ს. 80-იანი წლებიდან ჯაფარიდების ეს უკანასკნელი „მემამულეც“ აღარ ჩანს. ჯაფარიდების მფლობელობის საბოლოოდ მოსპობა თბილისის მოსახლეობის ხანგრძლივი, მრავალწლოვანი ბრძოლის შედეგი იყო“ (მესხია 1982: 244-245).

თურქ-სელჩუკთა საქართველოში ლაშქრობის სიმძიმის მიუხედავად, მათ ვერ გატეხეს ბაგრატის ბრძოლისუნარიანობა. სელჩუკთა წასვლის შემდეგ საქართველოს მეფემ დაატყვევა განძის ამირა, გავლენა მოიპოვა თბილისზე, შემოიერთა სელჩუკების მიერ დაკავებული ციხე-სიმაგრეები: რუსთავი, ფარცხისი, აგარანი, გრიგლ-წმიდანი და ქავაზნი. ფადლონის დატყვევება შეიძლება ბაგრატ IV-სთან ალფ-არსლანის პოლიტიკის მარცხად მივიჩნიოთ, ვინაიდან სწორედ იგი წარმოადგენდა სულთნის მმართველობისა და ინტერესების გამტარებელს საქართველოში. სელჩუკთა სულთანმა ძალით კი არ სცადა პრობლემის მოგვარება, არამედ საქართველოს მეფესთან შუამდგომლად „სარანგი ალხაზი“ გამოგზავნა. ამის შემდეგ ბაგრატი დაეზავა ფადლონს და გაუშვა თავის ქვეყანაში, სამაგიეროდ კი გაგის ციხე ჩაიბარა: „და მოგზავნა სულტანმან სარანგი ალხაზი და მისითა შუამდგომლობითა და სიტყვთა სულტანისაჲთა დაეზავა ბაგრატ და განუტევა ფადლონ და გაგზავნა საჯელმწიფოსა თჳსსა განძას. და წარჰყვა სარანგი თანა. და მოართუნეს გაგით კლიტენი. და აღიღო აფხაზთა მეფემან გაგი“ („მატიანე ქართლისაჲ“ 2008 294-295). კონკრეტული მიზეზი, თუ რით უნდა ყოფილიყო ალფ-არსლანის ეს დიპლომატიური ქმედება გამოწვეული, ჩვენთვის უცნობია, ალბათ, მან ანგარიში გაუწია ბაგრატისა და ქართველი ხალხის, მისთვის უკვე კარგად ცნობილ წინააღმდეგობის ძალას. გარკვეული როლი უნდა ეთამაშა ასევე ურთიერთობის გამწვავებას ბიზანტიასთან. „1069 წლისთვის სელჩუკთა აკინჯიებმა აღმოსავლეთიდან, სამხრეთ აღმოსავლეთიდან და სამხრეთიდან ერთდროულად დაიწყეს თავდასხმები ანატოლიაში. ამ თავდასხმებს მეთაურობდნენ სელჩუკი

მხედართმთავრები-აფშინი, აჰმედ-შაჰი, სანდუკი და სხვები. სელჩუკებმა კონია ხელთ იგდეს და გაანადგურეს. ბიზანტიის იმპერატორმა სცადა მათი თავდასხმების შეჩერება, მაგრამ ვერაფერი მოახერხა. ისევ თვითონ ჩაუდგა სათავეში ლაშქარს, კეისარიამდე მოვიდა და მის სანახებში გამართულ ბრძოლაში სელჩუკები დაამარცხა და უკან დაახევინა; რომან დიოგენი თავისი ლაშქრის დიდი ნაწილით ეფვრატამდე მივიდა და სელჩუკები აიძულა მდინარის მარცხენა ნაპირზე გადასულიყვნენ“ (შენგელია 1968: 250). გამორიცხული არ არის, რომ ბიზანტიელთა დროებითი წარმატება სელჩუკებთან და ბაგრატ მეფის მიერ ფადლონის დატყვევება ერთმანეთს დაემთხვა. იქნებ ამიტომაც მოქმედებდა საქართველოს მეფე ასე გაბედულად და რადიკალურად. ასეთ ვითარებაში, ალფ-არსლანმა ფადლონის გათავისუფლებისათვის ბაგრატთან ძალით დაპირისპირებას, მასთან მოლაპარაკება ამჯობინა. ამ საკითხთან დაკავშირებით საინტერესო მოსაზრება გამოთქვა ზ. პაპასკირმა: „XI საუკუნის 60-იანი წლების ბოლოს, როდესაც ბაგრატმა განახორციელა თავდასხმითი ოპერაციები აღმოსავლეთ საქართველოში, ალფ-არსლანი დაკავებული იყო ბიზანტიის წინააღმდეგ გენერალური ბრძოლის მომზადებით. როგორც ჩანს, ამ გარემოებამ აიძულა სელჩუკთა სულთანი, გამოეჩინა გარკვეული სიფრთხილე ბაგრატთან ურთიერთობაში. ამის გარდა ბაგრატის დასჯა არც ისე ადვილი იყო (რაშიც სელჩუკები დარწმუნდნენ საქართველოში ორჯერ ლაშქრობის დროს), ალფ არსლანს უნდა გაეთვალა ომის დროს ბიზანტიის მხარდასაჭერად ბაგრატ IV-ის ბრძოლაზე. აქედან გამომდინარე გვაქვს საფუძველი ვიფიქროთ, რომ ალფ-არსლანის დიპლომატიური სვლა ბაგრატის მიმართ გათვლილი იყო ბიზანტიის წინააღმდეგ მომავალ ბრძოლაში, ქართველი მეფის ნეიტრალიტეტის უზრუნველყოფაზე. ამიტომ საქართველოს მეფესთან კონფრონტაცია მსხვილი სამხედრო კამპანიის წინ, სელჩუკთა მხრიდან იქნებოდა დიპლომატიური შეცდომა“ (პაპასკირი 1991: 20-24; Папаскири 2001: 92-95; Papaskiri 2010: 227-228). რა თქმა უნდა, შესაძლებელია ბიზანტია-სელჩუკების გამწვავებული ურთიერთობის დროს სულთნის ელჩს საქართველოს ნეიტრალიტეტის მიზნით, მართლაც, ეწარმოებინა სამშვიდობო მოლაპარაკება საქართველოს მეფესთან, თუმცა 1069 წლის ზაფხულ-შემოდგომაზე, როცა ბაგრატმა ფადლონი შეიპყრო, ალფ-არსლანის სამზადისი ბიზანტიის წინააღმდეგ კონკრეტულად გენერალური ბრძოლისთვის, რომელშიც პაპასკირი 1071 წლის

მანასკერტის ბრძოლას გულისხმობს (Papaskiri 2010: 227-228), საექვოდ მიგვაჩნია. საისტორიო წყაროების მიხედვით, ალფ-არსლანის მხრიდან ასეთი სამზადისი ამ დროს არ შეიმჩნევა. გენერალური ბრძოლის ორგანიზება ბიზანტიის იმპერატორმა რომან დიოგენმა გადაწყვიტა სელჩუკთა წინააღმდეგ მას შემდეგ, რაც თოდრულ-ბეგისა და ალფ-არსლანის სისტემატური თავდასხმებით მათ ანატოლიის ძირითადი ნაწილი დაიპყრეს. დიოგენის ეს გადაწყვეტილება საკმაოდ მოულოდნელი იყო ალფ-არსლანისთვის. როდესაც ეს ამბავი შეიტყო, იგი ალექოში იმყოფებოდა და ეგვიპტის დასაპყრობად ემზადებოდა. მან სამხედრო ძალების ერთი ნაწილით ალექოში თავისი შვილი დატოვა, თავისი ვასალი მირდასოღლუ მაჰმუდი ეგვიპტის დასაპყრობად გაგზავნა, ხოლო თვითონ სასწრაფოდ გამოემართა ანატოლიისაკენ და ურფაში მოვიდა... ქალაქის დუკამ სულთნის ლაშქარი სანოვაგითა და საქონლით მოამარაგა. სულთანი ურფიდანაც მალე წამოვიდა და აღმოსავლეთისაკენ განაგრძო გზა. სწრაფი მგზავრობის გამო გზაში დიდძალი საქონელი დაეხოცა. განსაკუთრებით ბევრი ცხენი და აქლემი დაეღუპა მდ. ევფრატის გადალახვისას. სიმნელეებს ქმნიდა პროდუქტის უქონლობაც (შენგელია 1968: 260). ალფ-არსლანისთვის ამ გადამწყვეტი ბრძოლის მოულოდნელობაზე მეტყველებს ისიც, რომ ბრძოლის წინ იგი არ იყო კმაყოფილი თავისი ლაშქრის ძლიერებით. ბარ ჰებრაი აღნიშნავს, რომ ალფ-არსლანი სელჩუკთა ლაშქრის რაოდენობის სიმცირის გამო აღშფოთებული იყო და ამიტომ ერთ-ერთი უფლისწული სავთეგინი რომან დიოგენს ელჩად გაუგზავნა (შენგელია 1968: 260). მათეოს ურჰაეცის ცნობით, სულთანი იმპერატორთან მეგობრობასა და მშვიდობიანობის ჩამოგდებას ითხოვდა (შენგელია 1968: 261). სელჩუკთა სულთანი, ბიზანტიელთა წინააღმდეგ გენერალური ბრძოლისთვის ჯერ კიდევ 1069 წლის ზაფხულ-შემოდგომაზე (მაშინ როდესაც საქართველოს მეფემ განძის ამირა შეიპყრო) რომ ეზრუნა, უშუალოდ ბრძოლის წინ თავისი ლაშქრით უკმაყოფილო არ იქნებოდა და არც სამშვიდობო მოლაპარაკებას შესთავაზებდა ბიზანტიის იმპერატორს. საისტორიო წყაროების მიხედვით, მანასკერტთან ბრძოლის წინ ბიზანტიის იმპერატორმა მრავალრიცხოვანი ლაშქარი შეაგროვა. იბნ ალ-ასირისა და მუნეჯიმ ბაშის მიხედვით, იმპერატორს 200 000 ჯარისკაცი მოუგროვებია; ბონდარის ცნობით- 300 000 კაცი. წყაროები ერთნაირად აღნიშნავენ დიოგენის ლაშქრის ეროვნულ სიჭრელეს. „მათე ურჰაელის ცნობით, სელჩუკ

უფლისწულთა საქმიანობით აღშფოთებულმა რომან დიოგენმა ლაშქრის შეკრება გადაწყვიტა, დასავლეთის რიგ ქვეყნებში ფირმანები დააგზავნა და გოთებისაგან, ბულგარელთაგან, შორეული კუნძულების ხალხთაგან, კაბადოკიელთაგან, ბითინიელთაგან, კილიკიელთაგან, ანტიოქიელთაგან და ტრაპიზონელთაგან უდიდესი ლაშქარი შეაგროვა. რომან დიოგენის მიერ შეგროვილი ლაშქარი მრავალფეროვანი იყო წყაროების (ჰუსეინი, ბონდარი, მუნეჯიმ ბაში) ცნობით, იგი შედგებოდა ბიზანტიელთა, რუსთა, ოღუზთა ქართველთა, ხაზართა, ფრანკთა, ქრისტიან არაბთა და სომეხთაგან“ (შენგელია 1968: 256). მათე ურჰაეცის ცნობით, არზრუმში დაბანაკებულმა რომან დიოგენმა სელჩუკებთან გადამწყვეტი ბრძოლის წინ სხვადასხვა რაიონებში დააგზავნა რაზმები. ამ დროს მას საქართველოში 22 000 ჯარისკაცი გამოუგზავნია (შენგელია 1968: 258). სამწუხაროდ წყაროები არ მიუთითებენ საქართველოში მათი გამოგზავნის კონკრეტულ მიზეზს. მათეოს ურჰაეცი ზოგადად რომან დიოგენის მიერ ანატოლიის სხვადასხვა პროვინციებში ლაშქრის დაგზავნის ერთ-ერთ მიზეზად მათი საჭირო სანოვაგით მომარაგებას ასახელებს.

ამჯერად, 1071 წლის აგვისტოში მანასკერტთან გამართული სელჩუკ-ბიზანტიელთა დიდი ომის ცალკეული დეტალების კვლევა ჩვენს მიზანს არ წარმოადგენს. ამ ბრძოლაში ბიზანტიელებმა, მიუხედავად დიდი რიცხოვრების უპირატესობისა და საგანგებო მომზადებისა, სასტიკი მარცხი განიცადეს სელჩუკებთან. თვითონ იმპერატორი მათ ტყვეობაში ჩავარდა. სელჩუკების ეს გამარჯვება უთუოდ მიუთითებს ალფ-არსლანის დიდ სამხედრო ნიჭზე. „მანასკერტთან სელჩუკების გამარჯვება ერთ-ერთი უმნიშვნელოვანესი მოვლენა იყო მათ ისტორიაში. ამიერიდან სელჩუკებს გზა ხსნილი ჰქონდათ ანატოლიის „ასათვისებლად“. მანასკერტის ბრძოლასა და მის შედეგებს უდიდესი საერთაშორისო გამოძახილი ჰქონდა თავის დროზე ისლამის სამყაროში. მანასკერტის გამარჯვებით საბოლოოდ ჩაეყარა საფუძველი ანატოლიაში სელჩუკთა დამკვიდრებას. თურქი ისტორიკოსები იმდენად დიდ მნიშვნელობას ანიჭებდნენ მანასკერტის ბრძოლას, რომ ანატოლიაში თავიანთ სამშობლოს სათავედ 1071 წელს სდებენ და თურქთა ისტორიის ახალი ხანის საწყისად მიიჩნევენ (შენგელია 1968: 268). სრულიად მართებულად შენიშნავს ზ. პაპასქირი „მანასკერტის ბრძოლა სრულიად სამართლიანად ითვლება გარდამტეხ ეტაპად სელჩუკ-ბიზანტიელთა

გლობალურ დაპირისპირებაში. ბიზანტიის იმპერიის გამანადგურებელმა მარცხმა მანასკერტის 1071 წლის ბრძოლაში, საბოლოოდ გატეხა მისი სამხედრო-პოლიტიკური ძლიერება და დიდი ხნით გადააქცია თურქ-სელჩუკები დომინირებულ ძალად ახლო აღმოსავლეთში“ (Papaskiri 2010: 227).

რაც შეეხება საქართველოში განვითარებულ მოვლენებს, განძის ამირა ფადლონმა ბაგრატის ტყვეობიდან განთავისუფლების შემდეგ საქართველოს ისევ გამოსტაცა ქავაზნი და აგარანი. ბაგრატ მეფე დასავლეთ საქართველოდან გადმოვიდა და აგარანი ფადლონს ისევ წაართვა. „შემდგომად ამისა ფადლონმან გატეხა ფიცნი და შუამდგომელობანი დიდისა სულტანისანი და მოიპარა ქავაზინი. და შემდგომად ამისა მეფე აფხაზეთს იყო, მოვიდა ფადლონ და მოადგა აგარათა; და მისცა ციხისთავმან აგარანი. და მსწრაფლ აღმოვიდა მეფე, მივიდა და მოადგა აგარათა და წარიხუნა აგარანი“ (მატიანე ქართლისაჲ 2008: 295). შემდეგ საშველად იხმო თავისი ცოლისძმა-ოსთა მეფე დორდოლელი. მათ წინ გიორგი კურაპალატი წაუმძღვარა, მოაოხრა განძა და ურიცხვი ტყვე და ნადავლი გაგზავნა თავის სამეფოში: „და გამოიყვანა დორდოლელი, ოვსთა მეფე, ორმოცი ათასითა კაცითა ოვსითა და წარუძღუნა წინაჲ მე მისი გიორგი კურაპალატი და მოაოჭრა განძა და აღიღო ტყუე და ნატყუევნი ურიცხვ და გაგზავნა თავის სამეფოდ“ (მატიანე ქართლისაჲ 2008: 295). ბაგრატისა და განძის ამირა ფადლონის კონფლიქტი საბოლოოდ ოვსთა მეფის დახმარებით ბაგრატის გამარჯვებით დამთავრდა. ეს კი ამ ეტაპზე გარკვეულწილად ალფ-არსლანის მარცხს ნიშნავდა საქართველოში. ფადლონი ხომ საქართველოში მისი ხელდებული და პოლიტიკის გამტარებელი იყო. ალბათ ფადლონის მარცხის განსაკუთრებული მნიშვნელობაც იყო ერთ-ერთ მიზეზი ქართველი და ოსი მეფეების ისეთი საზეიმო შეხვედრისა, როგორიც „ქართლის ცხოვრებაშია“ გადმოცემული: „ამისა შემდგომად აღისურვილა დიდმან ოვსთა მეფემან დორდოლელმან დისძისა მათისა ბაგრატისა სევასტოსისათჳს, და ითხოვა დარბაზობაჲ ბაგრატისგან. ხოლო ბაგრატ ნება სცა და მხიარულდ წარმოემართა ოვსთა მეფე ყოვლითა თავადითა ოვსეთისაჲთა, და აღმოვლო გზად აფხაზეთისაჲ და მოვიდა ქუთაისს, და ნახა დაჲ მათი დედოფალი, დედაჲ გიორგი კურაპალატისაჲ, რამეთუ გიორგი კურაპალატი გეზულ იყო უწინა, და მოიყვანეს ქართლს, და მეფე დგა ტინისციდის ჭალასა, ნადარბაზევს, და მოეგება წინა დიდითა ზეიმითა და პატივითა.

შეკრბეს ერთგან კეზუთა ზედა. და იყო სიხარული და ჯმაჲ ბუკთაჲ და დუმბულთა საშინელი და მიუწდომელი. და დაყვნეს ერთგან დღე თორმეტი და განისუენეს ყოვლითა განსუენებითა და სიხარულითა. და მიზეზთა ზამთრისაჲთა გაისწრაფეს. და მისცა ნიჭი და საბომვარი მეფესა და ყოველსა დიდებულსა ოვსეთისასა. გაგზავნა და წარვიდეს სიხარულითა“ (მატიანე ქართლისაჲ 2008: 295). ქართველი მემკვიდრე ქართველებისა და ოსების მიერ განძის მოოხრების თარიღს არ ასახელებს. ბაგრატ მეფეს, როგორც აღვნიშნეთ, ფადლონი 1069 წლის ზაფხულ-შემოდგომზე უნდა დაეტყველებინა. ამის შემდეგ, „მატიანე ქართლისაჲს“ მიხედვით, მოვლენები (ფადლონის გათავისუფლება, მისი ხელახალი მტრობა საქართველოს მიმართ, ბაგრატის მიერ ოსების გადმოყვანა დასახმარებლად, მათ მიერ განძის მოოხრება, დარბაზობა) ძალიან სწრაფად, ერთი მეორის მიყოლებით ვითარდება. თუ გავითვალისწინებთ იმასაც, რომ განძის აოხრების შემდგომ გამართული დარბაზობიდან წასვლა ოსებმა დიდი ზამთრის გამო იჩქარეს, მაშინ განძის აოხრების თარიღად შეიძლება 1069-1070 წლის ზამთრი მივიჩნიოთ. სანტერესოა, რომ ამჯერად ალფ-არსლანი არავითარ ღონისძიებას არ იღებს განძის ამირას დასახმარებლად. ეს შეიძლება ორი ძირითადი მიზეზით აიხსნას. პირველი, რომ ფადლონმა „გატეხა ფიცი და შუამდგომლობანი დიდისა სულტანისანი“ და მეორე, რომ ალფ-არსლანს არ სურდა ბიზანტიასთან გამწვავებული ვითარების ფონზე ბაგრატთან ურთიერთობის გაფუჭება. იგი ყველანაირად შეეცდებოდა, ბიზანტია-სელჩუკების დაპირისპირებაში შეენარჩუნებინა საქართველოს მეფის ნეიტრალური მდგომარეობა. ბაგრატიც თავის მხრივ დიპლომატიურად იყენებდა ამ მდგომარეობას და ქვეყანაში სიმშვიდეს ინარჩუნებდა. შემთხვევითი არ უნდა იყოს ქართველი მემკვიდრის ცნობა, რომ „შემდგომად ამისსა არონიებდა სულტანი მოციქულთა და უკრებდა ძლუნთა ბაგრატ მეფესა, ამოძთა ენითა სთხოვდა ხარაჯასა. ხოლო არა დაიდვა ბაგრატ მეფემან ხარაჯად, არამედ ავლენდა იგიცა მოციქულთა და უკრებდა იგიცა ძლუნსა. და იყო მათ შორის სიტყვთ სიყუარული (მატიანე ქართლისაჲ 2008: 295- 296).

XI საუკუნის 60-იანი წლებიდან, განსაკუთრებით, ალფ-არსლანის სელჩუკთა სახელმწიფოს სათავეში მოსვლის შემდეგ, ბიზანტიის სახელმწიფო იმდენადაა დასუსტებული გართულებული საშინაო და საგარეო პოლიტიკური მდგომარეობით, რომ ბაგრატ IV მას ანგარიშგასაწევ ძალად აღარ მიიჩნევს. ნ. ბერძენიშვილი

შენიშნავს, რომ ამ დროს საქართველო „ლამობდა ამიერკავკასიიდან გაემეგვებინა ბიზანტია, რომელიც „საწუნელი“ შექმნილიყო ღონემოცემულ ხელდებულისათვის“ (ბერძენიშვილი 1954: 123). საისტორიო წყაროების მონაცემებით ამ პერიოდში საქართველოს სამეფო კარის მონაწილეობა ბიზანტიელთა მხარეზე სელჩუკებთან ბრძოლაში არ შეინიშნება. მართალია, მანასკერტთან ბრძოლის წინ დიოგენის ლაშქარში ქართველებიც სახელდებიან, მაგრამ უშუალოდ ბრძოლაში ქართველების როლი,, მათი აქტიურობა გამოკვეთილი არ არის. ქართველი მემატიანე, რომელიც დაწვრილებით აღგვიწერს XI ს-ის 40-იანი წლების დასასრულს ბიზანტიელთა შემადგენლობაში ქართველთა ბრძოლას სელჩუკების წინააღმდეგ, საერთოდ დუმს მანასკერტის ბრძოლასთან დაკავშირებით. რაც გვაფიქრებინებს, რომ ქართველები, მითუმეტეს სამეფო კარი, ამ ბრძოლაში არ მონაწილეობდა. როგორც ჩანს, ბაგრატ IV-მ კარგად შეაფასა ბიზანტიის იმპერიის სისუსტე და სელჩუკების წინააღმდეგ ბრძოლაში არ ჩაება. ვფიქრობთ, ამ დიპლომატიური ქმედებით ბაგრატმა ქვეყანა იხსნა ალფ-არსლანის საქართველოში შესაძლო კიდევ ერთი ლაშქრობისაგან. მაშინ როდესაც მანასკერტის ბრძოლის შემდეგ სელჩუკებმა დაიკავეს მთელი სომხეთი, შირვანი და ანატოლიის დიდი ნაწილი, საქართველო ჯერ კიდევ დამოუკიდებლობას ინარჩუნებდა. „მატიანე ქართლისაჲს“ მიხედვით, ბაგრატი „იყო კაცი სახითა უშუენერისი ყოველთა კაცთასა, სრული სიბრძნითა, ფილოსოფოსი ენითა, სჯანი ბედითა, უმდიდრესი ყოველთა მეფეთა აფხაზეთისათა, მოწყალე შეცოდებულთათჳს, უხვ გლახაკთა ზედა. ხოლო ჟამთა მისთა ქუეყანასა დაწყნარებაჲ არა ჰქონდა: ეკლესიანი და გლეხნი, აზნაურნი და გლახაკნი ვერ იკითხვებოდეს“ („მატიანე ქართლისაჲს“ 2008: 297). ქართველი მემატიანის ამ დახასიათებაში კარგად ჩანს როგორც ბაგრატ IV-ის ფიზიკური აღნაგობა და შინაგანი ბუნება, ასევე იმ ეპოქის მძიმე ხასიათი, რომელშიც ბაგრატი ცხოვრობდა. დიმიტრი ბაქრაძე ბაგრატ IV-ს შემდეგნაირად ახასიათებს: „იმან დაამშვიდა და დაამცირა საქართველოს დიდებულნი და დაუმორჩილა სამეფო უფლებასა; დასცა განჯის მთავარნი და თბილისის ემირნი; მოითმინა ორი საზარელი კვეთება სპარსეთის მძვინვარე სულთნის არპ-ასლანისა და აღამაღლა სამეფო ისე, რომ გამოიხსნა ბიზანტიის დამოკიდებულებიდან. ბაგრატის დროდამ აფხაზთ-ქართველთ ნათესაობა დაემყარა მტკიცედ, ესე იგი იმან მოინადირა გამოჩენილი ადგილი უპირველეს იმ დროის სახელმწიფოთა აზრში“ (ბაქრაძე 1880: 55). ბაგრატი გარდაიცვალა „თუესა ნოემბერსა ოცდაოთხსა, ქრონიკონსა ორას

ოთხმოცდათორმეტსა“ (1072წ). იმავე დროს გარდაიცვალა ალფ-არსლანიც ისე, რომ „ვერღარა ცნეს ბაგრატ და სულტანმან ერთმანეთისა სიკუდილი“ („მატიანე ქართლისაჲ“ 2008: 296).

ბაგრატმა სელჩუკთა აგრესიის პირობებში დიდი ბრძოლის, გაუტეხელი ხასიათის, დიპლომატიისა და ქართველების ბრძოლისუნარიანობის წყალობით სიცოცხლის ბილმდე შეინარჩუნა ქვეყნის ეროვნული სუვერენიტეტი.

ალფ-არსლანის საქართველოში მეორე ლაშქრობასთან დაკავშირებით შეიძლება დავასკვნათ:

1. ალფ-არსლანის საქართველოში მეორე ლაშქრობის ძირითადი მიზეზი იყო ამიერკავკასიაში ერთადერთი დამოუკიდებელი ქრისტიანული ქვეყნის დამორჩილება და ბიზანტიის იმპერიისაგან მისი იზოლირება. ასევე ბაგრატ IV-სგან შევიწროვებული მუსლიმური პოლიტიკური ერთეულების დახმარება.
2. ბაგრატ IV-მ კარგად ისარგებლა ალფ-არსლანის პირველი ლაშქრობის შემდეგ დამყარებული დროებითი მშვიდობით და აქტიური პოლიტიკის გატარება დაიწყო ქვეყნის გაერთიანება-გამლიერების მიზნით. ქართველი მემკვიდრის ცნობით, ალფ-არსლანის მეორე ლაშქრობის წინ საქართველოს მეფე კახეთში, ხოლო სადრ ად-დინ ჰუსეინის მიხედვით ბარდავში იყო გალაშქრებული.
3. სელჩუკთა ლაშქარი კახეთ-ჰერეთში არანის გავლით შემოვიდა, ხოლო აქედან ქართლში სამი კვირის შემდეგ, 1068 წლის 10 დეკემბერს გადმოვიდა და ექვსი კვირის განმავლობაში სვერის ციხემდე მთელი ქვეყანა ააოხრა.
4. ქართველი მემკვიდრის მიერ დასახელებული სვერის ციხე და სადრ ად-დინ ჰუსეინის მიერ აღწერილი სალიბის (ჯვრის) ციხე, რომელიც სელჩუკებმა დიდი წინააღმდეგობის შემდეგ აიღეს, სხვადასხვა ციხეები უნდა იყოს და არა იდენტური. მიგვაჩნია, რომ სწორედ ამ ციხეების მცდარი იდენტურობის გამო ფიგურირებს ქართულ ისტორიოგრაფიაში აზრი სელჩუკების მიერ სვერის ციხის აღებასთან დაკავშირებით.
5. „მატიანე ქართლისაჲს“ მიხედვით, ალფ-არსლანს საქართველოში ლაშქრობის დროს თან ახლდნენ თბილისის ამირა, კახეთის მეფე აღსართანი და სომხეთის მეფე კვირიკე. ვფიქრობთ, ამ ლაშქრობის დროს ალფ-არსლანს თან უნდა ხლებოდა აგრეთვე განძის ამირა ფადლონი, როგორც მისი ყველაზე ერთგული მოკავშირე და დასაყრდენი.
6. სელჩუკთა სულთნის საქართველოდან წასვლის ძირითადი მიზეზი ბაგრატ მეოთხის აქტიური მოქმედება და ქართველი ხალხის დიდი წინააღმდეგობა იყო. ამას ხელი

შეუწყო აგრეთვე იმდროინდელმა დიდმა ზამთარმა. ალფ-არსლანმა ვერც ამჯერად შეძლო საქართველოს დამორჩილება.

7. ალფ-არსლანმა საქართველოდან წასვლის წინ თბილისი, რუსთავი, ასევე, ქართლის დაპყრობილი პუნქტები განძის ამირას ჩააბარა. ამ ქმედებით მან სხვა მოკავშირეები (თბილისის ამირა, კახეთის მეფე და სომეხთა მეფე) გაანაწყენა. ამ დასკვნის საშუალებას გვაძლევს ის ფაქტი, რომ სულთნის საქართველოდან წასვლის შემდეგ ბაგრატისა და ფადლონის კონფლიქტში ყოფილი მოკავშირეების მხარდაჭერა განძის ამირის მიმართ არ შეინიშნება.

8. სულთნის საქართველოდან წასვლისთანავე ბაგრატ IV აქტიურად მოქმედებს, 1069 წლის ზაფხულ - შემოდგომაზე მან შეიპყრო განძის ამირა, აღადგინა კონტროლი თბილისზე და უკან დაიბრუნა სელჩუკთა მიერ დაპყრობილი ციხე-სიმაგრეები. სავარაუდოა, რომ ამ დროს მან მოახერხა სელჩუკთა განდევნა ქვეყნის მთელი ტერიტორიიდან. საისტორიო წყაროების მიხედვით, სელჩუკთა მასობრივი არსებობა საქართველოს ტერიტორიაზე ბაგრატ IV-ის დროს არ შეინიშნება.

9. ბაგრატ IV-მ განძის ამირა ალფ-არსლანის შუამდგომლობით გაათავისუფლა, სამაგიეროდ კი გაგის ციხე ჩაიბარა. სულთნის ასეთი დიპლომატიური ქმედება ბიზანტიასთან ურთიერთობის გამწვავებით უნდა იყოს გამოწვეული. მას არ სურს ასეთ ვითარებაში ბაგრატთან ურთიერთობის გაფუჭება და ყველანაირად ცდილობს ბიზანტიისგან მის იზოლირებას. ბიზანტია-სელჩუკების გამწვავებული კონფლიქტი უნდა იყოს თავის მხრივ ბაგრატის რადიკალური მოქმედების ერთ-ერთი მიზეზი, ალფ-არსლანის საქართველოდან წასვლის შემდეგ.

10. განძის ამირა ფადლონის მიერ სამშვიდობო ზავის დარღვევის შემდეგ, საქართველოს მეფის ინიციატივით, ქართველ-ოსთა ლაშქარმა 1069-1070 წლის დეკემბერ-იანვარში განძა დალაშქრა და დიდი ნადავლით უკან დაბრუნდა. ისტორიულ წყაროებში ალფ-არსლანის დამოკიდებულება ამ მოვლენისადმი არ ჩანს. ვინაიდან განძის ამირა სელჩუკთა ხელდებული და მათი დასაყრდენი იყო. ამიტომ მისი დამარცხება, საქართველოში ალფ-არსლანის პოლიტიკის მარცხად მიგვაჩნია.

11. XI-ის 60-იანი წლებიდან ბაგრატ IV ბიზანტიისაგან დამოუკიდებელ პოლიტიკას აწარმოებს. ამ დროიდან წყაროებში აღარ შეინიშნება ქართველთა და ბიზანტიელთა ერთობლივი ბრძოლა სელჩუკების წინააღმდეგ. როგორც ჩანს, საქართველოს მეფე

კარგად ხედავს ბიზანტიის სისუსტეს და თავს არიდებს მათ გამო სელჩუკებთან ისედაც დამაბული ურთიერთობის გაუარესებას.

12. ალფ-არსლანმა ვერც მეორე ლაშქრობით შეძლო თავისი პოლიტიკის განხორციელება საქართველოში. იგი იძულებული გახდა ბაგრატ IV-სთან დიპლომატიური ურთიერთობის გზას დასდგომოდა, რასაც ამტკიცებს განძის ამირასთან დაკავშირებული პრობლემის მოლაპარაკების გზით გადაწყვეტა. არ გამოვრიცხავთ, რომ ამ მოლაპარაკების დროს გადაწყვეტილიყო ასევე ბიზანტია სელჩუკების კონფლიქტში საქართველოს ნეიტრალიტეტის საკითხი, როგორც ამას ფიქრობს ზ. პაპასქირი.

13. ბაგრატ IV-სა და ალფ-არსლანს შორის დიპლომატიური ურთიერთობის მიმანიშნებელი უნდა იყოს ქართველი მემკვიდრის სიტყვები, რომ „არონიებდა სულტანი მოციქულთა და უკრებდა ძლუნთა ბაგრატ მეფესა, ამოდთა ენითა სთხოვდა ხარაჯასა. ხოლო არა დაიდვა ბაგრატ მეფემან ხარაჯად, არამედ ავლენდა იგიცა მოციქულთა და უკრებდა იგიცა ძლუნსა. და იყო მათ შორის სიტყვთ სიყუარული“. ვფიქრობთ, სწორი დიპლომატიური ქმედების წყალობით იხსნა ბაგრატ IV-მ ქვეყანა ალფ-არსლანის შესაძლო მესამე ლაშქრობისაგან.

14. ბაგრატმა სელჩუკთა აგრესიის პირობებში დიდი ბრძოლის, გაუტეხელი ხასიათის, დიპლომატიისა და ქართველების ბრძოლისუნარიანობის წყალობით სიცოცხლის ბილომდე შეინარჩუნა ქვეყნის ეროვნული სუვერენიტეტი.

VIII თავი

აღფ-არსლანის საქართველოში ლაშქრობების შედეგები

თურქ-სელჩუკთა მასობრივი შემოსევები ამიერკავკასიაში XI ს-ის 30-იანი წლებიდან იწყება. მართალია, ამ დროს მათი ლაშქრობების ძირითადი ობიექტები აზერბაიჯანი და სომხეთი იყო, მაგრამ თავისებური უარყოფითი შედეგები მოჰქონდა საქართველოსთვისაც. ბაგრატ IV-ის მიერ თბილისის ალყის უეცარი მოხსნის მიზეზად ივანე ჯავახიშვილს, იბნ ალ-ასირის ცნობაზე დაყრდნობით, თურქ-სელჩუკთა ამიერკავკასიაში გამოჩენა მიაჩნდა (ჯავახიშვილი 1983: 142). საქართველოს მესვეურებს კარგად ჰქონდათ გაცნობიერებული, თუ რა მძიმე შედეგების მომტანი იქნებოდა სელჩუკთა მხრიდან მოსალოდნელი შემოსევები. შემთხვევითი არ უნდა იყოს, რომ ნასერ ხოსრუს „საფარ ნამეს („მოგზაურობის წიგნი“) ცნობით, 1047 წელს ეგვიპტეში ნილოსის არხის გახსნისადმი მიძღვნილ ზეიმს, სხვა ქვეყნების წარმომადგენლებთან ერთად, ქართველებიც ესწრებიან. ამ ქვეყნების საერთო მიზანი ანტისელჩუკური კოალეციის შექმნა უნდა ყოფილიყო. (ჟორჯოლიანი 1979: 63). XI საუკუნის 50-იანი წლებიდან, წყაროების მიხედვით, სელჩუკთა მარბიელი რაზმები უკვე საქართველოს ტერიტორიაზეც ჩანან. არისტაკეს ლასტივერტეცი სელჩუკთა მიერ 1054 წელს დარბეული ადგილების ჩამონათვალში საქართველოს ტერიტორიასაც ასახელებს (არისტაკეს ლასტივერტეცი 1974: 87-88). სელჩუკთა ამ ლაშქრობას უნდა ეხებოდეს ბაგრატ IV-ის მიერ 1057 წელს შიომღვიმის ლავრისთვის გაცემული შეწირულობის სიგელი, რომელშიც გადმოცემულია „წარმართთა“ მიერ შიომღვიმის მამულების აოხრება. ამ სიგელის მიხედვით, სელჩუკთა ლაშქრობით გამოწვეული შედეგების შემსუბუქების მიზნით ბაგრატ IV შიომღვიმის ლავრას გარკვეული შენაწირით დახმარებია.

სელჩუკთა მარბიელი ლაშქრობების შედეგი უნდა ყოფილიყო ერთ-ერთი მიზეზი იმ მძიმე პოლიტიკურ-ეკონომიკური მდგომარეობისა, რომელიც ხვდება 1060 წელს საქართველოში შემოსულ გიორგი მთაწმინდელს.

აღფ-არსლანის სულთნობამდე საქართველოს ტერიტორიაზე სელჩუკთა ლაშქრობას მარბიელი ხასიათი ჰქონდა, რომელიც დიდ ზიანს აყენებდა ქვეყნის ეკონომიკასა და კულტურას, თუმცა მათ ამ დროს საქართველოს მიმართ

პოლიტიკური მოთხოვნები ჯერ კიდევ არ ჰქონდათ. სელჩუკთა პოლიტიკური ინტერესი საქართველოს მიმართ გამოიკვეთა ალფ-არსლანის დროს. მის მიერ ამიერკავკასიის მიმართულებით განხორციელებული ორი ლაშქრობის ძირითადი სამიზნე საქართველო იყო. ამიტომ მისი ლაშქრობები საქართველოში განსაკუთრებული სისასტიკით და მძიმე შედეგებით გამოირჩეოდა. მიუხედავად იმისა, რომ არაბული წყაროების (სადრ ად-დინ ჰუსეინი, იბნ ალ-ასირი) მიხედვით, ალფ-არსლანი საგანგებოდ მოემზადა საქართველოში პირველი ლაშქრობათვის (1064წ.), ქართველი მემატიანის გადმოცემით ბაგრატ IV-ისა და საქართველოს მოსახლეობისათვის ეს ლაშქრობა მაინც მოულოდნელი ყოფილა. სელჩუკები საქართველოში სამხრეთიდან შემოვიდნენ. მათ დაარბიეს: ჯავახეთი, კლარჯეთი, შავშეთი, ტაო და თრიალეთი. „ამისა მეფობისა ჟამთა შინა გამოვიდა სულტანი არფასარან, მეფე სპარსეთისაჲ, დასხმის გუარად, უგრძნეულად მოვიდა და შემუსრა კანგარი და თრიალეთი. და დღესა ერთსა მარბიელმან მისმან მიუწია ყუელისყურსა, გარდავიდა შავშეთს, კლარჯეთს და ტაოს ვიდრე ფანასკერტამდე. და მასვე დღესა ჩამოუწია თორს და ღვვის ჯეკს, და თვით დადგა თრიალეთს სამ დღე“ („მატიანე ქართლისაჲ“ 2008: 289). ეს ლაშქრობა იმდენად ძლევამოსილ და მოულოდნელ ხასიათს ატარებდა, რომ ტაოდან ცოლ-შვილით მომავალი საქართველოს მეფე ძლივს გადაურჩა სულთნის მდევრებს და ქართლში გადმოვიდა: „რამეთუ მას ჟამსა მომავალ იყო მეფე ტაოთ, და თანა ჰყვანდეს დედაჲ და დაჲ და ძე მისი გიორგი; დადგრომილ იყვნეს ხეკრებულთა. და აყრისა მისსა ჟამსა მოუჭდა ლაშქარი სულტანისაჲ; მოვიდეს და წარმოდგეს ქედსა ზედა. ხოლო იგინი ჩამოესწრნეს ქართლს“ (მატიანე ქართლისაჲ 2008: 289). მტერმა განსაკუთრებული სისასტიკით ახალქალაქი ააოხრა. ამ სისასტიკეზე ერთხმად მიუთითებენ როგორც ქართული („მატიანე ქართლისაჲ“, „ცხოვრებაჲ გიორგი მთაწმინდელისაჲ“, „მირაშხანის წარწერა“), ასევე უცხოური (სადრ ად-დინ ჰუსეინი, იბნ ალ-ასირი, ჰამდალაჰ ყაზვინი, მათეოს ურჰაეცი...) საისტორიო წყაროები. იგივე წყაროების ცნობით, სელჩუკებმა ახალქალაქში უამრავი განძი და ტყვე იგდეს ხელთ. „მატიანე ქართლისაჲს“ ავტორი ახალქალაქის აოხრებას შემდეგნაირად გადმოგვცემს: „წავიდეს ჯავახეთს და მოადგეს ახალქალაქს, რამეთუ მესხნი აზნაურნი და ზემოდსა კერძისანი ძლიერად დგეს ახალქალაქს და ჰბრძოდეს სამ დღე. რამეთუ არა ზღუდითა მტკიცითა განსრულებულ იყო ახალქალაქი, ვერღარა

დაუდგმიდეს ბრძოლითა ძლიერითა. აღიჭურნეს მყოფნი ქალაქისანი და განახუნეს კარნი და შეეზნეს ძლიერად, მოსრნეს პირითა მახვლისაჲთა. და შევიდეს ქალაქად თურქნი და ტყვე ყვნეს ურიცხჳნი სულნი ქრისტიანეთანი, აღიღეს განძი და ტყუე ძლიერი, და შეიღება წყალი ახალქალაქისაჲ სისხლითა“ („მატიანე ქართლისაჲ“ 2008: 289). ქართველი მემკვიდრე შეუდარებელი მეტაფორით გამოხატავს ახალქალაქის აოხრებით გამოწვეულ უმძიმეს შედეგს: „შეიღება წყალი ახალქალაქისაჲ სისხლითა“. ალფ-არსლანის ეს ლაშქრობა თანაბრად მძიმე აღმოჩნდა ყველა სოციალური ფენისთვის. გიორგი მცირეს სიტყვით, ამ დროს „არათუ ახალქალაქისა ოდენ მკვდრნი მოისრნეს, არამედ დიდ-დიდნი და წარჩინებულნი მთავარნი და ერისთავნი სამეუფოჲსა ჩუენისანი ძვრ-ძვრათ მოისრნეს და წარწყმდეს“ (გიორგი მცირე 1967: 174). სელჩუკთა პირველ ლაშქრობა იმდენად მძიმე შედეგებით დამთავრებულა, რომ, როგორც ჩანს, გიორგი მთაწმინდელის ბიოგრაფს ეზარება ამ ფაქტების დაწვრილებით აღწერა, ამიტომაც წერს: „მოიწია რისხვაჲ იგი უგრძნეულად, რომელსა ყოველნი მეცნიერ ხართ“ (გიორგი მცირე 1967: 174). მისივე ცნობით, სელჩუკთა ამ ლაშქრობას თვით გაუტეხელი ბაგრატ IV-ც კი ისეთ სასოწარკვეთაში ჩაუგდია, რომ მასთან სანუგეშებლად მისულ გიორგი მთაწმინდელისათვის უთქვამს: „უკეთუმცა არმეხილვა სიწმიდე შენი, კნინდამცადა მწუხარებისა მიერ მომკვდარ ვიყავო.“ (გიორგი მცირე 1967: 174).

„მირაშხანის წარწერის“ მიხედვით, ალფ-არსლანის ლაშქრობით გამოწვეული შედეგები იმდენად მძიმე ყოფილა, რომ ავტორი თავის თავს ცოდვილს უწოდებს. სელჩუკებს მთელი ჯავახეთი, განსაკუთრებით კი ახალქალაქი აუოხრებიათ და მოსახლეობა ტყვედ წაუყვანიათ. ამ დროს მესხი აზნაურები ახალქალაქში მდგარან. ფარსმანს მეფისთვის პირობა არ გაუტეხია, იგი მოუკლავთ და ყველანი გაუწყვეტიათ: „ჟ მე, გიორგაჲ ფრიად ცოდვილს. მეწიფა მოვიდა ჯავახეთს და შეჰრისხ[ა] [ყ]ოველი ყოველს ქრისტესდა. მეტად ახალქალაქი[თ] წაიღო ას[წყ]უიდა და ტყუედ წაი[ღო], ყოველი მესხი აზნაური შიგნ დგა. ფარსმან პირ-ექ[მ]ნ[ა] მეფეს. მოკლეს და ყოველი ასწყუიდ[ეს]“ (სილოგავა 2000: 203).

ალფ-არსლანის ამ პირველი შემოსევებით ყველაზე მეტად სამხრეთ საქართველო დაზარალდა, მაგრამ თურქთა დაუნდობლობისა და სისასტიკის ხმა მთელ საქართველოს მოედო. სამხრეთ საქართველოდან ლტოლვილი მოსახლეობა,

რომელიც ქართლის შიდა რაიონებს აფარებდა თავს, შიშის გრძნობას ავრცელებდა და მთელი ქვეყანა თავდაცვისათვის ემზადებოდა (ლორთქიფანიძე 1979: 199). ამ ფაქტის გამოძახილი უნდა იყოს შიდა ქართლში, სოფელ თრეხვის მახლობლად, მიუვალ ადგილზე, ლეონტი მროველის თაოსნობით ქვაბების მშენებლობა ჯერ კიდევ ალფ-არსლანის გამოჩენამდე. თრეხვის წარწერა მოგვითხრობს: „მე, ლეონტი მროველმან, დიდითა მოჭირვებითა აღვაშენე ესე ქუაბი ხატისათჳს ღმრთაებისა და დღესა ჭირისასა ნავთსაყუდელად რუისისა საყდრისა შვილთათჳს, ჟამთა შინა ალფარსლან სულტანისაგან ოჯრობისადა. ქრონიკონსა სპვ“ (1066წ.) (გაფრინდაშვილი 1961: 246). რა თქმა უნდა, რუისის საეპისკოპოსო ერთადერთი არ იქნებოდა, რომელიც საიმედო თავშესაფარისთვის ზრუნავდა როგორც ფიზიკური, ისე კულტურული მემკვიდრეობის გადასარჩენად. რუისის მაგალითზე შეიძლება განვაზოგადოთ ის რთული მდგომარეობა, რაც ალფ-არსლანის ლაშქრობებმა გამოიწვია საქართველოში. ამ წარწერიდან ჩანს, რომ ქართული ეკლესია სწორად აფასებდა შექმნილ ვითარებას და უაღრესად მძიმე პირობებში ქრისტიანობისა და ეროვნული დამოუკიდებლობის დაცვისათვის რთულ სამშენებლო მოღვაწეობას ეწეოდა.

მეტად დრამატულია ის სურათი, რომელსაც სომეხი ისტორიკოსი მათეოს ურჰაეცი (XI-XII სს.) აღწერს ახალქალაქის აღებასთან დაკავშირებით. აბასლანმა (ე. ი. ალფ-არსლანმა), წერს იგი-„სასტიკი ბრძოლებით ალყა შემოარტყა ახალქალაქს, როელიც იერიშით აიღო. მან უმოწყალოდ მახვილით მოსრა მთელი ქალაქი. კაცები, ქალები, ყველა მღვდელი, მონაზონი და მთავარი. მთელი ქალაქი სისხლით მორწყო. სპარსეთში ტყვედ წაიყვანა უამრავი ჭაბუკი და გოგონა, ხელთ იგდო უამრავი ოქრო-ვერცხლი და თვალ-მარგალიტი“ (სილოგავა 2000: 236). სადრ ად-დინ ჰუსეინისა და იბნ ალ-ასირის მიხედვით, სელჩუკებმა ახალქალაქი ააოხრეს და მთლიანად გადაწვეს. მათივე ცნობით, ალფ-არსლანის ლაშქარმა იმდენი ნადავლი ჩაიგდო ხელში, რომლის დათვლა შეუძლებელია. თითქმის ყველა წყარო, რომელიც ამიერკავკასიაში ალფ-არსლანის პირველ ლაშქრობას ეხება, მიუთითებს საქართველოდან უამრავი ტყვის გაყვანის ფაქტზე, თუმცა მათი კონკრეტული რაოდენობა არსად არ სახელდება. შ. ლომსაძის აზრით, მათი რაოდენობა 80 000-ზე ნაკლები არ უნდა ყოფილიყო (ლომსაძე 1992: 152). სელჩუკთა მთავარი ამოცანა იყო გამარჯვების შემდეგ ადგილობრივი მშვიდობიანი მოსახლეობის აყრა-გადასახლება

და მათ ადგილზე მომთაბარე თურქმენი ტომების დასახლება. წყაროთა უქონლობის გამო შეუძლებელი ხდება ქართველი ტყვეების შემდგომი ისტორიის კვლევა. ამ მხრივ გამონაკლისია ქართველი ფეოდალი ბეშკენი. XIII-XIV საუკუნეების ირანელი ისტორიკოსის ცნობით: „...სულთანმა ალბარსლანმა საქართველოზე გამოილაშქრა. ბრძოლის შემდეგ იმ ადგილის მმართველმა ბაგრატ გიორგის ძემ სულთანთან ზავი დასდო. საქართველოს ზოგი ამირათაგანი სულტანს ტყვედ ჩაუვარდა. ზოგმა მუსლიმანობა მიიღო. ერთი იმათაგანი ბეშთეგინი იყო. მონის საყელოს ნაცვლად (სულთანმა) მას ცხენის ნალი გაუკეთა ყურში. მისი შთამომავლობაც აგრეთვე ატარებს ყურში დიდ რგოლს. ქალაქი ვერავი უწყალობა მას (ალბარსლანმა) და ეს ქალაქი ამჟამად ბეშთეგინად არის ცნობილი“ (ჰამდალლაჰ ყაზვინი 1937: 27).

როგორც ჩანს, ბეშკენი ერთ-ერთი სამხედრო ტყვეა, რომელმაც სელჩუკთა ერთგულებით, დიდი ნიჭისა და უნარის წყალობით, იქტას საფუძველზე სამხრეთ აზერბაიჯანში ქალაქი ვარავი მიიღო. შემდგომში ამ ქალაქს ბიშქინი დარქმევია.

ბეშკენის მაგალითით შეიძლება ვივარაუდოთ, რომ სამხრეთ საქართველოდან გაყვანილ ტყვეთა უმრავლესობა ალფ-არსლანმა სამხრეთ აზერბაიჯანში, ახარისა და ვარავის ოლქებში დაასახლა. რაც შეეხება საქართველოში უცხო ტომთა ჩამოსახლებას, უნდა ითქვას, რომ ამ დროს მათი კვალი, წყაროების მიხედვით, არ შეინიშნება.

კიდევ უფრო მძიმე შედეგების მომტანი აღმოჩნდა საქართველოსთვის ალფ-არსლანის მეორე ლაშქრობა, რომელიც სელჩუკთა სულთანმა კახეთ-ჰერეთის მხრიდან განახორციელა. სადრ ად-დინ ჰუსეინის ცნობით, სულთანმა კახეთში ტყიანი ადგილნი გადააწვევინა, რომ უფრო ადვილად ემოქმედა ადგილობრივი მოსახლეობის წინააღმდეგ: „მაქს გარს ერტყა მუხნარი და ტყიანი ადგილები, რომლებზედაც ურუმთა და აფხაზთა ყაჩაღები და ქურდები იმალებოდნენ. სულთანმა მენავთეებს უბრძანა, რათა ეს ჭაობიანი და ჭოჭი ადგილები გადაეწვათ“ (სადრ ად-დინ ჰუსეინი 1976: 192). ამის შემდეგ სელჩუკებმა ყველა ციხე სათითაოდ დაიპყრეს, მთელი ეს მხარე მიწასთან გაასწორეს და ხელში აურაცხელი სიმდიდრე ჩაიგდეს: „სულთანმა ამ ქვეყნის ყველა მხარეში მდებარე ციხეები სათითაოდ დაიპყრო, აიღო მთელი ეს ქვეყანა და რაც კი იპოვა, ყველაფერი გაანადგურა. იმდენი სიმდიდრე ჩაიგდო ხელში, მისი აღწერა შეუძლებელია“ (სადრ ად-დინ

ჰუსეინი 1976: 192-193). ქართველი მემატიანის ცნობით, ბაგრატ IV-ის შევიწროვების გამო კავკასიაში გახიზნული კახეთის მეფე ალფ-არსლანს ეახლა, მუსლიმანობა მიიღო და მორჩილება გამოუცხადა. ვფიქრობთ, აღსართანის ეს ნაბიჯი ბაგრატის მტრობასთან ერთად სელჩუკთა კახეთში ლაშქრობის მძიმე შედეგებით უნდა ყოფილიყო გამოწვეული. ალფ-არსლანი კახეთში სამი კვირა დარჩა. რა თქმა უნდა, სელჩუკთა მრავალრიცხოვანი ლაშქრისთვის ეს დრო საკმარისი იქნებოდა ამ მხარის ასოხრებლად და ნადავლის ხელში ჩასაგდებად.

კახეთის განადგურების შემდეგ სულთანმა ქართლის მიმართულებით გამოილაშქრა. „მატიანე ქართლისაჲს“ მიხედვით, მას თან ახლდნენ თბილისის ამირა, კახეთის მეფე აღსართანი და სომეხთა მეფე კვირიკე. სავარაუდებელია, რომ ალფ-არსლანთან ერთად იქნებოდა აგრეთვე მისი ყველაზე ერთგული დასაყრდენი ამიერკავკასიაში განძის ამირა ფადლონი. სადრ ად-დინ ჰუსეინის ცნობით, სულთანმა თავის ლაშქარს თავისუფლად მოქმედების უფლება მისცა. მათ თბილისამდე მთელი ქვეყანა მოაოხრეს. შემდეგ თბილისიც დაიპყრეს და იქ ერთი მეჩეთი ააშენეს: „სულთანი გამოემართა აფხაზთა მეფე ბაგრატის წინააღმდეგ და თავის ჯარებს მისცა თავისუფლება ამ ვილაიეთებში, რომ ეხოცათ და გაენადგურებინათ. ამგვარად, ბოლოს თბილისში ჩამოვიდა. სულთანმა ეს ქალაქიც დაიპყრო და იქ ერთი ჯამე გააშენებინა (სადრ ად-დინ ჰუსეინი 1976: 193). ამის შემდეგ ალფ-არსლანმა და მისმა მოკავშირეებმა 500 000-იანი ლაშქრით მთელი ქართლი მოაოხრეს, დასავლეთ საქართველოში გადავიდნენ და სვერის ციხემდე ილაშქრეს. სელჩუკთა ლაშქრობამდე ქართლი ღვინით და პურით მდიდარი ყოფილა, მაგრამ ექვსი კვირის განმავლობაში მათ მთელი ქვეყანა მიწასთან გაუსწორებიათ, ვისაც მთაში გახიზვნა მოუსწრია, მკაცრი ზამთარისგან დაღუპულა. ქართველი მემატიანე ამ ამბავს ასე მოგვითხრობს; „და იყო ქართლსა შინა პური და ღვინოჲ. და დაყო ექუსი კვრაჲ, და იწყო ოჯრებად და ჯოცად კაცისა, და გარდავიდა მარბიელი მისი არგუეთს. მიუწიეს და დაარბივეს ვიდრე სუერის ციხემდე. და მოისრა ურიცხჳ სული ქრისტიანეთაჳ და ტყუე იქმნა; და იქმნა საძაგელ ქუეყანაჲ ქართლისაჲ სახილველად კაცთა. მოოჯრდეს ყოველნი ეკლესიანი და სიმრავლითა მძორღსაითა არღარა დაედგმოდეს ქუეყანასა თვალნი. და ცოდვათა ჩუენთა მოსაგებელსა რისხვასა ღმრთისასა ზეცით ცაჲ წამებდა, და სისხლის მწვმელი ღრუბელი აღმოსავლეთით მოეფინა ქართლსა ზედა. და იქმნა

ღამე უკუნი, ვითარცა ნათელი დღისაჲ. და იყო ხილვაი მისი საშინელი და შემადრწუნებელი, და არე-არე სისხლის წვმაჲ ეხილვა კაცთა. და იქმნა ზამთარი სასტიკი; რომელი გარდაეხუენა ზამთარსა და მიმართა მთათა, მოსწყდა იგიცა სიფიცხისაგან ზამთრისა. ხოლო ყოველსა ქართლსა შინა დადგა ლაშქარი“ (მატიანე ქართლისაჲ 2008: 292-293). ალფ-არსლანის მეორე ლაშქრობის დროს სელჩუკთა ხელში გადავიდა თბილისი, რუსთავი, ხორნაბუჯი, არადეთი, გაგი, აგარანი, ქავაზინი და სხვა პუნქტები, რომლებიც სელჩუკთა სულთანმა განძის ამირა ფადლონს გადასცა. თუმცა ბაგრატ IV-მ მოახერხა ალფ-არსლანის საქართველოდან წასვლის შემდეგ ამ პუნქტებზე კონტროლის აღდგენა.

სელჩუკთა ლაშქრობები კავკასიაში ალფ-არსლანამდე ძირითადად სომხეთისა და აზერბაიჯანის ტერიტორიებზე მიმდინარეობდა და მისი უარყოფითი შედეგები მარბიელი ლაშქრობის სახით, მხოლოდ საქართველოს განაპირა მხარეებს ეხებოდა. ალფ-არსლანის დროს კი ორი საგანგებო ლაშქრობა მოეწყო საქართველოში. ამ ლაშქრობების დროს მოიშალა ქვეყნის ეკონომიკა, გაიძარცვა და განადგურდა მოსახლეობა, შეფერხდა და გარკვეული დროით გადაიდო წარმატებით დაწყებული საქართველოს პოლიტიკური გაერთიანება.

„მომთაბარე სელჩუკები სრულიად განსხვავდებოდნენ არაბებისა და ბიზანტიელებისაგან. ისინი დაპყრობილ ტერიტორიაზე სახლდებოდნენ და მეურნეობისათვის საჭირო მიწებს იკავებდნენ. სელჩუკების მეჯოგურ მომთაბარული მეურნეობა, შეუთავსებელი იყო ქართული ფეოდალური მეურნეობისათვის. პრიმიტიული მეურნეობა მკვიდრდებოდა მტკვრის, ალაზნის, ივრისა და არეზის სანაპირო ჭალებზე. მაღალგანვითარებული კულტურები (ბაღ-ვენახები, პურეული და სხვ. კულტურები) ადგილს უთმობდა საძოვრებს. თურქსელჩუკთა დაპყრობები გაცილებით უფრო დამანგრეველი და დამღუპველი იყო, ვიდრე არაბთა ან ბიზანტიელთა შემოსევები და ბატონობა. „თურქობა“ საქართველოს ფეოდალურ მეურნეობას საფუძველს-მიწას აცლიდა და მას გადაშენების საფრთხეს უქმნიდა. ასე შეფერხდა საქართველოსა და საერთოდ კავკასიის გაერთიანება-ცენტრალიზაციის პროგრესული საქმე“ (მეტრეველი 1990: 74).

ალფ-არსლანის ლაშქრობების დროს ქართველებმა, დიდი ზარალის მიუხედავად, არ მისცეს თურქულ ტომებს საქართველოს ტერიტორიაზე

მასობრივად გადმოსახლების საშუალება, შეინარჩუნეს სახელმწიფოებრივი ორგანიზაცია და პოლიტიკური დამოუკიდებლობა. მართალია, ალ-არსლანმა ორგზის ლაშქრობით საკმაოდ შეაფერხა ქვეყნის შემდგომი პოლიტიკურ-ეკონომიკური განვითარება, მაგრამ მან ვერ მიაღწია მთავარ მიზანს, ვერ შეძლო ამიერკავკასიაში ერთადერთი დამოუკიდებელი ქრისტიანული ქვეყნის დამორჩილება-დახარკვა. შეიძლება ითქვას, რომ ალფ-არსლანის წარმატებული პოლიტიკის ფონზე საქართველოს მეფე ბაგრატ IV ერთ-ერთი იშვიათი გამონაკლითაგანია, რომლის წინააღმდეგობის დაძლევაც ვერ შეძლო და მასთან დიპლომატიური ურთიერთობის გზას დაადგა. „არონიებდა სულტანი მოციქულთა და უკრებდა ძლუნთა ბაგრატ მეფესა, ამოძთა ენითა სთხოვდა ხარაჯასა. ხოლო არა დაიდვა ბაგრატ მეფემან ხარაჯად, არამედ ავლენდა იგიცა მოციქულთა და უკრებდა იგიცა ძლუნსა. და იყო მათ შორის სიტყვთ სიყუარული.“- წერს ქართველი მემკვიდრე. ამავე მემკვიდრის ცნობით, ალფ-არსლანი და ბაგრატ IV ისე გარდაიცვალენ, რომ „ვერღარა ცნეს ბაგრატ და სულტანმან ერთმანეთისა სიკუდილი“ (მატიანე ქართლისაჲ 2008: 296). ქართველი მემკვიდრის ამ ფრაზაში სიმბოლურად ჩანს ალფ-არსლანისა და ბაგრატ IV-ის მეტოქეობა, დიპლომატიური ურთიერთობა და თანაბარი პიროვნული ძლიერება. მართალია, ალფ-არსლანმა ვერ შეძლო საქართველოს პოლიტიკური დამორჩილება, მაგრამ თავისი ლაშქრობებით ქვეყანა დაასუსტა და კარგი ფონი შეუქმნა შემდგომი აგრესიისათვის თავის შვილს, სელჩუკთა მომდევნო სულთანს, მალიქ-შაჰს. შეიძლება ითქვას, რომ ალფ-არსლანის ლაშქრობებმა გარკვეული წინაპირობა შექმნა საქართველოში შემდგომდროინდელი დიდი თურქობისათვის.“ საქართველოს მეფის გიორგი II-ის (1072-1089 წწ.) დროს ქვეყანაში პოლიტიკური ვითარება კიდევ უფრო გართულდა. განსაკუთრებით გაუარესდა მდგომარეობა 1080 წლიდან, როდესაც დაიწყო „დიდი თურქობა“. თუ ბაგრატ IV ახერხებდა თურქ-სელჩუკების საქართველოდან განდევნას და არ აძლევდა თურქმანულ ტომებს აქ დასახლების საშუალებას, ამიერიდან სელჩუკები ყოველწლიურად გაზაფხულიდან ზამთრის დადგომამდე თარეშობდნენ ქვეყანაში. ისინი მოდიოდნენ თავიანთი ოჯახებითა და ჯოგებით, სახლდებოდნენ დაპყრობილ მიწა-წყალზე და სამეურნეოდ ვარგის მთელ ფართობებს საძოვრებად აქცევდნენ. ბინადარი მოსახლეობა კი მთებსა და ხეობებში იხიზნებოდა. საფრთხე ემუქრებოდა ქართველი ხალხის ეთნიკურ სახესაც.

დავითის ისტორიკოსი ასე დადმოგვცემს შექმნილ ვითარებას: „და განგრძელდა ესევეთარი ჭირი ქრისტიანეთა ზედა; რამეთუ არესა თანა გაზაფხულისასა მოვიდიან თურქნი და მათვე პირველთა საქმეთაებრ იქმოდინ, და ზამთრით წარვიდიან. და არა იყო ჟამთა შინა თესვაჲ და მკაჲ; მოოჭრდა ქუეყანაჲ და ტყვედ გარდაიქცა; ნაცვლად კაცთა მხეცნი და ნადირნი ველისანი დაემკვდრეს მას შინა; და იყო ჭირი მოუთმენელი ყოველთა ზედა მკვდრთა ქუეყანისათა, შეუსწორებელი და აღმატებული ოდესმე ყოფილთა და სმენილთა გარდასრულთა ოჭრებათასა“ („ცხოვრებაჲ მეფეთ-მეფისა დავითისი“ 2008: 303). ხარკის გადახდა, რომელიც ეროვნული დამოუკიდებლობის შენარჩუნების მიზნით ბაგრატ IV -ს შეუძლებლად მიაჩნდა, გიორგი II ისათვის სათხოვნელი შეიქმნა. იგი 1083 წელს ეახლა მალიქ შაჰს, მორჩილება გამოუცხადა და ყოველწლიური ხარკის საფასურად ზავი და მშვიდობა ითხოვა.

ამრიგად, ალფ-არსლანის საქართველოში ორგზის ლაშქრობა მძიმე შედეგებით დასრულდა. პირველი ლაშქრობის დროს სელჩუკებმა სამხრეთ საქართველო, ხოლო მეორე ლაშქრობის დროს კახეთ-ჰერეთი, ქართლი და დასავლეთ საქართველოს ნაწილი (სვერის ციხემდე) ააოხრეს. მათ საქართველოში უამრავი სიმდიდრე და ტყვე იგდეს ხელთ. მოსახლეობის ნაწილი სელჩუკთა წინააღმდეგ ბრძოლას შეეწირა. შეფერხდა ქვეყნის ეკონომიკური და პოლიტიკური განვითარება. რამდენიმე ხნით გადაიდო საქართველოსა და საერთოდ კავკასიის გაერთიანების საკითხი. მიუხედავად დიდი ზარალისა, ალფ-არსლანის ლაშქრობების დროს ქართველმა ხალხმა შეძლო სელჩუკთა ბატონობის თავიდან აცილება და სახელმწიფოებრიობის შენარჩუნება.

დასკვნა

1. თურქ-სელჩუკთა სახელმწიფოსა და მისი საქართველოსთან ურთიერთობის შესახებ საგულისხმო ცნობებია დაცული ქართულ, სომხურ, არაბულ, სირიულ, ბიზანტიურ და სხვა საისტორიო წყაროებში. იგივე წყაროები მოგვითხრობენ ალფ-არსლანის საქართველოში ლაშქრობების შესახებ.

2. სომხური წყაროების (არწრუნი, მათეოს ურჰაეცი, სამუელ ანეცი, ვარდან დიდი) მონაცემებით სელჩუკები ამიერკავკასიაში 1016-1021 წლებში გამოჩნდნენ.

თურქი მეცნიერის იანინჩის გამოკვლევით, როდესაც თურქ-სელჩუკები ნახჭევანთან აღმოჩნდნენ 1018-1021 წლებში, დაიწყეს ქართველთა ქვეყნის მარცვა. სელჩუკთა წინააღმდეგ გამოვიდა ლიპარიტი 5 000 მებრძოლით, მაგრამ ძალები არ ეყო და გაიქცა, ხოლო მთელი ტერიტორია გასანადგურებლად სელჩუკებს დაუტოვა (Yinanç 1944: 36). 1018-1021 წლებში სელჩუკთა მიერ საქართველოს მარცვა სინამდვილეს არ უნდა შეესაბამებოდეს. ქართულ, ბიზანტიურ, არაბულ და სხვა საისტორიო წყაროებში ამ პერიოდში ქართველთა და სელჩუკთა რაიმენაირი ურთიერთობის დამადასტურებელი ცნობები არ მოგვეპოვება.

3. ქართული დოკუმენტური წყაროს ცნობით: 1029 წელს „აქა ბაგრატ კურაპალატი სულტანსა დაესხა“ (ქორდანია 1892: 169). მუნეჯიმ ბაშის ცნობით, ამავე წელს სელჩუკები აზერბაიჯანში შევიდნენ და ბევრი რაიონი გაანადგურეს (შენგელია 1968: 172). ვფიქრობთ, ქართველების სელჩუკებზე თავდასხმა აზერბაიჯანის ტერიტორიაზე მოხდა. როგორც ჩანს, სამეფო კარზე კარგად აცნობიერებდნენ თუ რა მძიმე შედეგები მოჰყვებოდა საქართველოსთვის სელჩუკების დამკვიდრებას სომხეთ-აზერბაიჯანში.

4. ბაგრატ IV -ის მიერ თბილისის ალყის უეცარი მოხსნის მიზეზად 1039-1040 წლებში ი. ჯავახიშვილს, იბნ-ალ-ასირის ცნობაზე დაყრდნობით, თურქ-სელჩუკთა ამიერკავკასიაში გამოჩენა მიაჩნდა (ჯავახიშვილი 1983: 142). თუ ი. ჯავახიშვილის ამ მოსაზრებას დავეთანხმებით, საქართველოში ამ დროს სელჩუკებს უკვე გარკვეულ ანგარიშს უწევენ.

5. „მატიანე ქართლისაჲს“ მიხედვით. 1047 წელს ლიპარიტი აწყობს ლაშქრობას დვინში თურქ-სელჩუკების წინააღმდეგ ბიზანტიელთა დასახმარებლად. ერთი წლის შემდეგ ლიპარიტი თავისი ჯარით კვლავ ეხმარება ბიზანტიას სელჩუკთა წინააღმდეგ

ბრძოლაში. ამ ომში ბერძენ-ქართველთა ლაშქარი დამარცხდა და ლიპარიტი ტყვედ ჩავარდა („მატიანე ქართლისაჲ“ 2008: 286). ქართველი მემკვიდრის ამ ცნობას ადასტურებს ბერძნული, სომხური, არაბული და სირიული წყაროები.

6. 1049 წელს სომხეთში სელჩუკთა დიდ ლაშქრობაზე საუბრობს არისტაკეს ლასტივერტეცი.(არისტაკეს ლასტივერტეცი 1974: 75) შესაძლებელია, ამ დროს გამოჩნდნენ ისინი განძაში. „მატიანე ქართლისაჲ“ ცნობით, იბრაჰიმ იინალის ანატოლიაში გამარჯვების შემდეგ სელჩუკები განძას მოადგნენ. ბიზანტიის კეისარმა სარდალი ლიხტური გამოგზავნა დიდი ლაშქრით, მას შეუერთდა ბაგრატ მეფეც, რომელიც, ალბათ, კეისრის გულის მოგებას ცდილობდა. თურქებმა თავი აარიდეს გაერთიანებულ ჯართან შებრძოლებას და განძა დატოვეს („მატიანე ქართლისაჲ“ 2008: 286).

7. არისტაკეს ლასტივერტეცის ცნობით, 1054 წელს სელჩუკებმა სულთან თოდრულ-ბეგის სარდლობით კვლავ ილაშქრეს ამიერკავკასიაში. მის მიერ ჩამოთვლილ დარბეული ტერიტორიების შემადგენლობაში საქართველოც შედის (არისტაკეს ლასტივერტეცი 1974: 87-88). ამიერკავკასიაში სელჩუკთა ლაშქრობას 1054-1055 წლებით ათარიღებენ მათეოს ურჰაეცი და მუნეჯიმ ბაში. (შენგელია 1968: 202-203).

8. თურქ-სელჩუკთა საქართველოში ლაშქრობას ეხება ბაგრატ IV-ის მიერ 1057 წელს შიომღვიმის ლავრისთვის შეწირულობის სიგელი (ენუქიძე...1984: 35-36). ამ სიგელში მოტანილ ცნობას წარმართთა მიერ შიომღვიმის ლავრის მამულების აოხრების შესახებ თ. ჟორდანიას მიაწერს თოდრულ ბეგის ამიერკავკასიაში 1050-1053 წლებში ლაშქრობას. ჩვენ უფრო სარწმუნოდ მიგვაჩნია ამ მამულების აოხრება სელჩუკთა ამიერკავკასიაში 1054 წლის ლაშქრობის დროს.

9. ბიზანტიის კეისარ კონსტანტინე X დუკას (1059-1067) დროს საქართველოში თურქ-სელჩუკთა დიდ ლაშქრობაზე მიუთითებს გიორგი კედრენე (კედრანე 1963: 82). მისი „ხრონოგრაფიის“ პერიოდისა და კონსტანტინე X დუკას მეფობის წლების გათვალისწინებით, ეს ლაშქრობა შეიძლება 1059 წლით დავათარილოთ. ამ პერიოდში სელჩუკთა ანატოლიაში დიდ ლაშქრობაზე მოგვითხრობს თურქი ისტორიკოსი იანინჩი. (Yinanç 1944: 52-56). სწორედ ამ დროს უნდა მომხდარიყო ბიზანტიიდან საქართველოსკენ მომავალი სახმელეთო გზის დაკეტვა, რომელსაც აღნიშნავს გიორგი მთაწმინდელის ბიოგრაფი გიორგი მცირე. ვფიქრობთ, იმ მძიმე პოლიტიკურ-ეკონომიკური მდგომარეობის ერთ-ერთი მიზეზი, რომელიც გიორგი მთაწმინდელს

საქართველოში 1060 წელს მოსვლის დროს დახვდა, თურქ-სელჩუკთა ზემოაღნიშნული ლაშქრობა უნდა ყოფილიყო.

10. ქართულ წყაროებში, ბაგრატ მეოთხის მიერ 1057 წელს შიომღვიმის ლავრისთვის შეწირულობის სიგელის გარდა, სელჩუკების შემოსევები საქართველოში ალფ-არსლანის ლაშქრობებამდე არ გვხვდება. აღნიშნული ფაქტი უცხოურ წყაროებში გადმოცემული სელჩუკების საქართველოში ლაშქრობების ხასიათის გაანალიზებასთან ერთად იძლევა საშუალებას, რომ ვივარაუდოთ: XI საუკუნის 30-იანი წლებიდან არლფ-არსლანის სულთნობამდე ამიერკავკასიაში სელჩუკთა ლაშქრობების ძირითადი ობიექტი აზერბაიჯანისა და სომხეთის ტერიტორია იყო, რაც თავისებურ უარყოფით გავლენას ახდენდა საქართველოს პოლიტიკურ მდგომარეობაზე. ხშირი იყო სელჩუკთა მარბიელი ხასიათის შემოსევები უშუალოდ საქართველოს ტერიტორიაზეც. დიდი ზიანი ადგებოდა ქვეყნის ეკონომიკასა და კულტურას. ამ დროს პოლიტიკური მოთხოვნები თურქ-სელჩუკებს საქართველოს მიმართ ჯერ კიდევ არ ჰქონდათ.

11. XI საუკუნის 60-იანი წლებისათვის ბაგრატ IV-მ მოახერხა ქვეყნის შიგნით მშვიდობის დამყარება, ძლიერი ფეოდალების აბაზასძეთა და ბაღვაშთა დროებითი დამხობა, აგრეთვე ძირითადი ქართული მიწების გაერთიანება. ვფიქრობთ, აბაზასძეებისა და ბაღვაშთა დამარცხების შემდეგ უნდა მომხდარიყო ერისთავ ფარსმან თმოგველის გაერთგულება მეფისადმი. შემთხვევითი არ უნდა იყოს, რომ იგი „მატიანე ქართლისაჲს“ მიხედვით XI საუკუნის 40-იან წლებში ბაგრატ IV-ის მოწინააღმდეგეთა ბანაკშია, ხოლო ახალქალაქის აოხრების დროს (1064წ.), „მირაშხანის წარწერის მიხედვით“ მეფის ერთგულია და მეციხოვნეთა რიგებში იღუპება.

12. დიდ სელჩუკთა სახელმწიფოს ფუძემდებლის თოდრულ-ბეგის გარდაცვალების შემდეგ სულთნის ტახტი დაიკავა ალფ-არსლანმა (1063-1072). იბნ ალ-ასირის მიხედვით, იგი 424 (1032/3), რავენდის მიხედვით, კი 431 (1039/40)წელს დაიბადა. ალფ-არსლანი, ქართულ-ბერძნულ-სომხური წყაროების მიხედვით, უარყოფით, ხოლო არაბულ-სპარსულ-ოსმალური წყაროების მიხედვით, დადებით პიროვნებად ხასიათდება.

13. ხელისუფლების განმტკიცებისთანავე ალფ-არსლანმა დაიწყო ლაშქრობა ანატოლიისა და ამიერკავკასიის მიმართულებით. ამ ლაშქრობის მთავარი მიზანი აღმავლობის გზაზე დამდგარი საქართველოს დაპყრობა, ბაგრატ მეფის დამორჩილება და მისი ბიზანტიის იმპერიისაგან იზოლირება უნდა ყოფილიყო. ალფ-არსლანის

საქართველოში უშუალო ლაშქრობა ამ ქვეყნისადმი განსაკუთრებულ ინტერესზე მიუთითებს.

14. პირველი ლაშქრობა ალფ-არსლანმა სამხრეთ საქართველოს მიმართულებით განახორციელა. სელჩუკებმა დაარბიეს კანგარი, თრიალეთი, ყუელისყური, შავშეთი, კლარჯეთი ტაო და ქართველების დიდი წინააღმდეგობის მიუხედავად (რომელსაც ერთხმად აღნიშნავენ როგორც ქართული, ასევე უცხოური წყაროები), მიწასთან გაასწორეს ახალქალაქი. მტერმა ამ ბრძოლაში უამრავი ტყვე და ნადავლი იგდო ხელთ. დაუსრულებელი გალავნის გარდა ახალქალაქის მცველების დამარცხების მიზეზი, ვფიქრობთ, ისევე როგორც ქართველი ხალხის მთელი ისტორიის უმრავლეს შემთხვევაში, აქაც მტრის რიცხოვნობა უპირატესობა უნდა გამხდარიყო. სომეხი ისტორიკოსის ვარდან დიდის მიხედვით ახალქალაქის აღების დროს ალფ-არსლანს 100 000 კაციანი ლაშქარი ჰყავდა (www.vostlit.info Восточная литература, Авторы и источники на букву „В“ - Вардан Великий, часть-3).

15. საისტორიო წყაროების ანალიზის, ურთიერთშედარებისა და ისტორიოგრაფიული მონაცემების მიხედვით ალფ-არსლანის საქართველოში პირველი ლაშქრობა და ახალქალაქის აოხრება შეიძლება, 1064 წლის ზაფხულით დავათარილოთ.

16. სამხრეთ საქართველოს პროვინციების დარბევა და ახალქალაქის აოხრება არ ნიშნავს ამ მხარის, მითუმეტეს მთელი საქართველოს დამორჩილებას. სადრ ად-დინ ჰუსეინის ცნობა, რომლის მიხედვით ბაგრატმა ალფ-არსლანის სასარგებლოდ ხარკი იკისრა (სადრ ად-დინ ჰუსეინი 1976: 190) ქართულ-სომხურ-ბიზანტიური წყაროებით არ დასტურდება. უფრო სწორი უნდა იყოს ამ პერიოდის თანამედროვე ქართველი მემატიანის ცნობა, რომლის მიხედვით, ახალქალაქის აოხრების შემდეგ ალფ-არსლანმა ბაგრატ IV-ს ელჩი გაუგზავნა მშვიდობა შესთავაზა და დისშვილი სთხოვა ცოლად. შემდეგ კი ანისისკენ გაილაშქრა („მატიანე ქართლისაჲ“ 2008: 289). ალბათ, ქართველთა დიდმა წინააღმდეგობამ აიძულა იგი, უარი ეთქვა ქვეყნის სიღრმეში ლაშქრობაზე. ამ საქმეში გარკვეული როლი უნდა შეესრულებინა ბაგრატის თანხმობას და შემდგომ აქტიურ მოქმედებას თავისი დისშვილის სულთანზე გათხოვებასთან დაკავშირებით.

17. საქართველოს მეფე ახალქალაქის აოხრების შემდეგ საკმაოდ აქტიურად მოქმედებს. გართულებული პოლიტიკური მდგომარეობის მიუხედავად, მან შეძლო სომეხთა დამორჩილება და სამშვილდის შემოერთება. შემდეგ კი თავისი ასული მართა ბერძენთა მეფეზე გაათხოვა, დისშვილი კი სელჩუკთა სულთან ალფ-არსლანზე. ბაგრāti

ცდილობდა, სულთანთან ნორმალური ურთიერთობა ჰქონოდა, მასთან დამოყვრებით იგი ქვეყანაში მშვიდობის შენარჩუნებას ცდილობდა.

18. „მატიანე ქართლისაჲს“ მხედვით, ბაგრატის დისშვილისა და ალფ-არსლანის ქორწინება შეიძლება 1065 წლით დავათარილოთ. მართალია, ქართველი მემატიანე პირდაპირ არ მიუთითებს ამ თარიღს, მაგრამ იგი ალფ-არსლანის საქართველოში მეორე ლაშქრობის თარიღად 1068 წელს ასახელებს. ამავე დროს მიუთითებს, რომ ეს ლაშქრობა მოხდა ბაგრატის დისწულის ალფ-არსლანზე გათხოვებიდან „შემდგომად სამისა წლისა“ („მატიანე ქართლისაჲს“ 2008: 290-291). ამავე თარიღს ასახელებს ვახუშტი ბატონიშვილიც (ვახუშტი ბატონიშვილი 1973: 150). ბაგრატის აქტიური მოქმედებიდან გამომდინარეც, ლოგიკურად, ეს ქორწინება ახალქალაქის აოხრების შემდგომ ახლო პერიოდში, ყოველ შემთხვევაში 1065 წელზე გვიან არ უნდა მომხდარიყო.

19. ალფ-არსლანმა ანატოლიისა და ამიერკავკასიის მიმართულებით, პირველი ლაშქრობის დროს, სასტიკად დაარბია სამხრეთი საქართველო, მიწასთან გაასწორა ახალქალაქი, ხელთ იგდო უამრავი სიმდიდრე და ტყვე, შეაჩერა წარმატებით დაწყებული ფეოდალური გაერთიანების პროცესი, მაგრამ მან ვერ შეასრულა ძირითადი ამოცანა. საქართველომ დიდი მსხვერპლის ფასად შეინარჩუნა მთავარი-სახელმწიფოებრიობა და ეროვნული დამოუკიდებლობა.

20. ბაგრატ IV-მ კარგად ისარგებლა ალფ-არსლანის პირველი ლაშქრობის შემდეგ დამყარებული დროებითი სიმშვიდით და აქტიური პოლიტიკის გატარება დაიწყო ქვეყნის გაერთიანება-გამლიერების მიზნით. ქართველი მემატიანის ცნობით, ალფ-არსლანის მეორე ლაშქრობის წინ საქართველოს მეფე კახეთში (მატიანე ქართლისაჲს 2008: 290-291), ხოლო სადრ ად-დინ ჰუსეინის მიხედვით, ბარდავში იყო გალაშქრებული (სადრ ად-დინ ჰუსეინი 1976: 192).

21. ალფ-არსლანის საქართველოში მეორე ლაშქრობის ძირითადი მიზეზი იყო პირველი ლაშქრობის დროს შეუსრულებელი ამოცანის განხორციელება, ანუ ამიერკავკასიაში ერთადერთი დამოუკიდებელი ქრისტიანული ქვეყნის დახარკვა-დამორჩილება. ასევე ბაგრატ IV -სგან შევიწროვებული მუსლიმური პოლიტიკური ერთეულების დახმარება.

22. მეორე ლაშქრობის დროს სელჩუკთა ლაშქარი არანის გავლით შემოვიდა კახეთ-ჰერეთში. მტერი კახეთიდან ქართლში სამი კვირის შემდეგ 1068 წლის 10 დეკემბერს გადმოვიდა და ექვსი კვირის განმავლობაში დაარბია როგორც აღმოსავლეთი, ასევე დასავლეთი საქართველო სვერის ციხემდე. კახეთიდან ქართლში ლაშქრობის დროს

ალფ-არსლანს, „მატიანე ქართლისაჲს“ მიხედვით, თან ახლდნენ კახეთის მეფე აღსართანი (იგი ალფ-არსლანს კახეთში ლაშქრობის დროს ეახლა, მუსლიმოზა მიიღო და მორჩილება გამოუცხადა), სომხეთის მეფე კვირიკე და თბილისის ამირა („მატიანე ქართლისაჲს“ 2008: 291) ვფიქრობთ, ალფ-არსლანს უნდა ხლებოდა აგრეთვე განძის ამირა ფადლონი, როგორც მისი ყველაზე ერთგული მოკავშირე.

23. ქართველი მემატიანის მიერ დასახელებული სვერის ციხე და სადრ ად-დინ ჰუსეინის მიერ აღწერილი სალიბის (ჯვრის) ციხე, რომელიც სელჩუკებმა დიდი წინააღმდეგობის შედეგად აიღეს, სხვადასხვა ციხეები უნდა იყოს და არა იდენტური. მიგვაჩნია, რომ სწორედ ამ ციხეების მცდარი იდენტურობის გამო ფიგურირებს ქართულ ისტორიოგრაფიაში აზრი სელჩუკების მიერ სვერის ციხის აღებასთან დაკავშირებით.

24. დიდი მცდელობის მიუხედავად, მეორე ლაშქრობის დროსაც, სელჩუკთა სულთანმა ისე დატოვა საქართველო, რომ ბაგრატ მეფისაგან ხარკის გადახდას ვერ მიაღწია. მისი საქართველოდან წასვლის ძირითადი მიზეზი ქართველების დიდი წინააღმდეგობა და იმდროინდელი მკაცრი ზამთარი უნდა ყოფილიყო.

25. ალფ-არსლანმა საქართველოდან წასვლის წინ თბილისი და რუსთავი, ასევე ქართლის დაპყრობილი პუნქტები, განძის ამირას ჩააბარა. ამ ქმედებით მან სხვა მოკავშირეები (თბილისის ამირა, კახეთის მეფე და სომეხთა მეფე) გაანაწყენა. ამ დასკვნის საშუალებას გვაძლევს ის ფაქტი, რომ სულთნის საქართველოდან წასვლის შემდეგ ბაგრატისა და ფადლონის კონფლიქტში ყოფილი მოკავშირეების მხარდაჭერა განძის ამირის მიმართ არ შეინიშნება.

26. სულთნის საქართველოდან წასვლისთანავე ბაგრატ IV აქტიურად მოქმედებს, 1069 წლის ზაფხულ-შემოდგომაზე მან შეიპყრო განძის ამირა, აღადგინა კონტროლი თბილისზე და უკან დაიბრუნა სელჩუკთა მიერ დაპყრობილი ციხე-სიმაგრეები. სავარაუდოა, რომ ამ დროს მან მოახერხა სელჩუკთა განდევნა ქვეყნის მთელი ტერიტორიიდან. საისტორიო წყაროების მიხედვით, სელჩუკთა მასობრივი არსებობა საქართველოს ტერიტორიაზე ბაგრატ IV-ის დროს არ შეინიშნება.

27. ბაგრატ IV-მ განძის ამირა ალფ-არსლანის შუამდგომლობით გაათავისუფლა, სამაგიეროდ კი გაგის ციხე ჩაიბარა. სულთნის დიპლომატიური ქმედება ბიზანტიასთან ურთიერთობის გამწვავებით უნდა იყოს გამოწვეული. მას არ სურს ბგრატთან ურთიერთობის გაფუჭება და მასთან მშვიდობიან მოლაპარაკებას აწარმოებს (ძალის

გამოყენებით ბაგრატის დამორჩილების უპერსპექტიოებაში იგი საქართველოში ორგზის ლაშქრობით უნდა დარწმუნებულიყო). ბიზანტია-სელჩუკების გამწვავებული კონფლიქტი უნდა იყოს, თავის მხრივ, ბაგრატის რადიკალური მოქმედების ერთ-ერთი მიზეზი, ალფ-არსლანის საქართველოდან წასვლის შემდეგ.

28. განძის ამირა ფადლონის მიერ სამშვიდობო ზავის დარღვევის შემდეგ საქართველოს მეფის ინიციატივით ქართველ-ოსთა ლაშქარმა განძა დალაშქრა და დიდი ნადავლით უკან დაბრუნდა. ვფიქრობთ, ეს ლაშქრობა 1069-1070 წლის ზამთარში უნდა მომხდარიყო. საისტორიო წყაროებში ალფ-არსლანის დამოკიდებულება ამ მოვლენისადმი არ ჩანს. ვინაიდან განძის ამირა სელჩუკთა ხელდებული და საყრდენი იყო, ამიტომ მისი დამარცხება, საქართველოში ალფ-არსლანის პოლიტიკის მარცხად მიგვაჩნია.

29. XI ს-ის 60-იანი წლებიდან ბაგრატ IV ბიზანტიისაგან დამოუკიდებელ პოლიტიკას აწარმოებს. ამ დროიდან წყაროებში აღარ შეინიშნება ქართველთა და ბიზანტიელთა ერთობლივი ბრძოლა სელჩუკების წინააღმდეგ. როგორც ჩანს, საქართველოს მეფე კარგად ხედავს ბიზანტიის სისუსტეს და თავს არიდებს მათ გამო სელჩუკებთან ისედაც დამაბული ურთიერთობის გაუარესებას.

30. ბაგრატ IV-სა და ალფ-არსლანს შორის დიპლომატიური ურთიერთობის მიმანიშნებელი უნდა იყოს ქართველი მემატიანის სიტყვები, რომ „არონიებდა სულტანი მოციქულთა და უკრებდა ძლუნთა ბაგრატ მეფესა, ამოდთა ენითა სთხოვდა ხარაჯასა. ხოლო არა დაიდვა ბაგრატ მეფემან ხარაჯად, ავლენდა იგიცა მოციქულთა და უკრებდა იგიცა ძლუნსა. და იყო მათ შორის სიტყვთ სიყუარული“ („მატიანე ქართლისაჲ“ 2008: 295-296). ვფიქრობთ, სწორი დიპლომატიით იხსნა ბაგრატ IV-მ ქვეყანა ალფ-არსლანის შესაძლო მესამე ლაშქრობისაგან.

31. „მატიანე ქართლისაჲს“ მიხედვით, ალფ-არსლანი და ბაგრატ IV ისე გარდაიცვალნენ, რომ „ვერღარა ცნეს ბაგრატ და სულტანმან ერთმანეთისა სიკუდილი“ (მატიანე ქართლისაჲ 2008: 296). ქართველი მემატიანის ამ ფრაზაში სიმბოლურად ჩანს ალფ-არსლანისა და ბაგრატ IV-ის მეტოქეობა, დიპლომატიური ურთიერთობა და თანაბარი პიროვნული ძლიერება. შეიძლება ითქვას, რომ ალფ-არსლანის წარმატებული პოლიტიკის ფონზე ბაგრატ IV ერთადერთი გამონაკლისია, რომლის წინააღმდეგობის დაძლევაც ვერ შეძლო და მასთან დიპლომატიური ურთიერთობის გზას დაადგა.

32. სელჩუკთა ლაშქრობების მძიმე შედეგების მიუხედავად, საქართველოს მეფე ბაგრატ IV-მ დიდი ბრძოლის, მტკიცე ხასიათის, დიპლომატიისა და ქართველების ბრძოლისუნარიანობის წყალობით სიცოცხლის ბოლომდე შეინარჩუნა ქვეყნის ეროვნული დამოუკიდებლობა.

ალფ-არსლანის ლაშქრობების დროს ქართველი ხალხის თავდადებული ბრძოლა ერთ-ერთი გმირული ფურცელია, საქართველოს ეროვნული დამოუკიდებლობისათვის ბრძოლის მრავალსაუკუნოვან ისტორიაში.

გამოყენებული წყაროები და ლიტერატურა

1. აბდალაძე 1988: აბდალაძე ა., ამიერკავკასიის პოლიტიკურ ერთეულთა ურთიერთობა IX-XI საუკუნეებში, თბ., 1988.
2. აბდალაძე 1979: აბდალაძე ა., სომხური წყაროები, წიგნში -საქართველოს ისტორიის ნარკვევები, ტ. III, თბ., 1979.
3. ანონიმი ავტორი 2003: ანონიმი ავტორი, ანატოლიის სელჩუკთა სახელმწიფოს ისტორია, ნოდარ შენგელიას წიგნში: სელჩუკები და საქართველო XI საუკუნის უკანასკნელი მეოთხედი XIII საუკუნე, თბ., 2003.
4. არისტაკეს ლასტივერტეცი 1974: არისტაკეს ლასტივერტეცი, ისტორია, ქართული თარგმანი გამოკვლევით, კომენტარებითა და საძიებლებით გამოსცა ე. ცაგარეიშვილმა, თბ., 1974.
5. ატალიატე მიხეილ 1966: ატალიატე მიხეილ, ისტორია, გეორგიკა, ბიზანტიელი მწერლების ცნობები საქართველოს შესახებ, ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. VI, თბ., 1966.
6. აფციაური 1980: აფციაური ჯ., გიორგი მცირის „გიორგი მთაწმინდელის ცხოვრება“ თბ., 1980.
7. აფრასიძე 1984: აფრასიძე გ., საქართველოს შუა საუკუნეების ქალაქები (XI-XII სს), თბ., 1984.
8. ბაქრაძე 1880: ბაქრაძე დ., საქართველოს მეფე ბაგრატ IV, 1027-1072, ტფ., 1880.
9. ბერძენიშვილი 1954: ბერძენიშვილი ნ., საქართველოს რუსეთთან შეერთების ისტორიული მნიშვნელობისათვის, „მნათობი“, №6, თბ., 1954.
10. ბერძენიშვილი 1965: ბერძენიშვილი ნ., კლასობრივი და შინაკლასობრივი ბრძოლის გამოვლინება საქართველოს საგარეო-პოლიტიკურ ურთიერთობაში, საქართველოს ისტორიის საკითხები, ტ. II, თბ., 1965.
11. ბერძენიშვილი 1964: ბერძენიშვილი ნ., ჯავახეთის 1933 წლის დღიური, საქართველოს ისტორიის საკითხები, ტ. I, თბ., 1964.
12. ბერძენიშვილი 1971: ბერძენიშვილი ნ., საქართველოს რუსეთთან შეერთების ისტორიული მნიშვნელობისათვის, საქართველოს ისტორიის საკითხები, ტ. V, თბ., 1971.

13. ბერძენიშვილი 1985: ბერძენიშვილი დ., ნარკვევები საქართველოს ისტორიული გეოგრაფიიდან, თბ., 1985.
14. გაბაშვილი 1968: გაბაშვილი ვ., საქართველო-ეგვიპტის ურთიერთობის ისტორიიდან (XI-XII სს), XII საუკუნის საქართველოს ისტორიის საკითხები, თბ., 1968.
15. გაბაშვილი 1957: გაბაშვილი ვ., ნარკვევები მახლობელი აღმოსავლეთის ისტორიიდან (ფეოდალური ხანა), თბ., 1957.
16. გაფრინდაშვილი 1953: გაფრინდაშვილი გ., ახალი ნავარძიევის წარწერა, „მეცნიერება და ტექნიკა“, №9, თბ., 1953.
17. გაფრინდაშვილი 1961: გაფრინდაშვილი გ., ლეონტი მროველის 1066 წლის სამშენებლო წარწერა თრეხვის ქვაბებიდან „საქართველოს მეცნიერებათა აკადემიის საზოგადოებრივ მეცნიერებათა განყოფილების მოამბე“, №1, თბ., 1961.
18. გაფრინდაშვილი 1964: გაფრინდაშვილი გ., ისტორიული ჯავახეთის გამოქვაბულები, კრ. „მეგლის მეგობარი“, №3, თბ., 1964.
19. გვერდწითელი 1947: გვერდწითელი რ., ზედა თმოგვის ეკლესიის წარწერები, „საქართველოს სახელმწიფო მუზეუმის მოამბე“, ტ. XIV-B, თბ., 1947.
20. გიორგი მცირე 1967: გიორგი მცირე, „ცხოვრება გიორგი მთაწმინდელისა“ ძველი ქართული აგიოგრაფიული ლიტერატურის ძეგლები, წიგნი II (XI-XII სს.), ილია აბულაძის რედაქციით, თბ., 1967.
21. დარჩიაშვილი 1982: დარჩიაშვილი შ., სომხური ლაპიდარული წარწერები და „მატიანე ქართლისას“ ერთი ცნობა, თსუ შრომები, ისტორია, ხელოვნებათმცოდნეობა, ეთნოგრაფია, თბ., 1982.
22. ენუქიძე... 1984: ქართული ისტორიული საბუთების კორპუსი, შეადგინეს და გამოსაცემად მოამზადეს თ. ენუქიძემ, ვ. სილოგავამ, ნ. შოშიაშვილმა, თბ., 1984.
23. ვარდან არაველეცი 2002: ვარდან არაველეცი, მსოფლიო ისტორია, ძველი სომხურიდან თარგმნეს ნოდარ შოშიაშვილმა და ეკა კვაჭანტირაძემ, შესავალი, კომენტარები და საძიებლები დაურთო ეკა კვაჭანტირაძემ, თბ., 2002.
24. ვახუშტი ბატონიშვილი 1773: ვახუშტი ბატონიშვილი, აღწერა სამეფოსა საქართველოსა, ქართლის ცხოვრება, ტ. IV, თბ., 1973.
25. ვრიენიოსი 1966: ვრიენიოსი ნიკიფორე, ისტორიული მასალები, გეორგიკა, ბიზანტიელი მწერლების ცნობები საქართველოს შესახებ, ტექსტები ქართული

თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. VI, თბ., 1966.

26. ზაქარაია 2002: ზაქარაია პ., ქართულ ციხე-სიმაგრეთა ისტორია, თბ., 2002.

27. ზონარა 1966: ზონარა იოანე, ისტორია, გეორგიკა, ბიზანტიელი მწერლების ცნობები საქართველოს შესახებ, ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. VI, თბ., 1966.

28. თოფურია 1963: თოფურია პ., მასალები ბეშქენიანთა ქართული დინასტიის ისტორიისათვის, მახლობელი აღმოსავლეთის ისტორიის საკითხები, თბ., 1963.

29. კედრენე 1963: კედრენე გიორგი, ისტორიული მიმოხილვა, გეორგიკა, ბიზანტიელი მწერლების ცნობები საქართველოს შესახებ, ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. V, თბ., 1963.

30. კიკნაძე 1958: კიკნაძე რ., არაბული და სპარსული ისტორიული წყაროები XI-XIII საუკუნეების თბილისის შესახებ, „ცისკარი“, №10, თბ., 1958.

31. კიკნაძე 1960: კიკნაძე რ., XI-XII საუკუნეების თბილისის ისტორიიდან (აღმოსავლური წყაროების მიხედვით), ი. ჯავახიშვილის სახელობის ისტორიის ინსტიტუტის შრომები, ტ. V, ნაკვ. I, თბ., 1960.

32. კომნენე 1966: კომნენე ანა, ალექსიადა, ისტორიული მიმოხილვა, გეორგიკა, ბიზანტიელი მწერლების ცნობები საქართველოს შესახებ, ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. VI, თბ., 1966.

33. კოპალიანი 1962: კოპალიანი ვ., ამიერკავკასიის ხალხთა ურთიერთობის წარსულიდან, თბ., 1962

34. კოპალიანი 1969: კოპალიანი ვ., საქართველოსა და ბიზანტიის პოლიტიკური ურთიერთობა 970-1070 წლებში, თბ., 1969.

35. ლომსაძე 1992: ლომსაძე შ. სელჩუკთა პირველი შემოსევები და ბეშქენიდები, „მნათობი“, №3, თბ., 1992.

36. ლორთქიფანიძე 1979: ლორთქიფანიძე მ., საქართველოს შინაპოლიტიკური და საგარეო ვითარება X ს-ის 80-იანი წლებიდან XI ს-ის 80-იან წლებამდე. წიგნში საქართველოს ისტორიის ნარკვევები, ტ. III, თბ., 1979.

37. მათე ურჭაელი 1971: მათე ურჭაელი, ისტორია, ქართული თარგმანი ე. ცაგარეიშვილისა, სომხური წყაროები საქართველო ბიზანტიის ურთიერთობის შესახებ X-XI საუკუნეებში, კრ. მრავალთავი, ტ. II, თბ., 1971.
38. მატიაწე ქართლისაჲ 2008: მატიაწე ქართლისაჲ, ქართლის ცხოვრება, მთავარი რედაქტორი რ. მეტრეველი. თბ., 2008.
39. მაჭავარიანი 1897: მაჭავარიანი ი., არაბულ და სპარსელ მწერალთა გეოგრაფიული და ისტორიული ცნობანი საქართველოს შესახებ, „მომბე“, №12. თბ., 1897.
40. მაჭავარიანი 1898: მაჭავარიანი ი., არაბულ და სპარსელ მწერალთა გეოგრაფიული და ისტორიული ცნობანი საქართველოს შესახებ, „მომბე“, №1, თბ., 1898.
41. მესხია 1982: მესხია შ., საისტორიო ძიებანი, ტ. I, თბ., 1982.
42. მესხია 1983: მესხია შ., საისტორიო ძიებანი, ტ. II, თბ., 1983.
43. მეტრეველი 1978: მეტრეველი რ., დიდნი საქმენი, თბ., 1978.
44. მეტრეველი 1990: მეტრეველი რ., დავით IV აღმაშენებელი, თბ., 1990.
45. მეტრეველი 1988: მეტრეველი რ., და მოვიდეს ვარანგნი..., თბ., 1988.
46. მეტრეველი 2002: მეტრეველი რ., დავით IV აღმაშენებელი; მეფე თამარი თბ., 2002.
47. მეტრეველი 1998: მეტრეველი ე., ათონის ქართველთა მონასტრის სააღაპე წიგნი, თბ., 1998.
48. მხითარ აირივანეცი 1990: მხითარ აირივანეცი, ქრონოგრაფიული ისტორია, ძველი სომხურიდან თარგმნა, შესავალი, შენიშვნები და საძიებელი დაურთო ლიანა დავლიანიძე-ტატიშვილმა, თბ., 1990.
49. ორბელიანი 1993: ორბელიანი სულხან-საბა, სიტყვის კონა, თბ., 1993.
50. პაპასქირი 1990: პაპასქირი ზ., ერთიანი ქართული ფეოდალური სახელმწიფოს წარმოქმნა და საქართველოს საგარეო-პოლიტიკური მდგომარეობის ზოგიერთი საკითხი, თბ., 1990.
51. პაპასქირი 1991: პაპასქირი ზ., შუა საუკუნეების საქართველო საერთაშორისო არენაზე, თბ., 1991.
52. პაპასქირი 2009: პაპასქირი ზ., და აღმოცისკრდა საქართველო ნიკოფსიიდან დარუბანდამდე, თბ., 2009.

53. ჟორდანია 1892: ქრონიკები და სხვა მასალა საქართველოს ისტორიისა და მწერლობისა, შეკრებილი, ქრონოლოგიურად დაწყობილი და ახსნილი თ. ჟორდანიას მიერ ტ. I, ტბ., 1892.
54. ჟორჟოლიანი 1979: ჟორჟოლიანი გ., ერთი ცნობა ნასერ ხოსრუს „საფარ ნამედან“, საქართველოს ისტორიის აღმოსავლური მასალები, წიგნი III, თბ., 1979.
55. სადრ ად-დინ ჰუსეინი 1976: სადრ ად-დინ ჰუსეინი, ალფ-არსლანის საქართველოსა და ამიერკავკასიის ქვეყნებში ლაშქრობის შესახებ, ძიებანი საქართველოსა და კავკასიის ისტორიიდან, ტექსტი ქართული თარგმანით გამოსცა და შენიშვნები დაურთო ნ. შენგელიამ, თბ., 1976.
56. სამუშია 2006: სამუშია ჯ., ბაგრატ IV-ისა და ლიპარიტ ბაღვაშის კონფლიქტის გამომწვევი მიზეზების შესახებ, ექვთიმე თაყაიშვილის სახელობის საქართველოს საისტორიო საზოგადოება აფხაზეთის ორგანიზაცია, საისტორიო ძიებანი, 8-9, თბ., 2006.
57. სამუშია 2003: სამუშია ჯ., ბიზანტიურ-ქართულ-სომხური სამხედრო კოალიცია თურქ-სელჩუკთა წინააღმდეგ, ივ. ჯავახიშვილის სახელობის თბილისის სახელმწიფო უნივერსიტეტის შრომები, 349, ისტორია, არქეოლოგია, ხელოვნებათმცოდნეობა, ეთნოლოგია, თბ., 2003.
58. სვანიძე 1999: სვანიძე მ., ოსმალეთის ისტორია, თბ., 1999.
59. სილაგაძე 1991: სილაგაძე ბ., არაბთა ბატონობა საქართველოში, თბ., 1991.
60. სილაგაძე 1971: სილაგაძე ბ., იბნ ალ-ასირის თხზულების „თარხ ალ-ქამილის“ ერთი ადგილის დადგენისათვის, ქართული წყაროთმცოდნეობა, ტ. III, თბ., 1971.
61. სილაგაძე 1979: სილაგაძე ბ., არაბული წყაროები, წიგნში საქართველოს ისტორიის ნარკვევები, ტ. III, თბ., 1979.
62. სილოგავა 2000: სილოგავა ვ., ერთი ეპიგრაფიკული ძეგლი თურქ-სელჩუკთა შემოსევების შესახებ XI ს-ის საქართველოში, კრ. ასპინძა სამცხისა და ჯავახეთის საზღვარზე, ახალციხე, 2000.
63. სილოგავა 1992: სილოგავა ვ., შესავალი ლექცია სპეცკურსისა „ქართლის ცხოვრება“ ახალციხე 1992.
64. სკილეცს გამგრძელებელი 1966: სკილეცს გამგრძელებელი, გეორგიკა, ბიზანტიელი მწერლების ცნობები საქართველოს შესახებ, ტექსტები ქართული

- თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. VI, თბ., 1966.
65. სტეფანოზ სივნიეთის ეპისკოპოსი 1971: სტეფანოს სივნიეთის ეპისკოპოსი, სივნიეთის სახლის ისტორია, ქართული თარგმანი ე. ცაგარეიშვილისა, სომხური წყაროები საქართველო-ბიზანტიის ურთიერთობის შესახებ X-XI საუკუნეებში, კრ. მრავალთავი, ტ. II, თბ., 1971.
66. სტეფანოზ ორბელიანი 1978: სტეფანოზ ორბელიანი, ცხოვრება ორბელიანთა, ძველი ქართული თარგმანები, ქართულ-სომხური ტექსტები გამოსაცემად მოამზადა, შესავალი და საძიებლები დაურთო ე. ცაგარეიშვილმა, თბ., 1978.
67. სუმბატ სპარაპეტი 1971: სუმბატ სპარაპეტი, მატიაზე, ქართული თარგმანი ე. ცაგარეიშვილისა, სომხური წყაროები საქართველო ბიზანტიის ურთიერთობის შესახებ X-XI საუკუნეებში, კრ. მრავალთავი, ტ. II, თბ., 1971.
68. ტაბატაძე 1979: ტაბატაძე კ., სპარსული წყაროები, წიგნში საქართველოს ისტორიის ნარკვევები, ტ. III, თბ., 1979.
69. ყაუხჩიშვილი 1963: გეორგიკა, ბიზანტიელი მწერლების ცნობები საქართველოს შესახებ, ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. V, თბ., 1963.
70. ყაუხჩიშვილი 1966: გეორგიკა, ბიზანტიელი მწერლების ცნობები საქართველოს შესახებ, ტექსტები ქართული თარგმანითურთ გამოსცა და განმარტებები დაურთო სიმონ ყაუხჩიშვილმა, ტ. VI, თბ., 1966.
71. შენგელია 1968: შენგელია ნ., სელჩუკები და საქართველო XI საუკუნეში, თბ., 1968.
72. შენგელია 2003: შენგელია ნ., მცირე აზიის სელჩუკები და საქართველო XI საუკუნის უკანასკნელი მეოთხედი XIII საუკუნე, თბ., 2003.
73. შენგელია 1997: შენგელია ნ., სელჩუკებისა და საქართველოს დიპლომატიური ურთიერთობა XI-XIII სს., ქართული დიპლომატია, წელიწდეული, 4, თბ., 1997.
74. ცხორებაჲ მეფეთ-მეფისა დავითისი 2008: ცხორებაჲ მეფეთ-მეფისა დავითისი, ქართლის ცხოვრება, მთავარი რედაქტორი როინ მეტრეველი, თბ., 2008.
75. ცაგარეიშვილი 1974: არისტაკეს ლასტივერტეცი, ისტორია, ქართული თარგმანი გამოკვლევით, კომენტარებითა და საძიებლებით გამოსცა ე. ცაგარეიშვილმა, თბ., 1974.

76. ცისკარიშვილი 1959: ცისკარიშვილი ვ., ჯავახეთის ეპიგრაფიკა, როგორც საისტორიო წყარო, თბ., 1959.
77. ცქიტიშვილი 1970: ცქიტიშვილი გ., სვერის ციხე, ძეგლის მეგობარი, კრ. 21, თბ., 1970.
78. ჭილაშვილი 1970: ჭილაშვილი ლ., ქალაქები ფეოდალურ საქართველოში, ტ. II, თბ., 1970.
79. ჯავახიშვილი 1983: ჯავახიშვილი ი., ქართველი ერის ისტორია, თხზულებანი თორმეტ ტომად, ტ. II, თბ., 1983.
80. ჯავახიშვილი 1977: ჯავახიშვილი ი., ძველი ქართული საისტორიო მწერლობა, თხზულებანი თორმეტ ტომად, ტ. VIII, თბ., 1977.
81. ჯანდიერი 1969: ჯანდიერი ე. ჯავახეთის ახალქალაქის ისტორიისათვის, ფეოდალური საქართველოს არქეოლოგიური ძეგლები, ტ. I, თბ., 1969.
82. ჯაფარიძე 1998: ჯაფარიძე გ., ლიპარიტი IV ბაღვაში ბიზანტიისა და თურქ-სელჩუკთა დიპლომატიურ ურთიერთობებში. კრ. ქართული დიპლომატია, წელიწდეული, ტ. 5. თბ., 1998.
83. ჰამდალლაჰ ყაზვინი 1937: ჰამდალლაჰ მუსთოუფი ყაზვინი, თარგმანი შენიშვნებითა და საძიებლითურთ ვ. ფუტურიდისა, თბ., 1937.
84. Аириванечи Мхитар, История, Второй труд, www.vostlit.info, Восточная литература, Авторы и источники на букву „А“.
85. Агаджанов 1969: Агаджанов С.Г., Очерки истории огузов и туркмен Средней Азии IX-XIII в.в., Аш., 1969.
86. Агаджанов...1965: Агаджанов С. Г., Юзбашян К. Н., истории тюрских набегов на Армению в XI в., Палестинский сборник, вып. 13 (76), М-Л, 1965.
87. Ал-Хусайни Садр-Ад-Дин, Сообщения о сельджукском государстве, www.vostlit.info, Восточная литература, Авторы и источники на букву „Х“.
88. Ан-Насави Шихаб-ад-Дин, Жизнеописание султана Джелал ад-Дина, www.vostlit.info, восточная литература, Авторы и источники на букву „А“.
89. Ар-Равенди Абу-Бекр, Отдохновение Сердец, www.vostlit.info, Восточная литература, Авторы и источники на букву „Р“.
90. Бартольд 1963: Бартольд В. В., Очерк истории Туркменского народа, Сочинения, Т. II, часть I, М., 1963.

91. Бенешевич 1921: Бенешевич В. Н., Три Анийские надписи из эпохи византийского владычества, Петроград, 1921.
92. Вардан Великий, Всеобщая история, www.vostlit.info, восточная литература, Авторы и источники на букву „В“.
93. Гандзакеци Киракос, История Армении, www.vostlit.info восточная литература, Авторы и источники на букву „К“.
94. Гордлевский 1960: Гордлевский В.А., Государство Сельджукидов Малой Азии, Избранные сочинения, т. I, М.-Л., 1960.
95. Гусейнов 1980: Гусейнов Р. А., Взаимоотношения Bizантии и сельджуков в Малой Азии в XI-XII в.в. (По сирийским источникам), Средневековый Восток, М., 1980.
96. Гусейн-Заде 2010: Гусейн-Заде Р. А., Кавказ и Сельджуки, Баку 2010.
97. Дьяконов 1912: Дьяконов А. Б., Кип Батиский, СПб., 1912.
98. Жордания 1895: Жордания Ф., К материалам по истории Грузии XI-XII вв., М., 1895.
99. Жузе 1940: Жузе, П. К., Материалы по истории Азербайджана из Тарих-ал-Камил Ибн ал-Асира, Баку, 1940.
100. Заходер 1945: Заходер Б. Н., Хорасан и образование государства Сельджуков, журн. „Вопросы истории“, № 3-4, М., 1945.
101. Заходер 1943: Заходер Б. Н., Денданекан, „Исторический журнал“, № 3-4, М., 1943.
102. Ибн-ал-асир, Полный свод всеобщей Истории, www.vostlit.info восточная литература, Авторы и источники на букву „И“.
103. Казвини Хамдаллах, Успада сердец, www.vostlit.info, Восточная литература, Авторы и источники на букву „К“.
104. Карпов 1945: Карпов Г. И., Туркмены-Огузы, Известия Туркменского Филиала АН СССР, № 1, 1945.
105. Мирхонд, Сад чистоты, www.vostlit.info, Восточная литература, Авторы и источники на букву „М“.
106. Михаил Сирец, Хроника, www.vostlit.info, Восточная литература, Авторы и источники на букву „М“.
107. Низам-ал-Мульк 1949: Низам-ал-Мульк, Сиасет-намэ, Книга о правлении, перевод, введение в изучение памятника и примечания Б. Н. Заходера, М.-Л., 1949.
108. Низам –ал-Мульк, Книга о правлении, www.vostlit.info, Восточная литература, Авторы и источники на букву „Н“.

109. Семенов 1946: Семенов А. А., К вопросу о происхождении слова „Сельджук“, Бюллетень Академии Наук Уз. ССР, №3, Ташкент, 1946.
110. Папаскири 2001: Папаскири З. В., От Давида до Давида, Тб., 2001.
111. Minorsk 1953: Minorsk V. Studies in Caucasian history, London, 1953.
112. Kafesoğlu 1953 Kafesoğlu I., Sultan Melikşah, Devrinde Büyük Selçuklu Imparatorluğu, Istanbul, 1953
113. Köymen 1963: Köymen M., Selçuklu Devri Türk Tarihi, Ankara, 1963.
114. Kuvondikov 2010: Kuvondikov U., Место и роль Государства Сельджукидов в процессах исторического периода ,Uluslararası Selçuklu Sempozyumu, Kayseri 2010.
115. Papaskiri 2010: Papaskiri S., Манцикертское сражение и некоторые аспекты Грузино-сельджукских взаимоотношений в начале 70-х годов XI века, Uluslararası Selçuklu Sempozyumu, Kayseri 2010.
116. Sevim 2002: Sevim A., Genel Çizgileri Ile Selçuklu-Ermeni İlişkileri, Türk Tarihi Kurumu Yayinlari, Ankara 2002.
117. Yinanç 1944: Yinanç M., Türkiye tarihi, Selçuklular devri, I, Anadolunun fethi, Istanbul, 1944.